




Page 137a



JACOBI FACCIOLATI
ORATIONES

ET ALIA AD
DICENDI ARTEM
PERTINENTIA,
CUM PRÆFATIONE

PERILL. VIRI

D. JO. CAR. NOB.
a NEWENSTEIN.



LIPSIAE,
Apud Petrum Conrad. Monath,
A. R. S. MDCCLI.



EMINENTISS. AC REVERENDISS.

CAROLO
CARD. REZZONICO
EPISCOPO PATAVINO

A U C T O R.



Mine accidit valde bono, ut
cum ego viam aliquam &
rationem quærerem, qua
meam erga te voluntatem
publice patefacerem, lucubrationes
istæ nova quadam forma dispositæ
atque ornatae ex Typographica Semi-
narii officina rursus exirent. Sic enim
fit, ut rei occasio mihi jucundissimæ
non tam quæsitæ, quam oblata videa-
tur. Neque vero mireris, aut me,
aut quemquam alium ex hac Civitate

tanto in te studio commoveri. Cepisti enim cunctorum animos admirabili quadam virtutum abundantia, quarum, ut verum fatear, nemo nostrum imaginem sibi totam ne cogitando quidem effinxerat. Quod cum dico, nolim suspiceris, levem de te nostrorum Civium expectationem fuisse. Vix nobis spes aliqua affulset habendi tui, & primus ille rumor est allatus, qui hominum sensa sine furo manifestat, cum protinus exarsere vota omnium, ut ne justas quidem moræ causas, quæ gravissima negotia plerumque comitantur, pro suo in te animo ferre vellent. Scilicet fama nominis studia incendebat, & tacita quædam animorum præsentio certe non vana, cujus tamen ratio, ut est humana mens ipsa sibi ignota, reddi non potest. Illud vero nobis maxime mirum fuit, & si quæris, etiam molestum, te unum de te ipso dubitare. Oblata enim tibi Sede hac ab eo Pontifice, qui pro sua sapientia rerumque usu nihil unquam temere facit, attamen dies aliquot ad deliberandum postulasti. Quorsum spectabat cunctatio ista, quæ nos
anci-

incipiti metu suspensos aliquandiu tenuit? Videlicet ab illo ipso, qui te vocabat, jam didiceras, ut est in divino ejus Opere de Beatific. & Canonizat. l. 3. c. 31. Episcopale munus nec quæri debere, nec omnino desiderari, atque adeo ne prompto quidem ac libenti animo recipi, nisi quatenus ad opus laboremque refertur. Neque tamen ignorabas, quanti esset, quod tibi offerebatur. Liceat enim mihi de rebus nostris paullo liberius gloriari. Urbs hæc, si antiquitas & nobilitas quæritur, Trojanos conditores habuit; & illi ipsi, cui nunc patet, conditores dedit: si loci opportunitas, inter mare montesque posita, & quaquaversus flumine irrigua, rebus omnibus abundat, quas terra gignit, & hominum industria undique importat: si soli cælique salubritas, hoc vero est, cujus causa in primis frequentatur, advenientibus quotidie multis, ut Patavini aeris aspiratione, quasi medicamento aliquo delibuti ac perpurgati, pristinae saluti redantur. Quod si Lycea maxime & Sanctorum virorum Reliquiæ miraculo-

rum fama celebratæ loca nobilitant, quæ urbs in Italia est, quæ nostræ anteferri jure possit? Fuere alibi Academiæ ad invidiam usque floridissimæ: fuere templa miraculis illustria, hominumque ad ea peregrinationibus frequentata: sed fato rerum humanarum ita intercidere, ut jam veteris gloriæ vestigium aliquod vix retineant. Contra autem stant adhuc decora nostra ad sæculum jam quintum propagata; adhuc Patavini Gymnasii splendor ac dignitas Italiæ prælucet: adhuc Antonii Patavini gloria in admiratione est, atque ex omnibus terræ partibus peregrinos trahit. Amplitudini Civitatis amplitudo respondet Episcopatus, qui ab ipsis Apostolorum temporibus initia duxit per Prosdocimum Petri discipulum, nisi nos rerum nostrarum monumenta fallunt. Ditio ejus longe lateque extensa in ipsos vicinarum provinciarum fines; Canonorum collegia in eo plura ad Oppidorum splendorem insignia, urbanum vero præcipue clarum, nec hujus modo, sed multarum præterea regio-

regionum facile primum; Seminarium a-
 lumnorum frequentia, & omnium rerum
 bonarum disciplinis florentissimum; Pa-
 roeciæ, Monasteria, Sodalitates, Sacra-
 rum Virginum Coetus, Hospitalia, Cu-
 rotrophia, & multa, & rectissime admi-
 nistrata; postremo tantis rebus cum di-
 gnitate sustinendis, æquale patrimo-
 nium. Itaque locus ipse pro tanta sui
 amplitudine ac nobilitate fatis ostendit,
 quos homines poscat. Ac primi qui-
 dem Episcopi, quibus pugnandum mo-
 do cum infidelitate, modo cum barba-
 rie fuit, in Cœlitum album relati sunt;
 reliqui magno semper in honore habiti,
 aliquando etiam, Principes ac Modera-
 tores Civitatis constituti. Quid quod
 apud Episcopum ipsa hæc tanti nominis
 Academia rudimenta posuit; ejusque
 præsidio & auspiciis diutissime stetit ac
 floruit? Veteris hujus auctoritatis argu-
 menta adhuc remanent pulchra & ho-
 norifica in Magni Cancellarii titulo,
 quem ita Franciscus Barbarus interpre-
 tatur, ut Scholastici ordinis principem
 significet. Quamobrem apud Episco-

Uratus
 an. 1049.
 & 1058.

pum Disciplinarum & Artium Collegia
coguntur; Episcopus eorum, qui pro-
bari cupiunt, examini præest; titulos
Academicos, omnemque docendi & in-
terpretandi facultatem Episcopus im-
pertitur. Enimvero tanta hæc loci de-
cora atque ornamenta, quæ homines
admiratione imbuunt & alliciunt, inter-
dum etiam deterrent. Te tamen, Prin-
ceps Eminentissime, detertere non de-
bebant, magni animi Virum, ad Episco-
palia onera sustinenda viribus & ætate
florentem, totius Ecclesiastici juris peri-
tum, in maximis Romanæ Curiae rebus
diu multum exercitatum, ad pietatis &
religionis officia indole quadam tua,
veterique instituto paratissimum. No-
lim videri latius vagari, quam consilii
ratio initio suscepti, aut Epistolæ modus
ferat. Sed, nisi rem totam explicuissem,
nec Tu conjicere posses, quinam esset
nostrorum animorum sensus, cum pri-
mum de Te sermo in hac urbe iniectus
est, nec alii fortasse intelligerent, quid
tandem sit expectationi huic tantæ re-
spondere. Ad rem præsentem quod at-
tinet,

tinet, si velim Tibi persuadeas, pietatis ac religionis custodiam a litterarum cura sejungi non posse. Siquid autem ex hoc libro, quod me quidem sperare juvat, delibare volueris, statim cognosces, ad eorum in primis institutionem scriptum fuisse, qui in Ecclesiæ Patavinæ spem tuis auspiciis aluntur. Vide igitur, num alio nomine, quam Tuo ornari ac muniri debuerit. Quivis alius, qui Te in ejusmodi rebus compellet, videri possit officiose facere; mihi aliter facere ne liberum quidem fuit. Ceterum si Tu, Princeps Eminentissime, factum probas, & jure factum concedis, ego beneficii loco accipio, & quidem longe maximi; cujus gratia nihil umquam prætermittam, quod me in ære tuo esse, cum ætati huic nostræ, tum vero etiam posteris qui nostra legent, ostendere possit. Vale.



PRÆFATIO

PERILL. VIRI

D. J. O. CAR. NOB.
a NEWENSTEIN

ADELOQUENTIÆ CANDIDATOS.

Quem vobis vel cogitandi
ubertate, vel dicendi fa-
cultate, præstantiorem
legendum darem, quam facundissi-
mum Facciolatum nostrum, pro-
fecto habui neminem. Hic enim
vivendi & sciendi Eruditor ille
est, qui tam vasto præditus Inge-
nio, ut sacrosanctam illam gloriam
togae Romanae, consummatamque
Archib-

Architecturam Eloquentiae videatur repraesentare.

Quum major sit cultus in curis secundis, hoc civilis prudentiae specimen, suo candori restitutum, in manus vestras redit, & fructum non minimum, quod proprium ac praecipuum est, adfert. Hunc itaque Eruditionis mirae, miraeque gratiae Virum, Adolescentes, vobis ad imitandum proponite. Quid ipsum Ciceronem ad tantum in Philosophia & Eloquentia decus evexit, an non Platonis, Aristotelis, Demosthenis & aliorum imitatio? Nulla hercule in cultissimo hoc Patavino Exercitatore Patavinitas, quod olim non nemo in Livio Historicorum Principe causabatur, sed inculcata Latini sermonis puritas, & justa effigies Eloquentiae elucescit.

Hanc

*Hanc igitur Reginam, utroque
in foro triumphantem, ab recenti
memoria ex illo orbis horto ad
nostrans Alpes profectam, univer-
sae Reip. Christianae bono exco-
lite, & serto immortalitatis coro-
nate; quod passim ex assidua prae-
lucentis exempli imitatione, ex
recta & minime vitiosa aemulatio-
ne, ex optimorum denique studio-
rum contemplatione efflorescit.*

TYPO-

TYPOGRAPHUS

DE HAC EDITIONE.

Librum hunc ad Latinae eloquentiae studia incitanda rursus editurus, Acroasēs Dialecticas, quae olim Orationibus accesserant, omittere constitui; quod non tam ad copiose eleganterque dicendum, quam ad acute disputandum conferre videantur. Quamquam duo hac sapientum judicio non valde distant; & si recte conjungantur, tum vero mirabile illud solet existere, quod tacito quodam sensu homines ducit, & vel invitos sequi cogit. Hinc illa semidoctorum querela, placere quaedam ac probari, in quibus nihil ipsi vident nisi voculas. Attamen, ut nunc est, omittere Dialectica libuit, quibus alius non deerit locus. Et quia Typographo molis etiam habenda ratio, curavi mihi Orationes alias, quas vel Auctor ipse aliis temporibus dedit, vel eorum adolescentum nomine sunt emissae, qui, manu ducente Professore aliquo, Patavinis studiis proludere solent. His adjeci Epistolas Philologicas, &
libro-

*librorum Praefationes superioribus annis ab
eo scriptas vel Typographorum gratia, vel
juvenum ad scholasticas concertationes pro-
deuntium, vel aliorum qui eas certis de
caussis non vulgarunt. Nihil erat, quod
ille quidem concedere minus vellet, quam
genus hoc lucubrationum; sed nihil item,
quod a me vehementius expeteretur. Nam
hic revera locus est, ubi qui in dicendo non
valent, quamvis ceteroquin docti, fere fri-
gent ac deficiunt, ob id ipsum difficilis, quia
quotidie teritur. Oportet igitur exempla
esse quamplurima, quibus regantur ingenia,
& quodammodo alantur. Cave tamen putes,
me omnia, quae huc spectant, collegisse. Ex-
plere enim multorum desideria volui, sed
simul illud curavi, ne fatigarem satietate.
Vale.*

TABULA SYNOPTICA.

P A R S I.

I.	O Ratio ad Grammaticam. pag. I Commentariolum de ortu, interitu, & instauratione lingue latine. 19
II.	Oratio ad Humanitatem. 44
III.	Ad Rhetoricam. 60
IV.	Ad Philosophiam. 77
V.	Ad Theologiam. 96
VI.	Ad S. Scripturam. 113
VII.	Ad Jurisprudentiam. 131
VIII.	Ad Historiam. 149
IX.	Ad Ethica. 166
X.	Ad Mathematicam. 186
XI.	In Funere Card. Cornelii. 204 De ejusdem Card. Cornelii Vita. 215
XII.	In Funere Al. Pisani Ducis Venet. 218
XIII.	Ad Dialecticam. 232
XIV.	De Rhetorica & Dialectica differentia. 253
XV.	Ad instauranda Artium studia. 270
XVI.	Ad instauranda Artium studia. 283
XVII.	Ad instauranda Jurisprudentie studia. 294
XVIII.	Ad instauranda Artium studia. 303
XIX.	Ad instauranda Artium studia. 313

PARS

P A R S II.

P	<i>Refationes librorum.</i>	326
	<i>Epistola Philologica I. de Vita Philippi A</i>	
	<i>Turre Episcopi Adriensis.</i>	390
II.	<i>De Actione Oratoria.</i>	398
III.	<i>De voce Mehercule.</i>	404
IV.	<i>De Petro Bembo.</i>	408
V.	<i>De voce Αντιχείμεν &.</i>	410
VI.	<i>De voce Nepos.</i>	413
VII.	<i>De vocibus Artopra; Locare, & Nota.</i>	421
VIII.	<i>De Latinis transitionum formulis.</i>	427
IX.	<i>De vocibus Admodum, & Abrior.</i>	432
X.	<i>De Livii Patavinitate.</i>	436
	<i>Academica Commissiones ad usum Seminarii</i>	
	<i>Patavini.</i>	440
	<i>Scholastica Disputationes ad usum Semina-</i>	
	<i>rii Patavini.</i>	508

P A R S I.

Quæ complectitur

ORATIONES XIX.



ORATIO I.


AD GRAMMATICAM

Habita in Seminario Patavino coram

GEORGIO
CARD. CORNELIO.

*Latina lingua non est ex Grammaticorum
libris comparanda.*

* * * * *

*  *

* Uoties ex hoc ornatissimo loco
* publice dico, ita delector præ-
* sentia vestra, & celebritate hæc
* litteratorum hominum tanta, ut
* satis amplum mihi videar, non
* unius modo orationis, sed ingen-
* tium laborum fructum collegisse.
* Unum enim dicere, tacentibus omnibus, cum
* est ubique gloriosum, cum vero ibi maxime, ubi
* qui audiunt & frequentissimi sint, & rebus omni-
* bus ad subtiliter graviterque judicandum in-
* A stru-

structissimi. Non tam hercule olim illustre fuit, florente republica, Romæ dicere, sive in foro, sive in curia, ubi nullo delectu habito, promiscue omnes subsellia occupabant; quam est hoc tempore, hoc in loco, unde lectissimum quemque ex omni litteratissimæ Civitatis ordine circumspicio, Theologos, Philosophos, Medicos, Mathematicos, Jurisperitos, atque horum sane plurimos, qui eloquentiæ laudem cum sua quisque arte conjungunt. Videte, quæso, Auditores, in vestro beneficio quantopere mihi placeam. Ego equidem litterarum splendorem ac dignitatem cum Magistratum imperio & majestate minime comparo: sed tamen cum veteres Romanorum supplicationes, ovationes, triumphos in mentem revoco, plane non tanti facio, ut amplissimæ huic mihiq; jucundissimæ dicendi exercitationi præponam. Nullus enim hic plebi locus est, nullus semellis, insanæ clientium turbæ ad plausus & acclamationes plane nullus; sed & viri totius Civitatis principes ad dignitatem, & Patres omnium ordinum gravissimi ad honestatem, & Doctores Collegiorum omnium sapientissimi ad judicium, & ingenui adolescentes ad gratiam & celebritatem convenerunt: quorum lætæ frontes, & secunda admurmuratio dicentem potest mirum in modum erigere, ac beatum prorsus efficere. Verum felicitas hæc humanarum omnium, ut mihi quidem videtur, longe maxima, quam est infinitis prope difficultatibus ac periculis circumsepta! Cujus est, bone Deus, tanta ingenii vis ac fecunditas ad res præclarissimas inveniendas, distribuendas, ornandas, ut ne leviter quidem ulla

la in parte deficiat, nusquam incurrat, displiceat nemini? Sunt enim eodem tempore præstanda multa, diversa, ac prope contraria; nec solum laborandum quomodo dicas, sed in primis qua de re dicas: ut si semel in re proponenda alicujus animum offendas, eum deinceps habeas in tota oratione aversum. Est qui nihil velit audire, nisi vetustum; quosdam gratia tantum novitatis conciliat; alii Græcas Latinasque eruditiones postulant; amplificatione alii delectantur: eoque sunt singuli acumine ingenii, quibus ut imponas, nulla arte consequaris. Hæc me reputantem, ac sæpe antea expertum iussere denique libertatem illam abdicare, quæ solet ceteroquin ex hoc suggesto dicentibus concedi omnibus, ut de re quilibet suo quisque arbitrato verba faciant. Quare quem mihi ordinem ipsa studiorum ratio ac natura præscribit, eum in posterum religiose servabo, ut hoc quidem tempore de Grammatica, tum de Humanitate, post de Rhetorica, deinde de Philosophia, postremo de reliquis disciplinis, ut quæque solet addisci, orationem habeam, & quod de singulis sentio, id quotannis exponam. Ita mihi boni Superi tantum vitæ concedant ac virium, ut curriculum hoc primum conficiam, deinde non improspere; libenter tum demum celsurus aliis provinciam, cum laboribus & ætate confectus vel fato fungar, vel in otio honesto conquiescam. Interim de Grammaticis studiis, quibus solet ætas prima occupari, non raro etiam altera, aliquando & postrema, quid mihi videatur, habere; & qua soletis benignitate, diligenter attendite,

Et si omnes artes ac disciplinas in dies amplificari tam est rei litterariæ gloriosum atque utile, quam Reipub. augeri opibus & imperio; tamen quod Reipub. accidit, ut nimia crescendi libidine non raro decrescat, idem solet in hoc litterarum quasi regno evenire. Nihil ego de Platonica Philosophiæ, nihil de Peripateticæ fatis, variaque fortuna disputo, quarum utraque tum demum vel corrui, vel certe plurimum detrimenti cepit, cum impotenti sectatorum studio altissime evecta, in præcipiti stetit, ac mole sua laboravit. Unum illud Latinitatis tradendæ artificium urgeo, quod Grammaticen communiter appellant; opus suapte natura exiguum ac tenue, sed immodica hominum industria adeo amplificatum, ut volenti omnia percurrere nihil sit nisi Grammaticum tota vita legendum. Conatus hos præstantium virorum, si eo spectant, ut Latini sermonis diligens quædam historia extet, non solum non reprehendo, sed etiam laudo; sin vero nobis Latinitatis discendæ gratia ostentantur, longissime abjicio, nulliusque esse momenti, nullius utilitatis contendo. Prima enim illa Guarini Veronensis rudimenta ut corrigerent & illustrarent, boni præceptores depravarunt; eoque res demum deducta est, ut qui velit Latine scire, hunc sibi a Grammaticorum insidiis cavere maxime oporteat. Quod ut evincam, cum mihi necesse sit de Grammaticorum tricis & ambagibus aliquanto disputare liberius, quæso vos, Auditores, ne me honestissimo generi hominum infensum putetis, qui & natura ipsa ad benevolentiam comparatus, omnem invidiæ suspicionem diligentissime fugio, & pro susce-

scepto vitæ instituto eorum in primis amore delector, qui de litteris benemereri pro virili parte conantur. Sunt enim eorum lucubrationes etsi ad recte loquendum non necessariae, tamen ad cognoscendum non illiberales: neque ego (ita me Dii ament) industriam hanc magna cum eruditione conjunctam contemno; sed parum admodum ad Latinæ locutionis usum valere dico. Et sane, ubi puer singulas nominum ac verborum declinationes memoriæ mandavit, paucaeque illas in universum regulas probe tenet, quibus tamquam cardinibus tota vertitur Latina lingua; quid est, cur statim non ad Classicum Scriptorem ducatur, quem sine intermissione verset, memoriæ tradat, habeatque veluti unum ex familia, quicum magistri ope & auxilio familiarissime loquatur ac vivat? Cum enim ille potissimam diei partem in scholis traducat, quid in caussa esse dicamus, ut perpetua rerum Latinarum tractatione Latine tamen minime discat; domi vero minore multo exercitatione minusque accurata a parentibus, a nutricibus, a vernis domesticam linguam assequatur? Ego certe ita mihi persuadeo, tenellos angustosque puerorum animos immensa illa regularum, appendicum, scholiorum farragine terreri atque opprimi, ut ne respirare quidem possint, nedum se explicare, Latineque interrogando ac respondendo naviter audere. Quemadmodum enim subitarius miles si in confertissimam hostium aciem statim compellatur, periculi magnitudinæ atque insolentia despondet animum, sui que prorsus oblitus vix telum expedit; ita litterariæ palæstræ cirunculi ingentes Grammaticorum com-

mentationes aggredi jussi, cogitatione ipsa difficultatis ac laboris exanimantur, spemque omnem evadendi statim abjiciunt. Hinc scholæ tædium, hinc quæsitæ sæpe morbi, hinc impatiens vacationum desiderium, hinc denique commenta illa calidissime excogitata ad otium & ignaviam, si fieri potest, impune fovendam. Hæc ego si probem, ad nuces profecto redire videar, & pueris similia facere: sed tamen quoties animo colligo exsucca illa, frugisque omnis ac delectationis expertia Grammaticorum præcepta, quibus tot annos impallefcere vivida ingenia coguntur, quadam quasi miseratione commoveor, justoque dolori libentissime parco. Quocumque enim quisque vestrum (juvat præterita repetere, & memoriam pueritiæ renovare ultimam) ita fuit ad omnes litterarum labores recte compositus, ut ante cœperit æquo animo frequentare scholas, ac domestico carere otio, quam positis Grammaticis, Latinos Scriptores tractaret, eorumque lectione & imitatione Latine aliquid conaretur? Ego sane, ut de me dicam, obruebar infinita illa atque implicatissima regularum strue; nec pluribus votis adversa tempestate jactati nautæ portum desiderant, quam ego inde me ut expedirem, & improbi laboris terminum aliquando contingerem, Deorum hominumque opem implorabam. Ut autem ad amœniora paullo transivi, cœpique ex oratoribus ac poetis delibare aliquid, tum vero quasi in novum orbem repente translatus tanto animi ardore Latinæ linguæ studium arripui, ut ludorum ac vacationis oblitus, magno etiam sæpe cum valetudinis incommodo libris diu noctuque

que inhærerem. Quod si ardentissimæ illi proficiendi voluntati aliquando respondisset ingenium, ut certe (magno cum dolore dico) numquam respondit; nec vos hoc tempore plebejo dicendi genere molestissime detinerem, nec ullus esset hæc ætate Latinus Orator, cui de orationis nitore, numero, perspicuitate ullo pacto concederem. Nunc vero in magna virium infirmitate siquid valeo, qui valeo sane minimum, totum Cicero-
ni, Terentio, Livio, Casari, Virgilio, Horatio, ceterisque ejus ætatis Scriptoribus elegantissimis debeo. Nihil a me repetundarum jure postulet Priscianus, nihil Donatus vindicet, nihil Valla, nihil Sanctius, nihil ille ipse, deliciae quondam nostræ, Emanuel Alvarus, quos omnes una cum crepundiis vel abjeci, vel deposui; nec ex eo umquam in manus sumsi, nisi per hosce dies, ut huic Orationi materiam compararem. Excidere jamdiu animo eorum monita, excidere leges, nihilque mihi potest ad stilum retardandum contingere infestius, quam tristis quædam eorum recordatio ac metus, unde solent arida omnia, sicca, exanguia proficisci. Quid enim est aliud Grammaticæ loqui, quam omnino Latine non loqui, si credimus Præceptori maximo Quintiliano? Instit. I.
l. c. 6. Nam ut omnia Grammatici vere dicant, utrum aliud efficiunt, nisi ut sine barbarismis, sine solæcismis sic oratio? In quo si tota laus consistit Latinitatis, jam ne ipse quidem Cicero Latinus est, cujus libri, si ad Grammaticorum cavillationes exigantur, solæcismis non carent. Neque vero id ignorant, sed quæ in aliis magnopere damnant, hæc in Cicerone, mutato nomine, si-
guras

guras appellant, & veluti lumina variandæ orationi accommodata valde commendant. Nituntur enim omnes Latinum sermonem certis complecti legibus, quibus deinde contraria multa apud Latinos Auctores cum inveniant, ad schemata, metaplasmos, antiptoses, archaismos, hellenismos, & id genus alia magnifica figurarum nomina confugiunt, quorum ope non quidem eorum famam tueantur, qui sine piaculo reprehendi non possunt, sed nobis illudant, ne Grammatica præcepta cum illis ipsis pugnare Scriptoribus, unde sumuntur, intelligamus. Fuit olim Latina lingua, quemadmodum ceteræ, juris plane sui, ex colluvione multarum gentium Romæ nata, populari convictu, communique rerum tractatione aucta, denique usu ipso, & sorte quadam inveniendi ligandique verba, non ratione & consilio ad hanc copiam propagata, numerisque suis absoluta. Hanc proinde præceptis coercere totam, perinde est, ac de scientia, non de lingua disputare: quod Varro ipse, analogiæ ceteroquin exactor

Gell. l. 1. c. 25. molestissimus, aliquando cum didicisset, nullam esse observationem similium docuit, & in omnibus pæne verbis unam consuetudinem dominari. Id vero quam mirum videri debuit Alvaro nostro, qui de sola nominum, verborum, ac participiorum constructione quingentas ferme regulas non sine multis præterea observationibus conceinavit! Fuit ille certe magno ingenio, magna industria, magna Latini sermonis peritia, cui ego de re tota libenter concedam, si suas regulas non dicam omnes, non plurimas, non aliquas, sed principem illam, ac ceterarum caput de verbo

bo *Amo* adversus irruentem undique inimicorum impetum defendat, sartamque rectam ab omni detrimento conservet. Quid enim primum discernis, Emanuel, de verbo *Amo*? Num esse activum, & inter activa familiam ducere? At Ausonius ad neutra rejecit: *Ut apud Deum fieri* ^{Ingrat. Act.} *amas*. Quid tum? Num esse primi ordinis, nec alium postulare casum, nisi quartum? At est qui secundi faciat, eique genitivum apponat: *Nolo Thaidem amare tanti*. - Quid postea? Vis ne esse primi & secundi? At Cicero ad quartum refert: *Si quicquam me amas*. ^{Att. 1. 5. ep. 17.} Quid deinde? Esse etiam quarti? At idem in sextum conjicit: *De raudesculo multum te amo*. ^{Att. 1. 7. ep. 2.} Pro pudor! Ejus rei artem efficimus ac venditamus, cujus fundamenta prima tam facile corruunt. Novi equidem, & qui analogiam summa ope defenderent, ab ipsa florentis Romæ ætate fuisse nonnullos: sed nemo tamen cum hac nostrorum Grammaticorum turba comparandus, qui ut nihil intentatum relinquant, ab ipso mundi exordio, & vetustissima Hebræorum lingua Romanarum vocum causas, similitudinem, & originem petunt, petituri altius vel ab Arcadibus, si Arcades, quod Poetæ eorum jactare consueverunt, ante lunam orti fuissent. Nihil novi affero apud eos, quibus est aliquis cum Martinio, cum Beemanno, cum Vossio usus. Cum his autem? Imo etiam cum viris nostræ hujus ætatis præstantissimis, qui abrepti sæculi more, gravissimum certamen de vocalæ nescio cujus origine nuper instituerunt, multasque ac reconditas eruditiones ex Hebræis codicibus, ex Syriacis, ex Arabicis, ex Græcis ductas in tam leve negotium contule-

tune. Quod si, quam sunt ingeniosi ad hæc excogitanda, tam essent unanimes in tradendis, fortasse nos aliquando fefellissent. Verum hoc percommode cadit, quod sibi invicem de rebus omnibus bella movent, seque mutuis vulneribus conficiunt; quod ipsum argumento est, nihil huic arti inesse certi, quæ homines procaces efficit, & novarum rerum nimio plus amatores. In ipso enim statim Grammaticæ limine nonne de partibus orationis principes in hac arte viri acerbissimi me pugnant? quodque ridiculum est, gravissimos totius antiquitatis Scriptores Aristotelem, Platonem, Plutarchum, D. Augustinum pro se quisque stare jubent? Perge porro. De pronominum causa, numero, ac natura quam dubia, quam varia, quam sibi contraria decernunt Varro, Probus, Priscianus, Donatus, Quintilianus? Hi autem ipsi inter se cum casibus nomina ab officio fuisse indita consentiant, nonne Scaliger tamen negat? Valla castigat Priscianum, quod *sicum* mortuum quartæ declinationis fecerit: rursus in Valerium arma movet Petrus Ramus, quod *sicum* fructum masculino genere extulerit. Scaligero commune genus pessime a Græcis ἐπίκονον, optime a Latinis *promiscuum* appellari videtur. Sanctius Latinus damnat, Græcos absolvit. Impersonalia dicit Alvarus *deceat*, *pœnitet*, *pluit*, & similia: nulla esse impersonalia, testatus Deos hominesque, Scioppius affirmat. Siquis verborum modos statuat esse quatuor, ecce tibi qui quinque, qui sex, qui octo, qui multo plures inducit. Est qui probeat *gerundia*, ac *supina*: non deest, cui pura Grammaticorum deliramenta dicat, Alii ver-

bis

Minerva
Sanct. 1.
l. c. 2.

bis in *or* Præterita tribuunt, alii adimunt. Quibusdam placent verba Neutra, ac Deponentia, quidam toto Latio exulare jubent. Denique in tanta Scriptorum multitudine neminem unum invenias, qui malit aliorum vestigiis insistere, quam nova comminisci, ceterosque omnes allatrare. Nolo vos, Auditores, per singulas partes ducere, omnesque de Orthographia, de Prosodia, de Etymologia, de Syntaxi controversias hoc loco explicare, ne gravissimo officio, ne tempore, ne patientia vestra nimium abuti videar. Percurrite, si vacat, quæ solent homines libellorum suorum initio longissime præfari, ubi ceteris, qui ante se de re Grammatica scripsere, diem dicunt, eorum lucubrationes mendosas, nugaces, sordidas, cloacinas (sit verbo Scioppiano venia) audacissime appellant, seque ex Deorum immortalium sede quasi delapsos, allaturos optima pollicentur. Cumque singuli & universi eadem recinant, quo se vertant miseri adolescentes? cui se tamquam duci tradant germana latinitate instituendos? Numquid Varroni? At litterarum porcus dicitur a Palæmone. Num Prisciano? At Græcum hominem Latine linguæ fucum fecisse existimat Alvarus. Num Vallæ? At ejus *Elegantias* Ramirezius de Prado inelegantes appellat. Num Donato, num Probo, num Sèrvio, num Charisio? At hos omnes passim labi, & monstra effutire contendit Scioppius. Num denique Scioppio ipsi? At miserabilis litterator dicitur ab Hornio, vir desultoriæ levitatis a Labbeo, canis Grammaticus a Lambecio. Indignamini ad hæc, Auditores: sed artis, mihi credite, seu vitio, seu fato quodam fieri solet, ut

nec

nec sua quisquam afferre possit, nisi carpat aliena; nec aliena carpere, nisi modum excedat. Quam indecoræ, quam pudendæ, quam prope insanæ fuere contentiones illæ Poggii cum Valla, Politiani cum Merula, Scaligeri cum Erasmo de rebus his minutissimis, quasi de aris & focis? Quam illa ridicula Francisci Philelphi cum Timotheo quodam Græco, qui de vi syllabæ pugnaturi, ea lege in aciem ex composito descenderunt, ut victus barba mulstaretur! O magnas nugas magno conatu actas! O vos miseros quicumque ab his tamquam ex tripode de Latinæ linguæ ratione responsa petitis! Quos æstus quas tenebras vobis offundent Grammaticæ illæ Philosophicæ, Minervæ, Aristarchi, Mercurii, Thesauri, in quibus ad criticam eruditionem multa quidem sunt acute ac subtiliter excogitata, ad locutionis vero Latinæ usum propemodum nihil! Est illustre quiddam Latinus sermo, ingenuum, perspicuum, tricis & ambagibus carens, quod nemo umquam ex his hominibus pugnacissimis consecutus est: nec vero intelligo, scriptis suis quo pacto fidem concilient, quibus ipsi, quæ præcipiunt, præstare non possunt. Polycletum accepimus statuarum artificem totius Græciæ peritissimum non ante celebrem illum recte fingendi Canona in lucem edidisse, quam publice proposita statua, velut artis exemplo, suas ipse regulas egregie præstando confirmasset. Ita se mihi Grammatici probent: tum vero fatebor non invitus, Latine loquendi facultatem eorum præceptionibus tamquam canone probandam esse. Sed profecto, quod Carneades apud Ciceronem agebat, oratoriæ artis scripto-

ptorem ne mediocriter quidem disertum fuisse ul-
 lum, idem de Grammaticis affirmare licet, ne-
 minem adhuc artem, quam traderet, Latine lo-
 quendi ne mediocriter quidem calluisse. Non est
 hujus temporis, aut loci, multo vero minus mea-
 rum virium, singulorum vitia commemorare: ve-
 rumtamen, ne quid gratis ad invidiam asferre vi-
 dear, prodeant in medium hinc Terentius Var-
 ro, veterum Grammaticorum, hinc Julius Scali-
 ger, nostrorum sine controversia princeps, quorum
 alter aurea ætate Deorum beneficio natus, Cice-
 ronis æqualis & amicus, ita tamen scripsit, ut
 cum Livio Andronico Romanæ linguæ incuna-
 bulis exceptus videatur: alter vero Josepho filio
 communi omnium consensu primas cedit; illi in-
 quam Josepho, cujus peregrinitates, barbarismos,
 solæcismos nec unos, nec leves Scioppius collegit,
 & in suo *de stilo historico* libro posteritati manda-
 vit. Tamen si Latinæ linguæ laudem (ut ante dixi)
 neque totam, neque præcipuam in solæcismis vi-
 tandis collocari puto, quod est emendate loqui; sed
 in ipsa potius plena ac tereti compositione verbo-
 rum, in colore & habitu quodam, ut nihil clau-
 dicet, nihil diffuat, nihil fluctuet, sed tota per-
 mista & temperata numeris, æquabiliter constan-
 terque feratur oratio, quod unum est, si recte
 sentio, Latine loqui. Numerosa hæc & concin-
 na verborum comprehensio nulla definiri arte pot-
 est, nullis Grammaticorum præceptis concludi;
 cujus vel maximum vitium est, si de industria quæ-
 sita ad certas leges operose exigatur. In auribus est
 singulorum tota, & ad aurium sensum judicanda:
 quod fortasse olim præstare non fuit valde diffi-
 cile

cile audientibus ac loquentibus nihil nisi Latine, at vero his temporibus, nisi quis se totum veteribus scriptis dedat, & in eorum lectione & imitatione dies noctesque versetur, nec tolerabile quippiam Latine conabitur, nec nisi insipienter judicabit. Hinc fatuæ passim orationes, in quibus tam est perspicuus Grammaticus labor, ut omnia macra sint, meticulosa, hiulca, sine numero, sine veneribus, sine gratiis; quæ tamen auditori misero laudandæ sunt, quod nequeat barbarissimos & solœcismos ex Grammaticorum regulis designare. O te dementem, M. Tulli, qui cum Varronis de re Grammatica libros haberes, linguæ tamen nitorem ex perpetua Catonis, Plauti, atque in primis Terentii lectione hauriendum tibi existimabas. Te levem, Demosthenes, qui Thucydidis historias cum sæpe legisses, octies insuper descripsisti. Tantumne tibi a foro, & a curia supererat otii, ut non te potius Grammatico homini traderes, unde Atticam illam sermonis elegantiam ocyus arriperes? Itane igitur, Auditores? Ne vivam, siquis ex nostris, qui se Tullianos profitentur, unam Tullii Orationem aut semel in vita descripsit, aut octies lectitavit. Vel igitur Cicero, in quo esset Latini sermonis ratio, Demosthenes, in quo Græci, non satis intelligebant; vel nos in Grammatico ludo, aliud agentes, quam oporteat, frustra laboramus. Valeant Prisciani, valeant Servii, valeant Donati; vel eos consulamus eatenus, ut ab aliquo Pomponio Marcello de solœcismo postulati respondere possimus. Ergo (ut extremum aliquid habeat oratio mea, quo tota hujus generis ratio conclu-

Suet. de
ill. Gram.
c. 22.

da-

datur) traditus mihi ad institutionem adolescens
 norit linguam esse quamdam, quæ Latina dica-
 tur, Italicæ parentem, eique magna parte simi-
 lem. Hujus sciat esse nomina, esse verba; no-
 minumque ac verborum Ordines certis obstringi
 legibus, quæ sint memoriter ante omnia discen-
 dæ: summa Constructionis capita altissime infigat
 animo, calleatque probe velut unguis digitosque
 suos: in Prosodia versetur aliquanto magis; quod
 ratio condendi carminis certior est magisque de-
 finita, quam solutæ orationis: ad extremum pau-
 cis ex Etymologia & Orthographia delibatis,
 Grammaticos longissime ableget; sibi que valde
 persuadeat, non Latinum sermonem ex Gram-
 matica, sed Grammaticam ex Latino sermone na-
 tam esse. Quid ita? Nimirum ut aquas ex ipso
 fonte hauriat, hoc est Latinos Scriptores legendi
 scribendique exercitatione numquam intermissa in
 succum & sanguinem suum convertat; unde ille
 exilit orationis ambitus ac nitida circumscriptio,
 quæ supra Grammaticorum vires posita, auribus
 longa disciplina exercitatis judicari potest, verbis
 explicari non potest. Id unum in hac palæstra
 arduum est ac difficile, quod & liberale ingenium
 postulat, & morum conformationem quamdam
 ingenio similem, & illam extremo loco diligen-
 tiam, quæ sola in hac arte minimum valet, ce-
 teris tamen adjuncta naturæ præsidiiis, Tullianum
 illud dicendi genus efficere potest, quod tantope-
 re commendatur, Hoc scilicet ab hominibus non
 tam miti fidere natis, aut excultis frustra requi-
 rimus, qui, ut carmina edant sæpe optima, ora-
 tionem tamen, cujus non est nisi aurium sensu
 defi-

16 ORAT. I. AD GRAMMAT.

definitus modus ac numerus, ostendent fortasse nullam, quæ Latina dici possit. Vos igitur, adolescentes, quibus in Italia natis atque altis illud insuper accedit, quod in Italiæ parte nobilissima, & ad animi cultum opportuniissima erudimini, pergitte strenue in hoc curriculo, ut majorum vestrorum laudem retineatis. De bellica Itolorum virtute nihil sane ausim pronunciare: sed litteras quidem certe non amisimus. Commigrant ad nos quotidie callidi homines pecunia instructissimi, & præclaram illam Musarum supellectilem, optima volumina nobis abripiunt: artes etiam ac disciplinas paullatim abducturi alio, nisi studio ac diligentia resistitis. Vestrum est communis patriæ famam ac splendorem ex tanto periculo eripere, vestrum luctuosam calamitatem ab hoc solo, a nobis, a vobis ipsis prohibere; ut omnes intelligant Romanum imperium Italis auferri potuisse, Romanas litteras non posse. In vos coniecere oculos, vos hortantur atque impellunt parentes pro familiæ honestate, cives pro Reip. gloria, magistri pro scholæ fama, sed in primis Antistes Eminentissimus pro Religionis causa, quæ cum litterarum causa conjunctissima est.

Præposita editioni primæ hujus Orationis.

O Rationem hanc cum haberem, non defuerunt, qui crederent, me nova moliri, ac de Grammaticis studiis hoc in loco mutandis cogitare. Id me coegit orationem ipsam typis committere, totamque consilii mei rationem & causam patefacere. Nec igitur is ego sum, ut tantum possim; nec si maxime possem, rerum nostrarum conditio quippiam de veteri instituto mutari pateretur. Pueri enim fere omnes, qui huc accedunt, Grammaticen attigerunt; nec juvat curriculi partem emensos, nova proposita via, rursus ad carceres revocare. Præterquam quod nihil unquam tanti erit, ut me ab ea docendi consuetudine avocet, quam diligentissimi Societatis Patres ubique tenent, Emanuele Alvaro duce. Cum enim acutissimo ingenio Viri juventutis recte instituendæ vias omnes ac rationes scrutati, unam denique illam invenerint, quam Italia omnis amplexa est, quid nos in tanta virium imbecillitate novi conemur? Satis erit, si ductores sapientissimos, quantum labore & solertia possumus, prope sequamur; desperantes post tot tantosque conatus inveniri posse meliora. Quid igitur, inquis, in oratione istac tua de Grammaticis blateras? Ego vero nihil dixi, nisi exercendi stili gratia; in quo si quid peccatum est, cur non illi peccarunt, qui injustitiam, qui muscam, qui quartanam, qui asinum laudaverunt? Non est sane idem in civili hominum convictu reprehendere aliquid, & laudare; in Academicis exercitationibus est prorsus

B

idem.

idem. Quod si cui forte aliud agens persuasi, aut persuasisse videor, Latinam linguam non ex infinitis Grammaticorum praeceptis, sed ex veterum librorum lectione & imitatione comparandam esse, nolo ego illum tamquam in media arena destituere. Itaque ejus causa Commentariolum de Latinis Scriptoribus Orationi adjungo, ut qui sint ad legendum & imitandum probatissimi, ex singulorum classibus facile intelligat. Duæ porro cum sint divisiones celeberrimæ, quarum una a quadruplici hominis ætate, altera a metallorum gradibus peti solet, nolui tibi omnes Grammaticorum pugnas de illis narrando, immensæ lectionis rædium afferre; sed quod optimum duxi, in prima fere Andreæ Borrichium, in secunda Olaum, viros clarissimos secutus sum. Utrum vero aliquid præstiterim, præter describendi laborem, malo te ipsum judicare. Verum cui hæc? Non illis certe, qui librorum proœmia cum legerint, satis habent; magnoque supercilio in triviis & compitis de re tota disceptant: sed unis illis, qui & patienter legunt, & sapienter judicant, & humaniter monent. Horum aliquem si nactus fuero, de graculorum vocibus non laborabo. Vale.

COMMENTARIOLUM

De Ortu, Interitu, & Instauratione

LINGUÆ LATINÆ,

*Ac de ejus Scriptoribus ad sæculum
usque XVII.*

Quemadmodum aperto Romæ asylo, dataque victis hostibus liberalissime civitate, dispari genere homines in unam gentem coaluerunt, ita linguæ variez ac dissimiles, inter se commistæ unam illam pepererunt, quæ Romana ab urbis, Latina a regionis nomine appellata est. Sed quia primi Urbis incolæ Græci generis fuere; & Romulus ipse de rebus suis, & Numa de disciplina sapientiæ Græce scribentes, sermonem hunc in primis populo commendarunt; hinc magna consecuta est similitudo inter utriusque Gentis litteras, & litterarum sonum, atque adeo inter verba ipsa, & verborum constructionem. Quocirca Quintilianus l. 1. c. 5. *Hæc, inquit, divisio mea ad Græcum sermonem præcipue pertinet; nam maxima ex parte Romanus inde conversus est.* Adde, quod per sæcula quinque, & eo amplius, vel nullæ, vel perraræ fuere Romæ litteræ præter Grajas: cumque Romanus sermo ad eam copiam & elegantiam pervenisse visus est, ut ad artes ac disciplinas transferri posset, nescio qua ta-

men semper verecundia Græcæ linguæ tamquam parenti honorem detulit; & a victa debellataque provincia Populus Romanus gentium dominus leges dicendi scribendique accipere non recusavit. Hor. l. 2. ep. 1. *Græcia capta ferum victorem cepit, & artes intulit agresti Latio.* Quod cum reputo, vix mihi persuadeo fuisse ullum, aut esse, aut vero umquam esse posse, qui Græca studia in homine Latino non prober.

Ex iis, qui Latinæ linguæ tempora in certas ætates velut hominis vitam distribuunt, illi nobis videntur probandi maxime, qui Infanciam ejus ad annum Urbis conditæ DXIV. coll. C. Clodio & M. Tuditano, perducunt; quo anno Livius Andronicus fabulam dedit, ut tradit Cicero in Bruto c. 18. & lib. 1. Tuscul. c. 1. Etsi enim & Salios Sacerdotes Numa constituit, qui armatos Deos canerent, & Pontifices, qui Romanarum rerum annales conficerent; rudia tamen & incondita fuere omnia, qualia novi Imperii status, perpetuis bellis post Numam petitus patiebatur. Ejus ævi monumenta partim, incensa a Gallis Urbe anno CCCLXVI. periere; partim verustate ipsa absumta sunt, præter legum fragmenta pauca, quorum specimen velut prima balbutientis Romæ verba præbemus.

Lex Romuli, seu Tatii Collegæ ejus, seu Tullii sexti Romanorum Regis apud Festum in voce PLORARE.

Sei parentem puer verberit, aut oloe ploravit;
puer Deiveis parentum sacer est od. Sei nuros...
sacra Deiveis est od.

Hoc

Hoc est

Si parentem puer verberet, at ille ploret, puer sacer esto Divis parentum, h. e. eis tamquam hostia mactari possit. Si nurus focerum verberet, sacra Divis ejus esto.

Anno ab Urbe condita CCLXI, cujus ætatis sermonem horridum appellat T. Livius l. 2. c. 32. Lex prima Tribunicia apud Festum in voce SACER ex emendatione partim Scaligeri, partim F. Ursini.

Quei aliuta facit, cum pecunia familiaque sacer estod. Sei quis em ocisit, pariceida nec estod.

Hoc est

Qui aliter fecerit, cum pecunia & familia sacer esto. Si quis eum occiderit, parricida ne esto.

Anno ab Urbe condita CCCIV. Ex XII Tabulis lex prima de Jure privato ex optimis monumentis concinnata,

Sein ious vocat, atque eat. Neit, endocapito, antestariet. Si calvitor, pedemve struit, manom endoiacito. Si morbos ævitafve vitiom escit, quein ious vocat, iumentom dato. Sei nolet, atceram nei sternito.

Hoc est

Si in ius aliquis vocat, statim vocatus eat. Nii, incipiat vocans testes appellare. Si frustratur, pedemve fugiendo refert, manum illi iniicito. Si morbus vel ætas impedimento sit, quominus ire possit, qui in ius vocat, iumentum illi dato. Si nolit iumentum accipere, lecticam illi ne parato.

Novi sane, viros præstantissimos & leges Regias,

& Tribunicias, & ex XII Tabulis multo nitidiores edidisse, ut sæculo pæne aureo scriptæ videantur; nihil veritos affirmare, se illas ex antiquissimis tabulis descripsisse. Verum sit earum fides penes ipsos. Ego enim Scriptores secutus vel pares, vel prope pares, non solum elegantiora monumenta illitteratissimæ antiquitati convenire non puto, sed ne illa quidem ipsa, quæ modo attuli, satis mihi rudia & obscura videntur, ut in ea jurare paratus sim. Quod ut confirmem, non Ciceronem appellabo, non Quinctilianum, non Festum, non Gellium, non Polybium, qui ejus ætatis stilum ita inconditum & obscurum dixerunt, ut quædam vix peritissimi interpretes intelligerent; sed inscriptionem afferam ævi multo posterioris, & ad linguæ adolescentiam proxime accedentis, quæ tamen ruditate verborum allata monumenta, nisi fallor, longissime superat: ut si quis velit utraque tueri, eum necesse sit affirmare, linguam Latinam ad annos usque CCCCXCIV non modo nihil profecisse, sed etiam declinasse.

Inscriptio L. Scipionis, qui anno ab Urbe condita CCCCXCIV. Consul fuit, effossa ad Portam Capenam, ut ferunt.

HONC. OINO. PLOIRVME. CONSENTIONT. R
DVONORO. OPTVMO. FVISE. VIRO
LVCIOM. SCIPIONE. FILIOS. BARBATI
CONSOL. CENSOR. AIDILIS. HIC. FVETA
HEC. CEPIT. CORSICA. ALERIAQVE. VRBE
DEDET. TEMPESTATEBVS. AIDE. MERETO

Hoc est

*Hunc unum plurimi consentiunt Romæ
Bonorum optimum fuisse virum*

La-

*Lucium Scipionem, Filius Barbatī,
Cōsul, Censor, Aedilis hic fuit.
Hic cepit Corsicam, Aleriamque Urbem.
Dedit Tempestatibus ædem merito.*

Paullo antiquius est monumentum Duilio positum in basi Columnæ Rostratæ, quod ingeniose admodum restituit & illustravit Ciacconius. Affertur in Græviana Flori editione, in Tractatu valde erudito de puerit. Linguae Latinæ clariss. Funccii, & inter Gruteri Inscriptiones pag. cccciv. n. 1. Sed cum ejus fides ex toto non constet, ego omittere malui.

Per hæc & similia Lingua Latina transegit pueritiam suam.

Inde cœpit adolescere per *Livium Andronicum*, per *Nævium*, *Cethegum*, *Ennium*, *Cæcilium*, *Catonem*, *Pacuvium*, *Plautum*, *Accium*, *Afranium*, *Lucilium*, *Terentium*, aliosque præterea non paucos, quos inter eminet *Plautus*, ac *Terentius*. *Livius* itaque *Andronicus* primus fuit Romanorum Poeta, qui anno ab Urbe condita DXIV. fabulas dedit, non tamen dignas, quæ iterum legerentur, ut ait *Cicero* in *Brut.* c. 18. Primus Orator fuit *Cethegus*, ut ex *Ennii* testimonio scripsit idem *Cicero*. Primus historicus *Nævius*, qui bellum Punicum primum versibus jambicis descripsit: quam autem luculente, non erit, opinor, difficile ex hoc ejus Operis initio colligere.

Quei terræ Latiae homines tulerunt
Vires fraudesque Poinicas, fabor.

Hoc est

Qui terræ Latiae homines contuderunt

Vires fraudesque Punicas, fabor.

Quanto politius Ennius, qui carmine heroico paucis post annis idem bellum est persecutus!

Horrida Romuleum certamina pango duellum.

Hic tamen ipse cum Catone & Pacuvio ad infantiam Latini sermonis relatus est a Scaligero, Becmanno, Gifanio, & præterea multis: sed injuria, ut diserte ostendit Andreas Borrichius in suis Vindiciis.

Adolescentiam excepit Virilis ætas, hoc est absoluta illa & constans Latinæ linguæ elegantia, gravitas, pulchritudo: sed, ut fere solent maxima bona, cito intercidit, & in senium prolapsa est. A Cicerone enim cum cœpisset, id est ab extremis Romanæ libertatis temporibus, vix ad tertium Imperatorem pervenit. Sed profecto visa est mirabili quodam ingeniorum foetu numerâ damna compensare, cum Ciceronem tulit, Virgilium, Horatium, T. Livium, Cæsarem, Nepotem, Catullum, Ovidium, litterarum lumina non ad eam solum ætatem, sed ad omnem posteritatem illustrandam. Adde huc Sallustium, Varronem, Lucretium, Vitruvium, Manilium, Tibullum, Propertium, Hirtium, Gratum, Cornificium, Phædrum, & insuper multos, quorum vel fragmenta, vel sola nomina ad nos pervenerunt. Priores tamen tres sæculi sui locutionem dedignati, κακοζηλία nescio qua rudem antiquitatem suis scriptis repararunt, ut potius ad linguæ adolescentiam videantur rejiciendi. Cujusmodi ingenia ne nostræ quidem ætati desunt, qua viris ceteroquin satis doctis nihil Italicum sapit, nisi sit ex Dante peticum, aut Passavantio, aut horum æqualibus, hoc

hoc est ab ipsis Italicæ linguæ incunabulis.

Jam vero imperante Tiberio, cœperant Romani veteris obliti libertatis demittere animum, & similia facere ac loqui fortunæ suæ. Hinc sermonis gravitas & majestas in adulatoriam ac pæne servilem formam degenerare, viresque sensim amittendo ad senium properare. Ecce tibi statim *Vellejus, Juvenalis, Martialis, Persius, Florus, Quintilianus, Suetonius, Celsus, Valerius Maximus*, uterque *Seneca*, uterque *Plinius, Tacitus, Pomponius Mela, Asconius Pedianus, Scribonius Largus, Petronius, Columella, Silius Italicus, Valerius Flaccus, Statius, Justinus, Frontinus, Apulejus*, ceterique ad alterum usque Antoninum Imperatorem Latini scriptores.

Hic vero ad summam senectutem pervenisse Romanus sermo visus est, nihilque postea dignum peperisse, quod ad imitandum proponeretur.

Sunt qui ad Gordianum usque, non desunt qui etiam ad Constantinum Latinæ Linguæ ætatem producant. Sed minorem sine nobilissimæ linguæ injuriam facit, qui eam interiisse, quam qui lutulenter vixisse putat. Juvat nihilominus eos scriptores commemorare, qui Antoninos subsequuti conari sunt aliquid; & vel natura, vel imitatione præstiterunt. Familiam ducit *Q. Curtius*, dignus meliore ævo, sive hoc, sive alio vixerit; proxime sequuntur *Gellius, Palladius, Terullianus, Censorinus, Spartianus, Capitolinus, Lamprius, Arnobius, Minutius Felix, Lactantius, Marcellinus, Aurelius Victor, Eutropius, Ausonius, Prudentius, Macrobius, Servius, Claudianus, Vegetius*,

tius, Solinus, Eumenius, Nazarius, Pacatus, multique non contemnendi Jurisconsulti. Huc adde Auctores finium regundorum, Medicos, Rhetoras, & Grammaticos veteres. Adde *Juvenam, Augustinum, Ambrosium, Orosium, Sidonium Apollinarem, Boethium, Martianum Capellam, Priscianum, Cassiodorum, Jornandem, Venantium Fortunatum, Corippum, Isidorum*, & paucos præterea, quos non est operæ pretium referre.

Tacuere deinde litteræ, non Latinæ modo, sed omnes fere usque ad sæculi XIV. initium, cum excitatæ sunt ab immortalibus viris *Albertino Musato, Francisco Petrarcha, Joanne Boccaccio, Lombardo Serico*. Ac Musatus quidem, ut scribit Scardeonius lib. 2. class. x. primus fuit, qui visus est Latinas Musas jampridem extorres, & bonas litteras jamdiu sopitas ab exilio restituere, & a veterno aliquantisper excitare, atque a fœda illa barbarie in Italiam revocare; utpote qui aliquanto prior ætate Petrarcha, in his studiis plurimum laboravit &c. Ex eo tempore cœpit rursus vires sumere Latinitas quodammodo renata; jamque sæculo quintodecimo ad floridam ætatem properabat per *Laurentium Vallam, Franciscum Philelphum, Poggium, Faccium, Vergerium, Ambrosium Camaldulensem*, utrumque Barbarum, *Leonardum Aretinum, Guarinum Veronensem, Blondum, Perottum*, & præterea multos. At vero sæculo XVI. ita florere visa est in *Bembo, Paleario, Mureto, Manutio, Sigonio, Sadoletto, Naugerio, Riccio, Amaseo, Luisino, Alcionio*, & aliis, ut ad auream illam Augusti ætatem proxime accesserit. Etsi autem elapso proxime sæculo rursus cœperat declinare,

nare, non quidem, ut ante, magistrorum inopia, sed nimia quadam copia in ejus interitum studiorum similitudine conjurata; tamen hoc tempore, implorata undique ope, respirare videtur, & in pristinae dignitatis spem assurgere.

LINGUÆ LATINÆ

ÆTATES,

Aurea, Argentea, Ænea, Ferrea, & Lutea.

ANtequam adolescentes, quos instituimus, ad hanc tabulam accedant, velim animadvertant, non omnes ætatis aureæ Scriptores esse aureos, & imitatione dignissimos. Sunt enim hic etiã, ut in aliis rebus, mala mista bonis. Itaque in uno primum *Cicerone* diu multumque versentur; deinde *Terentium*, *Cæsarem*, *Virgilium*, *Horatium* sibi adsciscant; demum *Nepotem*, *Livium*, *Catullum*, & ad carminis facilitatem comparandam *Ovidium*, *Tibullum*, *Propertium* in manus sumant. A ceteris abstineant, donec ipsi per se judicare possint, tanto singulos esse meliores, quanto ad hæc latinitatis exempla propius accedunt. Quosdam vero numquam attingant, nisi ad eruditionem: ego enim plerosque afferro, non quia probem, sed quia volenti per sæcula omnia discurrere, nihil melius se se offert. In sæculis XV. & XVI. plura sane nomina censeripotuerant: sed ego legentibus, non bibliothecam conficientibus scribere institui.

28 COMMENTAR.
LATINI SCRIPTORES

in suas ætates distributi.

ÆTAS AUREA

Incipit ab anno Urbis conditæ DXIV. Definit
in annum Urbis conditæ DCCLXVII.
qui est æræ Christianæ XIV.

Horum
non ex-
tant nisi
fragmen-
ta.

Livius Andronicus.
C. Nævius.
Statius Cæcilius.
Q. Ennius.
M. Pacuvius.
L. Accius.
C. Lucilius.
Sex. Turpilius.
L. Afranius.
L. Cornelius Sisenna.
P. Nigidius Figulus.
C. Decius Laberius.
Verrius Flaccus.
M. Porcius Cato.
M. Accius Plautus.
M. Terentius Afer.
T. Lucretius Carus.
C. Valerius Catullus.
P. Syrus.
C. Julius Cæsar.
Cornelius Nepos.
M. Tullius Cicero.

Sex.

Sex. Aurelius Propertius.

C. Sallustius Crispus.

M. Terentius Varro.

Albius Tibullus.

P. Virgilius Maro.

T. Livius.

M. Manilius.

M. Vitruvius.

P. Ovidius.

Horatius Flaccus.

Pedo Albinovanus.

Gratius Faliscus.

T. Phædrus.

C. Cornelius Gallus, cujus est Ciris.

*C. Cornificius, cui tribuunt libros quatuor
Rhetoricorum ad Herennium.*

*Aulus Hirtius, vel Oppius, quorum alteruter
Cæsaris Commentarios supplevit.*

*P. Cornelius Severus, ad quem referunt Car-
men de Ætæa.*

Jurifcon-
sulti, quo-
rum frag-
menta in
Digestis.

Q. Mutius Scævola.

Alfenus Varus.

M. Antistius Labeo.

Masurius Sabinus.

Supra ceteros eminent **TERENTIUS, CATUL-
LUS, CAESAR, NEPOS, CICERO,
VIRGILIUS, HORATIUS, OVIDIUS,
T. LIVIUS, SALLUSTIUS;** sed hic qui-
dem verborum novator est, ut ait Gellius lib.
I. c. 15, ideoque non omnibus ingeniis aptus.

ÆTAS ARGENTEA

Incipit ab æræ Christianæ anno XIV. Desinit
in annum CXVII.

Cornelius Celsus.
P. Vellejus Paterculus.
L. Junius Columella.
Pomponius Mela.
A. Persius Flaccus.
Q. Asconius Pedianus.
M. Annaeus Seneca.
L. Annaeus Seneca.
M. Annaeus Lucanus.
T. Petronius Arbiter.
C. Plinius Secundus.
C. Silius Italicus.
C. Valerius Flaccus.
C. Julius Solinus.
D. Junius Juvenalis.
P. Papirius Statius.
M. Valerius Martialis.
M. Fabius Quintilianus.
Sex. Julius Frontinus.
C. Cornelius Tacitus.
C. Plinius Cæcilius Secundus.
L. Annaeus Florus.
C. Suetonius Tranquillus.
Q. Curtius Rufus.
Val. Probus Grammat.
Scribonius.
Sulpicia.
L. Fenestellæ annal. fragmenta.

Ætatis
non pror-
sus certæ.

Supra

Supra ceteros eminent CELSUS, VELLEJUS,
SENECAE, PLINII, SUETONIUS, JU-
VENALIS, QUINCTILIANUS, FLO-
RUS, CURTIUS.

ÆTAS ÆNEA

Incipit ab æræ Christianæ anno CXVII.
Definit in annum CCCC.

Jurif-
consulti,
quorum
fragmen-
ta in Di-
gestis.

Licinius Proculus.
Neratius Priscus.
P. Juvenicius Celsus.
Priscus Jabolenus.
Domitius Ulpianus.
Herennius Modestinus.
Salvius Julianus.
J. Cajus.
Callistratus.
Æmilius Papinianus.
Julius Paullus.
Sex. Pomponius.
Venulejus Saturninus.
Ælius Marianus.
Ælius Gallus, & alii.

Ætatis
non
omnino
certa.

Valerius Maximus.
Justinus.
Terentianus Maurus.
Minucius Felix.
Sosipater Charisius.
Fl. Avianus. Al. Avienus.

A. Gellius.

L. Apulejus.

Q. Septimius Tertullianus.

Q. Serenus Sammonicus.

Censorinus.

Cæcilius Cyprianus.

T. Julius Calpurnius.

M. Aurelius Neïnesiānus.

Ælius Spartianus.

Julius Capitolinus.

Ælius Lampridius.

Vulcatius Gallicanus.

Trebellius Pollio.

Flavius Vopiscus.

Cælius Aurelianus.

Flavius Eutropius.

Rhemnius Fannius.

Arnobius Afer.

L. Cælius Lactantius.

Ælius Donatus.

Commodianus.

C. Vettus Juvenius.

Julius Firmicus.

D. Hilarius.

Fab. Marius Victorinus.

Sex. Rufus, seu Rufus Festus Historicus.

Ammianus Marcellinus.

Fl. Vegetius Renatus.

Aurelius Theodorus Macrobius.

Q. Aurelius Symmachus.

Dec. Magnus Ausonius.

Sex. Aurelius Victor.

D. Ambrosius.

Aur.

Aur. Prudentius Clemens.

Cl. Claudianus.

Marcellus Empiricus.

Proba Falconia.

Supra ceteros eminent **JUSTINUS, TERENCE-
TIANUS, VICTOR, LACTANTIUS,
CLAUDIANUS.**

Auctores ætatis incertæ

Hic collocandi videntur: tametsi aliquis eorum,
si ratio stili habeatur, quocumque tandem
tempore vixerit, in superioribus ætatibus cum
dignitate stare possit; aliquis vero etiam in-
fra luteos detrudendus videatur.

Palladius Rutilius.

Æmilius Macer.

Messala Corvinus.

Vibius Sequester.

Jul. Exsuperantius.

Jul. Obsequens.

L. Ampelius.

Apicius Cælius.

Sex. Pompeius Festus.

Chalcidius.

Zeno Episcopus.

Probus Auctor Notarum.

Falgenius Planciades.

Hygini Fabulæ, & Astronomicon.

*C. Cæsaris Germanici Aratea, quæ alii ad Au-
gusti, alii ad Domitiani ætatem referunt.*

P. Victor de Regionibus Urbis Romæ.

C

Vege-

Vegetius de re Veterinaria.

Auctores Priapeorum.

Auctores Catalectorum, quæ Virgilio, & Ovidio tribui solent.

Auctor Orationis Sallustii in Ciceronem, & Ciceronis in Sallustium: item illius Antequam Cicero iret in exilium.

Auctor Epistolæ ad Octavium, quæ Ciceroni tribuitur.

Auctor Panegyrici in Pisonem, qui videtur aliis Statius, aliis Lucanus.

Declamationes, quæ tribuuntur Quintiliano, item quæ Porcio Latroni; item quæ Calpurnio Flacco.

Interpres Irenæi.

Interpres Daretis Phrygi, & Dictyos Cretensis.

Catonis Disticha moralia.

Scholiasæ veteres.

Grammatici antiqui.

Rhetores antiqui.

Medici antiqui.

Rei agrariæ Scriptores.

Catalecta Petroniana, & Errores Veneri, qui cum Petronio edi solent.

Pervigilium Veneris cum variis opusculis, qui inscribuntur Baudii Amores.

Pamata, & Epigrammata vetera a Pithæo, & Almelovenio collecta.

Fragmenta Historicorum collecta ab Augustino, & Riccobono.

Monumentum Ancyranum, & insuper Monumenta varia antiqua, a Georgio Fabricio collecta.

*Fasti Consulares.**Inscriptiones Veteres.**Legum antiquarum fragmenta.**Notitia dignitatum utriusque Imperii &c.*

ÆTAS FERREA, & LUTEA

Incipit ab æræ Christianæ anno CCCC.

Definit in Sæculum IX.

[*Cl. Rutilius Numatianus.**Servius Honoratus.**Rutilius Numatianus.**D. Hieronymus.**D. Augustinus.**D. Damasus.**Rufinus.**Sulpicius Severus.**Paulus Orosius.**Cælius Sedulius.**Paulinus Nolanus.*Sæculi V. { *Codex Theodosianus.**Dracontius.**Salvianus.**Petrus Chrysologus.**Prosper Aquitanicus.**Martianus Capella.**Paulinus Petrocorius.**Claudianus Mamertus.**Sidonius Apollinaris.**Latinus Pacatus.*[*Claudius Mamertinus.*

{ *Nazarius.*{ *Eumenius.*{ *D. Fulgentius.*{ *Alcimus Avitus.*{ *Orientius.*{ *Ennodius.*{ *Manl. Severinus Boethius.*{ *L. Maximianus.*{ *Priscianus Grammaticus.*{ *Nonius Marcellus.*

Sæculi

VI.

{ *Diomedes.*{ *Justiniani Institutiones.*{ *Justiniani Codex.*{ *Arator.*{ *Jornandes.*{ *M. Aurelius Cassiodorus.*{ *Cresconius Corippus.*{ *Venantius Fortunatus.*{ *Gregorius Magnus.*{ *Gregorius Turonensis.*

Sæculi

VII.

{ *Isidorus Hispalensis.*{ *Eugenius Toletanus.*{ *Drepanius Florus.*{ *Marculphus.*{ *Anonymus Ravennas.*

Sæculi

VIII.

{ *Aldhelmus, seu Adelhelmus.*{ *Beda.*{ *Flaccus Alcuinus.*{ *Paulus Diaconus.*

Sæculi
VIII.

Rabanus Maurus.
Freculphus.
Eginhardus.
Strabus Gallus.
Aimonius.
Theodulphus Aurelianensis.

LINGUA LATINA JACENTE

Sæculo X.

Luitprandus.
Odo Severus.
Flodoardus.
Rhegino.
Witrichindus.

Sæculo XI.

Haymo.
Rodulphus.
Hermannus.
Lambertus.
Medici Salernitani.
Marbodeus.
Constantinus Afer.
Petrus Damiani.
Marianus Scotus.
Raimundus.
Villeramus.
Baldericus.

Sæculo XII.

Guntherus.
Sigebertus.
Joannes Saresberiensis.
Otto Frisingensis.
Saxo Grammaticus.
Hildebertus.
Helmoldus.
Gratianus.
Hugo.
Petrus Abailardus.
S. Bernardus.
Petrus de Riga.
Guillelmus Tyrius.
Petrus Blecensis.
Josephus Devonius.

Sæculo XIII.

Phil. Gualterus.
Conradus Abbas Ursp.
Matthæus Parisiensis.
Vincentius Bellovacensis.
Martinus Polonus.
Albertus Magnus.
S. Thomas Aquinas.
S. Bonaventura.

Sæculo XIV.

Joannes Scotus.

Ma.

Alanus de Insulis.
Matthæus Vindocinensis.
Robertus Bessonius.
Gualterus Burlæus.
Danthes Aligherius.

LINGUA LATINA INSTAURATA

Sæculo XIV.

Albertinus Musatus.
Franciscus Petrarcha.
Joannes Boccaccius.
Lombardus Sericus, & alii.

Sæculo XV.

Poggius Bracciolinus.
Georgius Trapezuntius.
Laurentius Valla.
Bartholomæus Faccius.
Flavius Blondus.
Franciscus Philolphus.
Bessario Card.
Theodorus Gaza.
Æneas Sylvius.
Nicolaus Perottus.
Rodolphus Agricola.
Bartholomæus Platina.
Franciscus Barbarus.
Hermolaus Barbarus.
Marsilius Ficinus.
Nicolaus Leonicens.
Pomponius Lætus.

Jovianus Pontanus.
Angelus Politianus.
P. Paulus Vergerius.
Ambrosius Camaldulensis.
Leonardus Arocinus.
Guarinus Veronensis.
M. Antonius Sabellicus.
Matthæus Palmerius.
Franciscus Contarenius.
Jo. Antonius Campanus.
Joannes Tortellius.
Benedictus Accoltius.
Janotius Manettus.
Leonardus Justinianus.
Antonius Panormita.
Baptista Albertus.
Baptista Mantuanus.
Jo. Andreas Lascaris.
Joannes Aurispa.
Georgius Merula.
Palladius Fuscus.
Bartholomæus Scala.
Jacobus Antiquarius.
Colutus Salutati.
Victorinus Feltrensis.
Gabriel Altilius.
Porcellius, & alii.

Sæculo XVI.


Jacobus Sannazarius.
Ludovicus Vives.
Cælius Rhodiginus.

Tho.

Thomas Linacer .
Petrus Alcionius .
Petrus Bembus .
Aonius Palearius .
M. Antonius Flaminius .
Joannes Cotta .
Christophorus Longolius .
Janus Parrhasius .
Andreas Naugerius .
Bartholomæus Riccius .
Jacobus Sadoletus .
Balthassar Castilio .
Honoratus Fascitellus .
Marius Molsa .
Marius Corradus .
Sebastianus Corradus .
Vincentius Madius .
Jo. Baptista Egnatius .
Romulus Amasæus .
Lazarus Bonamicus .
Gabriel Faernus .
Joannes Sturmius .
Pierius Valerianus .
Thomas Morus .
Gulielmus Budeus .
Melchior Canus .
Bernardinus Scardeonius .
Lilius Gyraldus .
Michael Brutus .
Hieronymus Fracastorius .
Henricus Glareanus .
Andreas Alciatus .
Scaliger pater, & filius .

Joannes Fernelius .
Scipio Capicius .
Gaspas Contarenus .
Nonius Pintianus .
Reginaldus Polus .
Paulus Jovius .
Robertus Stephanus .
Joannes de Casa .
Joannes Brodeus .
Antonius Goveanus .
Petrus Victorius .
Hieronymus Vidas .
Adrianus Turnebus .
Franciscus Robortellus .
Dionysius Lambinus .
Paullus Manutius .
Franciscus Luisinus .
Jo. Baptista Pigna .
Onuphrius Panvinus .
Hubertus Folieta .
Antonius Augustinus .
Guilhelmus Canterus .
Petrus Ciacconius .
Carolus Sigonius .
M. Antonius Muretus .
Fulvius Ursinus .
Barnabas Briffonius .
Henricus Stephanus .
Levinus Torrentius .
Doufa pater, & filius .
Joannes Passeratius .
Ubertus Gifanius .
Matthaeus Raderus .

Horatius Tursellinus.
Petrus Perpinianus.
Andreas Schottus.
Jovita Rapius.
Jo. Petrus Mapheus.
Bartholomæus Latomius.
M. Antonius Majoragius.
Marius Nizolius.
Gregorius Cortesius.
Andreas Maurocenus, & alii.



ORA-

ORATIO II.

AD HUMANITATEM.

*Pueris ad Latinam eloquentiam informandis nocet
librorum copia.*

QUI Grammaticorum insidias hoc ipso ex loco deprehendere præterito anno conatus sum; & si recte sentio, deprehendi; non satis videor commissæ nobis juventuti consuluisse, nisi ad Humanitatis studia progredientem manu veluti ducam, numquam ab ejus latere, nisi universo confecto curriculo, discessurus. Quamvis autem ingens præstantissimorum hominum numerus, qui optime docent, & scribunt optima, nihil reliqui fecerit, quod ad alendos puerorum animos pertineret; suus tamen est & copiarum morbus, nec tam sæpe animal humorum inopia, quam nimia quadam redundantia conficitur. Neque vero mihi tantum tribuo, ut putem posse me, qui nihil ferme possum, ultra peccetur in parte, remedium adhibere; sed tamen siquid est a nobis in commune scholarum bonum conferendum, quemadmodum suscepti muneris ratio non postulat modo, sed etiam flagitat, multo quidem mihi videtur esse facilius detrahare inventis supervacanea, quam addere necessaria. Nam serere arbores, disponere, lætificare non est nisi agricolæ peritissimi; stolones amputare, & inutilem fruticationem cohibere hominis est in re rustica vel mediocriter exercitati. Ut igitur de Grammaticis cum agerem, satius duxi pro virium mearum infirmitate ablegare præcepta multa, quam novâ excogitare, ita

Hu-

Humanitati non quid adjiciam, hodierna luce laboro, sed quid potissimum inani propagatione subortum sine invidia præcidam. Quoniam vero delicatissimis hujus ætatis auribus nihil libere dicendum est, nihil ex vetere illo Romani sermonis ingenio, quod a principis terrarum populi gravitate profectum, tum denique in hanc barbariem degeneravit, cum ad blanditias & adulationes traductum est, ea nomina tacebo lubens, quæ jamdiu tacito animi sensu devovi, & in ultimas barbarorum oras amandavi. Non est tutum, Auditores, mihi credite, non est tutum quibusdam scriptoribus diem dicere, & si qua peccarunt, ne multis noceant, fortiter constanterque patefacere. Nemo est eorum tam lutulentus, nemo tam desertus & abjectus, quin plebem aliquam, plebisque Tribunum inveniat, cujus voce ac pæne armis per summam legum & actoris injuriam judicio eripiat. Fruantur, per me licet, fortuna sua; regnent in scholis; imponant discipulis ac magistris; legantur, recitentur, describantur: non est ut hominum benevolentiam amittere velim, simulatesque gravissimas tam levi de causa subire. Quod unum arbitror sine periculo fieri posse, dicam in universum, acriterque contendam, pueris ad Latinam eloquentiam informandis librorum copiam in primis officere; proinde non esse conditione ulla permittendum, ut extra principes Latinitatis Auctores evagentur. Utinam Patavinis parentibus eam prolem Superi donent, quæ vel a teneris librorum studio teneatur, quod omen est in reliquis ætates sane præclarum; sed utinam etiam magistris omnibus eam

men-

mentem injiciant, ut pueris ad instituendum sibi traditis librorum multitudinem mature laudent, sero concedant. Id ego nostris solemnī more quotannis denunciabo, si modo a vobis in præsens obtinere potuero, quemadmodum spero, ut quæ ex animo dico, & confirmare aggredior, suffragio vestro comprobetis.

Si quid ego mihi non brevissimi temporis experientia comparavi, ut de primæ ætatis studiis judicare possim, in duo ferme genera distribuo: primum est eorum, qui Grammaticæ cursum vix emensi, ac litterarum veluti dulcedine prægustata, libros undique impense conquirunt, iisque se totos dedunt; alterum eorum, qui invita Minerva nati, librorum genus omne, non secus atque ovis lupum, averfantur. Medium enim ætas illa prudentia omni destituta nihil agnoscit. Utrumque sane vitium est: sed alterum illud, quod ex Musarum odio nascitur, insanabile; primum vero etiam optandum, modo adsit peritissimus docendi artifex, qui frenos adhibeat, qualis fuit Isocra-

Cic. 3. de tes in Theopompi concitatione temperanda. Quod
Orat. c. 9. si quis ex istis librorum amatoribus in eum magis-
trum incidat, qui per se currenti stimulos ad-
dat, cujusmodi sunt ubique multi, pejore futurus
est conditione, quam qui in ipso Grammaticæ
limine libros omnes ejuravit. Quandoquidem hic
sibi uni detrimento est; ille multos mortales in-
ficiet, & in erroris communionem doctrinæ fa-
ma perducet. Si enim, ut Callimachus agebat,
μέγα βιβλίον ἴσον μεγάλῳ κακῷ, quid illum ex mul-
tis, magnisque libris colligere putatis, Auditores,
qui simul ætate, simul judicio infirmus nondum
satis

Apud A-
thenæum
l. 3. c. 1.

satis æra lupinis distinguit? Ipsa profecto memoria, qua solet pueritia valere plurimum, ipsa, inquam, memoria facile omnia sine ordine ac sine delectu recipiendo nocebit: si modo non scitulum blateronem, sed Oratorem instituimus. Cum enim hominis animus ex earum rerum contemplatione, quæ in memoria reconduntur, duci fere soleat ad parienda similia, nonne ille confusa pariat ac perturbata necesse est, cujus memoria non thesaurus, ut a Tullio dicitur, sed tale quiddam sit, quale Poetæ finxere chaos? Sit oratio sublimis & exaggerata, sit vera, sit gravis, sit callida, sit verborum ac sententiarum floribus refertissima; si caret perspicuitate, quæ prima est dicendi virtus, nec in animos hominum penetrabit, nec artificio capiet, nec rationibus vineet, nec affectibus promovebit. Atque ego perinde loquor, quasi puer multa legendo, multa discat tum bona, tum mala, quod nequeat ex imbecillitate iudicii delectum adhibere. Nimis equidem egi liberaliter, nimio plus concessi, quam oportet. Pejora undique arripiet, probabit, exscribet, memoriæ mandabit, & ut in vacua rebus mente altissime infixæ, quamdiu vivet, retinebit. Amat enim ætas illa convenientia sibi, vana, levia, ludicra, in verbis novitatem, in sententiis fucum, in tota oratione tumorem & audaciam. Jacet Cicero, si cum Seneca compares; serpit Virgilius, si conferas cum Statio; friget Catullus, si Martiali opponas: uno verbo non rem & veritatem, sed colores & pigmenta confectatur. Quid vero si in fabulas illas forte incurrat, quas vulgo Romanenses appellant? quid si in
qua-

quadrata quædam carmina, cubica, retrograda? quid si in elogia, anagrammata, acrosticha, summa cum Latini sermonis verecundia non multis abhinc sæculis in Latium importata? Valeat, inquiet, omnis antiquitas frigida, meticulosa, sine animis, sine spiritu, sine fruge: perierat Latina lingua, nisi cum Romanis periisset: nunc demum revixit venusta, florida, elegans, par famæ ac nomini tanto. Ignorabant veteres illi, quantum liceret hyperbolæ, metaphoræ, allegoriæ: non ita fecundi erant, ut decem antitheta uno spiritu funderent: non norant quid esset argute dicere, quid subtiliter, quid magnifice. Quid autem norant? si qui unus ad sæculi hujus elegantiam accedere maxime visus est, Senecam dico, ejus lucubrationes Quinctilianus nescio quis corruptas in eloquendo, perniciosissimas, & dulcibus vitiis redundantes judicavit. Nolite, quæso, existimare, Auditores, ad causam ista congingi. Audi vi ego, audi vi nobilissimum adolescentem, qui cum multa ex Barclajo recitasset pluribus ante annis memoriæ tradita, & in sui perniciem arctissime custodita, quærenti mihi, utrum aliquid ex Cicerone didicisset, subitatus respondit, aridam illam Ciceronis Latinitatem obsolevisse. Magna hæc illius, magna multorum calamitas, non tamen paullo attentius consideranti valde mira. Quemadmodum enim pueri ex picturis maxime novas & coloratas, ex gemmis rubentes & pel lucidas, ex nummis fulgidos & elegantissime cufos; ita ex hoc literario quasi thesauro non solida & gravia, sed fucata & sonantia sibi decerpunt. Hinc morbus in omnes ætates consequen-

tes vel nullo umquam remedio, vel ferro atque igni depellendus. At enim est, qui in magna librorum multitudine nullum habeat nisi optimum. Gratulor ego illi, qui optima multa in rebus humanis invenire potuit. Est quod ad Oraculum Delphicum referamus. Esto, sint optimi, sint probatissimi omnes: ipsa enimvero multitudine sua, copia ipsa rerum optimarum legenti nocebunt. Neque enim tam multa capit angustissimus pueri animus; non impletur hoc modo, sed obruitur; respuit omnia, nisi sensim immitas. Quod si quis eximia natura præditus, laborisque & vigiliarum præter ejus ætatis morem insigniter patiens cuncta recipiat, quantum inde utilitatis ad eloquentiam redundabit? quantum scilicet ad valetudinem ex optimorum ciborum intemperantia. Non satis est ad morbos vitandos comedere saluberrima, nisi opportune, ac temperanter comedas. Porro sicut insitus stomacho ignis immodico cibo opprimitur, aut etiam extinguitur, ita ingenium nequit, ut ita dicam, nimis multa concoquere, sed quasi oppressum otietur, vel cruda & indigesta in malos humores convertit. Inde strigosus ille dicendi modus, inconstans, salebrosus, involutus, ut nihil intelligas sine interprete; inde illa historiarum, fabularum, ἀποφθεγμάτων perpetua & inordinata congeries in exordio, in confirmatione, in peroratione, nulla rerum, nulla temporis, nulla loci ratione habita, quæ omnia vulgus pulcherrimas eruditiones appellat, sapientes viri pulcherrima monstra. Est enim, ut aliarum rerum, ita eruditionis modus, quidam, ut definiendo, probando,

D

am-

amplificando erudita identidem fundas ad delectationem, non effundas ad satietatem; tamquam ornamenta pulcherrimæ domus, non cumulata, sed explicata. Verum sibi temperare nequit, ut maxime nitatur, qui cœpit ab infantia leſtitare, & *μνημονεύματα* conficere. Proponitur huic aliquid ad dicendum, ſive in templo, ſive in Academia. Itur ſtatim ad adverſaria. Quid tum? Non incluſum, aut cogitantem videas, ſed magna corporis animique contentione hac atque illac diſcurrentem, parantem undique libros, bibliothecas pæne ipſas ſedibus convellentem. M. Tulli, quid præbes ex Tuſculanis, quid ex Officiis? Cave diligenter, C. Plini, jam eſt in Hiſtoria tuâ. Plato, Laerti, Plutarche, præclarè vobiſcum agitur, ſi indice caretis, ſin minus, conferte ſymbolam. Jam proceſſit opus; verſiculos numerat; non ſatis eſt: hæret, rodit ungues. Inſtauretur librorum acies; ſuccedant ſacri, Biblia, Concilia, Interpretes, Græci omnes Latinique Patres; nemini parcendum eſt. Quid expectatis, Audiſcores? Exit, non oratio, ſed Polyanthea. Verum enimvero non novit ingenia, nec artem novit, qui ab hoc genere hominum aliter poſtulat. Cum enim leſtioni a pueritia deditiſſimi, numquam aſueverint cogitare ac promere ſua, coguntur deinceps in omni vita aut roſtris abſtinere, aut aliena temere compaſta profundere. Careat ſtilo necesse eſt, careat dicendi genere ſibi proprio, qui qua ætate maxime formandum erat, legendo tempus trivit, ſive, ut ex ejus ſenſu loquar, eruditioni parandæ operam dedit. Sed quæ, malum, eſt iſta eruditio vel fruſtra, vel intempeſti-

ve ab Oratore quæsitæ? Numquid non satis ad erudiendas vel Musas ipsas, numquid non satis ad fatigandas ingentia illa Gruteriana & Græviana volumina, nisi oratiuncula quælibet ad eruditionem traducatur? Convenere homines judicaturi, siue suadeas, siue dissuadeas, siue laudes, siue vituperes, siue accuses, siue defendas; teque tuamque causam, non si erudita, sed si vera dicas, aut vera dicere videaris, secuturi. Nolo hic dissimulare, Auditores, & esse, & me ipsum vidisse nonnullos ita laboris patientes, naturaque secundos, ut cum multa quotidie legant, scribere tamen non supersedeant; & utramque jungant exercitationem. Horum ego stilum non nego esse aliquem, sed nego esse probabilem, qui optime norim non ad unius hominis, aut ætatis imitationem, sed ex omnibus promiscue Latinæ linguæ sæculis, & ex omni scriptorum genere conflatum esse; ut cum dicunt, non uno ore, sed prope multiplici dicere videantur. Non enim potest esse unus, non constans, non æquabilis stilus ille, qui multorum librorum lectione trahitur in diversa; nec oratorem sapit, quod poetica multa, nec poetam, quod oratoria contineat. Hoc vitium est elocutionis maximum, in quod vel sapientissimi viri necessitate quadam labuntur; hic *νομιμὸς*, quem evitare ne ille quidem potuit summus in hac civitate patrum nostrorum memoria litterarum arbiter Octavius Ferrarius, quem tamen accepimus & pro sua prudentia se probe novisse, & pro ingenuitate sæpe dixisse, Humanitatem se, non Eloquentiam profiteri. Quippe intelligebat vir immortalitate dignissimus, publice

docendi munus ab ipsa adolescentia susceptum aditum sibi ad universam eruditionem Græcam Latinamque patefecisse, ad oratorias scriptiones interclusisse. Cogebatur enim pro ea, quam iniebat, docendi ratione, totam versare antiquitatem, nec ullo umquam certo loco consistere; modo esse in Tullio, modo in Apulejo; a Livio descendere in Marcellinum, a Catullo in Ausonium, a Virgilio in Claudianum; a Latinis continuo ad Græca transire, a Græcis ad Latina; undique autem ea colligere, simulque committere, quæ a stili similitudine longissime abhorrebant. Libuit in rem hanc Ferrarium afferre, tum ut quibusdam responderem, qui locutionem ejus ex orationibus judicantes accusare solent; tum vero maxime, ut tanti viri nomine orationi meæ fidem & auctoritatem conciliarem. Ad nostros redeo, quos video tanto peccare gravius, quanto minus peccare se sentiunt. Ille enim adolescens, ille vir, ille senex ex instituto multa legebat, isti ex desidia. Etenim varia multorum Scriptorum lectio, quid habet laudis, quod non sit vel cum ignavissimis commune? Nemo est tam otiosus, nemo tam bardus, modo litteras aliquando attigerit, quin poetas saltem, aut historicos jucundissime legat. Hinc ad longissimas ætatis horas fallendas, hinc ad lenienda solitudinis tædia, hinc ad somnum conciliandum remedia peruntur; ut jam experientia didicerim, eos fere, qui se mihi gloriantur multa legere, dulcissime otiari, sed laudem ex otio malitiose quærere. Quos ego tantum abest, ut velim confirmata jam ætate ad scribendum compellere, ut etiam valde deterream;

ne

ne in vitium incidant, de quo ante dicebamus, hoc est in confusam sibi que dissimilem dictionem, cujus partes singulæ latinæ sint, genus vero totum barbarum ac pæne monstruosum. Huc si spectant eorum consilia, in eo, quem instituerunt vitæ cursum, sapientissimi sunt, quod nihil audeant supra vires: sin autem laboris metu, quod plerique omnes consueverunt, abhorrent a pugillaribus, est quod illis bonam mentem precemur. Interim vero sine ulla dubitatione statuamus, legendi jucunditatem ab omni labore vacuum primam esse causam, cur adolescens libentissime legat. Altera aliquanto turpior solet esse furandi libido, orta procul dubio ex illa rerum ac verborum inopia, quæ nondum progressum ad Philologica comitatur. Fit enim inde, ut de se ipse desperans, aliena perquirat; quæ si quando callide corrasa, & in rem propositam belle deducta magister laudet, actum de illo est: nihil amplius cogitabit, nihil inveniet; libros compilabit omnes; alia sumet, alia detorquebit, modo libere, modo furtim, apte, inepte, ut unumquodque implendæ tabulæ idoneum videbitur. Scribatur dica, plagarius est. Neque enim video, cur furti appelletur, qui totam ab uno orationem surripuit, parcatur vero illi, qui multorum laciniis usus est, & pessimum nobis quasi centonem venditavit. Sed hac ratione nimis plane multi inter oratores irreperunt, numeroque ipso defenduntur; atque adeo honestissimo imitatorum nomine, probante ac volente populo, gaudent. Ego equidem veteri Romano populo quid liceret in danda hominibus verbisque Romana civitate,

fatis intelligo; quid nostro huic Patavino, quid Veneto, quid Florentino liceat, prorsus ignoro. Inconditum hoc latinæ dictionis genus probent civitates omnes, probet Italia tota, Gallia, Germania, Hispania probet, nisi grande illud nomen, *Senatus Populusque Romanus* e suis, tumultis excitetur, jubeatque ita fieri, intercedo. Etsi autem scribendi ratio hæc, seu potius describendi ex multorum lectione plerumque oritur, quod minus videantur ablata, quæ a multis, quam quæ ab uno auferuntur; non tamen negare auisim contingere posse, ut ex unius Scriptoris penu tale aliquid educatur. Quod si quis in Longolio, viro ceteroquin elegantissimo, diligenter animadvertat, non multa fortasse inveniet in ejus orationibus membra, quæ non sint Ciceroni tamquam domino adjudicanda. Sed ille cum cœpisset suum sibi formare dicendi genus, immatura morte præreptus, non potuit efficere, ut multis ad latinam eloquentiam exemplo esset. Quod vero Bembum, italici latinique sermonis lumen in omnium sæculorum oculis splendidissimum, barbari quidam Transalpini in eo accusare non dubitarunt, concedendum est illis, ut de re, quam ignorant, perperam judicent. In quibus tamen Justum Lipsium æquissimum virum censere nolo, qui cum esset aliquando non prorsus honorifice de Bembi stilo locutus, suum ipse errorem & in epistola sexta Centuriæ ad Italos, & in fine Taciti, & in Defensione posthuma ingenue confessus est, magnique & oratoris & historici nomen immortalis genere laudum exornavit. Si tamen alterutra in parte delinquendum est,

mi-

minus offendit aures, qui uni plus iusto adhæret, quod aliena quidem, sed inter se similia jungat; quam qui ex multis, ætate ac dicendi forma diversis, nullo modo cohærentia suffuratur. Jam vero ultima causa afferenda est, cur adolescentes multa legant; quam unam si probatis (videte quantum tribuam sapientiæ vestræ) cedo statim de re tota, puerosque nostros dux ego atque auctor in magnam bibliothecam statim ducō. Hoc nihil est aliud, quam modus legendi ita velox, ita præceps, ut singulis diebus singula volumina percurrantur: unde tantum existit ad eloquentiam comparandam adjumenti, quantum ad historiam ex eorum peregrinationibus, qui citatissimis equis per urbes feruntur. In quo ego ætatem illam non reprehendo, quæ impetum sequitur ac levitatem sibi propriam; utque ejusdem loci, ita ejusdem libri cito satietate teneatur. Illos reprehendo, qui levitatem istam laudando fovent, putantes magnæ cujusdam esse virtutis multorum Scriptorum nomina recitare: siquidem nihil præter nomen tanta velocitate legentibus hæere potest. Sentio me, oratione ipsa ducente, ad eos delapsum, qui sibi persuadent, & ubique prædicant, hujus ætatis studia, studiorumque famam librorum titulis & indicibus contineri. Isti si sapiunt, tota concidit oratio mea; in eoque laborandum est unice adolescenti, ut mature incipiat per bibliothecas cursitare. Itane vero patiemini, Auditores, futilem hanc doctrinæ speciem in sapientissima civitate jactari, ac vobis obtrudi? Impune ergo oratores laudabit, ac reprehendet; poetas, & historicos pensabit; de

Philosophis, de Theologis, de Jurisperitis sententiam feret, qui gravissimas facultates prima Scriptorum pagina definierit? Est aliquid respondere posse de Plutarchi nomine & patria; quot in libros ejus opera distribuantur; quis quonam sermone verterit; quis primus, quis postremus ediderit; quis Anglus, aut Batavus variis lectionibus illustraverit: sed quia interim vacat ingenium, nobilissima hominis pars, malim hæc in bibliopola, quam in viro litterato reperire. Video enim quam sit difficile, hæc omnia præstare, quæ totam hominis vitam occupant; nec tamen illa omittere, quæ utilius & honestius occupare possunt. Non eo sane consilio pueros nobis vestros tradidistis; non huc spectant cogitationes illæ, labores, impensæ, quas eorum causa libentissime suscepistis, & suscipere nos una vobiscum tantopere vultis. Est aliquid supra librorum titulos, quo contendatur; sed illud ejusmodi est, ut in tanta legendi celeritate deprehendi non possit. Immorari oportet rebus singulis, quæ maxime eminent; idem submissa voce legere, idem elata; quodque semel legeris, iterum sæpiusque repetere; & cogitatione vehementissima in omnem partem versare. Si enim lectio ad imitationem instituta est; imitari vero nihil est aliud, quam similes eorum fieri, quos nobis ad imitandum proponimus; certe non cursu, sed mora longissima opus est, ut illorum dicendi genus modo in universum, modo per partes singulas meditates, in nobis ipsis altissime defigamus. Ita si legat adolescens, vix unum, aut alterum latine linguæ Scriptorem ad multam ætatem evolver; nec

nec erit nobis a librorum multitudine revocandus. Non alia, credo, caussa primi illi attrita latinitatis ac pæne sepultæ reparatores tantopere floruerunt, ut uno tempore studium hoc & inchoasse videantur, & perfecisse, nisi quia paucissimos libros habebant, quibus se addicerent, vel nondum editis tot voluminibus, vel nondum satis librariorum opera propagatis. Nunc vero quanta undique succrevit librorum seges; quam multæ, atque operosæ officinæ! quot publicæ privatæque bibliothecæ, non modo ad litterarum studia, sed quod ostentationis est non ferendæ, ad parietum quoque ornamentum! Quæ copia multo quidem major, quam a nobis explicari possit, vel fastidium parit, vel levem illam legendi curam, quæ sine ullo eloquentiæ fructu, atque adeo cum detrimento plerumque expletur. Cavete, Adolescentes, magna animi provisione cavete. Insidiæ vobis ubique parantur, eoque periculosiores, quod parantur ab amicis. Nolite animum pravis libris vitiare, nolite turbare multis. Habete rationem ætatis, habete studiorum, habete etiam aliquam voluntatis in vos meæ, quæ nihil me finit aut cogitare, aut efficere, quod non ante cognoverim certis exploratisque argumentis institutioni vestræ profuturum. Illos ipsos, qui ætate jam sunt confirmata, *non multa legere, sed multum*, ex veteri proverbio Plinius jubet: quanto vos minus vagari oportet, atque in varia discurrere, qui nunc primum ire aggressi, de via si paullum deflectitis, tanto magis errabitis, quanto solent esse aberrationes a scopo itineris initio longiores. Unum vobis sufficere Ciceronem viri

lib. 7.
ep. 9.

in hac arte peritissimi existimarunt. Querebami-
ni. Largius egimus: Cæsarem concessimus, Te-
rentium, Nepotem. Non satis fuit. Horatium
addidimus, Catullum, Virgilium. Pergentibus al-
tius, & Livium, & Curtium, & Ovidium, &
alios deinceps præbebimus. Sint alii de se sollici-
ti: nihil vobis deesse potest, ubi tam multi ve-
strâ causâ laborant; ubi Princeps liberalissimus
laborare jubet. Quamdiu nos per ætatem ac va-
letudinem gravissima onera sustinebimus, quam-
diu ille, qui nequit a seipso desciscere, sustinen-
tibus benefaciet; non libros, non typos, non
præceptores, non alia studiorum vestrorum adju-
menta desiderabitis.

EPISTOLA

Præposita editioni primæ hujus Orationis.

Politiorum litterarum cognitionem, quod ad ho-
minis naturam ac dignitatem supra ceteras ar-
tes ac disciplinas pertineret, veteres Humanitatem
appellarunt: nos communem secuti scholarum nostra-
rum usum, eam dicimus Humanitatem, quæ Rhetor-
ices elementa tradit, hoc est recte consciendæ pe-
riodi ornandaque præcepta. Huic proludere cum de-
berem, eam removi librorum copiam, quæ puerorum
stilum aut retardare, aut vitare poterat tanto qui-
dem periculosius, quanto rectius magna specie boni
commendata incautis nocere solet. Ubi ætas ac stilus
confirmata sunt, non ego homines a legendo deter-
reo; tametsi Plinius alter, & alter Seneca, tamen-
si Franciscus Petrarcha, vir utroque illo præter-
quam

quam annis nihilo minor, cuilibet ætati ad solidam bonarum artium gloriam contendenti paucos libros concedunt. Sed alia fortasse aliis studiis atque temporibus præcipienda sunt. Interim ego pueros instituo; nec porro pergo, nisi ubi aliquorum vitia a pueritia contracta, pravaque consuetudines jubent me viros senesque ad exemplum producere, & alia ab aliis ducendo per omnes ætates discurrere. Tu, si quid rectius habes, noli modeste petenti denegare, vel danti, quod habet, succensere. Vale.



ORATIO III.

AD RHETORICAM.

Præcipua Rhetoris cura debet esse verborum.

ET si de primis puerorum studiis cum dicerem, non prorsus timore carebam, quem abjicere totum hoc in loco nemo potest, nisi prius verecundiam abjecerit; attamen res ipsa per se parva non tantam eloquentiæ vim postulare videbatur, nec tantam movere hominum expectationem, ut tamquam in magno discrimine examinarer. Nunc vero longius progressus, ad Rhetoricen cum pervenerim, tantumque dicendi genus augere debeam, quanto res, de qua dico, sublimior est; incredibili quodam timore perfundor, nec animum qua ratione confirmem in hæc mearum virium imbecillitate omnino reperio. Miseram est enim, ne dicam turpe, de Rhetorica disputantem nihil afferre posse Rhetorica dignum; illamque orationis exilitatem arti ceterarum principi accommodare, quæ, de minutis rebus cum sermo esset, vix toleranda videbatur. Licuit de Grammatica sive summis, sive temperate dicere, licuit de Humanitate: nunc autem nisi rerum ubertate ac magnitudine, nisi verborum ac sententiarum splendore, nisi vocis & gestus dignitate ostendimus eloquentiam ipsam in rostris esse, officio abutimur ac nomine tanto, abutimur celebritate hac, tempore, loco, patientia vestra

stra plane abutimur. Neque vero tacere licet, ubi facultas hæc nostra malevolorum obrectationibus in magnam invidiam adducta, nobilissima sui parte. hoc est elocutione periclitatur. Increbuit enim sermo, latiusque ad ignaviam fovendam quotidie disseminatur, eloquentiæ nervos & gravitatem infringi verborum ornatu, frustra que adolescentes in elocutione paranda ad multam ætatem laborare. Id ego si mihi obtrudi patiar, saxeus plane sim; si me tacente, obtrudi aliis, turpissime videar mearum partium oblitus. Excusso igitur timore omni, ipsaque erectus Scholæ vindicandæ necessitate, hoc ipsum contendo in Rhetorica tradenda præcipuum esse, quod isti minimum putant, delectum & collocationem verborum; idque ita contendo, ut nisi penitus in aures vestras animosque inseruero, totum hunc studiorum nostrorum ordinem improbari velim, meque meosque omnes ab hoc intento cursu ad litterarum elementa tamquam ad carceres, revocari.

Age, congregiamur. Quid est quod ægre ferant, nos in verborum cura tantopere occupari? Quoniam, inquiunt, ex tribus eloquentiæ partibus invenire ac disponere prima sunt, eloqui vero postremum, minimique laboris, minimæque dignitatis. Hic ego non tam doleo, quod in illam artem disputant, cujus naturam & rationem ignorant, quam quod nomina ipsa rerum non assequuntur, sibi que ipsi per summam imprudentiam contraria dicunt. Cur enim eloquentiam appellant, cujus eloqui postrema pars est, cum possint ac debeant a principe parte suæ facultati nomen

men dare? Non decet gravissimos homines eorum auctoritate moveri, qui cum statuissent elo-
 Cicero in quendi virtutem in oratore supra ceteras emine-
 orat, c. 19. re, non eum inventorem, non compositorem, sed eloquentem appellarunt. Quid non ludum aperiant? Quid tamdiu suam istam doctrinam nobis invident? Quid dubitant exire, veteresque magistros, mutatis & rebus, & rerum nominibus, docendi gloria discipulisque spoliare? O te beatum, J. Cæsar, si tales vel Romæ præceptores, vel Athenis invenire potuisses. Profecto non scripsisses, *verborum deletum originem esse eloquentiæ*. Miseret me tui, M. Tulli, qui tibi persuades, ac litteris mandas, *inventionem ac dispositionem prudentis hominis esse, eloquentiam oratoris*. Non hos audire potuisti arcana doctrina viros. Tu quoque, M. Fabi, doctore indiges, cujus ea vox est, *elocutionis rationem partem operis difficillimam esse, idque inter omnes oratores convenire*. Falleris; non convenit inter nostros. Ego quidem, Auditores, cum diu multumque cogitarem, unde tantum esset quibusdam hominibus eloquendi fastidium, mallemeque ratione aliqua excusare, quam stultitiæ tribuere, illud unum inveniebam, quod *λογολαΐδαλοι* nescio qui, omissa rerum cura, verbis se totos dedant, quæstionesque gravissimas molli & effeminato dicendi genere sine ulla verecundia tractent. Peccant hi quoque ex parte altera, gravissime peccant, quod debeat esse aliquid, ut in rebus omnibus, ita in elocutione satis: sed tamen turpissimum est, quod Græci dicunt, * *κακὰ κακοῖς ἰασθαι*, eoque ornamento oratoriam artem spoliare, quo ferme uno ab aliis distinguitur,

apud Cicero in Bruto. c. 72.

in Orat. c. 14.

lib. 8. in proem.

* mala malis curare.

rur, & in suo quodam genere collocatur. Qui
 nimius est in ornando, quamvis non ita bonus,
 tamen orator est; nec sane alia re ulla, nisi ver-
 borum copia & elegancia in oratorum numerum Cic. in Brut. c. 59.
 pervenisse Curionem, Oratorum Princeps judica- & 66.
 vit. Qui vero invenire potest, sed ornare non ib. c. 7.
 potest, is disputator est, Dialecticus est, quid-
 vis est potius quam orator: ut si quæras a M.
 Tullio de Pisistrato, de Solone, de Clisthene,
 deque aliis omnibus, qui Athenis dixerunt ante
 Periclem & Thucydidem, neget oratores fuisse;
 non quod Civitati omnium bonarum artium pa-
 renti per tot annos defuerit ingenium, sed quia
 defuit ingenium ad eloquendum. Poterant illi
 quidem, quemadmodum Romæ M. Scaurus, & ib. c. 29.
 P. Rutilius, res optimas invenire, apteque locare;
 verumtamen (ut ipsius Ciceronis verbis utar,) Ibid.
non refert videre, quid dicendum sit, nisi id queas
solute & suaviter dicere. Est enim alia quædam
 dicendi ratio, differendi alia; nec debent Rhetorica,
 & Dialectica iisdem terminis concludi, una-
 que definiri facultate, quæ ἀντίρροποι ab Aristotele dictæ sunt. Idem est utrique propositum, ut Rhet. l. 1. c. 1.
 quid unaquæque res sit, definiendo explicet; ut
 separet ab ambiguis; ut in suas partes tribuat;
 ut genera, ut species, ut quæ antecedunt, quæ-
 que consequuntur, notare possit, & singula sin-
 gulis conferendo dijudicare. Utraque interrogat
 ac respondet, probat & improbat, impugnat
 ac defendit: sed altera anguste & exiliter, al-
 tera copiose & ornate; illa disputatione, nostra
 hæc oratione. Quod cum Zeno Stoicorum Prin-
 ceptis ostendere vellet, manus similitudine ute-
 batur,

Cic. in
 orat. c. 32.

batur, eandemque contractam dicebat esse Dialecticam, explicatam esse Rhetoricam. Quam ego multos putissimos Dialecticos arguere possem, qui olim hac ipsa in urbe habiti sunt Oratores, non quidem a vobis, qui recte sapitis, sed a multis tamen non infimi ordinis hominibus, quod ambiguas quæstiones ad rostra afferentes acute subtiliterque differerent. Sed nolo in eam invidiam recidere, quæ tum mihi conflata est, quod eos Oratores non putarem. Prodeat in medium Brutus ille, cui tantum tribuere solebat M. Tullius, ut libros de hac arte pulcherrimos ejus maxime causâ scripserit, & ad eum instituerit: ille, ille, inquam, prodeat in medium, qui ab omni periculo invidiæ tutus affirmare non dubitabit, Stoi-
cos fere omnes & suæ civitatis, & Græcos prudentissimos fuisse in disputando, sed eosdem tractos a disputando ad dicendum inopes esse re-
pertos. Itane igitur sapientissimi viri cum de rerum humanarum contemptu dicerent, de magnitudine animi, de modo, de gravitate, de indolentia, deque aliis hujusmodi, cumque tam multi essent, omnesque ea viderent, quæ in re qualibet optima sunt, & ad persuadendum aptissima; nemo tamen unus ex iis aut eloqui potuit, aut sine elocutione placere? Nihil existimo afferri posse clarius, nihil certius, ut non solum intelligatis, sed oculis prope ipsis videatis, tantam illam oratoris artis magnitudinem ac difficultatem, quanta efficere potuit, ut ex omni memoria temporum ac populorum vetera repetentes nihil rarius, quam præstantes oratores inveniamus, in una prope modum esse elocutione. Hæc oratores facit;
hæc

apud Cic.
in Brut.
c. 31.

hæc illos a ceteris, ipsosque inter se per varia genera, variosque, ut ita dicam, colores vel sola, vel pæne sola distinguit. Etenim cum dicimus orationis genus aliud esse sublime, aliud medium, aliud infimum; cumque in his ipsis generibus Asianos oratores a Laconicis, & Atticos ab utrisque distinguimus, non de iis quæ dicuntur, cogitamus, sed de modo dicendi; non de rebus, sed de stilo, qui unus est in magna similitudine rerum pro cuiusque natura & exercitatione diversus. At enim stili nomine non verba solum, sed sententiæ quoque significantur. Ita videlicet: sed nulla tamen sententiæ illustris est, nulla Oratore digna sine apta comprehensione verborum. Tux sunt omnes, M. Tulli, singulares, exquisitæ, ac prope divinæ sententiæ: ipsæ tamen illæ & cum dicerentur, ingenti populi Romani admiratione exceptæ, & cum scriptæ sunt, totius Orbis omniumque ætatum consensione probatæ, si dura & inquinata aut Apuleji, aut Tertulliani, aut Marcellini dictione fœdentur, non secus ac pulcherrimæ matronæ obsoletis sordidisque vestibus indutæ, pulchritudinem omnem ac dignitatem amittent. Contra vero nulla est tam minuta sententiæ, tam nulla vulgaris, quæ Tulliana periodo comprehensa, Tullianis floribus ornata, Tulliano colore picta, non in aliam statim naturam migret, auresque hominum & novitate capiat, & suavitate detineat. Hoc vero non oratoribus proprium, sed etiam poetis esse commune, cum ipsa probat artis utriusque cognatio, tum vir acutissimi ingenii T. Tassus animadvertit; qui de Italico Casæ epigrammate cum disse-

1. 3. de
orat. cap.
6. & in
orat. c.
44.

E

reret,

reret, ostenderetque præcipua ejus lumina esse verborum, sine ulla dubitatione affirmavit, communes tritasque sententias, elocutionis splendore illustratas, reconditis atque eximiis, sed luce carentibus & ornatu, longissime antecellere. Verum de poetis nihil ad nos: oratores quidem certe nisi huc labores omnes cogitationesque conferant, ut quæ invenerint, concinne & eleganter efferrant, nihil invenisse, nihil tenere videbuntur, vacuisque subselliis verba facient. Sin autem mirabili hac augendarum rerum & ornandarum virtute valuerint, nihil tam modicum de administranda Rep. dicent, nihil de rerum natura, nihil de juris legumque scientia, quin plura & majora scire, quam illi ipsi, qui hæc tractant, judicentur. Est enim composita & expolita oratio instrumentis illis non valde dissimilis, quæ oculis admota ex una quidem parte res minimas in immensam magnitudinem augeant; ex altera verso maximas ita contrahendo minuunt, ut vix esse in rerum natura videantur. Tale sibi quippiam, nisi fallor, Isocrates proponebat animo, qui oratoriam artem cum definiret, hoc totum volebat esse, facere de parvis magna, de magnis parva: quod cum diceret, perspicuis sane verbis ornandi copiam & varietatem significabat. Quæ enim re ipsa parva sunt, omniumque experientia & confessione parva, non aliter fieri magna possunt, quam si multiplici ratione explicata, & per varia figurarum genera fusa ita pingantur, ita colorentur, ut auditorum animos mentesque præstringant. Hæ sunt præstigiæ illæ, a quibus sibi suisque civibus cavebat Cato, qui Carneadem

Plutarc.
in Vita
Isocrat.

dem Atheniensium Legatum cum audisset ita pro
 iustitia dicentem, ut nemo non assentiretur, eum-
 demque rursus ita, quæ dixerat, impugnantem,
 ut omnes sententiam mutarent; ejicite, inquit,
 hunc hominem, cui nihil persuadere difficile est.
 In quo ego Catonem, si hominis mores damna-
 vit, non reprehendo; si eloquentiam, Catonem
 in Catone requiro. Huc spectabant Leontius Gor-
 gias, Trasymachus Chalcedonius, Protagoras Ab-
 derites, Prodicus Chius, Hippias Eleus, cum
docere se profitebantur, quemadmodum causa inferior Cic. in
dicendo fieri superior posset. Ingens sane promissio, Brut.
 & nimium fortasse audax; nisi quod tanta cap. 8.
 est elocutionis vis, ut novam quamdam rebus
 formam inducens, humilibus dignitatem tribuat,
 parvis magnitudinem, obscuris lumen, abjectis
 nobilitatem. Itaque in hoc qui dominatur, vi-
 resque suas & facultatem sentit, gloriatur per me
 licet, se vertere posse omnia, imponere omnibus,
 trahere, impellere, concutere, forum curiamque
 totam permiscere. Videtis, opinor, Auditores,
 in quo ea posita facultas sit, quæ nobis ad do-
 cendum proponitur: neque vero illi non vident,
 qui adversus nos disputant, sed quod assequi non
 potuerunt, satis callide aspernantur. Verumtamen
 novimus homines: clament, irrideant, Nizolium,
 Doletum, Calepinum nobis objiciant; numquam
 obtinere poterunt, ut desipiamus. Id antea si di-
 dicissent, unde nos avocare conantur, efficere ali-
 quid fortasse possent; quia ne eloquentia quidem
 ipsa oppugnari potest sine eloquentia. At vero
 sua illa jejunitate inopiaque sermonis tantum ab-
 est, ut quippiam a nobis exprimant, ut modo

Ethic. I. I.
C. 3.

risum moveant, modo stomachum, modo etiam miserationem. Quid quod etiamsi non tanta esset in eloquendo vis, non tanta dignitas, non denique difficultas tanta, quantam ex iis, quæ diximus, quilibet cognoscere potest; nihilo tamen secius puerorum studia, nec puerorum tantum, sed etiam adolescentum in verborum iudicio & constructione diutissime teneremus? Est enim præceptoris non desipientis sequi naturam, & ea singulis ætatibus addiscenda proponere, quæ singulis aptissima sint. Valet memoria juvenus, ingenio non satis valet; quin ea juventuti tradimus, quæ non tam ingenio indigent, quam memoria? Quid Stoa, quid Peripatus, quid Academia ad hanc ætatulam, ad hoc ingeniolum? Ipsum illud Philosophicum pallium, ora hominum ad rerum gravissimarum tractationem composita, ipsa scholæ species, nomen ipsum sapientiæ, severitatis plenissimum, accedentes perterrebit. Nullus est in Philosophia locus tam planus & facilis, quam qui de moribus inscribitur & officio: hunc tamen ipsum cum explicaret Aristoteles, adolescentes procul esse jubebat, & aliunde sibi, quæ discerent pro ætatis suæ viribus, comparare. Aut igitur nihil est, in quo ætatem primam exercere debeamus, aut una est verborum cura; quæ, cum tam necessaria sit, quam est a nobis multis rationibus confirmatum; cumque tam minuta appareat, ut neque viros deceat, neque senes; non potest nisi per summam stultitiam a Rhetoricis scholis ablegari. Sed ablegetur, si Diis placet, ablegetur: succedant ejus loco spinosæ Dialecticorum ambages, ambiguæ Jurisconsultul-

sultorum formulæ, retrusæ Philosophorum ideæ; traducatur per hæc adolescentia; veniatur ad rostra: quid tum? Nonne vides, te populum habere iudicem, hoc est qua parte minime vales, plurimos homines; qua aliquis es, modo centesimum quemque, modo nullum? Itaque cum paucissimis placeas communione studiorum, plerisque omnibus insanire videris. Philosophica quædam delibas, & feliciter explicas? Euge, Lucretius annuit. De publico privatoque jure sermonem inferis, sciteque disceptas? Euge, Scævola probat. Altius assurgis, & siderum motus describis non inepte? Euge, Manilius laudat. Interim vero in verbis peccantem ceteri omnes reprehendunt, puerique ipsi, * ὡς ἐξ ἀμαξῆς λαλῶντες, impune irrident. En, inquiunt, præclarum Oratorem, qui ne illum quidem sermonem callet, in quo se jactat. Audisti solæcismos? Vidisti quo ore, quam duro, quam impudenti in magna civitatis luce, velut in umbra ludoque nostro, ea diceret, quæ nulla posset Latini Scriptoris auctoritate confirmare? Ubi illa invenit adverbia *intrinsece, extrinsece, amodo, cælitus, divisim, fusim, jure merito, private, duriuscule, gnare, diversimode, seorsum, undeque, sæpesæpius*? Ubi verba *ablatō, abhorrresco, elucesco, insolesco, correspondeo, exardeo, elucido, frigesacio, irritō, intertexo, obtenebro, pramano, unio, subintelligo*? Ubi nomina *historiola, historiuncula, extemporaneus, gratitudo, apitudo, ostensio, versutia, valor, oscitantia, ironicus, panicus, calicus, promittudo, sublunaris, exuvium*? Ut nihil pudet! Quid illa, inquit alter, quæ ferrea cum sint, ferreisque pejora, populo tamquam au-

* Tamquam e plauistro loquentes.

rea venditavit? *Influxus & ingratitudo Firmici, latinior & latinissimus Hieronymi, incapax Prudentii, licite Orosii, proficiuus Cassiodori, titillamentum Fulgentii, nullatenus Capellæ, econtra Servii, accino Diomedis, adinvicem Augustini, abjuratio Isidori, certitudo, collimo, nuspian, versio, multoties fortasse nullius. A barbaris ad σόλοικα & impropria descendunt, sibi que invicem magno cum risu memorant erubesco negligentia, gratulor tecum, ut tu inquis, sique studia, materna lingua, abs re, semel & bis, si fortasse, & sexcenta. Talia qui ferre libenter potest, & fieri puerorum fabula, verborum curam abjiciat: sed nobis tamen aliquanto verecundioribus nolit esse molestus. Qui vero ferre non potest, mature incipiat de verbis quærere, & in memoriæ thesaurum ad prima quælibet recipienda paratissimum selecta recondere. Atqui non desunt, qui serius in viam revocati velis remisque contentur, summoque labore & ingenio adolescentiæ damna rependant. Non desunt enimvero, quia non debent ad hanc rerum humanarum pulchritudinem & varietatem nec in natura, nec in civili administratione, nec in litteris deesse monstra. Sed isti tamen, ut cetera consequantur, numquam profecto ita flectent orationem, quin ex orbe universo labor appareat ac difficultas, qualis in citharædo, qui sero fidibus didicit, obduratosque ætate digitos pertinaci exercitatione nonnihil mollivit. Et hi quidem nostri sunt, sed longo tamen intervallo nostri: quippe elocutionem probant, sed elocutionem similem suæ, ne ipsi non optima consecuti videantur. Nolunt sermonem nudum & rudem, sed si paullo sit ornatior,*

tior, tamquam muliebre & effeminatum rejiciunt. Nihil mite laudant, nihil suave, nihil fluens; sed vehementia, concitata, vibrantia; horrida etiam sæpe & antiqua; trunca & aspere cadentia; strigosa, hiulca, rigida, dissipata. Genus hoc orationis puræ & emendatæ, sed neque factæ, neque conclusæ libenter arripitur ab adolescentibus, tum quod numero caret, in quo tota est ducendæ periodi difficultas, tum quod crebris hiatibus insistens, gravitatem habere videtur, levesque sententias strepitu ipso sustinere. Ego equidem hoc malo, quam nullum; cetera, quam hoc. Neminem enim vidi, qui cum posset ornatè ac numerosè dicere in hoc præsertim epidictico genere, in quo uno Latina eloquentia a foro curiaque pulsa denique constitit, non ita mallet, quam numeros incidere, & per abrupta inæqualiter ferri, seu potius subsultare. Adde quod Romani ipsi, quorum eloquentia non ad pompam, sed ad pugnam nutriebatur, non ante se foro populique judicio committebant, quam omnes orationis delicias sibi comparassent, vel comparare conati essent; non ut iis ubique uterentur, sed ut, cum res postularet, uti possent. In ipso enim judiciorum certamine remittenda est aliquando contentio, & judicis animus pacata suavique dictione relaxandus; quod perpetuus idemque cursus non euntis, sed bacchantis esse videatur. Ceterum quod verentur, ne concidat oratio, siquando motum inhibeant, & moderatius progrediantur, velim eos cum Cicerone aliquanto versari familiarius. Quis illo ardentior, quis incitator, cum in Verrem, cum in Clodium,

cum in Catilinam, cum in Pisonem, cum in Antonium invehitur? Quæ vis, quæ actio, qui cursus universa torrentis instar abripiens? Cum tamen satis putat calere animos, impetum cohibet, & ab acerrima contentione ad elegantem expositionem, ad lepores, ad facetias tamquam a Tragicis ad Comica repente descendit. Inde re-
fectis viribus, rursus bellicum canit; crebroque mutato dicendi genere urgendo, jocando, irridendo, execrando ad perorationem accedit, in qua præsertim ostendit, quantum ipse elegancia valeat & varietate, quantum varietas & elegancia valeat in eloquentia. Si ergo vitiosum est suaviter & numerose dicere, amandetur hinc Cicero, cujus orationes aliquæ suavissimæ totæ sunt, ac pæne Isocraticæ, ceteræ varix, magnaque sui parte ad delectationem compositæ. Cicero autem? Amandetur eloquentia ipsa, quæ nisi splendida est, nisi comta, nisi elegans, nisi numeris perfecta & conclusa, eloquentia non est, sed incondita quædam & ingrata loquendi profluentia. Non ignoro, futuros esse aliquos, qui totam orationem hanc ad invidiam detorquentes, dicant hoc ipso die, me rerum inventionem abstulisse oratori, inanem verborum sonitum reliquisse. Sed utcumque dicant, qui omnia referunt ad reprehensionem: ego illud primum dico, res Oratori necessarias esse, quia probare necessitatis est; sed rebus fidem artificio verborum afferri, verborum artificio derogari: deinde dico, inventionem esse veluti solum & fundamentum elocutionis; sed illam ad multas facultates, hanc ad Rhetoricam solam pertinere: denique dico, inveniendi facilitatem

tatem longe melius, quam in prima, in aliis ætatibus comparari posse; facilitatem eloquendi nisi in prima & altera comparari non posse. Hæc nos in verborum studio detinere solent; hæc detineri nolentibus prædicamus. Hæc eadem Cicero-
nem, hæc Quintilianum, hæc ceteros dicendi magistros impulerunt, ut eloquendi præcepta multo plura scriberent, nobisque diligentius commenda-
rent, quam inveniendi simul & disponendi. Itaque qui contra nos dicunt, non nos quidem adversarios habent, qui nulli sumus, sed viros in hac arte totius antiquitatis peritissimos. Quamquam neminem ego eloquentem virum contra dicentem audivi: audivi Theologos, audivi Philosophos, audivi Jurisperitos, audivi etiam clamatores aliquos, sed qui vel ingenii tarditate, vel laboris fuga, vel utroque ab hac laude repulsi, nihil sibi laudandum putarent, nisi quod ipsi præstare possent. Porro cum Theologos nomino, cum Philosophos, cum Jurisperitos, intelligo sane quos viros, quantæque auctoritatis! Sed meum est nihil cum fraude dissimulare, vestrum autem rationum momentis, non hominum opinione moveri. Illi enim quod sibi imperaverint, presse & acute ad veritatem inquirendam disputare, pati nullo modo possunt verborum circuitus, & illam figurarum copiam, quæ in sensus irrepit, eosque tractando ac permovendo, quocumque incubuerit, sequi jubet. Liceat illis amare sua; sed nobis quoque liceat amare nostra: illi subtiliter differant, nos eleganter; illi strictim, nos late; illi ad sapientes, nos ad populum; illi vera, nos non tam vera, quam vero similia. Quod si obtinere pote-

rimus sine pugna, præclaro fœdere juncti, Apollini Musisque litabimus: sin minus, æterna bella sustinere parati sumus, te duce atque auspice, Princeps Eminentissime, qui magno ingenio præditus optima vides, magna prudentia jubes, magna constantia tueris.

EPISTOLA

Præposita editioni primæ hujus Orationis.

Sive fato aliquo fiat, sive tanta illa deteriorum orationum copia, quæ in lucem quotidie mittuntur, certe sit, ut in summa bonarum artium felicitate magnum sit eloquentiæ fastidium, nec jam oratorem nisi de verendis Religionis mysteriis dicentem æquo animo toleremus. Hinc & qui libros parant, & qui typis mandant, ita sibi orationes cavent, ita omnes pene ominosas putant, ut non modo oblatas rejiciant, sed (quod alicubi contigit) ne sibi offerantur, propositis publice monitis, mature diligenterque provideant. Quod si quis ea patientia & humanitate est, ut donari sibi aliquam sinat, non ea conditione accipit, ut artificio distincta sit, non ut electis verbis gravibusque sententiis composita, non ut equaliter constanterque ingrediens, & in omnia genera prudenter fusa; sed ut variarum rerum eruditione exaggerata, ab orationis forma quam longissime discedat, & quedam quasi disputatio tali quærenti sæculo videatur. Quasi vero domina illa fori, domina curiæ eloquentia, ceterarum facultatum apud Græcos Latinosque facile princeps, nugatorium aliquid sit; nec diutius in re litera-

seraria ferri debeat, nisi suam illam verborum copiam splendoremque abjiciat, & in aliam quamdam facultatem evadat. Audivi ego homines, audivi, qui totum eloquendi studium contemnerent: nosque pro sua quadam bonitate monerent, ne miseros adolescentes tantopere de verbis sollicitos redderemus. Id me potissimum movit, ut elocutionis causam susciperem; & quantum fieri per me posset, ostenderem, nihil tam esse ejus ætatis proprium, quæ Rhetoricis vacat, quam diligens ac diuturnum verborum studium. Itaque primum artem ipsam, tum eorum naturam considero, quorum mihi studia commendantur; unde partes existunt orationis duæ. Atque in prima quidem elocutionem potissimam esse oratoris virtutem ex nomine ipso confirmo; deinde ex Cæsaris, Ciceronis, & Quintilianii auctoritate; tum quod sola sine inventione satis bonum oratorem faciat, inventio sine illa non faciat; postea quod eloquentiam ab aliis facultatibus distinguat; deinde quod oratorum genera inter se diversa constituat; postremo quod faciat de parvis magna, de magnis parva, in quo totam esse eloquentiæ vim Isocrates existimavit. In altera vero parte ita urgeo, quod institui, ut nihil magis adolescentiæ convenire, quam verborum studium, nihil verborum studio convenire magis, quam adolescentiam contendam. Itaque per quamdam ὑποτίπνωσιν ejus ætatis vitia subjicio, quæ, verborum cura primis annis omissa, ad dicendum accedit; multisque confirmo, perfectum oratorem esse nullum, nisi qui studiorum suorum tempora ab ipsa pueritia recte distribuit, & ætati cuique propria mature assignavit. Hæc ii si legent, quos maxime optamus, desinent, ut spero, aliquando illorum calam-

laniatorem dolere, quos in hoc studio ferme uno diu
multumque occupatos detinemus. Quod si non desi-
nent, pergami nihilominus incudem hanc validissime
tundere. Neque enim mihi causam, sed vires ad
eorum animos expugnandos defuisse putabo. Vale.



ORATIO IV.

AD PHILOSOPHIAM.

*Nulla est adolescentibus tradenda Philosophia,
nisi historica.*

QUOD eos fecisse puto, qui primum Abylam & Calpen præterveſti, nova ingredi maria, novaſque regiones quærere auſi ſunt, ut multis ſubinde difficultatibus impediti, aliisſque ex aliis periculis territi, ſuam ipſi levitatem audaciamque incuſarent; id ego hodierna luce facio, qui ex minoribus facultatibus longo mihi uſu familiariffimis, tamquam ex patrio lictore ſolvens, Oceanum ipſum tentare cœpi, & Philoſophicæ provinciæ velificari. Aliud eſt enim de orationculæ partibus, ac de naturæ principiis diſputare; aliud ſyllabas metiri, atque orbem terrarum; aliud denique rerum nomina, ac res ipſas, quæ cœlo terraque continentur, ad multorum institutionem definire, diſtinguere, illuſtrare. Nullus hic verborum globulis locus, nullus translationibus, nullus antichetis; exulat elegantia, jacet amplificatio, artificium omne figuræque frigent; quibus juventuti noſtræ aliquando impoſuimus, & in dicendo eſſe aliquid viſi ſumus. Quamquam ſit hoc difficile multis, qui ſe Rhetorico ludo concluſos exiſtimant, umbræque illius terminis tota vita circumſcriptos; mihi vero non debet eſſe arduum, nec inuſitatum, qui ab ipſa adoleſcen-

Cic. de
Orat.
1. 3. c.
19. &
Quintil.
1. 1. proœ.

scientia ex loci hujus institutis in omnes disciplinas excurri; qui Philosophiam ipsam triennium professus sum, qui demum ita in oratoria facultate constitui, ut non eam Quintiliani præceptis definiri putarem, sed infinita quadam artium ac disciplinarum cognitione comprehendi, quibus pro re nata (quantum quidem popularis artis natura patitur) in foro, in curia, in judiciis uteretur. Accedit, quod ex omnibus disciplinis nulla est tam eloquentiæ conjuncta, quam Philosophia; quæ ne distincta quidem ante Socratem fuit; & cum per illum distincta est, pristinae tamen communionis memoriam adeo retinuit, ut consecutis inde temporibus Philosophi præstantissimi nimis contemplationis laborem, scholæque severitatem dicendi exercitatione temperare consueverint; & oratores eloquentissimi a fori curiæque tempestate in Philosophicas litteras tamquam in portum aliquem se se recipere. Verum, utcumque est, juvat fidem solvere tribus abhinc annis vobis obstrictam; & id, quod sentio de hujus facultatis studiis, non ex officio solum, sed ex more quodam meo, mihi que insita dicendi libertate sine ulla trepidatione patefacere. Ego equidem, Auditores, & ab aliis sæpe quæsi, & mecum ipse reputavi, quid causæ esset, quod cum adolescentes in Philosophicis scholis diutissime teneantur, nihil tamen inde nisi præjudicia quædam plerumque colligant, quibus quasi superstitione adstricti ne fieri umquam Philosophi possint, impediuntur: cumque & ejus ætatis imbecillitatem, & scientiæ naturam, & communem docendi rationem attente considerassem, in eam denique opinionem veni,

ni, ut existimem, constanterque defendam, nullam Philosophiam, seu veterem sive novam, adolescentibus tradendam esse, nisi historicam. Historicam porro cum dico Philosophiam, differendi studium prorsus excludo, & grandia illa Academicorum, Peripateticorum, Democriticorum nomina adolescentibus adimo, quæ consequi tam mature nequeunt; nec vero umquam consequentur, si immature affectabunt. Hoc ut ostendam, multa mihi de tota ratione Philosophiæ, multa de adolescentium ingeniis, nonnulla etiam de magistris dicenda erunt; in quibus non vereor, ut æquissimos hujus civitatis Professores ne levissime quidem offendam, quos extra omnem ingenii aleam multis in rebus perspecta sapientia, ordinis dignitas, fortuna loci, & quod longe maximi momenti est, Principis judicium constituit. Non eadem est ratio privatæ, publicæque scholæ; quæque nos in hac umbra nostra angustissimis definita regionibus vel probanda, vel saltem ferenda ducimus, ea si in tantam illam lucem hominumque conspectum afferantur, vel nimis exigua sunt, vel etiam fortasse inepta. Imo ne nostris quidem ita dico, ut statim majorum instituta mutari velim, novamque iniri philosophandi rationem: quippe mihi ipse imperavi, nova multa, si fieri per me possit, excogitare, sed paucissima facere.

Scholarum fere omnium consuetudine receptum est, ut Rhetoricis studiis Philosophica statim succedant; quod hæc omnibus disciplinis communia sint, viamque ad contemplandum, & intelligendum patefaciant. Sive enim Medicus esse velis, sive Theologus, sive Jurisperitus; sive demum
ad

ad poesim, aut eloquentiam redire; facem veluti quamdam facultatibus ceteris præfert Philosophia, illis se omnibus inserit, magnamque sui partem pro cuiusque necessitate liberalissime supeditat. Sed cum philosophandi rationes multæ sint, maximeque diversæ, nulla est earum tam diligenter colenda, si fructum quærimus institutionis, quam quæ latissime patet. & ad quamlibet disciplinam contendentibus auxilia plurima ferre potest. In quo si Philosophos ipsos consulamus, hanc sibi quisque laudem magnis clamoribus sumet atque arrogabit; sin autem ratione agamus, facile reperiemus, non vetus philosophandi genus, aut novum, non Academicum, non Stoicum, non Peripateticum tot tantisque rebus suffitere; sed unum illud, quod omnia cum veterum, tum juniorum Philosophorum dogmata, sine ullo partium studio descripta & exposita complectatur. Si enim Theologis Aristoteles potissimum & Plato, si Pythagoras Mathematicis, si Moralibus Socrates, si Solon & Lycurgus Jurisperitis, si Medicis utiles illi sunt, qui non tam contemplando, quam experiundo philosophantur; ad omnes istorum libros adolescentes ducendi sunt, omniumque doctrinis instituendi; ut quocumque tandem siue necessitate, siue consilio, siue etiam casu aliquo deferantur, munitissimi accedant. Neque vero hoc tam est infinitum, quam sibi aliqui fortasse fingunt. Ita me Superi ament, ut multo plus operæ ac laboris infumunt, qui uni se Philosopho dediderunt, ejusque cogitata omnia per ambages æternasque lites proposita addiscunt, quam qui Philosophorum

rum omnium opiniones simplici narratione conclusas memoriæ mandant. Ut enim principem totius Philosophiæ locum attingamus, nonne facilius est naturæ principia, quæcunque sunt pro se-
ctarum varietate inventa, litterisque tradita, in medium afferre, & sine ullis controversiis explicare, quam se totum ad unius hominis auctoritatem conferre, cujus dicta innumeris quæstionibus enucleanda sint, argumentis munienda, privatis publicisque experimentis propugnanda? Memini ego, memini, quam multis non diebus, sed mensibus, quantoque cum tædio ingentia illa volumina aliquando volutarem, in quibus de Aristotelica materia, de forma, de privatione tantopere disputatur; nihilque demum percipitur, nisi hominis unius sententia, acuta certe quidem & Aristotele digna, sed immensis difficultatibus involuta, anceps, ambigua, & antiquis oraculis pæne similis. Animadverti sæpenumero, quam totum illud scrutandæ naturæ genus auditoribus identidem oscitantibus displiceret, cum magno verborum apparatu, magnæque animi contentione quærerem, *utrum privatio esset aliquid; utrum cum materia & forma componeret totum; utrum totum ipsum a suis partibus simul sumtis distingueretur; utrum materia potestas esset; utrum sola posset existere; utrum nihil, an non ens appellari deberet; & id genus alia alio tempore, & aliis hominibus fortasse pulchra.* Sed hæc cum more facerem institutoque majorum, nec aliter facere vellem, quam juberer; id tamen inde usque decrevi, siquando mihi dicendi publice copia daretur, totum hoc, quidquid est operæ,

improbare, & historicum quoddam philosophandi genus proponere, quod varietate rerum & facilitate juventutem alliceret, & sine satietate detineret. Quanto enim est ad docendum liberalius, & ad discendum expeditius, si dicas, res omnes apud Pythagoreos materia numerisque constare, hoc est materia certo partium numero compacta; materia & ideis apud Platonicos, hoc est materia per varias divinæ mentis ideas varie disposita; apud Peripateticos materia & forma, hoc est materia per suas formas absoluta & perfecta, & in certis rerum generibus collocata? Quod si addas infinitum Xenophanis & Melissi, chaos Empedoclis & Anaxagoræ, plenum & inane Democriti, frigidum & calidum Parmenidis, terram Hesiodi, aquam Thaletis, aerem Anaximenis, ignem Heracliti; tantumque in singulis immoreris, quantum satis est ad explicationem; jam id effecisti in parte totius Philosophiæ difficillima & implicatissima, quod omnes debeat adolescentes non dicam ingenuos, & ad studia natos, sed etiam bonarum artium otores mirifice delectare. Ex quo etiam fieri potest, ut illi ipsi, qui consuetudine potius, aut otio quodam, quam philosophandi cupiditate Philosophos audiunt, multiplici hac & expedita cognitione plecti, aliarum rerum cogitationem deponant, & in hoc studio diutissime consistent. Quamquam quis est unus ita philosophandi cupidus, & ad has præsertim Dialecticorum ambages, unde gravissimæ facultatis initia ducuntur, ita factus, ut eas statim avidissime arripiat, & sine ullo magistri artificio persequatur? Omnes ferme adolescentes, quicumque
inge-

ingenio aliquo & industria valent (tardis enim & inertibus æque omnia solent esse molesta & impervia,) omnes, inquam, istiusmodi adolescentes a suavissimo musarum amplexu inviti divelluntur, ut ad severissimos homines Zenonem & Aristotelem adducantur; nec mihi adhuc inventus est ullus, quin ipso in limine valde palluerit, tamquam ab amœnissimis hortis in vepres & dumeta compulsus. Quod siqua ratio est terroris hujus vel tollendi prorsus, vel minuendi, ut certe non deerit differendi libidinem coercenti, quid est cur nolimus auditoribus hilaritatem, & scholis frequentiam comparare? Sed hætenus de illis, quorum vitæ ratio dubia est, necdum quo tendant, certo consilio constituerunt. Agedum ad illos veniamus, qui politiorum litterarum cupidissimi, eo curas omnes ac studia referunt; neque enim omnes tam brevi oratione complecti possumus, neque tamen illos omittere debemus, quorum ipsi laudem & gloriam sequimur, tametsi non assequamur. Jam porro cum litterarum & eruditionis nomine veterum scriptorum interpretatio præter cetera contineatur, tantumque pateat provincia hæc (nequid supra hominis vires ab homine postulemus,) quantum Græcæ Romanæque litteræ; uter de se plura præstare poterit, & magnam illam eruditi personam sustinere, ipse, qui totus sit Aristotelicus, vel Platonicus, vel Democriticus, an vero ille, qui Aristotelis, qui Democriti, qui Platonis, qui denique Philosophorum omnium, quicumque in aliquo numero sunt, & familiam aliquam ducunt, opiniones teneat, alias ab aliis distinguat, & ad auctorem quam-

que suum, ubicumque invenerit, referre possit? Primus quidem ad pugnandum paratior erit, & siquid incidet ex schola sua, Philosophus etiam judicabitur valde bonus; sed ubi se alia ex aliis scholis petita pro Scriptorum varietate offerent, in plerisque deficiet, sibi que dissimillimus, nec Philosophus esse videbitur, nec eruditus. Alter vero ad philosophandum nullo certo genere acer, sed in omnibus tamen diligenter instructus, perpetua quadam, sibi que consentiente doctrina in omni antiquitate versabitur, & quidquid occurreret ex Philosophia, cujuscumque tandem sit ætatis, cujuscumque sectæ, cujuscumque hominis, ita pertractabit, ut id potissimum profiteri videatur, nec tamen ad loquacitatem & contentionem profiteri. Vix dici potest, in poetarum præsertim interpretatione quam multa requirantur ex omni Philosophica historia depromta. Stoici quidam sunt, quidam Epicurei; sed neque Academici desunt, neque Peripatetici, neque Pythagorei, & in uno sæpe carmine multorum Philosophorum placita conjunguntur. Accedat huc aliquis ex illis, qui tantopere sibi placeant, quod sectæ alicujus nomine censeantur: hærebit identidem, dubitabit, hallucinabitur, modo librarium negligentia, modo Poetam obscuritatis postulabit; & ipsa illa, quæ recte dicet, timide, cunctanter, ambigue, quasive divinando dicet. Ex hac totius Philosophicæ eruditionis ignoracione magna quædam Criticis scribendi seges exorta est, qui Homerum præsertim tamquam ineptum fabularum narratorem condemnarunt; quod multiplicitis sapientiæ semina, ex vetusta Ægyptiorum

rum ac Phœnicum disciplina collecta, fabulisque conclusa non intelligerent. At enim paucis loquimur; nec tanti est in litteraria Rep. Grammaticorum & Rhetorum ordo, ut statim Philosophicæ institutiones ejus causâ mutandæ sint. Non omnia brevissimo tempore afferri possunt, ut ante dixi; verumtamen si numero agenda res est, non eruditos modo, sed universam hominum societatem complectar, quibus ad honeste colloquendum, seque mutuis sermonibus oblectandum tanto magis studium hoc nostrum plurima cognitione diffusum prodesse ostendam, quanto pulchrius est multis in rebus versari dicendo posse, quam eodem semper vestigio hære, eademque recoquere. Etenim si humanæ vitæ conjunctio nulla re magis, quam honesta quadam & jucunda sermonis communione alitur, quid est quod hominum consuetudines & familiaritates magis ornare possit, quam collecta hæc ex omni Philosophiæ genere, de quacumque re, quæ in disputationem cadat, dicendi copia & prudentia? Et si autem non omnis de rebus Philosophicis controversia est, nulla tamen ceterarum facultatum tam ipsa per se constat, quin ad veteres Philosophos, unde omnis profluxit cujuscumque generis scientia, aliquo modo referatur; ut qui se hac in parte munierit, nullum doctissimorum hominum sermonem, nullam disputationem reformidet. Itaque si quis est, quem potissimum velim Philosophica hystoria ad elegantiorē vitæ usum erudiri, ii certe sunt, a quibus nobilitas generis, & fortunarum copia nihilo plus scientiæ postulat, quam quantum ad honestas amicitias conciliandas,

& probe colendas politissimis moribus satis sit. Nihil enim in amicitia potest esse insuavius, quam intemperantia illa subtilius disputandi, & quæsitæ alternis pæne verbis in uno aliquo genere scientiæ opinio: quo tamen morbo omnino carere nequeunt homines isti molestissimi, qui non multiplicem, sed magnam eximiamque cognitionem e scholis haustam profitentur. Fac enim illos sibi videri Peripateticos (magnum sane nomen, & antiquæ gloriæ fama verendum, ac pæne sacrum, si loco & tempore usurpetur; ridiculum, si ad ostentationem obtrudatur,) fac, inquam, eorum aliquem Peripateticum sibi videri: nullum jam licet inferre sermonem, quin eodem recidatur. Græcorum Remp. attingis? Græcorum, inquit, Aristoteles sapientissimus fuit. Macedonas appellas? Magnum, inquit, Alexandrum instituit Aristoteles. De Rhetore aliquo mentio est? At ille, Rhetorica præcepta Aristoteles optime scripsit. Ad Philosophum transis? Hic vero magna voce clamat, Philosophorum princeps est Aristoteles. Nihil denique nec infra Lunam, neque supra nominabis, quin ad Aristotelem & Aristotelicos libros, velis nolis, citissime deducaris. Nimirum nihil præterea novit. Quare nobilissimi adolescentes, qui ad unam communis vitæ elegantiam, civilemque convictum instituuntur, ne quando per hæc, aut similia ridiculi fiant, non tam ut multum discant, curare debent, quam ut multa. Ergo, inquiet aliquis, adolescentes illi, qui Philosophi futuri sunt, totiusque gloriæ, aut etiam vitæ spem in hoc studio collocarunt, certis se claudere finibus debent, partesque illas mature
elige-

eligere, quas deinde sine ulla aberratione sequantur. Equidem non diffiteor, in re ceteroquin valde plana id unum esse scopulosum atque difficile, quod historica Philosophia satis ornare videatur ad alia pergentes, non satis munire philosophantes. Videte, Auditores, quam nihil dissimulem: sed simul illud pro vestra sapientia cogitate, quam nihil meæ causæ diffidam, qui locum maxime lubricum extrema oratione persequor, & quod ex arte declinare debueram, vel leviter attingere, id totum explico, vestrisque cogitationibus ac prope oculis, quantum quantum est, ingenue subjicio. Age igitur, habete quid sentiam. Mitto, quanto illi ornamento sit, qui se Philosophum putat, omnium Philosophorum historiam a primo illo inventore Thalete (quantum quidem antiquissimarum rerum memoria concedit,) distincte cognoscere; quæ singulæ sectæ fuerint, quando inventæ, quomodo propagatæ, quamdiu cultæ, qua ratione sublatæ; mitto, quam sit etiam necessarium proponenti sua in eodem genere aliena non ignorare. Hoc unum dico, quod maximam vim apud homines sapientissimos habere debet, qui velit ex multis philosophandi rationibus unam eligere, eum temere prorsus facere, nisi omnes sibi ante oculos ponat, accurate perpendat, mature, prudenterque dijudicet. Nisi forte, quod accidit Chærephonti, ut oraculi voce ad Stoicos mitteretur, id sibi quisque promittit; sect. maestatisque hostiis in ipso Philosophiæ limine, de secta eligenda Apollinem sciscitatur. Zeuxin
 ferunt Heracleoten, cum pulcherrimæ mulieris si-
 mulacrum ex Crotonitatis virginibus effingere ius-

Luc. de

sect.

Cic. de

Inv. l. 2.

C. 1.

de sect.

fus esset; cumque in palæstram ductus mira dignitate pueros vidisset, ex quorum sororibus formosissimas conjiciendo deligeret, non prius tamen delectum habere voluisse, quam virgines ipsæ unum in locum publico consilio conductæ essent, & suismet oculis singularum formam aspexisset ac judicasset. Quod si nos parem in re multo gravissima diligentiam adhiberemus, profecto non committeremus, ut adolescentes nostri Philosophi casu fierent, & unam aliquam sectam suspicando amplecterentur, contra ceteras propugnandam, quas illis non ratio, sed impetus & inscientia reddit invisas. Nihil enim tam ridiculum dici potest, quam quod isti respondere solent, quoties interrogantur, quemadmodum Hermotimus a Luciano, quonam certo consilio ducti eam præter ceteras viam inierint, quam sequuntur; cumque sibi ducem elegerint, cujus præceptionibus irretiti, reliquos omnes nulla re sibi nisi nomine cognitos contemnunt, irrident, & falsi crimine, indicta causa, condemnant. Ecce autem præjudicia illa, quibus homines ab ipsa adolescentia occupatissimi ad philosophandum accedunt, & rationi, & sensibus ipsis fidem potius negare parati, quam susceptas partes umquam deferere, & aliena probare. Utinam vero hæc ut multi damnant in publicis privatisque scholis, ita tollere conarentur. Sed nimirum facilius est recte dicere, quam recte facere. Cur enim qui maxime possunt, non tamen occurrunt morbo huic? Quin ita adolescentum studia regunt, ut quoniam ætas illa ad recipiendum aptissima est, nec Platonem Deum esse sibi persuadeant, nec

Ari-

Aristotelem, neque Democritum; sed omnes omnium opiniones percurrant, tamdiuque retineant, donec ipsi per se, confirmata jam ætate, singulas singulis conferre possint, libereque rejicere, libereque probare? Sunt illi quidem pro suo quisque ingenio valde præstantes, & ea fama digni, quam sibi multorum sæculorum consensu pepererunt; sed nihil profecto est aut a natura, aut ab arte simplici in genere omnino perfectum, maximeque curare debemus, ne cujus doctrina tenellis mentibus altissime consignata ita illas assiduo usu, & quadam, ut ita dicam, familiaritate capiat, ut vitia quoque libenter suscipiant, aliorumque præclare inventis pertinacissime præponant: quod quidem tantum abest a recta veritatis inquirendæ ratione, nihil ut magis veritati possit esse contrarium. Ex quo Philosophi esse cœperunt, satis superque compertum est, convelli præjudicia non posse. Quin ergo curamus, ne fiant? Quin scholas ea prudentia moderamur, ut odio & amore vacui exeant adolescentes; ipsique per se libere, cum primum potuerint, philosophentur? Nam illud quid attinet refutare, quod hæc mihi proponenti quispiam fortasse reponet; nimis jam esse Philosophorum, nihilque pro tanta copia laborandum, nisi ut sapientissimum mature eligamus; a quo uno quidquid est in ceteris boni, & ipsum per se facillime cognoscamus? Apagelis. Annon enim hoc ipsum sapientissimi hominis est statuerè, quis sit sapientissimus? Fac porro statuas, Ex veteribus ne aliquem, an ex nostris? Si ex veteribus, Platonis ideæ offendunt Aristotelicos; Aristotelis

forma non placet Democriticis; infinitæ Democriti atomi non probantur Pythagoreis; Pythagoræ monas displicet fere omnibus; tantaque se mutuo contentione petunt, ut alius alii non minus quidem sapere, sed plane desipere videatur. Si ex nostris, quis ita ingenii doctrinæque fama omnium hominum suffragium tulit, ut eum sapientissimæ antiquitati, totique Scriptorum ordini sine injuria præponas? Difficile est enim abstinere risus, quoties boni viri ludum aperiunt; magnisque promissis ante denunciant, se non Platonicos esse, non Aristoteleos, non Gassendicos, non Cartesianos; esse in veteribus, esse in novis, quod sibi displiceat; esse etiam in utrisque, quod placeat; nemini se auctoratos fore, sed ex omnibus optima colligendo, suisque miscendo, liberum philosophandi genus ingenti cura & meditatione quæsitum allaturos. Euge, belle, pulchre, tibi Musisque gratulor. Accedant adolescentes, audiant, excipiant, in codicem referant: nihil est editum post homines natos æque divinum; exscribere oportet. Ac mihi quidem ita videtur, nihil esse adolescenti periculosius, quam hujusmodi homines ab initio offendere, qui non vident, quandoquidem certum Philosophiæ genus tradendum putant, satius esse unum aliquod ex illis tradere, quæ probatissima sunt, & auctoris fama commendata, quam suo de nomine Philosophos facere, & cito dediscenda venditare. Sed ego hæc adolescentibus persuadere fortasse potero, magistris persuadere non potero, qui nullam se laudem referre clamant, si nihil de suo, nisi vocem in scholam afferant. Hoc
sci-

scilicet eorum vitium est, ut velint non ad discipulorum utilitatem, sed ad ingenii ostentationem docere, nec tam esse magistri, quam videri Philosophi. Sed heus tu, si ratio hæc qualiscumque Philosophiæ illis utilis est, quorum causa laboras, quid est, cur gloriam aliunde quæras? Satis laudis retulisti, si officio satisfacisti. Præterquam quod itane sentis ex animo, hanc docendi rationem carere laude? Ergo laude carent Theologi hujus ætatis præstantissimi, qui innumeras questiones ad exercendum ingenium excogitatas longissime ablegarunt; totamque gravissimam scientiam Scripturæ præceptionibus, Sanctorum Patrum dictis, & Conciliorum decretis concluderunt. Jam illi omnes, qui non sua, sed aliena fideliter referunt, Theologi nomine indigni sunt: inveniant oportet, excogitent, comminiscantur, tum vero sapere videbuntur. Sed alias erit de Theologis sermo: ad Philosophos redeamus, quos ego ab inveniando non revoco, siquidem possint, sed rogo obtestorque, ut aliam quandam docendi, aliam contemplandi exercitationem esse constituent. Non est Philosophi narratorem agere: at est præceptoris. Historia Philosophica non est Philosophia: at neque possunt adolescentes, neque tam cito cupiunt esse Philosophi. Sed quænam istorum est, Dii immortales, Philosophia? Annon humanæ mentis vires cognoscere pro varia corporis conformatione singulis ætatibus varias, pars quædam est, nec sane parva Philosophiæ? Nunc illi quidem satis cognoscere videntur, quid tradere possint; non satis tamen, quid illi capere, quibus tradunt. Si enim pro illa,
quam

quam sibi arrogant, naturæ cognitione reputarent, eam cerebri partem, qua hominis animus ad ingenii memoriæque munia, quamdiu corpori conjunctus est, necessario uritur, ita in adolescentibus conformatam esse, ut sua quadam mollitie facile excipiat quidquid injicitur, ea tamen ipsa mollitie impediatur, ne spiritus ad intelligendum facile expediat & moderetur; non sane erubescerent, ætati illi consentanea narrando potius, quam differendo consignare. Atqui dum sua crepant, dum eadem perpetuo dicunt, repetunt, confirmant, insinuant, non id assequuntur, ut auditores minime apti repente Philosophi prodeant; sed ut ejus doctrinæ, quæcumque est, præjudiciis occupatissimi, ac veluti sacramento rogati, nullam præterea pati possint Philosophiam. Quam vero indecorum est, quam incongruum, quam a tota scientiæ natura alienum, adolescentem hominem de rebus abditissimis judicare, decernere, affirmare; & ut ejus ætatis est, tanto magis clamore & audacia, quanto minus ratione potest, susceptas partes propugnare? Non ego cum juventute tam dure agam, ut eam per multos annos Pythagorico more silere jubeam, nihilque respondere umquam, nihil interrogare; verumtamen si Philosophica eruditione contenta sit, nec sapientiam immature affectare videbitur, & in eo tamen valere, cujus præsidio perfectam absolutamque sapientiam comparare aliquando possit. Nam quod ipsa per se intempestive commentari velit, & sine prudentia garrere, iccirco factum est, ut nobilissima disciplina, non hominum ingeniis parata, sed ut Plato existimavit, Deorum munere

nobis concessa, incredibili invidia laboret; nihilque jam de rerum natura tam poeticum fingi posse videatur, quod non ab aliquo dicatur Philosophorum. Hinc modo cum horologiorum inconstantia, modo cum ægrotorum somniis, modo cum andabatarum pugnis a sapientissimis Scriptoribus comparata: hinc senatusconsulto a Romanis expulsa, & ad suos Græculos redire iussa: hinc denique a Græcis ipsis simulandi ars sæpe dicta, cujus fama & auctoritas non ipsa dignitate rei, sed singulari habitu, & contemptu ceterorum sustineretur. Quemadmodum enim summi in Repub. Magistratus si vulgari cœperint, & cuilibet ætati mandari, splendorem & auctoritatem amittunt; unde fit ut habitus ipse, & antiqua potestatis insignia, ad mores degeneres accommodata, irrideantur; ita philosophica studia maximarum tractatione rerum pæne divina, postquam in medio posita sunt, & cuique sine delectu communicata, in contemptum abiere, palliumque ipsum pristinae maiestatis insigne ad irrisionem traductum est. Ago igitur causam vestram, sapientissimi viri, cum dico, non esse adolescentibus dandum, ut ipsi per se, cum paullum aliquid in schola federint, statim philosophentur. Cum enim præstare nequeant, quod conantur, tanto nomini injuriam faciunt, & numerum quidem augent, si Diis placet, Philosophorum, sed pretium imminuunt. Ago etiam vestram, Adolescentes studiosissimi, quos cum videam in rerum difficillimarum tractatione magno cum labore fluctuare, ex illo velut Euripo in tranquillum pacatumque mare deduco, ubi & facilitas navigandi

di jucunditatem pariat, & opportunitas laudem, & modus utilitatem. Ago denique causam tuam, Princeps Eminentissime, qui cum velis, & identidem jubeas, juventutem hanc ad morum & litterarum institutionem tibi concreditam, non garulam in differendo esse, non acerbam, non pugnacem, genus hoc nostrum adsciscere potes Philosophiæ, quod nullam sententiæ dictionem habet, sed solis narrationibus continetur.

EPISTOLA

Præposita editioni primæ hujus Orationis.

Veteres philosophandi institutiones, si numero censeantur, tam multæ sunt, ut omnibus cognoscendis ne illius quidem anni sufficere videantur, qui tres hominum ætates vixit; sin autem re, ita partim antiquitate obruta periere, partim vero similia continent, ut uno nec immodico volumine Thomas Stanlejus universas comprehenderit. Nihil ergo consuecunt, qui Jonicam sectam, Italicam, Eleaticam, Epicuream, Cyrenaicam, Eliacam, Megaricam, Academicam, Peripateticam, Cynicam, Stoicam, Pyrrhonicam, Potamoniam nobis commemorant: quasi vero immensum aliquod onus oratione hac adolescentibus imponamus, quod viros senesque opprimere possit. Hoc præmonere iccirco volui, ne quis lemmate ipso, quemadmodum sæpe accidit, a legendo deterreatur; putetque a nobis ea proponi, quæ certis firmisque argumentis non solum non probentur, sed omnino probari non possint. Et vero cum de re hac sermonem apud amicos intulissem, dixissemque vide-

videri mihi multis de caussis, non Philosophiam, sed historiam philosophicam adolescentibus tradendam esse, primum quidem lapides loqui visus sum, tum id pervici, ut de illis adolescentibus concederent, qui nollent tota vita philosophari; sed ut ambas manus darent, mihiq; in universum assentirentur, id vero nec exprimere potui, nec ut exprimerem, pro illo, qui in familiaritatibus servari debet disputandi modus, pertinaciter laboravi. Nunc vero tamquam in aciem ductus, nervis omnibus viribusque contendo, primum quidem adolescentibus, quorum vite ratio adhuc incerta est, deinde illis, qui Græcam Latinamque eruditionem unice spectant, tum illis, qui ad generis commendationem vitæque elegantiam bonis artibus informantur, postremo illis, qui se totos philosophicis studiis dediderunt, per sectas omnes excurrendum esse, nihilque præter historiam ex tam longo itinere colligendum. Quid opus est pluribus? Oratoriam scriptionem afferro: nec tam me, quod ostendo, persuasisse juvabit, quam ad persuadendum non inepte dixisse. Vale.

ORATIO V.

AD THEOLOGIAM.

Theologus nemo dici potest, nisi probus vir.

JAm primo illo, quod mihi superiore anno ad altiores disciplinas progredienti a Philosophis injiciebatur, periculo defunctus, ad ipsum denique sapientiæ fastigium ascendo, & in gravissima Theologorum corona, communem studiorum naturam Scholæque hujus instituta secutus, libentissime confido. Quo in loco mihi quidem honestissimo, & a prima adolescentia multis laboribus multaue industriæ quæsito, una me res sollicitum habet, quæ multorum sermone contrita veluti proverbium circumfertur, magnos Theologos nihil credere; & quod inde consequitur, sine Superum metu, ac sine ulla immortalitatis cogitatione suis legibus vivere. Sive autem id ipsorum levitate percerebuit, quorum plurimi antiquitatis oppugnatione singularis reconditæque doctrinæ famam quærunt; sive etiam superbia, quod aliqui revera nihil credant, nisi quod ipsi ingeniolis suis longe minimis consequi possunt; sive demum insana quorundam improbitate, ac ferme desperatione, qui eam sibi necessitatem vitiorum suorum legibus impositam putant, ut ne Deum quidem esse concedant, nisi forte cæcum & otiosum; id ejusmodi est, ut magna animi provisione caveri debeat, & a nobis, nostrisque adolescentibus tamquam

quam triste aliquid ac detestabile averruncari. Quamobrem in ipso statim Theologiæ limine, pro eo, quod suscepi, monendæ juventutis officio, huc accedentibus edico, non solum ne exiguum ingenium afferant, quod est a natura impedimentum nulla fortasse industria nulloque artificio superandum; sed quod in cujusque potestate est, ne mores afferant liberos plusquam satis, & ad vivendi licentiam solutiores. Neque vero putetis, Auditores, me fines illos, quos mihi ipse circumdedi, sine causa perrumpere, & in eorum provinciam excurrere, qui cum vitiis & cupiditatibus bella gerunt: sed cum ita mihi videatur, mores & ingenium in hoc studii genere conjunctissima esse, & alterum ab altero mirifice adjuvari, id ipsum publice expono; & quantum quidem per me licet non mediocris jam usus, sed minimæ facultatis hominem, ostendo, Theologum neminem dici posse, nisi probum virum. Quod si iis persuadere potero, quorum mihi studia commissa sunt, ipsi se ab obrectatoribus aliquando defendent, & nobilissimæ disciplinæ gloriam per has insidias petitam justo sacramento vindicabunt.

Priusquam vero rem ipsam aggredior, peto a vobis hanc veniam, Auditores, ut de me, quod sæpe desideravi, pauca dicam: nam & brevissime faciam, & ea moderatione, ut omnes intelligant, me quidem non de me ipso laborare, sed de hujus dignitate loci, quem quoniam Principis sapientissimi judicio tenere cœpi, fortissime constantissimeque in omni vita defendam. Audi- vi, nostrum hoc dicendi genus planum & æqua-
bile non satis implere capacissimas quorundam

aures, qui sales identidem facietiarum, & exaggeratam multarum rerum eruditionem non tacita voluntate requirunt. Et ad primum quod attinet, utrum sit aliquis in nobis urbanitatis lepos opportune adhibitus, cujusmodi fuit in illis, quos nobis ad imitandum proponimus, nec ipse judicare possum, nec si possem, dicere ausim; dicacitatis quidem certe & comicæ cavillationis est admodum nihil. Ut enim lenissimum mihi ingenium natura largita est, ita neque voci, neque oculis, neque fronti addidit scurrile aliquid, cujus auxilio ad hanc eximiam laudem dicendo contenderem. Nihil vero minus est, quod arte comparari possit, quam ratio jocandi, & mimica quædam ad movendum risum pronuntiatio: ac si qui comparare conati sunt, cum essent suoapte ingenio vultuque ad seria compositi, stomachum & indignationem commoverunt. Quamquam si me natura ad istorum voluntatem conformasset, & tempus ita postularet, ipsi vos mihi gravitate vestra incredibilem verecundiam offunderetis: nec tam me voces quædam adolescentum levitatis indices ad audendum excitarent, quam mehercule primi hujus & alterius subsellii conspectus modestiæ moneret. At enim neque eruditi sumus. Si, quod isti faciunt, eruditio est, sexcenta Scriptorum nomina uno spiritu recitare, fateor equidem neque esse me, neque futurum umquam eruditum; non quod bibliothecis caream, unde talia sumuntur, sed quod longe diversum esse statuam oratoris officium; & quale demum cumque sit, nolim in eorum possessiones irruere, qui per hæc fucum facere consueverunt, seque pulchros be-

ros.

rosque plebeculæ litterariæ venditare. Sin autem eruditio est color quidam antiquitatis, non ille quidem ex librorum titulis semihoræ spatio collectus, & in omni sermone intemperanter fusus, sed ex diuturna priscorum monumentorum tractatione comparatus, eaque parsimonia & prudentia adhibitus, ut non facere ipse orationem, sed ornare videatur, est, si Diis placet, ut de eruditionis laude non omnino desperemus. Atque ut intelligatis, Auditores, quid hoc hominum sit, qui talia postulant, scitote illos non ingenio quidem carere, sed sanitate. Est in quo laudari possint, si sua laude contenti, aliis quoque non-nihil concedant. At vero cum ita populo persuadere velint, se unos scire omnia; neque tamen id honesta aliqua ratione consequi possint, universam litterariam provinciam criminando perturbant, magnumque sui iudicii metum qualiacumque conantibus injiciunt. De his plus satis: ad rem veniamus.

Objiunt quidam, ut ante dixi, Theologis præstantissimis ἀθεόγητα, omnisque, præter eam quæ a natura est, pietatis ac religionis contemtionem. Accusatoribus istiusmodi, qui nullorum omnino, vel paucorum vicia in omnes derivant, non esset mihi difficile audaciam excutere, siquidem vellent hoc in loco tamquam in iudicio calumniam ejurare: sed & illos abesse juvat, & nos ita dicere, ut nihil aliud spectasse videamur, nisi ut adolescentum nostrorum mores optimis monitis præceptisque componeremus. Veteres Socraticæ disciplinæ Philosophi, quorum doctrina Christianis legibus castigata in Theologicam scholam

adscita est, non aliter se inter suos numeratum iri putabant, quam si ita viverent, quemadmodum docebant. Hinc magna illa rerum humanarum tolerantia, fortunæ contemptus, projectio divitiarum, mentis consiliique constantia, virtutesque reliquæ, quas in Socrate primum ipso, deinde vero in Aristippo, in Cratete, in Biante, in Diogene, in Anaxarcho, ceterisque Stoicis æquales eorum admirati sunt, nobisque ad exemplum tradiderunt. Neque vero aut Græca juvenus in eorum scholas convenisset, aut ipsi prudentissimæ gentis magistratus convenire passi essent, nisi quæ dicerent, agendo confirmassent; totiulque vitæ ratio in publicis privatisque negotiis cum illius severitate doctrinæ consensisset. Tu vero, Theologe, quid mihi de Deo ejusque legibus; quid de Superis, atque Inferis; quid de vitiis, quid de virtutibus prædicas; si ita vivis, ut nihil eorum facias, quæ nos nisi faciamus, æternos cruciatus minitaris? Jam quid restat, nisi ut putemus, te ad ingenii commendationem talia confingere; & multorum credulitate velut ad ludum faciendum abuti? Levissimum est enim, nec omnino ferendum, quod vulgo dicunt, se neque Augustini quærere gloriam, neque Thomæ, neque Bonaventuræ; illos quidem, & præterea paucos illorum similes non comuni hominum conditione natos, sed tamquam cælo demissos divinarum humanarumque rerum studio incredibilem in omni virtutum genere exercitationem non sine miraculo conjunxisse. Diiboni, quid ita nugantur? Anne umquam fando auditum est, pietatem pugnare cum litteris, aut opus esse

esse portentis, ut res natura simillimæ conjungantur? Si enim Mathematica siderum & planetarum contemplatio, ut septimo de Rep. libro contendit Plato, pios homines facit; si illa ipsa litterarum exercitatio, quæ poeticis fabulis continetur, tamen plurimas habet ad vitæ institutionem opportunitates, ut elegantissima oratione *πρὸς τὰς νέας* D. Basilii ostendit; quid est, quod esse possit in Theologicis studiis ad probitatem impedimento, nisi forte illis, qui stomacho laborant, optimosque cibos in pessimum succum convertunt? Neque tamen postulo, ut insignia illa sapientiæ ac bonitatis exempla, ne singula quidem singulis ætatibus visa, Theologi nostri continuo referant, quod esset Theologicis scholis solitudinem ac vastitatem afferre: id quæro unum, quod & facillimum est, & cum hoc litterarum genere suapte natura conjunctissimum, ut æqui, ut honesti, ut moderati sint; nihilque dicant, aut faciant, quod a sacræ professione scientiæ abhorrere videatur. Cum enim omnes non parum offendere solent alterius cum altero de re tam gravi concertationes, tum nihil potest esse odiosius, quam ejusmodi cum ipso pugna, & tale aliquid, quale in histrionibus videmus, qui cum a scena discesserint, nihil sibi minus agendum putant, quam quod mimico illo habitu professi sunt. Quod si in facultatibus illis, quarum ratio & natura ad contemplandum unice refertur, totusque contemplationis fructus oblectatio est, qui eâ ponit auditoribus suis, multumque commendat, a quibus ipse tamquam incertis assensionem cohibet, turpissime peccat; quanto minus ferendum

dum erit, in Theologica disciplina, cujus pars maxima actionis gratia est, & ipsa contemplatio sempiternam beatitatem propositam habet, ea doceri, vetari, juberi, quæ magister ipse, ubi descendit, ante omnes contemnat, & ad irrisionem etiam, quod ipsum aliquando contingit, animi causa traducat? Qua in re si tibi noceret uni, pessimumque virus in ipso cohibitum, nequaquam glisceret ad aliorum innocentiam inficiendam, nihil insuper laborarem: sed cum ille in magna quadam luce vivere credatur, & cum Superis quodammodo colloqui, multis ad improbitatem exemplo est partim omnino cæcis, partim vero malitiose cæcutientibus, quod minime audeant sine duce & auctore pudenda patrare. Præclara vero Theologi laus, sceleri ducatum præbere; constituere signa facemque improbis; intemperanter, cupide, libidinose & agere ipsum, & agentibus excusationem comparare. Nolite porro existimare, Auditores, vitium ullum in hujusmodi homine modicum esse: omnia summa sunt, perditæ omnia, & ad infinitum quoddam malitiæ genus profligata. Qui enim potest rerum divinarum tractationem cum vitiorum cæno componere, & in utroque dies noctesque versari, cum necesse est stimulos omnes extrudisse conscientiæ, nihilque sibi ultra vitæ terminos polliceri. Huc ubi ventum est improbitatis, cave hominem reprehendas, aut ullo modo sanare coneris: conclamatum est. Non tibi ab ignorance, non ab incogitantia, non ab infirmitate naturæ, unde ceteri solent, excusationem querit: non patitur hoc Theologi nomen; in Superos ipsos causam convertit; partim dubitat,

par.

partim negat, partim irridet, callidaque circuitione & anfractu eo denique recidit, ut ex diuturno divinarum rerum studio nihil se certi collegisse significet. Adde huc in familiari sermone identidem jactas de animæ immortalitate dubitationes, de sacrorum librorum sensu, de Ecclesiæ legibus, de alterius vitæ pœnis, deque iis omnibus, quorum cogitatio monere homines solet, & in officii religione continere. Ex hoc uno fonte, vel prope uno novæ in dies effluunt opiniones, quas hæreticas appellamus, unde sibi istæ Theologorum quiescentiæ sepem circumdant, causasque prætendunt, ne temere facere videantur, quod ipsi ceteroquin minime omnium facere deberent. Ac primum quidem suis moribus obtegendis talia prætexunt, ad tempus quæsitæ; deinde malo quodam inconstantia metu propugnare conantur; denique vitiosi ingenii pertinacia, & pessima famæ libidine eo usque deveniunt, ut spargant in vulgus, privatim publiceque confirmant, nec solum gratia, auctoritate, fortunis omnibus, sed capite ipso, si opus sit, per summam desperationem insaniamque tueantur. Cavete igitur per Deos immortales, Adolescentes, ne moribus incompositis huc accedatis, ubi qui non sit optimus, pessimus esse necesse est. Nihil artificiose dicimus, nihil perfunctorie, nihil ex illa consuetudine nostra, qua vobis officii jura, pudorem, honestatem, veritatem, & in primo litterarum limine, & in Rhethorico, & in Philosophico ludo sine intermissione commendavimus. Est hic peculiare aliquid, quod nos pro vestra gloria & salute vehementer inflammat; vocemque nostram & con-

entionem præcipuo quodam modo reposcit. Nam ceterarum professores artium, si in vitio sint, sibi in primis nocent, aliis vero vel nihil prorsus, vel parum, vel in eo nocent, quod non est momenti maximi. Grammaticus, & Philosophus sua sibi malitia obest, nullique præterea; Medicus aliorum valetudini, Orator fortunis infestus est: at vero Theologus, si malus sit, animum lædit, quæ pars una est in homine excellentissima, religionem, pietatem, Dei cultum non a se uno distrahit, non a singulis hominibus eximit, sed a civitatibus & provinciis evellit, ejicit, exturbat. Hinc vero seditiones per omnem ætatem consecutæ, bella civilia, cædes, incendia, rerum pub. mutationes, & siquid calamitosius humanæ societati contingere potest. Testis mihi Germania sit, Helvetia, Anglia, Batavia crudelissimis bellis diu vexatæ atque afflictæ; testis Gallia ipsa, quæ quamvis ad hanc diem singulari providentia ab hæreticorum insidiis erepta fuerit, identidem tamen a suis Theologis multo etiam gravius, quam ab externis hostibus conflatur. Quod cum reputo, valde miror, ecquid tam diligenter ac severe illorum ingenia expendantur, qui inter Theologos referendi sunt; quamdiu, quo loco, quo magistro quisque studuerit; quæ sit ejus ad res percipiendas retinendasque memoria; quæ ad interrogandum ac respondendum caliditas; quam cultus sermo, quam promptus, quam eruditus; de moribus vero paullo plus quærat, quam in milite de Theologia. Quamquam ipsa quoque ingenii inquisitio jamdiu cœpit esse remissior, nihilque facilius est homini
non

non stolidissimo, quam Theologum salutari. Sed profecto ita sibi duo hæc conjuncta sunt probitas & sapientia, ita alterum altero nititur, ut a quo æstuantium cupiditatum moderatio non requiritur, ab eo neque cogitandi acumen, nec intelligendi celeritas, neque facilitas explicandi magnopere sit requirenda. Quæ cum ita sint, intelligitis, Auditores, non me Theologis rem utilem commendare, sed plane necessariam; ut si nolint innocenter integreque vivere, aliquid quoddam litterarum genus suscipere debeant, omnemque Theologicæ gloriæ cogitationem abjicere. Est enim Theologia in vehementi quadam altissimarum rerum contemplatione posita, quæ hominem totum occupat, absorbet, & a terra quodammodo abripit; nec ullam ejus partem avelli patitur, ut in vitiorum sordibus tam dispari studio voluntetur. Hoc sibi illa proprium vindicat supra reliquas disciplinas ob infinitam meditandi vim, ut nequeat inesse nisi illis, qui a rebus ceteris alienissimi sint. Cedo mihi, si lubet, Ecclesiæ fastos: plures ego tibi Theologos ostendam, qui templis arisque coluntur, quam tu mihi ex omni litteraria Rep. Grammaticos, Rhetoras, Philosophos, Medicos, Mathematicos. Immo (dicam enim quod sæpe animadverti) vix mihi unum aut alterum ex tota antiquitate recitabis tam gravi dignum nomine, ut Theologus appelletur, quin insigni virtute excelluerit, suamque sapientiam non satis per se firmam probitatis accessione confirmaverit. Nihil de illis loquor, quos nondum *Libitina sacravit*: adhuc illis cum invidia configendum est, quæ quoties a fronte

nequit, a tergo, a lateribus aggreditur, & quorum sapientia in tuto est, vitæ morumque famam labefactare conatur. Qua in calamitate, si calamitas est habere aliquid invidia dignum, primum se benefactorum conscientia solari debent, sibi que ipsi perfugium esse; deinde vero aliquid etiam inimicis condonare, qui nihil hujusmodi auderent, nisi plurimi essent, qui se uno eodemque tempore & flagitiis, & Theologicis studiis nobilitare conarentur. Verumtamen aliud est Theologum videri, aliud esse; ac si quis vestrum, Auditores, signum sibi aliquod præberi cupit, cujus ope tamquam Lydio lapide singulos experietur, sic habeat; vitia pervertere naturam omnem, & cum infimas animæ partes contaminaverint, in ipsam quoque arcem invadere, suisque tenebris obscurare, ne quid magnopere cupiat nisi crassum materiaque concretum; idcirco tam esse difficile vitiis hominibus in Theologica facultate præstare, quam lippis & cæcipientibus in pictura. Nihil est, quod dici possit absurdius, quam in bene constituta Repub. ordines omnes sibi respondere, & in unum quasi corpus coalescere, hominem vero ipsum, ex cujus exemplo Reipub. ratio ducitur, partes habere naturæ quidem nexu colligatas, sed ita officio dispares, ut altera humi depressa flagitiis obruatur. altera prorsus libera in sublime feratur, & purissimis spiritibus se se immisceat. Dum animus corporis custodia continetur, rerumque imagine sensibilibus indigebit, nisi sensus sedatissimi sint, nisi castigati, nisi pravæ cujuslibet cupiditatis expertes, numquam se totum explicare poterit, viresque omnes
ad

ad contemplandum intendere. Minima quæque perturbatio sive amoris, sive odii in supremam animæ partem impetum facit, & ubi certamen nequit, tumultum edit; qui si non est ejusmodi, ut omnem contemplandi ardorem extinguat, illas tamen commentationes interturbando impedit, quæ debent esse intensissimæ, & spiritum a corpore, ut ita dicam, alienare. Quod cum intelligerent utriusque Scholæ Principes, & in quodam veluti portu viverent ab humanæ vitæ tempestatibus remotissimo, numquam tamen Theologicum studium aggrediebantur, quemadmodum accepimus, quin se se precationibus, votis, sacrificiis diligenter expiarent; omnique ceterarum rerum cura deposita, quantum mortali licet, cælesti naturæ conjungerent. In quo uno maxime consenserunt, imitatores habent admodum paucos; in quo sibi contrarii sunt, immensam uterque familiam ducit, nimio quodam contentionis amore & superandi cupiditate flagrantem: quod maximum est Theologorum vitium nullo meo clamore sanandum, non tamen tacendum. Hinc enim exitium quoddam ortum est pulcherrimæ facultatis, in qua potissimum excellere creduntur, non qui gravissima ad cognoscendum, sed qui subtilissima ad fallendum excogitant: hinc vanæ quædam otiosæque disputationes, quæ mentem a S. Bibliorum doctrina, a Sanctorum Patrum dictis, a Conciliorum legibus, a Pontificum decretis longissime abducunt, & sine ulla utilitate fatigant: hinc pertinax & insanum partium studium, quo fit, ut acerrime deceremus, cum minime oportet; idque viribus omnibus propu-

gne.

gnemus, non quod veritati proxime accedit, sed quod iis placet, quorum institutum amplexi sumus. Itane vero, Auditores, tot annos pallebimus; tot volumina diu noctuque teremus; tam multos dicendi scribendique labores non sine valetudinis detrimento, atque adeo cum vitæ periculo suscipiemus; ut id aliquando teneamus, quod nec placeat nisi nostris, neque nobis ipsis placere possit, aut debeat, si pallium commutemus? Agedum enim, bone vir, cur ita pronuncias, & ingenti bacchatione confirmas, *virtutes divine naturæ tributas nihil quicquam esse ab ipsa distinctum, quantumvis a nobis intelligendi gratia distinguantur?* Itane sentis ex animo? Itane ad docendum, non ad fallendum? Quid si te parentes tui in adversæ partis castra ab ipsa pueritia compulissent? quid sentires, quid propugnares? Contrarium scilicet. Ergo pro tuo illo libello pugnas, in cujus verba jurasti; pugnas pro pallio illo, non autem pro veritate. Tunc igitur me tibi adjungere conaberis; tu te mihi Theologum venditabis, quem video nihil minus quærere, quam veritatem; quem scio contraria prorsus fuisse dicturum, si te vel casus, vel consilium, vel domesticæ rationes alibi vivere coegissent, alioque colore uti? Grave est quod dico, grave est, sed nihil tamen reprehendendi causa dico. Fateor enim præstantissimos utrimque viros & majorum, & patrum nostrorum memoria prodiisse, qui magnam litteris & Ecclesiæ operam navarunt, suisque lucubrationibus immortalī gloria dignissimis multorum nugas compensarunt: sed hi quidem illam habebant, quam postulamus in omni vita
pro-

probitatem, & cum arma tenerent omnia, quibus egregie pugnare possent, minime tamen pugnaces erant; ubi vero pugnarent, eo victoriæ genere delectabantur, cujus fructus veritatis cognitio esset, non ambitio triumphi. De his nemo umquam dubitavit, utrum aliquid crederent; nemo illis tamquam crimen Theologiam objecit; nullam ipsi de se fallaciæ suspicionem commoverunt; sed benevolentiam & admirationem cum sibi, tum suæ facultati vel ab hominibus procacissimis compararunt. Quoniam tamen in magno numero pro rerum humanarum conditione plures sunt deteriores, inde ortæ multorum querelæ, districta, criminationes. Sed vela tandem colligamus. Ego hac in re si quid sapio, ita constituendum puto, Theologum neminem esse, aut certe neminem haberi posse, cujus non sit vitæ ratio Theologo digna. Plurimum enim interest non solum quid dicatur, sed etiam a quo dicatur; sæpiusque contingit, ut ne optima quidem a malo auctore accipere velimus. Gel. 1. 18.
c. 3.
 acerrimi judicii, suæque disciplinæ homines, cum de re gravissima in senatu consuleretur, & improbum civem, ut sit in Republica, non solum pati deberent, sed etiam sententiam rogare, ita decreverunt, ut cum optima aliquando dixisset, hæc ipsa a bono viro quamvis indiserto repeterentur, ejusque nomine senatusconsultum fieret, ne quid auctoris infamia saluberrimo decreto apud populum derogaret. Quid si de virtute ipsa, aut religione in illo gravissimo consilio relatum esset? Futurum ne umquam fuisse putatis, ut flagitiosi hominis vocem fer-

ferrent; nedum in ejus verba decreta facerent, publicis monumentis consignanda, & populo proponenda? Videte igitur, adolescentes, videte diligentissime, quale quantumque sit, quod suscipitis, præstandæ bonitatis onus, quoties in hanc classẽ nomina datis; & id vobis assumitis, ut de virtute ac religione consulentibus respondeatis. Disciplina augustissima est, ipsum hoc nomen Theologiæ divinum aliquid sonat, parietes ipsi scholæ hujus sanctissimis verbis quotidie percussi religiosum aliquid animo, ac prope oculis obijciunt. Sed ut omnia desint, quæ tamen deesse non possunt, hic certe non deest, quem nobis ex gravissimo morbo divina providentia restitutum lætissimi intuemur, Princeps Eminentissimus. Ille, ille me quotidie urget & extimulat non jussu modo, quod est Principis; sed quod est mitissimi Præfulis, impulsu quodam & cohortatione; addo etiam pæne precibus, quod est amantissimi patris, imo patris hujus; ille, inquam, me magnopere urget, ut non tam vobis litteras, quam virtutem & honestatem, quandocumque possum, quibuscumque rebus possum, assidue diligenterque commendem. Vidi ego vos, vidi singulos & universos ejus incommodi cogitatione defixos, prostratos, attonitos, illa etiam timentes vana & futilia, quæ otiosi homines ad studium novitatis comminiscabantur. Jam salva res est: ejusque valetudine ad plurimos annos confirmata, nihil denique restat, nisi ut vos magna modestia & pietate vivatis, ne ullo umquam tempore vestra causa laboret.

EPISTOLA

Præposita editioni primæ hujus Orationis.

RECTÆ honestæque vitæ rationem ita suæ plerique arti conjunctam existimant, ut sine illa ne ars quidem ipsa esse possit; ideo nec Oratorem esse nisi bonum virum, neque Philosophum, neque Jurisperitum, passim audimus. De Theologo nihil simile veteres scripserunt, nostri vero etiam longe dissimilia. Ac veteribus quidem veniam tribuamus ad ignoscendum, quod cum de Dîs nihil certi statuerent, Theologos quoque ipsos inter nugigerulos recensebant; nostri vero siquam Theologo impietatis dicam impingunt, id ita faciunt, quemadmodum solent & Medicis objicere, quod medicinis abstineant, & Jurisperitis, quod numquam lege agant; ipsi tamen & Medicorum, & Jurisperitorum opera maxime utuntur. Hoc ipsum mihi orationis habendæ occasionem præbuit, quam emitto. Quidam a nobis de Theologi industria & ingenio, quam de moribus audire malebant; sed nimirum quam sint hæc inter se conjuncta, non reputabant. De digressionem noli quicquam suspicari. Facile enim erratur; quod ea fere sibi quisque persuadeat, quæ potissimum cupit. Puta, me mihi accusatores apposuisse, crimenque finxisse; ut eam quoque Tullianæ eloquentiæ partem attingerem, quæ egreditur extra causam. Non desunt sane adversarii, in quos stilum exerceam; sed quia & natura me a jurgiis alienissimum fecit, & humanitas ipsa litterarum jubet esse mitissimum, malo videri tamquam in scena fabulam agere; quo
etiam

etiam ostendam, non me quidem armis, sed pugnandi voluntate carere. Quod superest, utinam hic consistendum sit, ut otio illo perfruentes, quo uno litera maxime aluntur, suscepta studia sine ullius offensione prosequamur. Vale.



ORATIO VI.

AD S. SCRIPTURAM.

*Sacrae Scripturae studium cum veterum linguarum
studiis conjungendum est.*

Siquis forte dubitat, quid in tantam hanc sapientissimorum hominum frequentiam hodierna luce afferre statuerim, ad illa se animo tantisper referat, quæ superiore anno hoc ipso ex loco disputavi: nam & sacras Litteras cum Theologicis studiis conjunctissimas esse statim intelliget, neque posse me ex instituto jam ordine alteras ab alteris separare judicabit. Nulla est in toto disciplinarum orbe rerum simillimarum cognatio tanta, nulla tam arcta societas, quæ cum illa comparari possit, quæ inter Theologiam Scripturamque intercedit: ut siquis vinculum hoc, non hominum opinione, sed ipsa rerum natura constrictum effringere velit, vehementer alteram debilitari necesse sit, alteram vero prorsus dilabi, aut in imum detrusam sine ulla nobilitate jacere. Etenim Scriptura quidem in scholis sine Theologicis disputationibus manca est, multisque luminibus destituta; Theologia vero sine Scripturæ ope nimium depressa humi, sophistica, incerta sui, sanoque homine & ad Christi leges exulto prorsus indigna. Quare non fuit mihi magnopere dubitandum, qua de re dicerem; sed quid, & quomodo dicerem, id vero me, ut ingenue

H

facear,

fatear, multis de causis iisdemque gravissimis sollicitum habuit. Cum enim ipsa per se Sacra Scriptura arcanum quiddam est, omniumque hominum existimatione & iudicio sublimius; tum ita quoque expositum, ut ne ipsæ quidem mulierculæ in re familiari occupatissimæ, otium sibi, aut ingenium ad legendum & interpretandum deesse arbitrentur. Quæ igitur me, cum de aliis facultatibus verba facerem, solari consueverat, iudicium intelligentia, & quæ cum intelligentia fere conjungitur, summa æquitas, non ea quidem mihi in præsentia dicenti deest, sed quæ dixerò, de more vulganti, magna ex parte defuturam, cogitando præsentio. Neque vero hæc aut ipse artificiose confingo, aut primus in medium profero, ut laudem ex difficultatibus quæram; cum ille ipse Divinorum Librorum interpres, omnium ætatum omni-que memoriæ longe doctissimus, & interpretum ceterorum facile princeps D. Hieronymus, ad Paullinum scribens, ita conquestus sit: *Quod medicorum est, promittunt Medici, tractant fabrilis fabri; sola ars Scripturarum est, quam omnes passim sibi vindicant; hanc garrula anus, hanc delirus senex, hanc sophista verbosus, hanc universi præsumunt, lacerant, docent.* Quod ego non eo dico, quo sacros codices e populi manibus excuti cupiam, & in abdito collocari, veluti carmina Sybillina non inspicienda nisi Duumviris. Nulla hic tacenda mysteria sunt, non Nyctelia, non Faunæ, non Cereris arcana; sed omnia omnibus sine ullo discrimine patent, quia fucò carentia, & ab ipso veritatis fonte, non ab aliqua

Æge-

Ægeriæ spelunca, aut a Cumanis antris petita. Sed tamen cum sit litteratorum ordo ab omni prorsus vulgi commercio sejunctus, in hac quoque ceteroquin communi palæstragenus quoddam sibi proprium habere debet, arinisque & exercitatione ab ignava turba differre. Siqua vero ratio est, ut id recte fiat, & nobilissimæ doctrinæ partes suis ingeniis, suisque locis assignentur, ita constituo, Sacrarum Scripturarum studia ipsa per se pulchra, omnibusque communia, in scholis tamen & Academiis vetustarum linguarum cognitione vehementer ornari, novaque hac accedente quasi supellectile, in propriam litteratorum hominum ditionem transire. Quod quidem ne gratis a me dictum putetis, aut vana quadam nostrarum exercitationum jactatione, aut illo fortasse studio, quo quidam solent ad ingenii subtilitatem difficilia consectari, id ipsum, quam maxime potero, collectis undique, & excogitatis rationibus patefaciam. Itaque ipsa mihi dicendi difficultas initio proposita, orationis copiam facit, & eo me ultro sequentem adducit, quo jamdiu meditabar, ut adolescentibus nostris veterum linguarum curriculum ægerrime ingredientibus, ingenti laboris fructu proposito, stimulos addam; ingressosque jam & sua sponte currentes, audientibus vobis, & ut spero, etiam probantibus, confirmem. Video me negotium suscipere multis difficultatibus implicatum; cumque animo reputo, quam ægre homines laudari sibi aliena patiantur, valde metuo, ne magnas invidiæ flammæ ipse mihi succendam, ex quibus denique nisi ambustus egredi nequeam. Nam illud pro mea qua-

dam verecundia facere non possum, quod tamen oratores plerique solent, ut nostris popularibus ea tribuam, quæ revera non insunt; & solemne illud, tritæque adulationis plenum acroama veteri more recinam, *Patavii dicimus*. Nulla est in Italia, in Italia autem? Nulla est in Europa universa, atque adeo in orbe terrarum tam culta litteris civitas, quam nostra hæc, si simul omnia, quæ rem litterariam constituunt, complectamur: at in singulis generibus quædam sunt, quæ si nobis vindicare velimus, multæ nos Academicæ ex jure manum confertum statim vocabunt. Hoc ipsum est ex gravitate sapientis hominis, se aliqua nescire fateri; & quæcumque honesta sunt, aut utilia, non aliunde, quam ex rebus ipsis judicare. Hoc nimirum Patavinum est, hoc hujus soli cælique proprium, unde fucus & levitas ab Heroicis usque temporibus exularunt: nec verò me in locum tam lubricum coniecissem, ut vetustarum linguarum studio tantum tribuerem, quantum mox audietis, si mihi omnes succensuros putassem, qui laude ista carerent. Ignavis quidem & socordibus concedo libens ut doleant, imo etiam ut reprehendant: quid enim potius? nihil illis operosum placere potest. At vos, Viri optimi ac præstantissimi, quorum singuli in magna aliqua doctrina excellitis, multi verò etiam in multis, tam mihi benevolos fore confido, quam longe abesse ab omni prorsus ignaviæ suspitione, certo scio.

Vetus est aliquorum opinio, eorum præsertim, qui se præter ceteros sapere arbitrantur, disciplinas artesque omnes, quæ ingenuis adolescentibus

bus tradi solent, vernacula cujusque provinciæ lingua explicari oportere, ne florentissima ætas latinitatis addiscendæ labore frangatur, quæ Geometricis & Geographicis studiis multo gravioribus opportuniissima esset. Quod si quis latina monumenta cognoscere velit, tam multas esse interpretationes ajunt, tam certas, tam fideles, tam ornatas, ut nihil melius ex ipso latinorum Scriptorum ore, siquando ex suis tumulis excitentur, accipi possit. Ac de disciplinis quidem sine latinis litteris addiscendis nihil ajo, nihil nego; quod autem de latinis monumentis dicitur per interpretationes cognoscendis, si de aliquo genere dicitur, facile patior, sin autem de genere omni, vereor ne homines isti non solum otio suo, sed etiam patientia nostra turpiter abutantur. Cum enim poetica & oratoria non tam rerum, quam verborum artificio constent; & cujusque sermonis figuræ quædam propriæ sint, modo syllabarum sono, modo vocum ambiguitate, modo ipsa positione formatæ, qui fieri potest, ut latina carmina & orationes suis verbis, suaque constructione spoliata, non suam quoque naturam exuant? Utcumque tamen est, juvit & oratorum & poetarum opera in alias migrare linguas, ut bona pars hominum domesticis commodis & otio superfluentes, desidia legendo ponerent; & quandoquidem eruditione carerent, aliquam saltem eruditionis umbram consecrarentur. At vero si quis est ad docendum vocatus, qui interpretationes hujusmodi impigræ juventuti proponat, & ad latinas exhedras afferat, næ ille aut barbarus est, aut insanus, aut pestis aliqua lon-

ge deterrima ad tenellas animas labefactandas scholis affusa. Videtis, Auditores, quorsum ista pertineant. Nimirum Sacra Biblia multiplici sermone vulgari pulchrum est, & pro humanarum mentium infirmitate etiam necessarium: at ipsos Bibliorum magistros ita cum vulgo torpere, ut nihil in scholas afferant, nisi communem aliquam & omnibus obviam interpretationem, valde miserum est. nec in tanta ceterorum studiorum felicitate ullo modo ferendum. Si enim latine scripta in nostrum hunc sermonem latino simillimum, & ab eo procul dubio propagatum sine fraude transferri nequeunt, quis mihi se tam eximium proficetur, ut Palæstinum orationis genus, supra quam dici, aut cogitari possit, a latino diversum, ita tamen latine reddiderit, nihil ut præterea postulare debeamus? Quis ancipitem Hebraicarum dictionum significationem, quis pondus, quis brevitatem, quis denique illa omnia per ellipsim, per emphasim, per paragogen, per onomatopœjam abrupta, aucta, traducta, formata, latinis vocibus assequi potuit; & duas linguas toto genere disjunctas ita consociare, ut verba verbis, figuræ figuris, constructiones constructionibus ex æquo respondeant? Id, non dicam, si factum est umquam, sed omnino si fieri potest, sileant per me licet Hebraica omnia. Ne ipse quidem Græcus sermo, qui tamen aliquanto propius ab Hebraico distat, & copiosissimus reliquorum est, vim omnem Sacrorum Bibliorum capere potuit; nec Septuaginta illa Sapientum societas potentissimi Regis jussu in hoc uno certantium effecit, ut Hebraicis codicibus Græci non indigerent. Verum-

ramen interpretatio ista, siue instinctu inflatuque divino, ut quidam putarunt, edita sit, siue tota, ut credibile est, humanis viribus debeatur, tantum auctoritatis a primis usque temporibus obtinuit, tantoque usui Christianæ religionis Patribus fuit, ut ob eam præsertim Græcas litteras cum Hebraicis ad egregium Sacrarum Scripturarum studium conjungere oporteat. Id si firmum certumque constituatur, jam non Philosophus, non Rhetor, non Grammaticus, non recens a ferula litterator, paullum modo latinitatis attigerit, gravissimum sibi munus tradendæ Scripturæ deposcet; nec amplius in scholis inanes quæstiones ad explendam contentionis cupiditatem excitatæ, sed sacratissima religionis mysteria ab ipso religionis exordio fideliter ducta, quemadmodum decet, personabunt. Tu ne igitur, inquiet aliquis, interpretationem excludis, quam Vulgatam appellant? Ego vero id ne cogitavi quidem umquam; neque si quis cogitet, satis mihi sanus videatur. Imo hæc dominetur una in privatis exercitationibus, dominetur in publicis, quam & multorum sæculorum verustas, & Concilii Tridentini auctoritas, & plura deinceps Pontificum decreta adversus obtretractatores in omnem ætatem permunierunt. Verum enimvero ubi explicanda est, & ad scholæ usum referenda, nisi & cum Græcis aliquando congrediaris, & cum Hebræis, & cum Syris, & cum Arabibus, & cum Chaldæis, eorumque rationes suis momentis perpendas, tamquam unus paterfamilias judicaberis, de domesticis religionibus cum pueris & uxore disputans, Si enim illa ita clara & expedita est, ut nullius egeat ex-

dedo-
trin.
Chris. l. 2.
c. 11.

plicatione, quid te mihi operamque tuam fallaci-
ter venditas? Sin autem alicubi obscura est, & ver-
borum ambiguitate perplexa, quomodo aut expla-
nabis ipse, aut aliorum explanationes judicabis,
qui fontes illos adire nequis, unde omnia proflu-
xerunt? Hærent enim adhuc in Vulgata aliarum
linguarum idiotismi, alibi brevitās apparet He-
braica, alibi Chaldæorum *παράφρασις*, alibi Se-
ptuaginta Interpretum *ἐκθεσις*: quibus expe-
diendis non Philosophus, non Theologus, non
Civilis, aut Canonici juris peritus, sed exotico-
rum sermonum interpres adhibendus est. Quid
vero idiotismos dico? Multæ etiam sibi voces
hanc operam poscunt. Cedo enim, quid illa signi-
ficent ab Hebræis sumpta, *ephod*, *sabaoth*, *Hosanna*,
Alleluiah: quid illa Syriaca, *Raca*, *Epheta*, *Golgo-
tha*, *Gabbatha*, *Maranatha*; quid alia multa a
Græcis inflexa? Non desunt, inquis, lexicæ, un-
de petam. Primum quidem, si D. Augustino cre-
dis, (quem virum, bone Deus, quo ingenio, qua
rerum divinarum humanarumque scientia!) si
huic, inquam, credis, *Sunt quedam verba certa-
rum linguarum, quæ in usum alterius lingue per
interpretationem transire non possunt*; deinde gratu-
lor egomet mihi, cui si lexicon suppetat, nihil
est opus te Magistro. Sed cominus, quæso, con-
grediamur. Novi enim esse aliquos, qui veteri-
bus linguis amplissimas laudes tribuunt, sed ni-
hilo plus temporis concedendum putant, quam
quantum lexicæ versare volentibus necesse est.
Age vero, lexicorum manceps, quid si ego ver-
bo negem, quod tu de lexico recitas? Unde ha-
bet, ut confirmes? Ridicula sunt hæc, Audito-
res:

res: neque enim omnia in lexicis esse possunt, neque debent: & ea ipsa, quæ sunt, memoriæ serviunt, non ingenio. Scilicet lexica consules, cum in capite Geneseos quarto de voce שְׁפַרְפָּר n. 15. te quispiam interrogabit, utrum ad gravitatem pœnæ, an ad rationem temporis sit referenda. Nam *septuplum*, quod est in Vulgata, non facile capies, nisi ab Arabibus auxilium petas, conjunctisque viribus adversus Rabbinos, & Chaldaicum Paraphrasten pugnare possis. Quid cum te de voce הֶלֶס in psalmo quinquagesimo secundo n. 18. percunctabimur? Quo te lexico expedies? cujus opem implorabis interpretis? Junius & Tremelius adverbium putant; Paulus Burgenfis & Chircherus vocem *ἐγκλιτικήν*; Matthæus Polus exclamationis signum; Calovius & Olearius pausæ significationem; Buxtorphius musicam notam. Ut vero tot capita concilies, adhuc tibi & cum Joanne Paschio, & cum Rabbinis, & cum Syris, & cum Æthiopibus interpretibus in diversa abeuntibus futura res est. Quam te porro miserum excruciabimus, cum veteres ad te controversias afferemus de verbo הַיְמִי in capite Geneseos n. 24. trigesimo sexto; de קָרַן in Exodi trigesimo quarto; de לִמְלָךְ in vigesimo Levitici; de הַבְּשִׁית n. 2. in duodecimo Numerorum; de נִדְרָתוֹ in libro n. 1. Regum secundo; atque insuper sexcentis, quæ si c. 2. n. 8. ne magna Hebraici sermonis peritia frustra explicare contendes? Audivi nonnullos, qui talia contemnerent, quippe magnis contentionibus non satis digna. Quibus primum respondere possum,

v. 12.

Gen. 49
10.

nihil in re tanti momenti minutum esse; deinde libenter illos interrogarem, utrum id satis grave ad disputandum videatur, quod est in verbis נִסְקוּרֵי psalmi secundi, unde Rabbinii Trinitatis mysterium exturbare conantur? Quid illud tantopere celebratum Jacobi vaticinium de Messia venturo, ablato Judæ imperio, cujus verba singula Christiani nominis hostes callidissime oppugnant, & alio torquent? Est ne par ingeniis tantis? Quid quod habet Isaias secundo, & septimo capite de nova lege, de Christi Evangelio, de Virginis partu, satisne capit magnarum mentium cogitationes? Verum siquid hujusmodi sine Hebraica pertractabis eruditione, nostri illi ex Synagoga pertinacissimi adversarii aut dormitabunt; aut ridebunt. Sed jam Hebræorum natio parum nobis negotii facessit, aut multo certe minus, quam ipsi Christiani homines heterodoxi. Nemo enim se ab Ecclesia Romana subduxit, novumque sectæ genus molitus est, quin suis opinionibus vel monstrosissimis sacras litteras prætexuerit. Inde novæ interpretationes exortæ; quæ cum veterum linguarum auctoritate malitiosius adsumta plerumque propugnari soleant, inepti plane sumus, nisi paribus armis arma retundimus, & populum peregrinis litteris attonitum admirantemque, ab insidiis & fallaciis liberamus. Quid enim est, quod ex illo suggesto doceas, teque mihi Scripturæ professorem magnifice jactes, si cum suas tibi interpretationes objiciunt Junius, Castalio, Leo Judæ, Munsterus, Oecolampadius, fidemque veterum codicum, & Hebraici Græci-que sermonis appellant, tu illos ne intelligis quidem,

dem, petitionesque gravissimas ignorantiae confessione declinas? Tute tibi habe veteres illas de Terrestri Paradiso, de Turre Nembrothi, de Henoch & Elia, de Melchisedech, de Jobo disputationes, quæ tametsi pulchritudinis & jucunditatis plurimum habent, tam multis tamen libris expositæ sunt, profligatæ, & ad exitum prorsus adductæ, ut jam supervacaneum sit ad eas recoquendas magistros arcessere, & miseram juventutem fatigare. Licuit in summo Ecclesiæ otio per hæc inter nos velut ensibus præpilatis ludere; nunc vero ingruentibus undique Romani nominis hostibus, & alia super alia bella ferentibus, in aciem prodire oportet, iisque armis configere, quæ ipsi potissimum pertimescant. Atque ego ut inter Academicos hætenus disputavi: quid si jam monere incipiam? quid si leges Ecclesiæ proferam, quibus resistere nefas sit? Annon enim Concilium Viennense tercentorum Episcoporum & Pontificis maximi præsentia varendum, gravissimo decreto sancivit, ut Hebraicis, ut Chaldaicis, ut Arabicis, ut Græcis litteris in quavis locus esset Catholicæ ditionis provincia? Nonne id ipsum Gregorius XIII. earum linguarum magistris & librariis Romam accitis, illustri ad imitandum exemplo confirmavit? Quid Paulus V. quid reliqui subinde Pontifices? nonne studia hæc magno favore ac benevolentia prosecuti, ad Monachos ipsos traducere conati sunt, iisque præmiis ornare, quæ vel ignavissimos excitarent? Græcis, credo, fabulis, aut antiquitatis ambitione ducebantur. Quid enim est reliquum parere nolentibus, ut dicant? Modestius agunt,

Clem. 1.
de Mag.

agunt, tempora accusant: Græcos & Hebraicos codices tum ipsa vetustate exesos, tum etiam multorum audacia corruptos esse: huc ipsos Tridentini Concilii Patres spectavisse, cum Vulgatam unanimi consensu probarunt; & unam ex omnibus sacrorum Bibliorum editionem Christianis hominibus commendarunt. Non tantum mihi a vobis conceditur otii, ut veteri calumniæ sæpiusque retusæ hodierna luce respondeam; id unam dicam, quod ubi opus fuerit, gravissimorum Scriptorum suffragiis confirmare possum, Vulgatam editionem non Græcæ, aut Hebraicæ, sed reliquis Latinis, quarum magna copia & varietas in dies exhibat, necessario illo Tridentinorum Patrum decreto propositam fuisse. Multa quidem commoda, & prope innumera in Christianam Ecclesiam ad Fidei morumque leges componendas per Synodum Tridentinam redundarunt; sed nihil tam grave accepimus, nihilque tam utile, quam quod ex omnibus Latinis Sacrarum Scripturarum interpretationibus una illa probata est, quæ ceterarum optima ac fidelissima, nutantia multorum ingenia tamquam clavo firmaret, certisque regionibus circumscriberet. Neque tamen ideo Hebraicis, aut Græcis codicibus, unde Latini omnes, ceterique manarunt, quippiam auctoritatis detractum est; stat adhuc eorum fides firmissimis præsidiiis fulta, licetque in rebus dubiis ad prima illa verbi divini exempla non modo sine crimine, verum etiam cum laude provocare. Haud equidem nego, mutila quædam in illis esse, nonnulla vero etiam mendosa; sed & menda ipsa antiquitatis indicia sunt, & partibus
in-

insunt minime necessariis; & in Vulgatam quæque librariorum incuria, si minuta quælibet animadvertimus, irrepperunt. Nihil novi affero, nihil quod summi Vulgatæ patroni, si serio & ex animo agant, negare possint. Sed vereor, Auditores, ne quemadmodum qui dignitates in repub. obtinere non possunt, privatum otium laudare solent, omnemque rei gerendæ rationem conquisitis difficultatibus improbare; ita qui Græca & Hebraica studia sive animi infirmitate, sive inertia defugiunt, eorum laudem malignius imminuant, tantumque Latinis concedant, ut modum fidemque superet. Hunc porro desidii morbum tum demum mihi videor depellere posse, si pauca quædam de Hebraica lingua dixerò, ejusque naturam & rationem minus multo implicatam, quam timidi homines sibi confingunt, patefecero. Nam Græca quidem multis jam locis reflorescens non indiget opera nostra. Agite dum qui Hebræorum pronuntiatione perterrefacti ab hoc litterarum genere tantopete abhorretis; quid est, si primos Grammaticæ labores superaveritis, quod studia vestra retardare possit? Num copia, num varietas, num inconstantia? Nihil sane hujusmodi esse potest in lingua illa, quæ multis abhinc sæculis oblitterata, in uno tantum sacrarum Scripturarum codice, grandi quidem ac splendide scripto, sed tamen uno superstes est. Nisi forte Talmudica commentaria neque rebus, neque verbis pura recipimus, & multiplicem illam loquendi sartagine[m] ad Hebraicum sermonem revocandam exultimamus. Fingite vobis animo unum ex omnibus Latinis Scriptoribus Ciceronem, ex
omni-

omnibus Græcis Demosthenem unum superesse; jam intelligitis, quam in angustum copiosissimæ ceteroquin linguæ compingantur; vocum numerus statim exiguus, dialectus una, forma constructionis non admodum varia. Nihil est enim aliud, quod Græcas Latinasque litteras adeo in immensum propagaverit, ut multos studiosis hominibus annos eripiant, quam ingens Scriptorum multitudo, qui pro ingenio quisque suo, pro patriæ, pro ætatis, pro rerum tractandarum natura verba dictionesque formarunt, multisque ex omni lingua detortis, infinitos labores discentibus ac docentibus proposuerunt. Adde, quod Hebraicus sermo ceterorum antiquissimus, & mundo æqualis, nullam litteram aliunde mutuatur, nihil in se barbari, nihil externi admixtum habet, sed ubique suus sibi que similis, quod nulli præterea contingit, in modico illo sacrorum Bibliorum ambitu planissime & expeditissime incedit. Quamobrem paucis mensibus, ut scribit Erpenius, & quidem duobus, aut tribus, ut Amama, tantum ex illo percipi potest, quantum est ad intelligendum satis; anno vero, & eo citius ita totus memoria scientiaque comprehenditur, ut jam difficultas super sit omnino nulla. Non desunt, qui mense breviorē diem satis esse affirmant; quorum ego sententiam neque probare ausim, neque rejicere: sed nulla certe veterum linguarum est, quæ paucioribus verbis constet, nulla quæ tam paucis plura significet. Nihil hic vastum, nihil redundans, nihil effluens; nulla neque *μακρολογία*, neque *βαττολογία*; sed pressa omnia, tantaque brevitate castigata, ut una sæpe vocula, atque adeo
syl-

Vvalt.
 Bibli. Po-
 lyg. pro-
 lego. 3.

syllaba una sententiam absolutissimam complectatur: unde est illud doctissimi Possevini in *Bibliotheca selecta*, tot esse in Hebraica Scriptura sacramenta, quot sunt litteræ; tot mysteria, quot puncta; tot arcana, quot apices. Quæ cum ita sint, per mihi mirum videri solet, esse homines cetera non insipientes, qui quidquid Hebraicum vident, aut audiunt, statim explodant, nobisque etiam molestiam afferant, quod vulgatis interpretationibus contenti non simus. Quod siue difficultatem timent, siue præstantiam non agnoscunt, quæro ego ab illis, cur ea saltem cura non moveantur, quæ humani ingenii propria est, cognoscendi remora, siquo præsertim insignia facto ad religionem pertineant. Ergo difficillima & infesta itinera suscipient, ut illustrium virorum monumenta videant, easque regiones obeant, quas illi præsentia sua, rebusque mirabiliter gestis nobilitarunt; quæ vero longe pulcherrima curiositas est, ejus linguæ cognoscendæ, quam primi hominum parentes divinitus hauserunt; qua ipsi inter se, & cum suo conditore locuti sunt; qua rebus omnibus dedere nomina; qua se Deus ipse יהוה nuncupavit; qua Angelos interdum usos, qua Prophetas scripsisse accepimus; quæ omnium linguarum princeps ac mater, vestigia sua ubique impressit; hac, inquam, tam honesta, tam splendida, tam homine digna curiositate nihil omnino commovebuntur? Sed videant alii pro suo ingenio gloriæque cupiditate, quem sibi animum suscipiendum putent. Ego sic statuo, cum tanta sit ad Sacras Litteras profitendas veterum linguarum necessitas, cum Hebraicæ præsertim tanta
faci-

facilitas sit, pulchritudo, dignitas, sanctimonia, etsi omnes omnium, qui nos quotidie circumstant, auctoritates repugnarent, nihilo tamen minus ad hanc præclarissimam laudem contendendum esse. Nunc vero cum re & ratione expressa veritas, ipsius quoque Ecclesiæ legibus, multarum Academiarum usu, & quod maximi apud me debet esse ponderis, nutu & admurmuratione vestra confirmetur, quid est præterea quod dubitemus? Ac ne id quidem omittere debeo, ita esse in more institutoque loci hujus, ubi me Superi litterarum custodem ac vindicem collocarunt. Quod leve fortasse alicui videbitur: at ego quidquid reperio ab eximio illo atque immortalis studiorum nostrorum Auctore, quem honoris, atque adeo pietatis causa nomino, Gregorio Cardinali Barbadico constitutum, ita accipio, quemadmodum divina debent. Quoties enim singula reputo, quæ vel ipse a se invenit, vel ab aliis inventa huc adduxit, artium, linguarum, ac disciplinarum genera tanto consilio distributa, tot præsidiis munita, tam multis exercitationibus a vana specie, in quam fere degenerant, ad rem & veritatem revocata, videtur ille mihi non humano consilio usus, sed divina quadam virtute præditus ea vidisse & fecisse, quæ posteri sine piaculo violare non possent. In quo etiam divina vis ac providentia magis apparet, quod cum ille ad vitæ exitum vocatus, præclarissimarum rerum initia nondum satis firma reliquisset, hic nobis Princeps Eminentiss. veluti parens alter Superum beneficio concessus est, qui positus ab illo fundamentis mirificas moles excitaret, tantum-

tumque proveheret, ut ad majorem amplificationem nihil jam desit, nisi locus. Ergo cum ille in magna, attentissimaque rerum omnium cura nihil æque cogitarit, atque ut totius Orientis linguas ad S. Scripturam illustrandam in scholas nostras advocaret, Græcæque ac Latinæ conjungeret; cum hic ejus vestigiis insistens, qui tamen prægredi ipse poterat, idem velit, idem curet, idem jubeat, quo me animo esse oporteat, existimate. Id extremo loco ab adolescentibus nostris vehementer peto, ut quoniam illorum gratia omnia dicuntur ac fiunt, in eo libenter laborent, quod nos certis probatisque de causis optimum ducimus; ea insuper cogitatione ducti præstantibus ingeniis digna, ut ornamenta sibi comparent, quæ paucis communia sint.

E P I S T O L A

Præposita editioni primæ hujus Orationis.

SI forte fortuna fiat, ut nostra hæc jejuna lucubratio in eas regiones deferatur, ubi linguarum studia florent, plerique omnes mirabuntur, quid me tandem moverit; ut in re satis plana & expedita tam multo sermone laborarem. Ego vero patriæ rationem habui, ejusque auribus dicere institui; nihil admodum de illorum judicio sollicitus, qui hæc sibi jamdiu persuaserunt, a majoribus tradita, & quotidiana consuetudine usurpata. Sed hinc, opinor, nihil in me valde criminofum, utcumque accipiant. Ab iis potius mihi timendum, qui superioribus contraria sentiunt, & nimis enucleatum putant, quicquid

I

quid vernaculum sermonem & latinum supergreditur. His & nugari ipse in re minus utili videbor, & ad nugas juventutem allicere. Hoc vero non caret specie culpæ: sed nolo purgare. Satis superque verborum in ipsa Oratione. Numquam ego placere omnibus studui; imo neque pluribus: quia illi contraria. isti deteriora sequuntur. Si paucis illis, quos mihi animo & cogitatione proposui, feci dicendo satis, jam operam recte navavi. Vale.



ORA-

ORATIO VII.

AD JURISPRUDENTIAM.

*Expediit, omnes gentes Romanis legibus operam
dare, sed suis vivere.*

Splendidum Jurisprudentiæ nomen, & quod uni
ferme convenit, etiam solidum, omnique ge-
neri hominum, sive meditandi sive agendi studio-
so, pulchrum atque utile, jubet me majore qua-
dam animi securitate hoc anno descendere, &
publicam hanc lucem vestramque omnium expe-
ctationem sustinere. Neque vero ante nugas egi,
aut aliquid in medium attuli præter oratoris di-
gnitatem; sed litteræ omnes ad humanitatem per-
tinentes, & Philosophicæ ipsæ ac Theologicæ di-
sciplinæ magis per se honestæ sunt, quam vulgo
probabiles: & quæ perverse interpretantium ma-
litiæ est, in invidiam quoque non raro vocantur,
quod otium umbratile foveant, & a reipublicæ
cura, quæ una illis gloriosa videtur, multos ab-
ducant. Una est legum scientia, de qua omnes
magnifice sentiunt, & qui se litteratos ferunt,
& qui ambitione ducuntur, & quibus medium
ingenium est; quod latissime diffusa publicam
privatamque fortunam regat, nullumque sibi de-
ditum jacere patiatur, etsi maxime lucem formi-
det, nec nisi inclusus domi de jure respondeat.
Ac ceteri quidem liberalium professores artium,
præter admodum paucos, silentio & inopia passim

contabescunt; ne Medicis quidem ipsis, generi tantopere necessario, reclusa ad opes via, nisi diu tolerando fatigatis, & naturæ necessitate prope confectis: cum interim Jurisconsultus ubique fere liberalius acceptus, mature floreat, & ad gratiam, & ad opes, & ad summas in republica dignitates, modo paullo diligentius connitatur, faciles sibi aditus patefaciat. Nihil est opus in hac republica, hisque temporibus, ubi homines a subselliis propemodum regnant, antiqua repetere; sed tamen ut id exemplo fieri intelligatis, illa ipsa gentium domina, totiusque sapientiæ secundum Græcos magistra, Romana civitas initio statim de jure cogitavit, ejusque peritis honorem habuit; cum ceteroquin incuriosa neque Grammaticos, neque Rhetoras, neque Philosophos, neque Medicos ipsos nisi multa post sæcula ferre potuerit. Verum tanta hæc gravissimæ scientiæ dignitas, tanta cum dignitate conjuncta fortuna, non caret invidiola, quod nondum omnes sibi persuaferint, Juris civilis studium Romanis legibus contineri, omnemque justitiæ rationem & æquitatis ex Justiniani codicibus tamquam ex oraculis petendam esse. Sua quidam libentius amplectuntur, alii Græca præferre malunt, nonnulli etiam sacras litteras in medium afferunt, unde omnem imperandi parendique rationem, omne æqui & iniqui discrimen sumendum putant. Non is ego profecto sum, qui tam veterem controversiam disceptare possim, suisque regionibus humani generis jura definire; sed tamen cum dicere aliqua necesse sit, ut hunc disciplinarum orbem absolvam, fidenter affirmateque oportere consti-

stituo, gentes omnes Romanis legibus operam dare, sed suis vivere. Porro autem Romanas leges cum dico, non hæc certi juris, sed ipsius prope justitiæ appellatio est, a recta ratione expromptæ, magnoque Deorum immortalium beneficio populo terrarum principi patefactæ; quæ si non cunctis civitatibus, aut negotiis, aut temporibus convenit, succus tamen inde sanguisque existit, qui ad alios mores opportuna derivatione ductus, ingenia vel efferatissima lenire potest, & cujusque instituta gentis ad bonum & honestum conformare. Itaque duo mihi facienda sunt, primum ut ostendam, nullum esse jus ad cognoscendum Romano præstantius; alterum ut probeam, patrias leges hoc jure temperari oportere, non abrogari.

Si quomodo jus in natura positum est, ita leges omnes, non hominum opinione, sed naturæ norma constituerentur, una esset omnium populorum vivendi ratio; magnaue cura liberarentur, qui se legum studiis dediderunt. Verum & ipsum jus nescio quo pacto quidam a natura abdicant, quorum princeps Archelaus Socratis præceptor; & leges populorum pro vario judicio & consuetudine variæ sunt, sibi que inter se contrariæ. Quid enim a moribus nostris magis alienum, quam promiscuas uxores habere, prolemque incertam educare? Hoc tamen instituto Masagetæ usi sunt. Quid suapte natura fœdus, quam filias & sorores in matrimonium ducere? Alterum tamen Persis, alterum Ægyptiis familiare fuit. Furta Cilices probarunt; orium & ignaviam Sybaritæ; alii denique alia, non re, sed suis opinionibus justa & honesta judicarunt: quod

Laert. in
Archel.

Idem in
Pyrrhon.

pluribus ostendit Sextus Empiricus Pyrrhon. hypoth. l. 3. c. 24. Ergo prima illa cogitatio juris studiosos tenere debet, ut recti pravique discrimen ab eo populo petant, qui ceteris mortalibus sapientia & virtute præstitit; eoque affectus est, ut longe omnium potentissimus multis regionibus multisque sæculis leges scisceret. Is scilicet populus Romanus est, gravissima natio, maximæ cujusque virtutis exemplum, fortis, temperans, prudens, & ad jura componenda mirifice factus. Ceteras quidem artes, totamque humanitatem & eruditionem a Græcis discamus, disputandi peritissimis: at vero Jurisprudentia Romanorum est, ab illis & parva & exulta, & ad Græcos ipsos, non facile aliena probantes, incredibili plausu traducta. Nam qui dicunt ex Græcia venisse leges, nolim ignorent, magnarum quoque rerum initia parva esse, jusque omne Decemvirale Attica sapientia conspersum, vix primum magnæ hujus substructionis fundamentum fuisse, quæ deinde Romanis opibus paullatim elata, in hanc demum celsitudinem, quæ toti immineret orbi, exædificata est. Quibus enim terrarum imperium Superi concesserant, iisdem pro sua providentia par ingenium imperio dedere; ut aliarum nationum leges primum exciperent; suas deinde plane innumeras ipsi juberent; tum veluti justitiæ imaginem inde ducerent, quæ publicis tabulis ad æternitatem impressa, non Romæ solum, sed ubique placere posset. Est igitur hoc non unius civitatis, aut provinciæ, sed generis humani, & ipsius quodammodo naturæ jus, ex prisca omnium sæculorum sapientia conflatum, & cælo prope demis-

missum ad barbariem tollendam, omnesque omnium populorum voluntates uno vinculo consociandas. Quid mihi adhuc Græcos commemoras? quid me in eas scholas mittis verborum refertissimas, rerum vacuas? Plato, Xenophon, Aristoteles tradunt quidem reipublicæ gubernandæ regulas; sed a communi consuetudine, & civilibus moribus longe recedunt; multa sibi permittunt, quæ extra umbram ferenda non sunt; & pro suo quisque stomacho civitatem fingunt. Illi ipsi, qui in republica versabantur, prudentissimi viri, suisque civibus leges scribebant, ut est natio nimis acuta, mutuis se telis confecerunt, nullusque ex omnibus toti Græciæ satisfecit. Minos enim ex multis decretis Jovis nomine conditis vix pauca probavit Lycurgo; Lycurgi leges ab Apolline acceptas, ut ipse ferebat, agrestes ac feras Plato judicavit; Draconis instituta tamquam inhumana rejecit Solon; Solonis legibus addendum detrahendumque putarunt Clisthenes & Demetrius Phalereus. Etsi autem Solonis νόμοι (sic enim ille suas leges appellare maluit, ut nomine ipso, nisi fallor, a Draconis θεσμοῖς distinguerentur,) etsi, inquam, Solonis νόμοι auctoritatem longe maximam in Græcia obtinebant; attamen sublato Solone, velut intermortui, verbo quidem eorum fidei commissi sunt, quos ὑψηλὰς nuncupabant, sed re ipsa non alios habuerunt interpretes, quam ipsos forenses oratores, causæ quemque suæ studio abreptos, & in id præsertim intentos, ut eloquentiæ fuco iudices fallerent, tabulasque sanctissimas ad tempus & arbitrium explicando distorquerent. Nihil tale Romanis legibus

bus contingere poterat. Ut enim rogatæ erant, & ab eo populo auctoritatem acceperant, qui populos omnes sui juris auctoritate continebat, ne ulla fontium interpretatione violari possent, custodes & explicatores habebant, quibus primum quidem civitatis consensus, deinde etiam Imperator tantum tribuit auctoritatis, ut iudices ipsi eorum responsis addicti, ita demum decernerent in lege esse, quemadmodum Prudentes (quod illis nomen scientiæ ac virtutis opinio dederat,) respondissent. Hoc vero diligenter animadvertite, sapientissimi viri. Cum enim leges paucis verbis comprehendantur, verbaque ipsa tempore adolescant, pulcherrima antiquitatis instituta intercidissent, nullaque omnino esset Jurisprudencia, si Romani quoque Græcorum exemplum secuti, suarum legum interpretationem oratorum arbitrio permisissent. Sed ut omnia a Græcis accepta fecere meliora, ita præsertim magis, quam illi ad regendum facti, cum leges accepissent, multisque amputatis & additis, suis moribus accommodassent, primum quidem Pontificibus, deinde vero, quos modo dixi, Prudentibus earum explicationem commendarunt; unde orta scientia juris, Romanorum propria, & una ex omnibus humanæ societati utilissima. Neque vero caret lumine illo philosophiæ, in quo tantopere se Græci jactant. Qui enim sibi tantum esse prudentiæ ingenique putabat, ut de jure respondere posset, is & antiquitatem omnem studio complexus erat, & Dialecticas regulas, & Moralem in primis philosophiam perdidicerat; sine quibus nec vetera legum vocabula expediri, nec sensa ad sæculi

enli mores traduci, nec omnino generalis præceptio rebus singulis aptari potuisset. Quod illud spectat Ciceronis in libro *de Orat.* 1. c. 44. Jus civile Romanorum multis præclaris artibus excultum, ceterarum gentium inconditum fuisse ac pæne ridiculum, ne Lycurgi quidem libris, aut Draconis, aut Solonis exceptis. Nolite enim audire hominem *pro Muræna*. Causæ inservit more suo, & ut Sulpicium prosterнат, nulli parcat Jurisconsulto. Tota illa oratio festiva est, & ad carpendum instituta, ut ne ipsi quidem parcat Stoicorum philosophiæ. Quam cum audiret Cato ejus adversarius, *Dii boni*, inquit, *quam ridiculum Consulem habemus!* Idem tamen, cum impet. in Vit. Cat. petus ille forensis deferbuisset, amoris iræque expertus, Duodecim Tabulas supra omnes philosophorum bibliothecas extulit, nihilque tam honorificum in pace judicavit, quam Juris scientiam profiteri. Et vero qui fieri poterat, ut nobilissimi Romæ viri vel hoc sibi studio ad honores ac dignitates viam munirent, vel honoribus jam perfuncti hinc sibi senectutis solatium & ornamentum quærerent, si tota juris scientia tenuis esset, ut ille contra Sulpicium dixerat, formulisque & actionibus contineretur? Adde his, qui respondendo jure privatis cavebant, illos etiam qui imperium meditabantur, seque ad leges ferendas, siquando opus esset, per hæc studia comparabant. Quod utinam semper ex hac schola magistratus exissent; neque enim tam cito tanta rerum moles corruisset. Equidem sæpe mecum ipse cogitare soleo, quamobrem qui reipublicæ operam navant, aliis se potius litteris dedant, & politicam artem a

Philosophis petant, hominibus plerumque sibi viventibus. Quod ego non reprehendo, sed nusquam certe, quam in Romana Jurisprudencia clarius apparent civium negotia, personarum gradus, rerum divisiones, acquirendi modi; nusquam publica & privata crimina, poenæque criminibus constituendæ; nusquam officii veræque virtutis munus; nusquam demum cetera, quæ humanam societatem lædere, tuerive possunt. Atque hæc quidem ad omnem civilis administrationis formam apposite scripta; quia nullus est rerum status, in quo Roma, perpetuis agitata motibus, aliquando non fuerit. Nam a Romulo ad Tarquinium usque Superbum experta regnum est; tum ad Aristocratiam per Brutum & Valerium Consules transiit; surgentibus deinde Tribunis, partemque honorum omnium sibi vindicante plebe, in Democratiam commutata est; post a Cinnanis contentionibus ad Triumviros usque reipublicæ constituendæ Oligarchiæ speciem quamdam obtinuit; denique amissa libertate omni, modo regio dominatui similia, modo tyrannidi passa est; tam sibi ipsa dissimilis, quam Principes habuit genere, moribus, ætate, ingenio diversos. Numquid alii sunt antiquæ doctrinæ fontes, numquid ulla Græcorum volumina, unde plura temperandæ civitatis documenta, unde certiora, unde magis probata, quodcumque tibi regimen fortuna dederit, sive regium, sive populare, sive mistum, parari possint? Sed, ut spero, Græcarum rerum amatoribus satis id superque futurum est, quia ratione ducuntur; nec unius disciplinæ gloriam Romanis gravate concedunt, reliquas omnes ex Græcia, Mu.

Musarum & Apollinis patria, tamquam mutuas exorantibus. Gravior mihi pugna, multoque periculiosior cum illis ineunda est, qui se religione quadam ad tempus adscita callide tegunt, totamque juris scientiam Mosaicis legibus definiunt. Haud ego sane inficias iverim, ex fonte illo saluberrimo, omniumque antiquissimo leges ac jura manasse omnia; ajo etiam, & confirmo: sed quando hæc in flumen amplissimum propagata sunt, cur fonti adhuc aridulo segnes hæreamus? Omnia sunt in libro illo divino, quæ ad religionis institutionem, vitæque honestatem ullo modo pertinere possunt; sed nimia quadam licentia fit, ut & Politicas, & Philosophicas commentationes quidam ex illo eruant, alii oratorium, alii poeticum artificium, nonnulli etiam incredibili depravatione rerum mysteria Chymica, & siquid est illis ab homine excogitatum inanius. Hoc genus hominum, qui se multa in sacris litteris videre putant, ab earum proposito remotissima, jam a mente discessit, & insanabili morbo laborat. Quos inter non eos censeo, qui summa juris capita ab ipso legislatorum principe Moyse derivant: hi enim & valde sapiunt, & ut ante dixi, nobiscum faciunt. At qui privatum publicumque jus, omnemque juris legumque doctrinam indidem hauriunt, mihi quidem nimis videntur extendere, quæ ad unius populi regimen scripta sunt, neque sane perpetuum, sed Christi summi regis adventu jam extinguendum. Angusta fere sunt hujusmodi ingenia, & in quo maxime gloriantur, in eo summam levitatem ostendunt. Cum ad eam pervenerunt insaniam, ut

hinc

hinc acuminis laudem quærant, omnia sibi licere putant, contraria contrariis inserunt, nova sensa componunt, monstrosas interpretationes effutiunt, nihilque tam alienum a S. Scriptura est, quod ejus auctoritate non confirmet. Jam in eo quam sibi placent, cum dicunt, Romanis legibus vetitas cærimonias atque impia sacra juberi! Ita nimirum. At nos ex iis, & præterea multis jam obsoletis de sepulcrorum jure, de judicibus dandis, de bonis addicendis, de prisca parentum potestate, de servitute, eruditionem expromimus, jussa & sanctiones temporis condonamus. Quod si grave aliquid afferre cupiunt, quin potius obscuritatem objiciunt? quod nos Romani juris vitium pro nostra ingenuitate fatemur; si modo vitium est, quod rei majestatem parit, & hominum segnitiam exercet. Objiciunt enimvero multi: nec tamen desunt, qui nimis plana omnia, & in medio posita esse querantur; quia sibi convenire nequeunt, qui res optimas temere oppugnant. Qua in re dicam universe quod sentio. Sunt in Romana Jurisprudencia, quæ maxima ingenia exple-re possint, nihil quod opprimere; Jus continet verbis ac sententiis obscurum, non tamen antiquitatis studiosis; magnitudine immensum, non tamen promptis & incitatis; rebus admodum varium, & alicubi etiam sibi contrarium, non tamen intelligentibus; uno verbo, pelago illam Justinianus comparavit procellis scopulisque infesto, in quo scilicet peritus nauta ingentem sibi laudem comparare potest, imperitus ne minimam quidem. Ergo huc, si viri sumus, operam omnem studiumque conferre debemus, in hoc co-

ten-

tendere, hoc urgere, quod & pulcherrimum, & Romanum est, immo mehercule pulcherrimum, quia Romanum. Omnia sunt ab eo populo mirabiliter facta, & nescio quo pacto in commune hominum bonum æternitati consecrata. Lingua ipsa in eo solo, ut fit, temere nata, nec antiquissima, nec copiosissima, neque fortasse elegantissima omnium, quæ ad nos pervenerunt, Romanis tamen satis quodammodo prædita, adhuc toto orbe diffusa est; omnesque gentes humanitate aliqua imbutæ latine discunt: quasi demum inter se tacito consensu convenerint, ut ingens illud damnum hac una reparent, quod ex eorum superbia tulerunt, qui Babelicam turrim auctore Nembrotho ædificantes, in varios sermones distracti sunt, eamque vivendi communionem dissolvere coacti, quam sublato colloquendi usu, diutius servare non poterant. Quid igitur de Romanis legibus dicendum erit summo ejus reipublicæ consilio constitutis, suffragio gentium omnium probatis, prudentum hominum interpretatione expeditis, magnorum Imperatorum auctoritate novisque constitutionibus roboratis? Sed hætenus de illis plus satis. Nolo enim videri tantum Romanis tribuere, ut nostris detrahā, quibus non quidem studia, sed vitam moresque regere oportet. Quod tamen non sine auctore facerem; quia fere humana ingenia ad extrema delabuntur, & cum alii ne in scholis quidem Romanas leges ferre possint, alii contra & judiciis, & curiæ quotidie obrudunt. Ego vero ad suas quemque mitto, modo sint ea sapientia conditæ, quam sibi a Romanarum studio legislator com-

1. 16.

comparare potuit. Quid enim? An Ægyptii sua sibi jura statuerunt, sua Cretenses, sua Lacedæmonii, Athenienses, vetustique Italiæ populi sua, nos autem nobis diffisi aliunde mutuabimur? Itane Gentes omnes, cum staret Roma & æterna videretur, de suis institutis sollicitæ erant, ut αὐτονομίαν, non secus ac libertatem, partim bello tuerentur, quod Antiochus fecit, partim pretio redimerent, quod Strabo de Tyriis narrat, omnes autem, quæcumque possent, pulcherrimum hoc summæ nobilitatis ac felicitatis testimonium publicis monumentis ad posteros propagarent; nostri vero homines in rebus judicandis sollicite quærent, quid Romanis Decuriis ante annos bis mille videretur? Ergo Athenis, non dicam sapientissima civitate, sed sapientiæ ipsius domicilio, hoc tanti erat, ut νομοφύλακες, peculiaris magistratus, omnibus consiliis interessent, naviterque caverent, ne patriis legibus injuria fieret; nos vero etiam indignabimur, nisi nostris antiquatis, peregrinæ valebunt? At enim nondum ea tempestate Romana erat Jurisprudentia. Vero: atqui tempestate nostra non mores sunt Romanorum. Hoc enim facit unum, ut ne optima quidem in usu esse perpetuo possint, quod longinquitas temporis abolet consuetudines priscas, & hominum ingenia commutat. Da scilicet nostris hominibus, his moribus, hoc Principe, sub hoc cælo viventibus, da Labeonis responsa summo jure, ac Dialecticis regulis adstricta; da spinosa illa ceterorum Proculianorum ex Zenonis & Chrylippi ducta principiis, qui omnia crimina æqualia judicant, nulloque discrimine punienda.

Deum

Deum profecto atque hominum fidem ipsa iudiciorum subsellia, non modo homines implorabunt. Id demum iustum est, quod temporibus convenit, non secus atque illud salubre dicitur, quod loco & tempore laboranti adhibetur. Ut igitur in arte medica, non cuilibet omnia, nec eadem semper salutaria sunt, ita in regendo & iudicando nisi iustitiæ munia pro rerum ac temporum conditione statuuntur, iusta cum iustis aliquando pugnabunt, legesque illæ, per quas civitatis morbi curari debent, modo insalubres, modo etiam exitiosæ videbuntur. Quid quæritis? Ipsa quoque Romanorum jura pro variis rerum conversionibus mutata sunt, suisque temporibus, & civium ingeniis accommodata. Neque enim aut jus Papyrianum, exactis Regibus, libero populo convenire potuit; aut duodecim Tabulæ civibus in immensum auctis, variatisque opum magnitudine moribus satis fuere; aut plebiscita & senatusconsulta, amissa rursus libertate, non Principum constitutionibus indiguerunt. Inunc, & antiquas leges huic sæculo recita. Delectabiq; cognitione pulcherrimæ rei; at paucos, mihi crede, movebis, ut patrias deserant, & ad illos mores suorum dissimillimos adducantur. Quid vero si illis, quas Romanas appellant, nonnihil immiscuit avaritia compulsus Justinianus? quid si multas ipse quoque vitiavit partim celeritate faciendi negotii, partim nescio qua malitia Tribonianus? Videlicet ita ferunt: quod ego nec sustinere ausim, neque refellere. Etenim utcumque sit, nostras ego malo, quam illas; sed illas, quam ceteras. Quod cum dico, non ego illis nostras

op-

oppono, quia meliores, sed quia temporì & moribus appositæ nostris. Si enim barbari cum Italiâ occupassent, multisque sæculis beatissimam hanc orbis partem incoluissent, numquam tamen ejus humanitatem & saluberrimam vivendi disciplinam ita transferunt, ut suarum legum turpium ac ferinarum amore deposito, Romanas addiscerent; cur nos nihilo minus ad elegantiam, quam Romani, ad æquitatem vero etiam magis exculi, antiqua illorum jura, nostris abiectis, revocabimus? Ego vero ne hoc quidem moleste fero, Gothos & Langobardos paullo belluarum dissimiliores, cum mores exuere in hac humanitatis patria nequivissent, pares moribus tenuisse leges; nedum velim, litteris ac religione cultissimas gentes suis se repente abdicare institutis, & ad aliena transferre. Quid quod ipsius patriæ amor, & quædam veluti patriarum institutionum reverentia jubet unumquemque custodire sua, & adversus novatores propugnare? Ut enim commovemur, & exardescimus, ut cælum terramque miscemus, quoties aliquis oblitus sui peregrinos mores usurpat; eaque arrogantia, quam quidam solent ex longis itineribus domum referre, patria quæque fastidit, mensas, vestes, studia, sermonem, nihilque nisi Gallicum, aut Anglicum admiratur! Quod si privatos homines sibi unis per hæc insanientes ferre non possumus, quomodo illos feremus, qui judicia administrant, unde pendet civitatis salus, si patrio receptoque jure contenti non sint? Quo loco Venetorum Patrum consilium, & præter omnia antiquitatis exempla insignem prudentiam silentio præterire non possum; qui cum mul-

multa æternæ reipublicæ fundamenta jecerint, tum illud in primis religiose caverunt, nequid umquam in judicando novaretur. Hanc illis constantiæ laudem suarum legum confidentia parit, quæ certe non tanta esset, nisi optime nossent, majores suos officia vitæ omnia quam rectissime præscripsisse, omnesque posterorum conatus, jubendo optima, prævertisse. Quemadmodum enim omnium rerum publicarum formis inter se comparatis, hanc denique unam constituerunt, quæ plurimas felicitate, diuturnitate omnes superavit; ita Græcis Romanisque legibus simul compositis, multaque opera expensis & æstimatis, hoc demum condidere jus, quod Venetum dicitur, ex omni vetusto jure sapientissime expressum, & æquitatis nomine, ubicumque gentium cognoscitur æquitas, celebratum. Nullam esse regionem puto, ubi mores & ingenia hominum ab antiquis legislatoribus egregie explorata mitioribus vinculis in officio contineantur, quæ maxima est, ac ferme una Principis gloria non metu, sed amore imperantis: at hoc singulare bonum, si quando aliena subrepere jura patiemur, statim corrumpetur, & ut legum arbitria, ita rerum ceterarum (quod Superi avertant) ad alios migrabunt. Quamquam, quod fieri nolo, ne fieri quidem fortasse potest. Fuit hoc quondam Romanæ reipublicæ fatum, ut una propemodum esset omnium hominum civitas, nomenque unum, tantumque Romana jura, quantum arma procederent; quod victæ nationes ne victæ quidem sibi viderentur, si Romano jure uti possent, civesque ejus urbis, quæ una credebatur ad imperium & immortalitatem

tatem constituta, nominari. Nunc quæ tantula civitas est, quæ non se ad imperandum natam existimet, cujus non magni ad gloriam tituli, legesque multæ aureis litteris descriptæ, & siquid adversi fortuna ferat, ipso civium sanguine custodiendæ? Qui paucorum jugerum regulus non se summis Principibus comparat, juris auctor sui, custosque tanto solertior, quanto plura infirmi timere solent? Non est igitur opus voce nostra, qua in re sibi quisque sapit. Id nobis curandum, ut, quod primo loco dixi, Romana jura in scholis teneamus, quibus homines instructi sua mercede utilius tractabunt; eamque felicitatem civitatibus parient, quæ rectam judiciorum administrationem plerumque consequitur. Hæc nos præsertim exerceant, quibus si non conceditur in foro esse, operamque litibus dare, illud tamen propositum est, ut ex antiquis legum fontibus magnam priorum verborum suppellectilem, solemnes formulas, omnemque eruditionis copiam reconditæ & exquisitæ ad aliarum disciplinarum usum colligamus. Utamur Principis Serenissimi beneficio, qui celeberrimos toto orbe Jurisconsultos magnis præmiis advocatos hac in urbe docere jussit: utamur sæculi sapientia, in quo cum littæræ facultatesque omnes pristinam dignitatem recuperarunt, tum maxime juris scientia, excussa barbarie, quæ per tabulas & leguleios obrepserat, rursus ad Alciatos, ad Goveanos, ad Cuiacios, ad Hotomanos, tamquam in sinum complexumque parentum, regressa est: utamur denique fortuna ipsa, quæ bonis artibus tandem aliquando conciliata, undique Augustos, undique

Mæ-

Mæcenates excitat, & litterarum & litteratorum studiosissimos. Quod postremum video a multis negari; sed mihi quidem ad hujus orationis exitum properanti, in te unum, Princeps Eminentissime, veluti multorum exemplum conjicere oculos satis est, cui ad insignem & absolutam erga litteras munificentiam, vel nihil omnino deest, vel illud unum, ut tantum illis prodesse possis, quantum cupis.

EPISTOLA

Præposita editioni primæ hujus Orationis.

SI quam libenter fit aliquid, tam etiam recte fieret, nihil a nobis exisset hac oratione tolerabilius: sed hoc in genere tum maxime ineptire homines solent, cum minime volunt. Nimius enim effusa voluntatis impetus ingenium fere ultra modum movere solet, tantumque agitare, ut neque parere prudenter possit, neque explicare disponere, neque apte luculenterque ornare. Id ego mature prævidi, fecique diligenter, ut ratione, non impetu ducerer: verumtamen ardua res est, neque illa diffiteor, quæ me hominem communibus vitiis obnoxium abripere potuerunt, & in devia propellere. Ergone inviti melius dicunt? Imo longe pejus. Cum enim studia humanitatis omnia in primis voluntate nutrantur, nihil neque poeticum, neque oratorium, quod ægro animo fiat, potest esse probabile. Quid quæris? Libenter in hoc argumento versatus sum, quod ipsum

per se grave, cum ea insuper eruditione conjungatur, quæ latina studia tractantibus familiarissima est. Plura ego de me polliceri non ausim. Quantum voluntas & conatus in homine valeant infirmissimo, alii viderint. Vale.



ORATIO VIII.

AD HISTORIAM.

*Qualecumque Historiæ studium ad omnes pertinet,
Criticum ad paucos.*

Magnopere vereor, ne nimio plus ab adolescentibus nostris hodierna luce postulare videar, humanasque vires non satis prudenter æstimare, si gravissimis disciplinis, de quibus superioribus annis verba feci, Historicum studium suapte natura immensum nunc denique adjiciam: quasi vero rebus necessariis onustos, ac pæne impares, supervacuis opprimere velim; spiritumque illis, ut ita dicam, atque animam intercludere. Verum & me illi satis norunt neque multa, neque severius exigere solere; & ego illos quotidie video, quidquid socordia peccant, modo magistro, modo naturæ imputare; & utcumque tandem res se habeat, quidvis potius committendum est, quam ut majores nostros, quorum consilia plane divina vel in rebus minutissimis recognoscimus, in tam gravi litterarum negotio minus vidisse judicemus; quamque ipsi statuerunt Historicam scholam, nobisque in primis commendaverunt, nos inani suspicione perterriti, aut levitate ducti prætermittamus. Equidem non diffiteor, nimis infinita esse, quæ hoc nomine comprehenduntur; quo cum antiqua monumenta veniunt obsoletis verbis fabulisque involuta; tum Geogra-

phicæ Chronicæque tabulæ æternis difficultatibus impeditæ; tum innumera rerum gestarum volumina non sine partium studio scripta; tum denique magna quædam controversiarum copia ad hæc ipsa, si fieri possit, expedienda, si non possit, magis magisque implicanda. Sed quemadmodum patrisfamilias prudentis est mensas apparatusissimas struere, non eundem tamen pueris cibum ac viris præbere; ita officii nostri ratio postulat, ut cum omne studiorum genus, quæ libero homine digna sunt, in medio posuerimus, tum demum quid cuique, quoque tempore conveniat, etiam atque etiam consideremus; & pro ingeniorum ætatumque varietate onera laboresque distribuamus. Ac si qua ars, aut disciplina duce solertissimo indiget, ne quid in illa ætatis imprudentia committatur, Historicum certe studium tam lubricum est, ut quædam non ignobiles Academia, cum de tanta solertia desperarent, quanta opus esse intelligebant, hoc tam insigni bono carere maluerint, quam levem juventutem periculo exponere. In quo, nequid dicam gravius, duobus Lycurgis similia fecerunt, sapientibus quidem viris, sed in hoc præter modum severis, quod alter, ut divitiarum aviditatem compesceret, omnem auri argentique usum Lacedæmoniis interdixit; alter, ut ebrietatem averteret, vites omnes in suo Thraciæ regno præcidi iussit. Nos exempla meliora secuti, moremque loci hujus, in quo alti educatique sumus, retinentes, ita statuimus, qualecumque Historiæ studium ad omnes pertinere, Criticum ad paucos. Hoc vero cujusmodi sit, quantum quidem animo ex vestra sapientia conjicio,

cio, plerique omnes intelligitis: sed ne quis tamen unus consilium hoc nostrum insimulet, oratione explicabo; simulque faciam, ut rerum præteritarum cognitio quanti sit in unoquoque genere, constet; simul illud ostendam, quam multis naturæ industriæque præsidis paratum esse atque instructum necesse sit, qui velit antiquitatem curiosius expendere, & severa Criticorum trutina sine periculo castigare.

Cum discendi desiderium ab ipsa nobis natura inditum Philosophi fuisse dicunt, tamen si universe loquuntur, nihilque prorsus excludunt, quod in hominis cognitionem cadere possit; ubi tamen eo descendunt, ut rem pluribus verbis exponant & confirment, facile apparet, in quo uno scientiæ genere omnes homines desiderando conveniunt, id aut Historicum esse, aut ad Historiam quoquo modo referri. Qua enim ætate plurimum natura valet, necdum iis affectibus tangitur, qui nos ad ingrata etiam suscipienda compellunt, vix quippiam est tam invisum, quam schola & magister: at illa tamen ætatula ipsa narratiunculis delectamur, earumque studio ducimur; quæ licet plerumque falsæ sint, magisque poeticæ, quam historicæ, certe declarant, quantum natura nostra rerum præteritarum cognitione afficiatur, cujus rei gratia fingendum etiam nutriculae putant. Ubi porro adolevimus, rationemque adhibere jam licet, hoc ipsum naturæ iudicium vel ex eo manifestum est, quod in aliis quidem disciplinis omnes industriæ nervos contendimus, nequid nobis nisi certum ac firmum, quantum rerum conditio patitur, inferatur; at in hac temporum præ-

teritorum investigatione, etiam vero similia libenter audimus; scientesque ac volentes ad poetas convolamus, qui insitam humano ingenio cupiditatem fallendo expleant, suæque illa mendacia, quantumvis immania, nobis obtrudant. Curiositas hæc non unius, aut alterius hominis, sed plane omnium, quicumque, non dicam litteras norunt, sed litterarum nomen audierunt, quia scilicet naturalis est, nullo nos vitæ tempore, nullo loco deserit; & cum aliæ omnes tardius exortæ, ætatis flexu dilabantur, hæc una nobiscum nata, ad extremam usque senectutem perdurat. Igitur cum dico, Historiæ studium quaecumque ad omnes pertinere, naturam ipsam ducem sequor, cujus si ratio perpetuo haberetur, haud ita multos suscepti consilii pœniteret. Nullam gentem esse puto tam incultam, tam vecordem, tam omnis humanitatis expertem, quæ suæ reipublicæ acta non litteris mandet, legique cupiat: carere barbari eloquentia possunt, carere philosophia, carere disciplinis omnibus, Historia carere non possunt. Hinc Spartani ad omnia rudes, præterquam ad arma, Dicæarchi tamen librum de majorum suorum gestis, totoque civitatis regimine quotannis in loco publico recitari volebant: Romani vero antequam feritatem exuerent, rerum suarum annalibus dedere operam; quos quidem non quivis unus ex populo, sed Pontifices ipsi scribere jubebantur; ut iidem & Sacrorum & Historiæ curam haberent, resque duas potissimum necessarias magistratus unus, idemque gravissimus procuraret. Quid Hebræi, tam antiqua natio, quam natura ipsa, in omnibus ferme rebus numine af-
flata,

flata, ut gentibus consecuturis auspicia præberet
legesque vivendi, quid inquam Hebræi? numquid
aliunde suas litteras, quam ab Historia auspicati
sunt? Nullus est codex Mosaicis commentariis an-
tiquior, ut ex hac tamquam naturæ voce discere
possimus, quo homines suoapte ingenio ferantur.
Quod si parum est in natura momenti, anne pa-
rum etiam in Dei optimi maximi providentia,
qui sacrum Historicum movit, ut religionis my-
steria, morumque instituta hac via & ratione do-
ceret? Nolo enim hic plura quærere: liber
omnium divinissimus, quo uno ad salutem indige-
mus, quem sine intermissione versare, legere,
memoriæ mandare debemus, hic, inquam, liber
tam necessarius historice scriptus est; num igitur
sapere sine Historia ullo modo possumus? Sed ni-
mis longe res ducitur: cominus agamus. Jam
enim scire velim, quodnam litterarum, aut do-
ctrinæ genus sine Historiæ adminiculo consistere
possit. Non sane poësis, quæ facta imitari fin-
gendo solet; non nostra hæc dicendi facultas,
quæ rerum vetustarum exemplis tum ad ornan-
dum, tum vero etiam ad probandum frequentis-
sime utitur; non Jurisprudentia, quæ sine Ro-
mani imperii totiusque antiquitatis notitia intel-
ligi omnino nequit; non denique Civilis scien-
tia, quæ multiplici rerumpublicarum historia con-
stat, & ex ea maxime conflata est. De Philoso-
phia vero quid dicam? Mitto quærere, utrum
animalium & plantarum historia huc re vera per-
tineat: sed cum pulcherrima sit Philosophiæ
pars de officio differens, sive a Pythagora,
sive a Socrate inventa, num hæc præceptis tan-

tummodo continetur? Nempe aut ipsa morum doctrina nihil est aliud, nisi Historia; aut ita cum Historia conjuncta, ut si caret exemplis, scholastica sit, jejuna, supervacanea. Tibi intus cane rigida illa & adducta virtutum genera, quorum usu & possessione felicitatem definis: nihil nobis hujusmodi persuadere poteris, nisi rerum eventu & hominum factis ostendas, quid pati possit humana conditio, minime nota illis, qui pallio inclusi intra parietes philosophantur. Quid fieri debeat, oscitantes audimus; at cum id factum esse intelligimus, nec sine fructu, & a præstantibus viris factum, tum vero studio movemur conandi similia, tum æmulatione exardescimus. Magna est hæc Historici studii ad philosophica tractanda necessitas, & haud scio an maxima; non tamen major illa, quæ Theologicas disputationes comitatur. Utrum enim ullus potest esse, aut dici Theologus, tanto par nomini, qui omni prorsus Historiæ cognitione careat? Iners profecto est, qui profanam ignorat, siquidem Canon, optimum ac solertissimum harum rerum disceptatorem, consulimus: at si quis ne sacram quidem tenet, quem ego illum Theologum dicam? Nisi forte parum pertinent ad Theologiam Mosaicæ narrationes, acta Pontificum & Conciliorum, priscorum Patrum memoriæ, Apostolorum & Martyrum vitæ, totius denique veteris disciplinæ cognitio, unde multo firmitus & clarius Christianorum sacra, quam ex *possibilium*, & *impossibilium* contemplatione, multarum scholarum otio familiarissima, demonstrantur. Quod nolim perinde accipiatur, quasi ego Scholasticam Theo-

lo

de loc.
Theol.
l. XI.

logiam summovere cupiam; & eruditionem quamdam ejus loco ponere sine illo doctrinæ ordine, quam μέθοδος Græci dicunt, sine acumine, sine disputationibus, uno verbo, quæ ingenio parcat, memoriam exerceat. Multa in Theologo esse oportet; nec satis mûneri facit, qui Dialecticis commentationibus tantarum rerum scientiam circumscribit; nec item satis, qui omnia religionis dogmata ex Ecclesiæ fastis & annalibus egregie recitat, nisi eadem possit luculentis acutisque rationibus illustrare, & contra oppugnationum perfidiam communire. Ardeo, mihi credite, in parte tam ampla dicendi desiderio; sed multa necessario omittenda sunt, ut de Critico Historiæ studio, quemadmodum initio proposui, quæ sentio, vobis exponam. Vereor enim, ne sibi quidam emendandi gloriola abrepti nimis indulgeant, suisque illis judicandi regulis temere usi, non modo leviora antiquitatis monumenta concutiant, sed in arces quoque ipsas invadant, tantumque sibi licere putent, quantum Criticæ concedendum prædicant; quæ ipsa per se optima est, magnoque in litteris usui, sed invidia laborat, quod ad ingenia furiosa aliquando perveniat. Neque vero iccirco actionem instituo, ut ea judicio persequar, quæ legitimæ censuræ modum & potestatem prætergrediuntur. Nimis hoc longum esset, majorisque ingenii opus. Sed illud mihi tamen non difficile erit ostendere, paucissimis hominibus ætate & sapientia valentibus arma hæc concedenda esse; quibus non recte adhibitis, solitudo & vastitas nobilissimis historiis, multarum ætatum fide confirmatis, afferri potest. Etenim si Criticum

cum hujus facultatis studium in eo consistit, ut nihil omnino credatur, quod non certissimis monumentis traditum ad nos devenerit, quotus quisque curam hanc tantam suscipere potest, ut obscurissimam antiquitatem excutiat, probet, castiget, excipiat, condemnet? Quot genera rerum, linguarum, studiorum teneat oportet; quam multa legerit, viderit, audierit; perceperit ex omni vetusta recentique doctrina, qui tantum in litteras sibi permittat, judiciumque tam periculosum, volentibus reliquis, aut saltem non ægre ferentibus, exerceat? Jam vero illud quantum est, vulgares opiniones deponere, ab omni odio atque amore sibi cavere, nimios animi motus modo in vetera, modo in nova pronioris coercere, veritatem unam tamquam ducem ac pæne Deam sibi proponere; contra suos, contra patriam, contra seipsum, si ita necesse sit, aliquando sentire, & quæ sentias, libere pronunciare? Nemo sane est, qui ita non profiteatur communi illo Criticis omnibus, ac fere jam ridiculo scribendi procæmio, in quo vitia humanæ naturæ omnia, veritatem uni tenentes, statim ejurant, multis ingenio abutentibus maledicunt, de sua fide & integritate magnifice pollicentur. At Carneades tanta sapientia vir, quanta nemo ignorare potest, nisi qui totam antiquitatem ignorat, ita sibi hac in re diffidebat, ut cum adversus Zenonem scribere constituisset, ad bilis imperus temperandos helleborum sumserit. Nunc tantam illam diligentiam plurimi rident, quibus purgandis ne tota quidem sufficiat Anticyra; vixque in provinciam tam difficilem ingressi, continuo stilum exacuunt, magna-

gnaque Scriptorum nomina ad eadem designant,
 Et hoc quidem juvenum solet esse vitium, aut
 eorum maxime, quod sibi videantur aliena ob-
 trectatione crescere, matureque ad famam sine
 multo labore pervenire. Herodotus, inquit,
 Xenophon, ceterique Græci poetarum similes
 sunt; Thucydides vero minus ad mentiendum
 aptus, obscuritate sermonis veritatem obnubit: ex
 Latinis Livius superstitiones consecratur, nec pa-
 triam verborum positionem dediscere potest; Sal-
 lustius vetustatem affectat; Cæsar gloriosus, Cur-
 tius mendax, Florus declamator est: ex Eccle-
 siasticis Sulpicius miracula venditat; Theodoretus
 fuco & metaphoris studet; Rufinus futilis est;
 Eusebius, Socrates, Sozomenus favent Hæreticis;
 omnes autem negligenter ac supine tempora
 signant. Utrum quilibet unus ita loqui potest?
 Non nego posse aliquos, sed eos scilicet, qui
 maximam vitæ partem in optimis studiis colloca-
 runt; qui multas sibi litteras ac reconditas, præ-
 ter latinas, addiderunt; qui summa denique opi-
 nione ingenii consecuti sunt, ut extra invidiam
 positi judicentur. Nempe hæc sibi multi tribuunt,
 sed pauci præstare possunt. Ex hoc enim tam in-
 genti hominum numero, qui in hoc pulvere de-
 sudamus, quique nobis ipsi, ut fateamur inge-
 nue, tacito quodam sensu blandimur, aliis fere
 valetudo deest, aliis voluntas, aliis ingenium,
 aliis subsidia librorum, aliis in vestigando conten-
 tio, aliis patientia, aliis denique alia, quæ sin-
 gula ubi deficiunt, multi adhuc ad planiora li-
 terarum genera aditus patent, ad Criticum Histo-
 riæ studium pæne nullus. Fac enim, se tam im-
 men-

menſo ac ſcopuloſo pelago adoleſcentem committere: jam primus ejus labor Sacra Biblia, quo in codice ſine controverſia fideliffimo quam ſæpe tamen ſecum ipſe luſtabitur, ſi omnia ad Criticæ leges exigere volet! Agedum incipe computare tempora, unde ſtudioſum hoc exordia ducit: ecce tibi ſtatim nubem offundunt Septuaginta Interpretes, qui annos centum generationibus ſingulis adjicientes, Hebræam, vulgatamque *ἡερογλαφίαν* in magnum diſcrimen conjiciunt. Conſtitue mihi Beli tempus, de quo non uno, aut altero ſæculo, ſed annis ferme mille principes hoc in genere Scriptores inter ſe differunt. Quandonam Aſſyriorum, quando Perſarum imperia cœpere; quos in annos confers egregium Judithæ facinus; unde Babilonicæ captivitatis tempora numerare incipis, unde Danielis hebdomadas, unde ipſum Chriſti Domini adventum tam celebrem, tam notum, tam illuſtrem, de cujus tamen anno, ſi orbis conditi rationem habeas, opiniones plus nonaginta, partim aliquo modo varias, partim omnino contrarias invenies? Te vero miſerum, ſi ſacra cum profanis componere velis, nomina nominibus, facta factis conciliare. Te Belus vexabit, te Nembrothus, te Cyrus, te Aſſuerus, te Artaxerxes, te multi Darii, te non modo temporum, ſed regionum terrarumque deſcriptio; quæ omnia ſiquis diſtinguere recte poteſt, & ſuo quæque loco ſtatueret, hunc ego hominem non cum cetera Criticorum turba comparo, ſed in primo ſubſellio colloco, & Muſis ipſis proximum judico. Quod ſi tanta eſt in hiſtorico illo difficultas, qui nec falli potuit, neque fallere voluit,

luit, quo animo ad eos accedes, qui homines sunt, humanisque erroribus obnoxii? Quam mentis acie, quo conatu opus erit, qua prudentia, quo ingenio, ut cum te ad horum lectionem contuleris, quanti quisque valeat, statim attendas; sitne natura sua ad laudandum inclinatio, an ad carpendum; quam sit ambitiosus, quam credulus, quam superstitiosus; utrum dubia, utrum contraria narret; unde sumat, quomodo sciat, a quibus acceperit, quorum partes sequatur, quibus adversus sit? Neque vero cum tantam animi intentionem, tantamque diligentiam adhibueris, salva res erit. Solent enim Scriptores, ubi imponere volunt, stilum naturamque commutare; & interdum quidem veracissimi falsa dicunt, quemadmodum fallacissimi interdum vera. Quo fit, ut cum facta, & auctoritates inter se pugnant, nemo nisi sapientissimus momenta illa colligere possit, quibus in partem omnem pensatis, iudicium conjiciendo feratur. At enim regulæ Criticæ sunt ab hominibus perspicacissimis compositæ, quarum ope ne adolescenti quidem difficile fuerit istiusmodi freta, & si quid istis infeltius est, superare. Fateor equidem eo me compulsus, velut in acie declinando atque effugiendo, quo minime volebam; non quod vulgari Sophistarum artificio usus, libenter graviora dissimulem, sed quod regulæ istæ a præstantissimis ingeniis excogitatæ magnam quamdam animo venerationem metumque objiciunt, nec liberam vocem erumpere sinunt. Verumtamen audendum in loco est; tametsi idipsum parcissime faciam, ne forte videar caput artis eatenus petere, ut totam

tam convellam. Prætereo igitur, quod vulgo fit, regularum auctores sese invicem labefactare; non dico, ex hisdem contraria concludi, quod Abgatti litteræ, ne multa recenseam, per eadem obpugnata propugnataque demonstrant; taceo, si quid in illis est nimis subtile, nimis varium, nimis multiplex, non tam ad veritatem enodandam, quam ad involvendam accommodatum; omitto præterea multa magni quidem momenti, sed quæ nec invidia carent, nec tantula oratione comprehendi possunt. Verum date mihi hanc, quæso, veniam, ut de illa nonnihil dicam, quam Critici omnes ceterarum principem judicant, certissimam, inconcussam, ante oculos diu noctuque habendam. Age igitur recita. **SIQUID IN ANTIQVIS MONUMENTIS OBSCURUM, PERPLEXUMQUE ERIT, CRITICI INTERPRETES SUNTO.** Euge, nihil moror. **SI NARRATIO NARRATIONI OPPONITUR, HOC PRIMUM JUS ESTO: QUA QVIS ÆTATE, QUOVE LOCO VIXIT, EJUS ÆTATIS LOCIQUE HISTORIAM SCRIBENTI FIDEM HABETO; TUM QUI PROXIME VIXIT, CONSULITO; AB ALIIS CAVETO.** Hoc tamquam filo per avia ducti memorias antiquissimas Critici quidam condemnarunt, & narrationunculas nescio quas multorum sæculorum contemptu situque obsitas in earum locum suffecerunt, parati negare verenda quælibet, si quis Scriptor ab inferis repente erumpat eorum æqualis, de quibus est controversia. Numquid igitur priscis temporibus nullæ erant animi perturbationes, affectus nulli, non amor, non odium, non injuria, non

non beneficium, quibus Scriptores labefacti rerum fidem violarent, seramque posteritatem aut malitia, aut infirmitate deciperent? Nunc certe Deum quendam esse oportet, qui potentum virorum facinora, seu pulchra, seu turpia, viventibus ipsis, fideliter scribat. Amicorum quoque ducenda ratio est, multo vero magis filiorum, interdum etiam nepotum; ut numquam fere simplex ac nuda veritas, nisi tardissime efflorescat. Multa profecto in hanc rem dici possent, nobis ipsis non audita modo, sed visa, nisi esset hoc ipsum periculosum; ut jam conjicere possitis, quam vera de aliis historici dicant, cum de historicis ipsis vera dicere intutum sit. Quapropter ad illos redeamus, *quorum Flaminia regitur cinis,* Javen.
lat. 1. *atque Latina.* Numquam enim ego eorum opinionem probavi, qui nova & inusitata vitia sæculo affingunt. Veteribus morbis laboramus, repente in singulos homines teterrima lue, qua se primus ille parensque ceterorum ad totius generis humani exitium contaminavit. Non est, opinor, Tacitus inter recentes adnumerandus; nec sane inter illos, qui minus acute aliorum peccata vident. Is tamen tanti ingenii, tantæque caliditatis vir nihil valentius invenit, quo suam in narrando fidem commendaret, aliorum infringeret, quam si ostenderet, ceteros ante se Scriptores eorum facta retulisse, quibuscum vivebant. *Veritas, inquit, pluribus modis infracta: primum* hist. l. 1 *inscitia reip. ut alienæ, mox libidine assentandi, aut* c. 1. *rursus odio adversus dominantes. Ita neutris cura posteritatis inter insensos, vel obnoxios: Sed ambitionem Scriptoris facile adverseris, obrectatio & li-*

L
vor

*vor pronis auribus accipiuntur: quippe adulationi
fædum crimen servitutis, malignitati falsa species
libertatis inest. Mihi Galba, Otho, Vitellius nec be-
neficio, nec injuria cogniti. Videte igitur, quanti
sit ad veritatem canon iste, quem nobis Critici
primo loco constituunt, nisi summa sapientia,
quæ paucorum est, adhibeatur. At quo canone,
quove duce per ea tempora ibis, quæ omni lit-
terarum luce carent? Quis te, nisi sit multarum
rerum cognitione firmata mens, quis te, inquam,
in iis tenebris reget, in quibus Pontifices Ponti-
ficibus oppositi, sacerdotia pecuniis emta, magna
rerum divinarum ignoratio, & ex ignoratione
error, scelerum & armorum impunitas, exiguum
sacri & profani discrimen, quædam veluti nox
Ecclesiæ offusa, in qua vix oculatissimi sine pe-
riculo versari possunt? Ætatis æstus, & levitas,
& humani ingenii curæ in pejora vergentes, trans-
versum agent: nihil jam sanum tibi videbitur,
nihil certum; quodque ipse percipere non pote-
ris, neminem probe percepisse judicabis. Accedet
illa etiam, quæ multis exitio fuit, antiquarum
rerum satietas, & mutandi libido, qua fieri so-
let, non ut vera, sed nova delectent; omnino
ut in cibis aliquando usu venit, quorum exquisi-
tissimi consuetudine vulgati fastidium afferunt, de-
teriores novitate probantur. Quod si quis primos
verecundiæ fines transferit, & antiquitatem con-
temnere cœperit, ubique Annios, ubique Inghi-
ramos, ubique Ceccarellos, ubique Ligorios in-
veniet; modo hunc, modo illum auctorem cri-
minabitur; nunc de stili varietate dolebit, quæ
tamen potest esse quæsitæ; nunc de temporis fal-
lacia*

lacia queretur, quæ tamen ad librarium referri potest; nunc illum Scriptoris nomen, aut libri titulus commovebit, quæ multis tamen casibus fere variantur. Quid multa? Vel in scirpo nodos quæret; neque putabit ex Critica dignitate esse, si quippiam apud se valeat, quod vulgatum sit, multisque commune: ex quo etiam falsa consulto defendet, ubi vera ab aliis occupata videbuntur. Siquidem hoc ipsius artis proprium ac præcipuum est, ut homines faciat præstandi cupidos, aliorum contemtores, rerum mirabilium nimis studiosos; quæ vitia tanto magis tantoque facilius penetrant, quanto molliori accedunt ætati. Ac nimis undique magna, & fortasse etiam aliquibus molesta dicendi seges mihi succrescit: temperandum orationi est, temporique serviendum. Quod reliquum est, ingenuam hanc studiosamque juventutem, quæ se nobis in disciplinam tradidit, oro atque obsecro, ut in suscepto præteriti temporis studio pergat. Neque enim est, cur antiquas statuas, arcus, thermas, theatra, sepulchra tam curiose inspiciamus; eorum vero animos immortales ac splendidos, qui hæc posuerunt, quibusque posita sunt, in historiis descriptos cognoscere nolimus. Egregium quiddam est ac dignitatis plenum majorum nostrorum memoriam revocare; religionis initia, incrementa, propagationem intueri; gentium ac populorum migrationes, bella, fœdera, regimina, fata ad prudentiæ usum perlustrare. Horum notitiam qui nullam habent, censentur inter pueros; qui ne habere quidem volunt, inter amentes. At simul illud ex animi sententia moneo, ne plus capere

velit, quam possit; hoc est ne nimis sapere, ne-
 ve maturius, quam oporteat. Nemini umquam
 crimini datum est, quod tardius se ad reprehen-
 dendum contulisset; multis quod citius: & nimi-
 rum gravius est judicandi opus, quam ut prope-
 rari debeat. Ad hoc, qui narrat, aut laudat,
 impune alicubi peccare potest; qui censorem
 agit, ne in minimis quidem rebus sine summo de-
 decore delinquit. Neque vero Criticorum inopia
 laboramus, ut undique omnes assumendi sint:
 quin etiam affirmare licet, ut suum cuique sæcu-
 lo ingenium est, quasque sidus, ita nostrum hoc
 ubertate atque indole quadam sua Criticos ferre.
 Verumtamen decus hoc tam pulchrum & exqui-
 situm in quodam veluti præstantiæ acumine con-
 sistit, unde minima quavis inclinatione in vitium
 & noxam detorquetur; ex quo fit, ut tamquam
 e longinquo adolescentibus aspiciendum putem,
 nec ante attingendum, quam diuturna mentis
 exercitatione vires confirmaverint. Hanc mihi
 cogitationem Criticæ arti honorificentissimam
 cum illa injecerunt, quæ hætenus dixi; tum etiam
 nostrum hoc vivendi institutum non nimis con-
 tentionis capax; tum denique tua, Princeps Emi-
 nentissime, toties testata voluntas prudensque
 judicium, nequid nobis in rerum memoriam,
 præsertim sacrarum, tam cito licere existimemus.

EPISTOLA

Præposita editioni primæ hujus Orationis.

Recte judicandi studium, quod mutuato a Græcis nomine, Criticum dicitur, etsi per omnia literarum ac disciplinarum genera late fusum, ubique locum habet, attamen Historicam provinciam jure quodam præcipuo tenet, eamque in primis moderatur. Nam præterquam quod ipsa per se narrandi ratio, quod ex multorum fide pendeat, lubrica est, magisque periculosa, quam cogitandi; accedit insuper Historico vel ocularissimo admirationis cura nimia, qua fit, ut sponte aliquando aberret, nec tam sollicitè vera persequatur, quam mirabilia. Et ipsa igitur Historiæ natura, & Historicorum indoles artis Criticæ auxilium flagitat, eoque nititur uno, ut nobilissima facultas ad otiosos detrusa, in scholarum lucem interdum exeat, & cum cæteris consistere possit. Id magis certum est atque exploratum, quam facile, præsertim vero illis, qui ob ætatis infirmitatem fidei nostræ ac tutelæ commissi sunt. Itaque his publica oratione commendaturus Historiam, & quod Historiam sequitur, Criticum studium, non stimulos tantum, sed frenos quoque adhibendos putavi, ob eas causas, quæ, ut alibi minus valeant, in hoc certe loco magnum momentum ac pondus habere debent. Siquis hæc aut sibi, aut suis non satis existimat opportuna, ne me tamen itcirco ita fatuum credat, ut idem omnibus propinare velim. Vale.

ORATIO IX.

AD ETHICA.

Moralis institutio magis a Poetis, quam a Philosophis petenda est.

Non deerunt, qui mirentur, cur ego meo quodam consilio, fortasse non malo, sed certe inusitato, ex aliis in alia quotannis aberrans, nova dicendi argumenta quæram, singulisque facultatibus in hanc lucem adductis, perinde disputem, quasi universum scientiæ orbem tantulo ingenio complecti velim, meque, ut vani Sophistæ solent, conflato ad invidiam nomine multiscium venditare. Attamen qui me, morefque meos parumper attender, facile intelliget, neminem esse, qui istiusmodi *ἐγκυκλοπαιδείαν* aut minus sibi tribuat, aut aliis ægrius concedat, veluti quamdam mortalis ingenii intemperantiam ultra vires nitentis, & siquidem se posse, quod nititur, putat, etiam insani. Neque tamen inficior, id mihi a prima adolescentia fuisse propositum, ut studiorum decursu quam plurimas literariæ provinciæ partes obirem; non ut aliquando immensum aliquid profterer, sed nequid eorum omitterem, quæ ad Oratorium & Poeticum artificium aliquo modo conferre possent; tantumque doctrinæ & eruditionis haurirem, quantum de re omni probabilia dicturo in tempore satis esset. Nulla est enim ars, aut facultas ita cum
alia

alia conjuncta, ut omnes simul cum Poetica & Oratoria: quod cujusque artificis sit propria materia sui que fines; Poeta vero & Orator nullam certam ac definitam regionem habeant, sed late vagentur, omnemque dicendi & scribendi copiam, cujuscumque sit ordinis, jure suo sibi arrogant, comprehendant, moderentur. Ac de Oratoribus quidem video inter omnes convenire: de Poetis autem, ne rem infinitam aggrediar, quo tempore aliud quiddam instituo, alii viderint. Hoc ego dumtaxat in præsentia dicam, sive in omni sermonis & humanitatis genere recte versentur, ut multis visum est sapientissimis viris, & in his etiam Ciceroni; sive aliqua tantum rerum capita complectantur, ut morosi quidam tristesque Grammatici ab hac laude repulsi scriptitarunt; unum tamen esse, quod illis negari sine injuria nequit, in quo præsertim tamquam in regno suo ab ipsa litterarum origine confederunt, quodque uni cum maxima dignitate & utilitate generis humani diutissime tenuerunt. Hæc Moralis institutio est, quam cum olim Philosophi, sive Pythagora, sive Socrate duce, ad certa officiorum capita rede-gissent, quidque sit in unoquoque primum, quid proximum, quid postremum, ratione atque ordine explicassent, in ea repente tamquam in fundo occupato pedem posuerunt, non admodum reclamantibus Poetis, genere hominum minime frangi, litium incurioso, & in diem vivente. Verum si tandem aliquando expergefacti jus suum persequi velint, eoque restitui, unde sine causa dejecti sunt, ego illis hodie tamquam in judicio Centumvirali fidem meam operamque præstabo;

de Or.
I. I. c. 16.

vobisque cognoscentibus, sponſionem faciam, ni paréat; officii præſcribendi rationem, quam Latini Moralem dicunt, Ethicem Græci, non tam ad Philoſophos, quam ad Poetas pertinere. Quod ut perſpicue faciam, omnemque dubitationem tollam, altius mihi repetenda ſunt Poëſeos initia: ex quo cognoscetis, cui potiſſimum litterarum parti, velut ab ipſa natura naturæque auctore, morum diſciplina commiſſa ſit; tametſi poſtea Philoſophi jura turbarint, & in rem alienam quaſi vacuam & caducam dolo malo irreperint.

Quod ſinguli homines facere ſolent, ut a prima pueritia fabulas ſequantur, nullumque ſtudii genus ad multam ætatem libentius tractent, quam Poeticum, id ipſum univerſe ab humano genere factum eſt, cujus prima cura Poëtice fuit, eaque una divinæ humanæque litteræ diutiſſime comprehenſæ ſunt. Quicumque aliquo doctrinæ genere excellunt, ſuoque ordine cenſentur, Theologi, Philoſophi, Jurisperiti, olim a Poëticiſ ſcholis exierunt, in quibus ſcientia omnis parta eſt, atque unice culta, ut Strabo, ut Plutarchus, ut Max. Tyrius, ut ille, qui unus nominari poterat, M. Tullius, nullo ferme repugnante, tradiderunt. Quod quidem non ad ipſa Mundi incunabula referendum eſt, nec divinando conjiciendum, cum ex hoc numero fuerint Muſæus, Homerus, Hæſiodus, Parmenides, Epimenides, Solon, Empedocles, aliique notiſſimæ memoriæ Græci, qui diſviſionem, ut nunc eſt; diſciplinarum & artium cum præceſſiſſent, variam multiplicemque eruditionem carminibus comprehendunt, & modo Poëtæ habiti ſunt, modo generali

nomine Sapientes dicti. Crevere ab eorum a-
 te mirandum in modum litterarum studia, ex-
 orientibus undique nescio quo fidere magnis in-
 geniis; laticesque ex uno fonte manantes in va-
 rios subinde rivulos deducti sunt, qui magis ma-
 gisque una cum Græciæ opibus adaucti, ingentia
 doctrinarum flumina certis finibus distincta cele-
 riter constituerunt. Hinc enim Juris & æqui-
 scientia propagata est; hinc illa, quæ de Deo
 rebusque divinis differeret, Theologia; hinc Phy-
 sicæ & Mathematicæ disciplinæ, quæ naturam la-
 tentesque naturæ causas subtiliter investigando
 patefacerent. In quo sane Poetarum sapientiam
 & æquitatem recognoscimus, sed adversæ fortunæ
 conjunctam. Cum enim ultro rerum naturalium
 scholas abdicassent, quod viderent, in singulis
 partibus jam præter modum amplificatis totam
 hominis industriam desiderari; novæque litterato-
 rum classi, qui se vel Sophos, vel Philosophos
 dicerent, provinciam hanc tam amplam ac nobi-
 lem liberaliter concessissent; homines isti a Poe-
 tis ut ita dicam geniti, in parentes arma verte-
 runt; quamque illi sibi reservaverant officii ex-
 plicandi potestatem, eam ipsam compilare cona-
 ti sunt. Sed quo successu jam habere. Prodie-
 runt novi isti morum magistri, ut eorum est in-
 stitutum, obsoleto nigroque pallio, obstipo capi-
 te, ore inculto atque horrido, barbati, capilla-
 ti, superciliosi, hominum potius terculamenta,
 quam homines: cum autem se tamquam cælo de-
 missos ad hominum licentiam coercendam magni-
 ifice jactassent, tum dogmata fundere cœperunt,
 quæ cum illo vultu atque habitu convenirent;

peccata omnia esse æqualia; de re nulla dolendum, de nulla lætandum; voluptatem omnem turpem esse; paupertatem, morbos, captivitatem non recte haberi inter mala; jus omne, nisi sit summum, iniquum esse; nullum amicitiae locum, nullum gratiae, nullum misericordiae tribui debere; & id genus multa, quæ si communiter persuadere potuissent, jam nullas haberemus civitates, hominesque cum hominibus vivere nequissent. Porro autem quia prava infinita sunt, sibi-que minime cohærent, vulgato arcano, bonorum & malorum fines pro libidine philosophantium variari posse, multi se repente familiarum duces constituerunt; in eo sibi uno convenientes, quasi-que conjurati, ut per pudenda & ridicula officium omne perverterent. Vix equidem mihi persuadere possum tantam aliquando fuisse hominum patientiam, ne dicam stuporem, ut cum viderent Diogenem cum suis Cynicis nudum ac sordidum ex professo maledicta jacere, Aristippum cum Cyrenaicis mollem & unguentis delibutum voluptatibus operam dare, Zenonem Stoicosque ceteros veluti lapides nullo rerum humanarum sensu tangi, Democritum in ridendo occupatissimum, Heraclitum in lacrimando; hos tamen non solum ferrent, sed & sapientes, & morum quasi canones judicarent. Quis si aliquid probabile in tam ridiculo vitæ genere attulerunt, non tamen Poetas de antiqua possessione detrudere debuerunt, elegantes homines ac politos, qui sua præcepta ad naturam & communem sensum conformare solent, more hominum vivere, & id quod est in unaquaque re bonum, quamvis non sit admirabile,

bile, ad imitandum proponere. Et hæc quidem magnæ hujus disciplinæ principia fuerunt, quæ morum censuram tam prospere suscepit, quam videtis; donec ad Academicos, & Peripateticos ventum est, qui magis aliquanto ad humanitatem accederent, sed tamen Philosophi essent. Nomen hoc tam serium & grave jam apud omnes fide laborat, quod tota Philosophia litibus & controversiis implicita, cultores suos factionibus addicat, pugnaces faciat, acerbos, acres, redarguendi cupidos, per abstrusa & difficilia admirationem sectantes. Ac si officia disputandi causa discerentur, isque optime moratus esset, qui subtilissime de moribus diceret, non esset ab his discedendum, qui in omnes humanas affectiones acutissime penetrant, multiplicique divisione rerum ac distributione minimas quasque differentias persequuntur: sed cum omnis hujusmodi disputatio ad actionem referri debeat, non video, tam minuta subtilitas quid valeat ad hominum animos permovendos; aut quomodo tandem plus valeat, quam poetica oratio, rebus confecta de medio sumtis, lucida, suavis, ornata, per numeros, per imagines, per figuras, non in aures solum, sed in omnes pæne sensus contorta & vibrata. Nisi quis forte putet monogrammos, qui rem nudis lineis repræsentant, magis movere oculos, atque allicere, quam picturas perfecte coloratas, umbrisque ac luminibus distinctas. Equidem non diffiteor, ut in monogrammis partium varietatem, numerum, ac positionem, ita in Philosophicis libris omnes officii partes, & patris cujusque membra clare distincteque apparere; at in
hac

hac tanta luce rerum etiam minimarum friget animus, & in sermone tam bono vir bonus desideratur. Neque vero magna doctrina opus est, ut virtutem, ejusque pulchritudinem cognoscamus; quod cum secundum naturam sit, suo se lumine prodit, & in cujusque oculos incurrit: itaque in eo potius præcipientis industria versari debet, ut per omnia artificiosæ dictionis instrumenta naturam revocet ad prava conversam; & in suæ dignitatis cogitationem adducat. Quod cum Æsopus, Philosophus non indiligens, animadvertisset, abjectis disputationibus, ad apologos animum convertit, initoque cum Poetis scædere, spem omnem formandæ vitæ in rerum communium imaginibus collocavit. Genus hoc fabularum miræ urbanitatis ac virtutis ad persuadendum, non in familiari solum sermone, aut in cantiunculis locum habet, sed etiam in gravissimis deliberationibus; quod multitudinem valde afficiat, trahat, deliniat, pertentet, callidoque artificio ducat ad earum rerum assensum, quæ certis ac notis similes sunt. Cedo mihi Philosophum aliquem, cujus scripta simul omnia tantum potuerint, quantum una illa fabella, qua Menenius Agrippa Romanam plebem cum Patribus conciliavit, & in urbem reduxit. Nimia sunt hæc. Cedo qui non gratis clamet, quem populus libenter ferat; cujus præcepta, quamvis egregia, si cum Ælopeis hisce nostris conferantur, non frigida sint, & audientibus molesta. Agedum enim, si quis a Zenone contendat, aurum habenti nocere, quis patienter audit, quis non Stoicam severitatem accusat? At si idem Phædrus per apolo-

lib. 2.
fab. 7.

pologum muli a latronibus spoliati eleganter te-
 steque ingerat, accipitur, probatur. Fac, nimum
 vindictæ studium Philosophus damnet: creditur
 scilicet umbraticus homo consulere timori suo. At Id. 1. 4.
 siquid hujusmodi Poeta velit, equo illo descri- fab. 4.
 pto, qui hominem armavit adversus aprum, pla-
 cet narratiuncula, penditur, imbibitur. Non
 est, cur singula commemorem. Quæcumque lit-
 teris consignata sunt de mendacio, de furtis, de
 fraudibus, de maleficiis, si ex schola Philosophica
 veniant, aures fatigant; si blanda & eleganti
 comprehensione verborum per fabulas efferantur,
 facile subeunt animos, & ubi insederunt, conscien-
 tiæ stimulos excitant. Si igitur res, non ex spe-
 cie & magnitudine, sed ex usu judicandæ sunt,
 pluris mehercule Phædri opusculum, quam decem
 ipsi ad Nicomachum libri, & sexcenta volumina
 ad eorum interpretationem scripta, non meo qui-
 dem, quod video quam leve sit, sed multorum
 sapientum judicio æstimari debet. Atqui adhuc in
 limine sumus, nec nisi minimam fabularis indu-
 striæ partem nutriculis ipsis familiarem adversa-
 riorum contentionibus opposuimus. Quid si ad
 graviores fabulas, quas proprie *μύθας* appellant,
 orationem ducamus? Quid si Comicas fictiones,
 si Tragicas, si Epicas in partes vocemus? Tamen
 ne imperum morales Philosophi sustinebunt? Ve-
 rum ego neminem vestrum tam expertem littera-
 rum existimo, ut harum fabularum commoda &
 utilitates ad civilis prudentiæ usum, & communis
 vitæ institutionem non sæpe audierit; mihiq;
 potius verendum est, ne inopia dicendi latissimum
 campum quæsisse videar, in quem *μυθόγραφοι* ipsi,
 Poe-

Poetarum explanatores, Critici, & Grammatici omnes infinitam prope segetem congefferunt. Itaque non docebo, vivendi præcepta figmentis istis involuta latere; sed potius causas exequar, cur ita Poetæ latere voluerint, cum simplex rectusque sermo, a Philosophis tanto post occupatus, ne ipsis quidem deesse posset. Omitto quod ante dixi, non admodum egere homines schola & magistro, ut in quo sit virtus intelligant; ejusque contrarium; sed figuris potius & imaginibus, per quas moniti, de se ipsi cogitare cogantur, & digna suscipere natura sua. At si docendi tamen sumus, ut aliquo certe modo sumus, nonne qui docet, rationem inire debet, quæ cum maxime impellat, tum vero etiam molestia careat & satietate? Poterat enimvero, poterat Poeta quoque de laboribus ac periculis fortiter adeundis, quemadmodum Philosophus, multa verba facere; at quanto magis mulcet ac movet, cum Herculem nobis monstra superantem ob oculos ponit, & per hæc divinos sibi honores promerentem? Poterat de calamitatibus æquo animo tolerandis illa omnia proferre, quæ Philosophis tam pulchra videntur; at cum Ulyssæm & Æneam per magnas ærumnas ad immortalitatem perducit, nonne & eadem canit, & canendo ad æmulationem incendit? Poterat denique de virtutibus omnibus, de amore patriæ, de fide, de justitia, de religione præclaros istos libellos ipse quoque conficere, nisi vidisset, quanto magis per exempla proficeretur. Unum vero neque ille consequi verbis poterat, neque Philosophi, quantumvis se ament, consequentur umquam, ut heroicam virtutem, quæ

quæ in summo præstantiæ fastigio, ac pæne supra hominem posita est, suis coloribus ornet, & recte subjiciant imitaturis. Eximiam hanc & inusitatam excellentiam, quæ ad Superos proxime accedit, ut exprimeret Aristoteles, ipse quoque ad poetica simulacra confugit, & Homérico Hectoræ productæ, fidem quæsit ex fabula. Et vero unum hominem exercitiis resistere, maria & navigationes aperire, populis salutem reddere ac libertatem, condere urbes ac gentes, orbem terrarum a tyrannis liberare, cujus putatis esse facultatis, quam divinæ, quam incredibilis? Quis talia, aut cui differendo persuadeat, quamvis disrumpatur? Aut omnis profecto inanis conatus est, aut unus historiæ fabularis heros ab egregio Poeta descriptus in tam difficili negotio plus valet, quam omnes omnium Philosophorum disputationes de hoc toto virtutis genere, de natura, de partibus, de fine, de sede, de nomine, de adjunctis, de contrariis; quæ ipsa dum nomino tam macra & spinosa, jam in ore vestro molestiæ signa conspicio. Malebam equidem scholarum tædia præterire, quæ nimis jam multos inimicos habent: sed hæc potissima ratio est, quæ fabulas peperit, veluti quædam blandimenta sanitatis, per quæ salutaria pocula promte & alacriter sumerentur. Quam porro suave, in theatro sedentem sine ulla animi corporisque contentione, non audire modo, quid sit honestum & inhonestum, quid utile & inutile, sed hæc ipsa in illustribus personis varia fortuna jactatis aspicere, eo rerum apparatu, ac verborum genere proposita, quod cum ad monendum plurimum

Eth. 1. 7.
c. 1.

valet, tum etiam ad movendum? Videtis, ut ad hæc omnes ordines libentissime convenient, ut attente audiant, ut numquam fatigentur, ut vel in lacrimas jucunde soluti Tragicos eventus excipiant? Conferte nunc frequentiam istam cum solitudine, quæ circa Philosophos est; & plane intelligetis, utrum præstet per nostras hæc Poeticas blanditias, an per acumina Philosophica mores civitatis castigare. Ægre homines apertum monitorem audiunt; gravia sunt verba illa, *ne dicas, ne facias; debet, non debet; licet, non licet*; & cum vitia aliqua, nullo compellato nomine, reprehenduntur, ille sibi exprobrari putat, cui conveniunt. In scena neque histrioni, neque satyro irascimur. Irascimur autem? Tanto magis favemus, quanto acrius aspergunt; modo amicos, modo sodales, modo nos ipsos in iis moribus recognoscimus, & abditum ulcus ridendo tractari patimur. Ergo tota illa juvenum turba, quam

Eth. l. 1. aperto Mortali ludo, Aristoteles exclusit, habet
c. 4. ex hac officina unde sanetur; hinc nemo repellitur; nulla ætas, nullus ordo, nulla conditio Poetæ gravis est; omnibus animi perturbationibus, iræ, libidini, invidiæ, cupiditati medicamenta hæc adhiberi possunt. Huc etiam viri Principes invitandi sunt, quibus nullum monitum nisi callido artificio, & per ambages ingeri potest: quod tamen non ad reprehensionem referri velim, sed ad ipsam principatus naturam, quæ tueri majestatem quacumque ratione, modo honesta, debet; & privatorum in se arbitria cavere. Ad hos scilicet Philosophus accedat de jure & injuria disputaturus; his, si quis animus, edicat, ne tantum
sibi

sibi licere putent, quantum possint; hos doceat aliud regem esse, aliud dominum; illum in primis parere legibus debere, cui legum cura commissa est; neminem peccare gravius, quam cuius exemplum transit ad alios. Amentem esse oportet, qui tantum audeat, præsertim proposito ante oculos Seneca, qui si tantum sapuisset, quantum profitebatur, non dicam tantas opes non collegisset, in quo a multis est accusatus, sed & opes quascunque habuisset, & quæsitam in habendo paupertatis laudem, & totam illam, qualiscunque esset, Philosophiam procul a Nerone vendidisset. Id tamen, quod Philosophus sine invidia atque adeo sine vitæ discrimine facere nequit, per suas fabulas Poeta facit, ita Principibus fere omnibus gratus, ita acceptus, ita aliquando etiam necessarius, ut jam inter aulæ instrumenta censeatur. Hic unus monere potest imperantem sibi, ancipitem fortunam, fœdosque tyrannorum exitus adumbrando; hæc una reliqua est virtuti via, qua se per poetica involucria non quærentibus insinuet, & in illo etiam fastigio aliquando consistat. Quo in loco id velim tantisper cogitetis, quam angustis regionibus Philosophorum diligentia contineatur, quæ primum ultra privatos non progreditur; deinde hos ipsos, si adolescentiæ cupiditatibus irretiri curatione indigeant, tamquam sibi minus idoneos alios dimittit. Ergo nihil restat aliud, nisi ut tota hæc gravissima disciplina, quæ ad mores formandos spectare deberet, ingenio & disputationibus serviat, consuetudinem sequuta reliquæ Philosophiæ, quæ mentes contemplando conterit, & in se ipsa

M

quo-

Sen. ep.
61. 113.
17.

quodammodo vertitur. Quare nihil mirum si tota est in argutiis, nec jam laborat, ut optima edat, sed ut *παράδοξα*, & quæ minime probentur in vulgus, *Sapientiam bonum esse, sapere bonum non esse; inter magistratum & repulsam interesse nihil; bona esse paria; mortem a vita non differre; virtutes esse animalia; & multa similia* istis. Tu ne igitur, bone Seneca, hæc scriberes, si vitiis sanandis non ex Stoica superbia, sed ex animi sententia operam navares? Tu hisce lusionibus felicitatem inesse putas, summum illud humani generis negotium; nostroque Homero tamquam nugatori dicam impingis? At is per suas fabulas, si recte intelligeres, aut quod intelligis, sine invidia fateri velles,

Hor. 1.
ep. 2.

... *quid sit pulchrum; quid turpe, quid utile, quid non,*

Plenius ac melius Chrysippo, & Crantore dicit. Nolite, quæso, mihi succensere, Auditores, quod de summo viro, & ut illa tempora ferebant, etiam probo libere dicam. Concoquere enim nullo modo possum, quæ ille in Homerum sive Poetam, sive Philosophum, certe sapientissimum, atque adeo sapientiæ parentem, audacter scribit, ubi ad ludificandum aggressus more suo, cuncta liberalia studia contemnit, & numerat in supervacuis. Hæc si in illa Metronactis schola jactabantur, injuria profecto populum Romanum accusat epistola septuagesima sexta, quod ad pithaulum & tibicinem licentius iret. Quamquam ut nihil dissimulem ex veritate & fidei loci hujus, ipse quoque Plato ab ea republica, quam sibi animo ad perfectissimam formam effinxerat, Hom-

De Rep.
3.

me-

merum, Poetasque ceteros, qui omnia promiscue imitarentur, abesse iussit: quod nobis adversarii tamquam ex iudicato objicere solent. Grave est hoc, Auditores, non tam ipsum per se, quippe a Philosopho, quam fama & auctoritate Platonis, cujus iudicio vel in sua causa multum deferre pro nostra æquitate volumus. Alios igitur sibi Heraclides Ponticus subscriptores adjungat, cum divinum hunc Philosophum, tamquam *Ὀμν-
γε συκοφάντην*, calumniæ postulat. Nos quandoquidem reputamus, Platonem Homeri studiosissimum fuisse; imo poetas omnes tanto studio, seu potius veneratione coluisse, ut Deorum filios appellaret, & ipsi quoque Antimacho Clario, inepto ac verboso versificatori, unus ex omni Atheniensi populo aures præberet; quandoquidem, inquam, hoc reputamus, aliud quiddam illum spectasse credimus, quam quod vulgo existimatur, cum has delicias suas ab ea civitate removit, quæ nulla esset; aut si esse posset, heroum magis, quam hominum congregatio dici deberet. Pistores etiam mehercule & cupediarios exclusisset, si cives suos, quemadmodum sine vitiis & multarum voluptatum usu, ita sine cibis vivere posse existimasset. At enim ne Epicurus quidem Poetas probavit. Videlicet intemperantiæ patronus. Parcat vitiis necesse est, qui istius hominis benevolentiam captat. Ego vero non miror, poetica studia alicui Philosopho displicere, sed ob eam displicere causam, quæ solet afferri, quod obscena multa a Poetis scripta sint; quasi vero quod multa herbarum ac frugum genera valetudinem lædant, herbas frugesque omnes odisse oporteat. Ac pri-

Cic. in
Brut. c.
51.

mum si negem, qui ita scribunt, esse Poetas, non injuria facere videar, sed ex ipso antiquitatis judicio, quæ cum Musas huic studio præfecerit, satis superque ostendit, quam esset hoc nomine indignus, qui puellas honestissimas turpi lenocinio contaminaret: deinde si dicam, artibus omnibus ad salutem inventis commune infortunium esse, ut improborum scelere ad perniciem convertantur, dicam id, quod & notissimum est, & vel in summa Poetarum nequitia poesim tamen ab omni reprehensione liberare debeat. Quod si quidquam eorum querelæ valerent, qui tam male animati in poetica sunt, quodnam de D. Basilio judicium ferendum esset, qui Græcorum Poetarum lectionem adolescentibus commendat, multasque ad virtutem opportunitates apud Homerum, apud Theognidem, apud Hesiodum, apud Prodicum Chium eloquentissima oratione demonstrat? quodnam de ipso D. Paulo, qui cum ex Arato, ex Mænandro, ex Epimenide aliqua referat, perspicue significat, in hoc litterarum genus quo animo fuerit. Esto, jure queruntur: Poetas ablegemus, totamque arenam Philosophi teneant, si ita demum salva res est. Quid? Utrum nos ignorare putant, quid doceat Epicurus, totusque ille voluptarius grex? an ita bonos esse, ut Calliphoni, & Dinomacho credamus, qui Epicuream voluptatem cum honestate copularunt, *tamquam cum homine pecudem*, ut Tullianis verbis utar. Hi nempe nobis Poetarum nomina recitant, qui a modestia desciverunt. At ego illis non unum aut alterum Philosophum, sed sectas obijciam, Hegesiacos, Theodorios, Annicerios, &

Orat.

πρὸς τὰς
νέας.

Cic. 3.

Off. c. 33.

& quos modo dixi, Epicureos, qui factō agmine virtutem oppugnant; nec ut Poetæ in conviviis & ludis genio indulgentes licentius canunt, sed in locis ad docendum gravissimis serio & ex instituto turpitudinis illecebras, & indignas homine voluptates commendant, inculcant, ratas faciunt. Adde his & qui contra verecundiam disputant, & qui fraudes tuentur, & qui utile ab honesto sejungunt, & qui privata commoda anteponunt publicis, & qui Deorum timore sublato, cetera concedunt sine discrimine. Quæ ego vitia hominum non commemoro, quod in facultatem innocentissimam redundare putem; sed ut hac in parte si vincere non possumus, ex æquo pugnemus; nec magis Poetarum licentia Poesi noceat, quam Philosophorum imprudentia Philosophiæ. Est utrobique, si verum quærimus, quod caveri debeat: neque Philosophorum amatores Philosophica omnia sine delectu probent; & nos Poetis nostris sæpè illud commemoremus, quod est apud Aristophanem in Ranis a. 4. sc. 2.

Apud
Cicer.
off. 3.

..... ἀποκρύπτειν χερὶ τὸ πονηρὸν τῶν γε ποιητῶν.

Καὶ μὴ παράγειν, μηδὲ διδάσκειν. τοῖς μὲν γὰρ παιδείοισιν

Ἔστι διδάσκαλος, ὅστις φράζει, τοῖς δ' ἡβῶσιν γε ποιηταί.

..... quæ mala sunt, abscondere poeta debet,
Non producere, neque docere. Nam puerorum quidem

Magister est dicendi peritus, adultorum autem Poetæ.
Sed jam amotis criminationibus, in viam redeamus, ut pauca quædam extremo loco de poeticis

numeris habeatis, quandoquidem in fabulæ commodis satis, ut opinor, versati sumus. Altera igitur pars, & nescio etiam an prima, quæ poeticam constituit, carmen est, a quo res subjectæ tantum virium & virtutis accipiunt, ut se in animos facile insinuent, firmiter adhæreant, motusque illos vehementissime excitent, quorum gratia sunt comparatæ. Quod cum totum quantum est, explicari non possit, majus etiam aliquid ac mirabilius, quam veritas patiatur, huic arti tribui solet, ut & feras mitigare dicatur, & morari flumina, & silvas lapidesque commovere. Quare ut Poeta nihilo plus rerum, quam Philosophus, ad vitæ præcepta conferat, quantum tamen in eo putatis esse momenti, quod alter soluta ac simplici, alter ligata & numerosa oratione utitur? Huc illud pertinet, ut opinor, quod Pythagoras scripsit, plus posse tibicines ad mores corrigendos, quam Philosophos. Certe nisi quid excellens ac divinum ad mentes impellendas in poetico sonitu numeroque esset, neque Archilochus Lycambem ad suspendium adigere per jambos potuisset; neque Tyrtæi versibus fuisset in acie locus; neque Solon, aut Terpander suas leges carminibus conclusissent. Nunc si quis officia & vitæ communis rationem numeris adstringere possit, morbisque animi tam valida remedia adhibere, hunc tamen Philosophus extrudet, suisque commentationibus, ad differendum seu potius ad rixandum comparatis, subsellia frangat? Sed urget indictus mihi orationis modus. Jam ex veteri Quiritium more, unde initio constituendæ causæ formulas duximus, ite in consilium, Viri

Empi-
ricus
advers.
Mathe.
c. 22.

sa-

sapientissimi, & quod bonum, faustum, felix, fortunatumque sit, suam legitimis dominis possessionem fraude interceptam restitui jubete. Tu vero, Corneli Eminentissime, huic judicio moderando præpositus, cum plurimum legibus, quemadmodum semper soles, tum aliquid etiam benevolentiae tribue: siquidem & Romani Cornelii, suæ gentis principes, Ennio, Lucilio, Terentio familiarissime usi, hac se Poetarum amicitia vel in primis nobilitarunt. Nihil tibi a Philosophis polliceri potes, in suas contemplationes abditis, nullique viventibus; Poetæ cum singulorum officia juvant, tum publicam gloriam, & magnorum virorum gesta ad immortalitatem propagant. Quamquam nihil te magis in præsentem movere potest, aut debet, quam si tibi persuadeas, vera esse, quæ dixi; tuamque istam Juventutem, de cujus institutione majorem in modum sollicitus es, ad virtutem & optimos mores per poetica studia fingi posse: qua de re si testimonium quoque flagitas, Horatianum producam, eoque vel apud Philosophos longe gravissimo finem dicendi faciam.

*Os tenerum pueri balbumque Poeta figurat,
Torquet ab obscenis jam nunc sermonibus aurem,
Mox etiam pectus præceptis formiat amicis,
Asperitatis, & invidiæ corrector, & ira.*

Horat. l. 2. epist. 2.

EPISTOLA

Præposita editioni primæ hujus Orationis.

Quo die Orationem hanc habere debebam, studiisque nostris ex more atque instituto præludere, accidit ut abesset hujus Seminarii Auspex Eminentissimus gravissima illa de causa, quæ totius Christiani Orbis Cardinales Romam concivit. Itaque supersedi, maluique carere voluptate illa, quæ mihi quidem mortalium omnium maxima est, publice dicendi, quam dicere inauspicato. Ne tamen videar ignavia potius, quam ratione fecisse, ut publico iudicio abstinerem, hoc quidquid est, in lucem edeo; in quo etiam superiorum annorum consuetudinem sequor, sed mehercule parum fidenter. Nam antea cum vulgarem, quæ recitaveram, videbar quodammodo mihi tenere iudicia hominum, eosque sponsores habere, qui mihi aures non gravate præbuisent. Nunc me totum fortune committo, planè incertus quo casura res sit. Neque enim, ut audientium, ita legentium ora vultusque notare licet, ubi caput avertant, ubi oscitent, ubi lacunar spectent, ubi proximum de hora interrogent; ne quid postea librario tradatur, quod fatigaris, aut offenderis. Hoc anno iacta est alea: ferendum, quicquid evenit. Quamquam ego, ut verum fatear, ex recitatione magis speravi fructum aliquem, quam persequi; quod fere nugarum tædia brevitate compensem, habeamque auditores vel ad ea, quæ minus probant, attentos. Quod igitur dictioni audientiam facere consuevit, idem, ut spero, benevolentiam scrip-

prio-

psioni conciliabit; brevitās videlicet, in qua ego mihi maxime placeo, quā me in primis, measque lucubrationes ornare solet, quam ego unus si desero, jam quomodo consistat in hujusmodi exercitationibus, omnino non habet. Nam plerique omnes, quos idem audio, disertissimi cum sint, temperare sibi nequeunt; ego vel si velim multa dicere, tamen inopia ingenii intra curiculam cohibear. Sed altera jam pagella procedit; ac pāne in epistola modum praterii, quem tibi in Oratione polliceor. Haftenus satis. Vale.



ORATIO X.

AD MATHEMATICAM.

*Adversus eos, qui nimis paucis Mathematica studia
concedunt; tum adversus eos, qui
nimis multis.*

Quod opus decem abhinc annis jussu & auspicio tuo (P. E.) ex hoc illustri atque edito loco solemnibus verbis institui, tandem aliquando exædifico; Diisque immortalibus grates ago, quod mihi homini valetudinis parum firmæ, ingenii vero infirmissimi, tantum virium vitæque tribuerint, ut cursum hunc, quem ne ipse quidem, cum auspicater, totumque prospicarem animo, conficere me posse sperabam, tamen confecerim; & ad Mathematicam facultatem, quæ orbem claudit ceterarum, non sine aliqua certe felicitate, quantum ex hujus lectissimæ coronæ benevolentia conjicio, nunc demum pervenerim. Verum quod in magnis operibus ferre accidit, ut ultima quæque difficillima sint, aut fessis jam viribus difficillima videantur, hic me postremus quasi actus vehementer terret, graviore quadam, ut sentio, persona imposita, novæque objecta non laboris modo, sed etiam difficultatis ac periculi specie. Nam de aliis quidem cum dicerem facultatibus, id unum requiri videbam, ut quæ cujusque tradendæ ratio mihi maxime probaretur, ex animi sententia declararem:

nunc

nunc ipsa rei possessio in controversiam vocatur; nec jam ostendere oportet, cujusmodi sit Mathematica scientia, aut quomodo comparatur, sed quem deceat, quemve dedeceat. Scilicet non desunt asperi homines ac difficiles, qui eam nobis invideant; & cum ipsi inter se de toto hoc genere sermones conferant minime æquos, tum nos quoque ipsos, ut sibi videntur arguti, aliquando interrogant, ecquid juventutem in spem Ecclesiæ nobis concreditam, in angulis ac triangulis dimentendis inaniter occupemus. His ego animis tam parcis & angustis, ut magnam partem generis humani, eandemque studiosissimam ad Euclidem & Archimedem accedere nolint, aliud quoddam genus hominum opponere consuevi, qui neminem doctum virum existimant, cujuscumque sit ordinis, si doctrinis careat Mathematicis. Cum enim utrique abeant ad extrema, ipsi se mutuo conficiunt. Sed jam ego quoque manus conferere tamquam in judicio constituo, nec solum priores illos propellere, qui nos aggrediuntur, sed hos quoque lacessere, quorum opinionem utilem quidem nostris rationibus ad tempus duxi, universe autem numquam probabilem. Quod ut ratione & ordine faciam, duplex mihi via non diversa modo, sed etiam adversa incunda est, quarum prima veluti defensione constet, altera accusatione. Defendam operam & industriam nostram, quæ in Mathematicis disciplinis impenditur; accusabo labores eorum nimis, ut ita dicam, ambitiosos, qui has ipsas disciplinas in aliarum fines inducunt, infinitaque contentione suscepta, quæ Dii Deæque separarunt, communi vinculo jungere & copu-

copulare conantur. Ac defendendi quidem propositum sive sit necessarium, sive supervacuum, quod nolo in præsentī quærere, a nemine reprehendi potest; illud vero accusandi cum re ipsa, tum nomine odiosum ita moderabor, ut omnes intelligant, non me levitate aut perturbatione aliqua ductum, sed studio veritatis ac justitiæ, suis finibus Mathematicam terminare; quos dum tenebit, in maximo ubique honore erit; ubi egredi incipiat, multas in se gravesque offensiones concitabit. Id vero quemadmodum se habeat, non ausim mehercule in hac luce exponere, nisi vestræ sapientiæ multis mihi rebus perspectæ magnopere considerem; qua me una tamquam scuto adversus invidiam tuebor, si quis forte tam cæcus atque audax obtrectator erit, ut cum audierit, quo ego sim in Artem plane nostram animo, quam benevolo, quam studioso, quam illius amplificandæ cupido, mihi tamen crimini tribuat, quod omnem litterarum provinciam per fas nefasve occupatam Mathematico non condonem. Nemo profecto est, qui possit de re ulla publice dicere sine periculo: at me præter ceteros timere oportet, qui quod sentio, non circuitione & anfractu tegere, non ad gratiam & voluntatem audientium temperasse possum, sed cuiusquemodi est, ex officio & gravitate personæ, quam hoc loco sustineo, perinde proferre debeo, ac si aram tenerem. Atque hæc valere semper: illud vero huius anni proprium ac peculiare est, quod peregrinus atque hospes in difficillimam regionem venio; nec ducere argumenta nisi ex universo genere possum, & ex communi quadam
ratio-

ratione, in quam litteræ omnes ac disciplinæ conveniunt. In his difficultatibus atque angustis si quid efficere tamen potero, plane intelligetis, neque nobis Ecclesiasticum vitæ rationem ingressis ommittenda esse Mathematica studia, neque ulli ultra modum & rerum naturam promovenda.

Qui in hanc facultatem alieno sunt animo, apertasque gerunt inimicitias, nihil sane afferunt valde firmum, sed tamen ita multa dicunt, ut si respondere singulis velim, in re non tam difficili, quam longa & molesta nullo litterarum bono tempus teram. At est callidum quoddam & insidiosum genus hominum, quod ut cognoscam, Auditores, indigeo sapientia vestra; ut refellam, auctoritate & auxilio. Soleo enim pro munere hoc meo, quod neque ego tanta assiduitate ac vigilantia obirem, neque ullus obibit pro hac rerum temporumque conditione, qui non se divinitus vocatum existimet, Deumque unum, contemptis mortalium consiliis, in omni actione & procuratione sibi proponat; soleo, inquam, diligenter omnia circumspicere; neque amicos solum, sed inimicos etiam, siqui sunt, audire, ut quantum fieri per me potest, studia nostra perficiam, & ab omni reprehensione liberem. Sunt igitur quidam ad litteras juvandas voce atque oræ præclare compositi, qui Mathematicæ dignitatem multis verbis extollunt, sed usum ajunt non videri Clericis convenire. Quid hoc sit, non satis explicant; sed ita tamen multa turbant, ut eos appareat profanum aliquid hoc nomine designare, quod in militari Architectura, aut in vana divinandi arte positum sit. Quid dicam, Auditores?

res? quid suspicer? Eosne malitiose facere, ut inde alios absterreant, quo ipsi accedere non potuerunt? At illi certe non sunt ita vafri; quamvis non negem, esse aliquos, ubicumque tandem sint (nam & Momo debet esse locus) qui pulcherrima quæque studia ob id unum carpere audent, quod se ab illis exclusos videant. Cum his nobis nulla res est, qui toti sunt a mendacio, quorum vita fallaciis constat, quibus siquis unus fidem habet, is ipse fabula fiat. Ergo illud est reliquum, ut qui nos a Mathematica renovant, non satis advertant, quam multa hoc nomen complectatur, quæ cum hoc nostro vitæ instituto consentiunt optime. Age enim, quid est in Physica scientia, nisi forte hanc quoque nobis denegant; quid est, inquam, in Physica scientia tam Philosophi privatum ac proprium, ut non magnam illius partem Mathematicus vindicet? Ratione quidem atque ordine contemplandi inter se differunt, rebus non differunt, nisi perpaucis. Quicquid numero, aut figura aliqua constat, quicquid sono judicatur, quicquid luce distinguitur, quicquid aliquo mensuræ genere comprehendendi potest in toto terrarum orbe, non tam Philosophici, quam Mathematici juris est. Atque hæc ante pedes. Quid *μυστήρια*, quid astra, quid planetæ, quid cælorum orbes? An hæc ignorare Philosophus potest, aut sine Mathematico studio scire? Ego vero ne satis quidem puto ad philosophandi præstantiam hæc studia conjungere: præcedant Mathematica necesse est, quæ animum a sensibus excitent, & ad intelligendi celeritatem exacuant; siquid modo vidisse Pythagoram credimus,

mus, qui nullum auditorem in sua illa Philosophica adyta admittebat, nisi prius Geometriam, Gell. I. c. 9.
 Gnomonicam, Musicam, Astronomiam didicisset. Hunc securus est Plato, qui Mathematicam iecirco *προπαιδείαν* vocat. Platoni accesserunt Xenocrates, & Speusippus, qui eisdem legibus Academicam post ipsum tenuerunt: tum ipse quoque Aristoteles, qui certe a Magistri sententia discessisset, si ullo modo adolescentem his auxiliis destitutum fieri posse Philosophum existimasset. Ita- Eth. I. 6. c. 8.
 que homines isti divino ingenio præditi, non Philosophorum modo principes, sed Philosophiæ parentes, ea scripta reliquerunt de Physicis rebus, quæ ne legi quidem nisi a Mathematico possent. Aut igitur nobis tota interdicator Physica provincia; aut concedatur, ut in eam tamquam cives & habitatores, non ut servi furesve, ingrediamur. Physica porro commemoro, non quod Logica & Metaphysica Mathematicis commodis careant, non quod Ethica ipsa alicubi non indigeant, non quod facultates reliquæ vim suam omnem ac dignitatem sine illis obtinere possint; sed quia nihil afferre constitui, quod subtiliter excogitatum videatur magis ad ingenium, siquod sit in nobis, quam ad veritatem ostendendam. At enim Philosophi sunt, & valde etiam, si Diis placet, beati, qui ne ipsum quidem quid significet Mathematicæ nomen, didicerunt. Esto: non tam bene cum litteris agitur, ut sapere non videantur, nisi qui sapiunt. Adhuc tamen est, quod nobis ætatiq; nostræ gratulemur. Nam per sæcula ante Galilæum bene multa unum illud philosophicum studium privatas

vatas scholas publicasque tenuit, quo isti boni viri videntur esse contenti. Habete autem, quale fuerit. Sectæ hostili odio invicem infestæ; ingenia certis hominibus sacramento addicta; impotens atque infinita pugnandi libido; nova rebus nomina indita ad lites alendas ex compacto institutas; fallaces & captiosæ interrogationes; certæ quædam solemnæque formulæ, quibus nihil subesset nisi strepitus; subtiles & acutæ speculationes de iis, quæ numquam fuissent, aut vero esse possent; perpetuæ & ad ravim usque productæ inani labore disputationes; omnia prius quæsita, quam veritas & natura. Videtis familias Gladiatorias (nolo enim Scholasticas dicere, quod nomen est, aut esse debet honestissimi ordinis) at hæ tamen ipsæ, silentibus Mathematicis, famam occuparunt Philosophiæ. Cum caput Mathematica extulit, suasque vires Physicæ adjunxit, tum veluti renovato orbe, magni illi extitere naturæ interpretes cum omni antiquitate comparandi, Galilæus, Cartesius, Gassendus, Borellus, Hugenus, Leibnizius, Neutonus; & qui horum secuti vestigia, Philosophi re vera sunt, & habentur. Quis igitur nobis tam erit infensus, ut inventis frugibus, rursus ad glandes mittat? Ergo si tempus & industriam vanis contentionibus impendamus, simul Physici, simul Clerici nomen præclare tuebimur; si naturam serio scrutemur, saltabimus extra chorum? voces & nomina persequi licebit, res non licebit? pro sectæ studio disrumpi gloriosum erit, pro studio veritatis indecorum philosophari? Nihilo plus dico, quam quilibet unus ex imis litterarum subselliis

co-

cognoscere possit; modo non ignoret, quam viam & rationem Philosophi teneant, ex quo iidem Mathematici esse cœperunt, suisque speculationibus sensuum testimonia & mechanicam operam adjecerunt. Atqui ego nimis exiguam laudem Mathematicis studiis tribuo, si nobis hæcenus retinenda statuo, ut Physicis opem ferant: stant ipsa merito suo, eoque in primis magno atque admirabili, quod nullum vitæ statum, nullumque ingenium respuunt. Si enim is non inditus arte, sed animis innatus scientiæ amor, quo cuncti exardescimus, honestissimus est, locisque omnibus ac temporibus aptus; quid est, quod Clericus ignorare illa debeat, quæ cum maxime ad discendum referantur, præstabile hoc disciplinæ genus constituerunt, non a rebus ipsis, quas comprehenderet, sed ἀπὸ τῆς μαθεῖν, hoc est a discendo, nuncupatæ? Pœniteret me profecto conditionis hujus, si mihi naturam adimeret, qua impellor ad sciendum; aut si cum multa ad ingenium exercendum concedat, sive levia, sive fallacia, sive ambigua, hoc tamen intêrcluderet, quod unum propemodum cadit in scientiam. Habeant sibi Peripatetici contentiones suas, habeant Academici, Stoici, Epicurei: volumina voluminibus opponant, factiones factionibus, ætates ætatibus; omnia sollicitent, turbent, misceant; ut non solum sempiternis laboribus nihil sciant, sed illud etiam dubium faciant, utrum sciri possit aliquid. Mathematica sane una ab incertis certa separat; ubicumque sit veritas, eo accedit; non de tempore, non de loco, non de secta laborat; libera, soluta, expedita, uti est quidque, seu album,

N

seu

seu nigrum, sine ambage demonstrat. Hanc nobis qui auferunt, si nullum præterea litterarum genus relinquunt, parum abest, quin pecudes faciant; sin autem & Poetica, & Critica, & Dialectica, & Philosophica omnia liberaliter condonant, quid est quod illa excipiant, quæ ad doctrinam & eruditionem omnium certissima atque exploratissima sunt? Nisi forte, ut initio significavi, quod multæ Mathematicæ partes sint, aliquæ vero etiam hominum vitio corruptæ; unius aut alterius invidiam ad universas traducunt. Ita siquidem fit in rebus omnibus, ut cujusque laus ac reprehensio sumatur ex proximo. In quo ego tam communi malo nihil nobis præsertim dolendum puto: tantum dico, siqua sunt in Mathematicis, quæ cum hoc nostro instituto non apte cohæreant, ea, judicio & temperatione adhibita, discerni posse, & quatenus expediat, conciliari. Si me a militari Architectura abstinere volueris, parebo lubens; si a civili quoque, honeste resistam: si Musicam extorquebis, nobilissimam illius partem mihi reservabo, mollem ac theatralem sponte remittam: si Arithmeticam interdices, Pythagoricam retinere conabor, sed illam illiteratissimam ultro abjiciam; quæ tamen (pro moves!) fortunatissima est, ridetque Theologiam nostram; si me divinatricem Astrologiam ejurare jubebis, ejurabo non invitus, quam nemo umquam coluit nisi stultus, vel ut stultos deciperet; at interim non desinam de corporibus cælestibus quærere, quid sint, ubi sint, quid efficiant, quomodo moveantur, quando concurrant; quod genus Astronomiam vocant, nulli magis propriam, quam qui men-

mente atque animo assurgere supra ceteros debet, ea contemplando, in quibus, vel ipso Tullio te-
 ste, divinæ virtutis ratio maxime apparet atque de Ha-
rusp. resp.
 exstat. Tantus hic amplissimæ disciplinæ modus, c. 9.
 tantopere castigatus ac sanus, video tamen qui-
 bus non probetur; quorum haberi fortasse ratio
 non deberet: sed quandoquidem in animum in-
 duxi, ut omnibus per nos satisfaceret, id ab illis
 peto, ut quam opinionem animo comprehende-
 runt, si ego illam hodie ratione labefactabo, tan-
 dem aliquando in hoc loco confessuque vestro de-
 ponant. Quodnam igitur est horum hominum de
 studiis nostris iudicium? Quale scilicet rudi ævo
 illorum fuit, qui nobilissima Græcarum Latina-
 rumque litterarum monumenta undique conquisi-
 ta, tamquam impura & execranda, devovebant;
 veriti, ne se a divinarum rerum cogitatione aver-
 terent, aut etiam contagione aliqua religionis
 ejus, unde essent profecta, contaminarent. Quan-
 tam tempestate illa jacturam fecerimus, nihil at-
 tinet commemorare. Nunt id agitur, ut cogno-
 scatis, unde isti præclari monitores exierint, qui
 omnia perhorrescunt, quæ ad sacrarum rerum in-
 telligentiam, aut morum compositionem aliquo
 modo non referantur. Hos enim nobis fines præ-
 stituunt, a quibus Mathematicos judicant abesse
 longissime. At non hercle ita judicabat Origenes,
 qui (ut est apud Eusebium) quos maxime ido-
 neos ad sacra studia crederet, eos in Geometri-
 cis & Arithmeticis mature exercebat; ut tamquam
 præsidio aliquo eorum ingenia muniret, sine quo
 multi defecissent. Verum non accipiunt Origenis
 testimonium; credo quod erraverit in rebus ma-

Hist.
 Eccl. 1. 6.
 c. 13.

ximis; at in hoc certe sapuit, in quo subscriptores approbatoresque habuit sine controversia sapientissimos. Hieronymum, & Augustinum, qui in sacrorum librorum interpretatione numerorum ac siderum scientiam tamquam ad multa necessariam adsciscunt. Sed quid opus est testibus, ubi ratio non deest? Mitto, quantum momenti habeant Geometrici atque Arithmetici calculi in disputationibus de Arca Noe, de Babelica turri, de Salomonis templo, de Holocaustorum altari: mitto, quam sibi partem vindicet Astronomia in controversiis longe maximis de Hebræorum annis Solaribus, & Lunaribus; de computo Diluviali, de principis Planetæ motu vel inhibito, vel revocato; de variis denique modis, quibus hæc explicant Ptolemaici, Copernicani, & qui Gigantum more cum Superis bella gerunt, Spinositæ: mitto etiam, quæ novi Testamenti studiosos exercere solent, Eclipsis Christi mortem consecuta, Magorum stella, cærimoniarum ad Lunæ tempora ordinatarum, omnisque calendarum ratio, quam Ecclesiæ Proceres, non adhibitis in consilium Mathematicis, numquam constituissent: hæc, inquam, mitto omnia, non quod exigua sint, sed quia nimis nota, multisque usurpata. Unum illud in præsentis vestris judiciis subjicio, de quo nescio an multi cogitent, sed mihi tamen gravissimum est: si quis Mathematicus pro ea, quæ nunc gliscit in dies magis, hujus facultatis propagandæ cupiditate fortasse nimia, ut mox ostendam; si quis, inquam, tantum sibiumat, ut sacrorum mysteriorum veritatem Geometricis momentis expendere velit, huncne feremus arma tractare

Etare nobis ignota; nec solum Ecclesiasticam pœ-
 nam, ubi jus lædat Religionis, sed etiam judi-
 cium effugere? Non hic vanus metus est. Vidi
 ego, qui tamen in alio pulvere versor, lepidu-
 lum libellum, cui titulus, *Theologiæ Christianæ
 principia Mathematica*; quibus callidissimus auctor
 Joannes Craigius cælestis doctrinæ fidem non tam
 ex divino testimonio, quam ex rerum humana-
 rum conditione metitur, & utriusque Testamen-
 ti auctoritatem specie confirmantis infirmat. An-
 ne hæc sua quadam lingua & notis arcanis scri-
 pta Theologi nostri ita ignorabunt, ut ne lege-
 re quidem valeant? Nihil ne juvabit, cum ejus-
 modi bella ingruent, esse ex hoc ordine, qui re-
 sistere possit? Non id ab omnibus requiro: at es-
 se tamen aliquos singulis ætatibus necesse est, qui
 communem causam quoquo modo petitam, ubi
 res postulet, æquis armis defendant. Non deerunt
 exempla, quæ sequantur, Riccius, de Cusa, Ca-
 ramuel, Cavalerius, Ricciolius, Petavius, Tac-
 quettus, Mersennus, Villalpandus, & præterea
 multi pietatis ac doctrinæ fama nobiles, qui cum
 se sacramento obligatos Ecclesiæ dedissent, non
 ideo tamen existimarunt, Mathematicam palæ-
 stram sibi esse præclusam. Sive autem operam
 suam Religioni navarunt, sive navandi defuit oc-
 casio, nemo certe repetus est, qui non eos ma-
 gnopere admiraretur, summisque honoribus di-
 gnos censeret. Numquid habent, quod istis ob-
 jiciant, qui nos ab eorum imitatione deterrent?
 Nam quod a Seneca sumunt, nihil Mathematici Ep. 88.
 eis doctrinis inesse frugis; quod a Polyæno, & Cic. Acad.
 Aristippo, nihil veritatis; cum tam sit aperte 4. & Arist.
 N 3 fal- 3. Met.

falsum, miror equidem, cur Stoica & Sceptica ingenia non agnoscant. De toto hoc genere hominum anno superiore diximus: neque opus est pluribus, in his præsertim angustiis, in quibus alteri quoque parti initio positæ debet esse locus. Jam vero ad illam venio, quam pro modo temporis mihi ad dicendum constituti brevissime absolvam, magis ut rem tantam attigisse videar, quam tractasse. Neque vero mihi in animo est illos arguere, qui cum sibi Mathematicam laudandam proponunt, eam in omnes artes ac doctrinas, maximas minimasque, nobiles atque ignobiles, tamquam necessariam inducere conantur, ut neque bonus aliptes, neque coquus, neque pistor esse possit, nisi Mathematicos diligenter audierit. Vetus est hæc, communis, protrita laudatorum consuetudo, ut nihil se dixisse putent, nisi omnia rerum genera comprehendant, fidemque hominum, & naturæ modum prætergrediantur. Non deerit alius querelis locus, quæ neque cessabunt umquam, neque proficient. Illa me hoc tempore cura sollicitat, quid tandem in mentem venerit Medicæ artis professoribus, ut sua omnia ad Mathematicam referant; nihil jam loquantur, nisi particularum figuras; fluida, solida, media, quæcumque corpori adhærent, aut corpus constituunt, ex pondere, ex nisu, ex mole, ex numero pensitent; medicamentorum vim & facultatem, bonam malamve corporis habitudinem, ipsum quoque spiritus motum Geometricis notis definiant; tandem illud efficiant, Medicum esse neminem, in quem Euclidis anima non migrarit. Non sum nescius, Hippocratem quoque

que ad Theſſalum filium ſcripſiſſe, ut animum ad Geometriam & Arithmeticam converteret, unde eſſet aliquis in Medicina facienda uſus: at nunc eo res adducta eſt, ut non jam Medicus ſtudia ſua Geometricis ornet, ſed totus Geometra ſit. Illud etiam fateor, morbos plane omnes, eorumque curationes formulis explicari poſſe ex arte Mechanica ductis, ſicui tantum ſibi otii, ut nihil novi ad hominum ſalutem cum afferat, uſitata verba mutare velit: verumtamen cum id fecerit, tam certum erit, Medicum iccirco eſſe Mathematicum oportere, quam certum eſt, ſutorem ac textorem eſſe Geometram, quod ſutrina ac tetrina Geometricis formis explicari poſſint. Non vereor, ne nimio plus dicam, quoties reputo, Joannem Fernelium, qui ad Celſum elegantia, doctrina ad Hippocratem proxime acceſſit, nihil Mathematicum ſuis ſcriptis, quibus univerſam Medicinam complexus eſt, aſpergere voluiſſe; cum tamen ita ductus natura ipſa, omnes induſtriæ nervos in Matheſi contenderet; multoque maximam diei partem, & domeſticas fortunas in hoc ſtudii genus infunderet. Quid? Huncne admirabili ingenio virum, non ſuæ modo ætatis, ſed omnis ab illa memoriæ Medicum præſtantiffimum, cum omnes morborum cauſas & remedia perſequeretur, poſſetque unus, ſiquis umquam, Mathematicis ſpeculationibus ſcientiffime uti, penitus abſtinuiſſe; noſtros vero ne reduviam quidem ſine illis curare? Discrimen hoc tantum unde ſit, alii viderint: interim accipite, quid cum a nobis urgentur, minus recti respondeant. Sæculum cauſantur Methodicis averſum;

Plant.
Vita
Fernel.

potentum mores nihil probantium, quod ipsi intelligant; divitum avaritiam, unde abradi pecunia nequeat, nisi per istiusmodi miraculorum ambages. Hactenus sapiunt: pergant, quod bene verat, in hoc curriculo. Huc addunt, magnam suæ Arti injuriam fieri, si ejus criminis postuletur, quod sibi fortasse aliquam levitatis notam inurit, at in Politicis, in Theologis, in Jurisperitis, quorum jam multi audire Mathematici volunt, capitale est. Ne hic quidem prorsus aberrant a vero. Quas enim præstigias afferat necesse est, qui sibi imperavit movere omnia, quæcumque ingenio possit, ut Theologicas doctrinas, omnemque civilem & Ecclesiasticam gubernandi rationem Mathematicis momentis adstringat? Tituli ipsi horum librorum, de quibus nihil amplius commemoro, offendunt oculos; & in quo se putant gratiam & auctoritatem Mathematicæ conciliare, in eo plane ipso fastidium pariunt & satietatem. Atqui malum malo mederi nequit. Non dico, Medicos tantum aliud agere: utinam quidem soli peccarent; at illi tamen, quod est in primis grave, nostro periculo peccant. Ceterum in libros quoque Philosophorum jam nimis multæ videntur mihi irrepsisse Mathematicæ tabulæ; quamvis alioquin non tam ipsæ inter se Philosophiæ partes conjunctæ sint, quam earum quædam, ut paullo ante dixi, cum Mathematica. Sit artibus ac disciplinis inter ipsas conjunctio & societas, sed cujusmodi solet esse fœderatis civitatibus, quarum unaquæque suo jure utitur. Quid in rem quamlibet Mathematicos appellas; quid eorum methodum ad omnem disputationem

Elementa
Politic.
Civil. &
Ecclef.
methodo
Mathem.
propo-
sita.
Lond.
1716,

traducis; quid jura perturbas? Non est ille ad veritatem satis numerorum linearumque apparatus. Neque enim Mathematica demonstrandi ratio tantam sibi fidem & auctoritatem acquisivit, quod per lineas & numeros conficiatur; sed quod principiis fulta certissimis, quæ ex his colligit, ea quoque certa esse necesse est. Linearis & numerica probatio in omnem fere artem ac disciplinam adduci potest, principia poni Mathematicis æqualia vix alicubi possunt. Quoties igitur in magna illa volumina incidimus, quæ in latentibus causis & naturæ obscuritate versantur, nos quidem nihil moveant Geometricæ figuræ tabellis inscriptæ elegantissimis, nihil illa Mathematica methodus tantopere jactata, si rebus inædificetur natura labantibus, ut sæpe usuvenit. Haud equidem ausim magnos Auctores nominare, præsertim & supra nos positos, & famæ securos: at videte tamen, quam nihil fere nimium possim. Ille ipse Artis nostræ magister Quintilianus, Inst. l. I. c. 10. Rhetorum oculus ac delicia, cum jubet oratorem Geometrica percipere, ut ubi necessitas flagitet, de terminis ac mensuris apposite dicat, gestumque digitorum ad computationes accommodet, videtur mihi propemodum sui oblitus ad Sophistarum sollicitudinem delabi. Nam id si accipimus, jam & Miles, & Architectus, & Histrion, & Musicus debet esse orator, ut de his artificibus verba facere possit, vocemque & manus ex arte moderari. Quid illi, qui Grammaticum quoque ad Geometras mittunt, ut de orationis numero, & syllabarum quantitate recte judicet? Satis ne sani habendi sunt? Sentio me magno quo-

dam æstu commoveri; & ab eo litore, cui spon-
te mea consilioque adhæsi, in altum quodammo-
do abripi: sed jam, ut in lubrico, nimis multa.
Summa sit, Mathematica studia patere latissime;
nec ipsa per se solum, quæ colantur, dignissima
esse, sed aliis præterea multis suffragari: nobis
vero in primis amplectenda videri, illustranda,
promovenda; quod status hic vulgari conditio-
ne exemptus, & in illustri fastigio collocatus, re-
bus ornari debeat omnibus, quæcumque humani
ingenii solertia parari possunt; ut non muneris
tantum dignitate atque excellentia ceteros mortales
Clericus superet, sed seipsum quoque dignum
ostendat, cui tale tantumque munus committeretur.
His se igitur dabunt adolescentes nostri; modo,
quod Fabius de Græco sermone præcipit, ne usque
ad superstitionem. Facio equidem minus libenter,
ut eorum industriæ modum ponam, cum ceteroquin aliunde
non careant desidiæ invitantis: sed nihil in omni vica
tam lædit officium, quam quod extremum est. Magnum
crimen istius ætatis, atque adeo ætatum omnium,
ignavia; sed nihilo tamen minus ingenii ostentatio:
tamen si utrumque fortuna, orbis terræ domina,
suis bonis sæpiissime cumulet. Ego illos in omni re
& actione veritatem & honestatem sequi volo,
nec omnino spectare aliud, quam quod tibi, P. Eminentissime,
in cujus tutela positi sunt, mea voce declarandum videtur.

Inst. l. I.
C. I.

EPISTOLA

Præposita editioni primæ hujus Orationis.

ÆGre admodum tuli, quosdam se altera hujus Orationis parte læsos putasse, quos ego nec fando audieram, neque omnino suspicabar Medicos esse. Dispeream, siquid egi malitiose. Cum illa scriberem, gravi quodam valetudinis genere conflictabar: itaque dolor iram concitavit, ira veritatem expressit. Cum recte valeo, Medicos omnes, eorumque rechnas libentissime laudo; sed quædam ægrozanti condonanda sunt. Jam extra jocum. Ego equidem societatis ejus, quæ Medicinæ cum Mathematica intercedit, utilitatem agnosco, fateor, inculco; nec mihi aliud propositum fuit, quam quod nimium videretur, oratorio stilo notare. Si quis hoc tamen in crimen vocabit, (nam quibusdam nihil est satis,) is sciat, rem sibi cum homine fore neque Medico, neque Mathematico, at certe rerum humanarum non prorsus ignaro. Vale.

O R A -

ORATIO XI.

IN FUNERE

GEORGII CARD. CORNELII

EPISCOPI PATAVINI

Habita in Æde Cathedrali.

Video vos, NN. sicuti præter consuetudinem
 mæstos ac sordidatos, ita in me oculis
 animoque defixos valde mirari, quomodo possim
 tam misero ac luctuoso tempore non dicam ver-
 ba facere, sed in hanc lucem acerbissimo casu
 contaminatam prodire; eumque jacentem aspice-
 re, qui me a prima ætate educavit; quicum per-
 petuo vixi; quem, in ipso adolescentiæ flore pa-
 rentibus orbatus, parentis loco habui; cui uni
 tantum debeo, quantum homo homini proxime
 ac secundum naturam debere potest. At si quis
 umquam filius, quod & Tiberium admodum ju-
 venem, & multos præterea veterum Romanorum
 more atque instituto fecisse accepimus, si quis,
 inquam, filius in patris funere tamdiu compesce-
 re lacrimas potuit, dum illi oratione parentaret,
 hanc mihi, quæso vos atque obsecro, veniam
 date, ut cum præter ceteros quærere sordes ac
 latebras ad explendum dolorem debeam, tamen
 aliquantisper in hominum conspectum procedam,
 ea dicturus, quæ ad deplorandum GEORGII
 CAR-

ORATIO XI. FUNEBRIS. 205

CARDINALIS CORNELII Episcopi nostri interitum ego illi tam multis rebus addictus pertinere exultimabo. Nullum jam est eximiae virtutis ac nobilitatis testimonium, quod levitas & adulatio non vulgarit; ipsaque hæc laudandi funeris consuetudo jamdiu ab antiqua institutione descivit, & ad multitudinem traducta est: ex quo fit, ut cum honor ipse obsoleverit, non videatur Principibus viris dignus, nisi pondus aliquod ab eo, qui dicit, ad hominem exultimationem judiciumque accipiat. Atque in me quidem neque ullus dignitatis titulus, quarum rerum numquam studiosus fui; neque præstabilis dicendi facultas, quam mihi comparare pro hac ingenii tenuitate non potui; neque aliud quippiam ad speciem & pompam ornamenti est: sed ea tamen semper fuit observantiæ ac pietatis meæ erga Principem beneficentissimum vis & magnitudo, tam diuturna, tam constans, tam omnibus nota, ut hoc ipsum, quod ego loqui, quod hiscere, quod respirare in tanta calamitate possim, mirabile quiddam sit, vestrisque cogitationibus & posterorum memoria aliquo modo dignum ac celebrandum. Itaque hæc ne laudatio quidem dici poterit, sed debita quædam mœroris ac luctus publico in loco significatio; in qua si vobis, quemadmodum spero, satisfecero, mihi tamen certe numquam satisfaciam: quia cum plus etiam contendero, quam possim, minus tamen semper, quam debere me intelligo, ipse mihi contendisse videbor. Non deerunt memoriæ tanti Viri laudatores, donec stabit virtuti honos; coque plures erunt, quod tale genus, dum viveret,

veret, pati non poterat: ego ea dicam, quæ ipse quoque si vivus adesset, atque audiret, improbare non posset; quæque boni filii & officii memoris, non viri callidi & ad dicendum exercitati judicentur. Sustinete me tanto dolori imparem humanitate & auctoritate vestra, *Nobiles ac Reverendissimi Viri*, princeps hujus Ecclesiæ pars, in quorum fidem ac tutelam Patavina sacra & sacrorum Ministri concesserunt; sustinete, inquam, me, atque adeste supremo hoc in illum officio, qui vos universos perpetuæ concordie & caritatis vinculo complexus, plurimi semper fecit atque adamavit; qui multos ex vobis in celsam hanc amplitudinis sedem evehit, familiariter adhibuit, privatis publicisque benevolentie testimoniis ornavit: neque plus quippiam postuletis, quam quantum a mœsto turbatoque ingenio in tam magna ac recenti ægritudine præstari potest.

Quantum igitur ad humana ac divina præsidium in unius hominis morte amisimus, Auditores! Amisit patria Civem ornatissimum suæ nobilitatis & gloriæ amplificatorem; amisit Christiana respublica Cardinalem religionis studio, consilii magnitudine, rerum gerendarum experientia præstantem; amisit Pontificem Patavina Ecclesia, (pro Deum atque hominum fidem, quo tempore, quam importuno!) amisit tamen Pontificem integritate morum, pietate, intelligentia, vigilantia, liberalitate dignum prorsus, qui Ven. Gregorii Barbadiçi exemplum, non in hujus tantum Civitatis oculis, sed in totius Europæ luce positum unus exciperet; ipseque aliis, qui succederent,

rent, exemplo esset. Jacturam hanc tantam si quis ex nostris sine lacrimis ac lamentatione ferre potest, si quis cogitando non commoveri, non plorare, non ingemiscere, is duritia & immanitate efferatus, ne inter homines quidem, nedum inter nostros habendus est. Sed ut tantisper a nobis discedamus, eique Urbi ac Familiæ donemus aliquid, unde ortum Georgius duxit, quem esse putatis in vulnere tam acerbo Venetorum civium sensum, eorum præsertim, qui illi cognatione aliqua conjuncti fuere, hoc est nobilissimorum? quem Serenissimi Fratris uno eodemque tempore, nescio quo siderum consensu & conjuratione, ut omnia dira essent, letali morbo prostrati? Sed qua ego te voce appellem, optime Princeps, amantissime Frater, Joannes Corneliorum decus atque ornamentum, qui jam vel mortuus, vel mori proximus, squalori squalorem addis? O nos miseros atque perditos! Ita ne duo lumina patriæ suæ longe maxima, tam illustria, tam splendida, tam benefica uno pæne articulo temporis obscurata jacere? Ita ne Imperium nostrum, ac Sacerdotium uno ictu repente perculsum funebri specie sordibusque fœdari? O tempora nobis aspera, o fata fera, o dies atrii! Quis ita rerum humanarum sensu caret, ut cogitatione mali fatalibus causis impliciti non frangatur? Quis si non privata, at communi saltem causa non dolet? Quis Dei præpotentis indignationem non sentit; aut si sentit, cur non placare atque avertere conatur? Subeat animos vestros Gentis hujus splendor tam antiquus, quam patria ipsa; tam magnus, quam qui esse in privata fortuna pot-

potest; tam late fusus ac sublimis, ut non supremum modo Civitatis suæ gradum iterum ac sæpius occupaverit, sed ad Regium quoque fastigium pertingere potuerit: hic porro vetusta quæque nomina uno intuitu prætereuntes, duo hæc ætatis nostræ decora splendidissima mentibus vestris infigite, attenteque contemplamini, Joannem Venetorum Ducem, Georgium Cardinalem Patavinorum Episcopum; utrumque altissimo loco positum, eique parem; utrumque complexum virtutes omnes, maximas minimasque, quæ tantam dignitatem ornarent, utilemque humano generi facerent; sed ea præsertim animorum ac voluntatum consensione, eoque amore conjunctos, qui sanguinis vim & naturam ipsam quodammodo superaret: tum vero reputate, par hoc Principum tam insignie, & pro temporum ratione plane unicum, eodem fere articulo temporis, quod certe ne posterorum quidem admiratione carebit, eodem inquam articulo sublatum. Me miserum atque infelicem, cui hæc tam fœda atque ominosa commemorare contingit! Vereor, ne aliquid in tantis terroribus lateat, quod nobis irati Superi hac ratione denuntient, ut ad veterum disciplinam moresque redeamus. Verum quo me rapit doloris impetus? Dii meliora. Exeamus jam patria, in qua satis querelarum, satis mœstitiæ luctusque est. Te, Romæ, te inquam jam appello, altera veluti Georgii patria, quam sibi ipse divino consilio elegit, ubi gravissimos Magistratus gessit, cujus nomine celeberrimam Legationem ad Lusitaniam Regem obivit, cui suffragio suo bis Principem ac Pontificem Maximum dedit, visus ipse

ipse non longo intervallo abesse ab illo dignitatum omnium culmine, si quantum valebat animo, tantum etiam corporis viribus & valetudinis firmitate valuisset. Audiat summus religionis Antistes idemque optimus, extinctum sibi & Ecclesiæ Cardinalem, qui nihil umquam aggressus temere, fide ac veritate sacra jura defendit, magnumque prudentiæ exemplum litteris & posteritati mandandum reliquit. Scio equidem, quam ex iis multa, quæ nobis admirationi esse solent, in urbe illa omnium principe exigua sint; sed tempora ipsa faciunt, ut cui aliqua Ecclesiæ procuratio commissa est, is mirifica sapientia præditus ibi quoque videri debeat, si in tot hominum cupiditatibus, sine ullius offensione ac sine turbis, suam provinciam administret. Hæc singularis prorsus Cornelii laus fuit, quod per annos quatuor & viginti in regimine tam varie diffuso ac difficili nihil acciderit singulare. Neque enim tam periti Medici est accedentes morbos curare, quam ne accedant præcavere. Viderat hoc, multisque ad imitationem memorare solebat, verum illud summi Sacerdotii exemplum cum antiquis comparandum, Clemens XI; in cujus egregia sensa successisse credendum est, qui in ipsam humanarum divinarumque rerum potestatem Dei Optimi Maximi providentia successit Innocentius XIII. Atque hunc etiam multo magis vidisse existimo, qui olim Georgio in Lusitana Legatione suffectus, recentia adhuc admirabilis virtutis vestigia in florentissimo illo regno ad immortalitatem impressa legit, & qualis quantusque esset, jam inde ab eo tempore cognovit. Hic tamen tanti nominis

O

minis tantæque gloriæ Cardinalis ereptus est, hic inquam tibi, Roma, ereptus senectute prima, qui ne extrema quidem sine bonorum querimonia decedere potuisset. Verum ego quid diutius Romæ jacturas queror, nostratum immemor? quid in tam lugubri hujus Civitatis conditione lugendi causas aliunde peto? Nobis ille, nobis ereptus est; nostrum est totum hoc infortunium; Patavium amisit sacrorum præsidem, religionis custodem, pietatis assertorem, Pastorem, Patrum, Parentem. Revocate animo, quicumque Georgium paullo familiarius cognovistis, compositam illam in tanta dignitate facilemque naturam, sensa illa in rem quamlibet prudentissima, acumen illud ingenii ad difficillima quæque expediti; intelligendi celeritatem, decernendi consilium, agendi industriam: reputate cum mentibus vestris perpetuam illam verborum vitæque continentiam, flagrans ad omnia pietatis opera studium, sollicitam Christianæ institutionis curam, effusam in egentes ac miseros benignitatem, totam denique illam optimæ indolis rationem, quæ ubi se alicui dederat, in eo statim admirationem & benevolentiam commovebat. Id cujusmodi sit, intelligi magis potest, quam ex toto explicari: sed multi tamen animadverterunt, hoc proprium ejus ac peculiare fuisse, ut minimæ quoque virtutes excellentem quandam speciem ac dignitatem ab ejus moribus sumerent, & quod in aliis vulgare esset, in eo tamen insigne atque eximium appareret. An ille, nisi tantus fuisset, aut etiam major, Barbadiçi famam, ut modo dicebam, excipere potuisset, ejusque locum magna omnium volun-

luntate ac lætitia tenere, qui tamquam e cælo descendisse visus, eoque regressus unde venerat, non humanis tantum laudibus, sed prope Superum voce ac prodigiis celebratur? Jacebat populus fere omnis ingentium damnorum memoria abjectus atque afflictus; mœrebant sacrorum Ministri præteritorum memores, anxii trepidique futurorum; querebantur sacri mulierum ac virorum cœtus in diem viventes, & ad incerta casuum solliciti; ejulabat egentium puellarum ac viduarum turba, tam certo subsidio ad vitam tuendam atque honestatem privata; litteræ quoque ac disciplinæ tam securo spe dejectæ atque exanimatæ sibi metuebant. Hic tamen in tanto doloris ac timoris æstu superveniens, veluti Sol post atram ac turbidam tempestatem, omnium vultus explicuit; brevique effecit, ut hominem interiisse tota Civitas judicaret, non virtutem. Nihil mutandum ratus eorum, quæ invenisset a Viro illo divino constituta, eandem ubique justitiæ, disciplinæ, religionis viam tenuit; quidquid ingrueret, ad illius decreta & majorum consuetudinem confugere consuevit; ac si quando emergentes novi generis morbi nova remedia pollularunt, quæ ipse egregie constitueret, maluit videri reperisse, quam fecisse. Quamquam ita quietâ sub hoc Præsule ac tranquilla fuere omnia, ut cunctas amplissimæ dioceseos rationes qui suis momentis expenderent, & tempora temporibus compararent, præstantissimum hominis ingenium ex hoc maxime agnoscerent, & supra omnem sæculorum memoriam prædicando efferrent. Princeps Veneta prudentia & Romana gravitate com-

positus, duas res non tam natura diversas, quam moribus dissociatas præclare copulaverat, obsequium, & libertatem; obtinueratque, ut boni mores æquitate temperati plus valerent, quam antea bonæ leges. Ipse autem præibat omnibus intaminata quadam innocentia vitæ, ingentique instructu virtutum omnium, quæ in hunc statum cadere possent: cumque initio esset paullo naturæ iracundior, ut plerique omnes sollertis ac vividi ingenii homines, ita seipsum brevi tempore edomuit, ut inditos ignes pertinaci exercitatione patientiæ non compescuisse, sed prope extinxisse videretur. Utinam vero eam valetudinem vegetam ac firmam, quam primum in hanc Urbem attulit, non interceptisset aliquanto post articulum dolor, qui cum in dies magis cœpisset esse gravis ac frequens, in causa demum fuit, ut ipse per se diœcesim suam non tam sæpe, quam voluisset, obire posset; insuper vero etiam aliqua omittere, aut differre, aut ad alios delegare cogeretur, quæ non animi solum imperio, sed corporis etiam ministerio indigerent. Hæc illum cura magis, quam morbus ipse conficiebat; hoc unum, de quo assidue querebatur; hoc pretio æstimata valetudo; huc vota precesque conversæ; sensu ceteroquin ad perpetuos dolores obdurato. Ut vero aliquantum respiraverat, lecto adhuc affixus admittere humanissime omnes, audire gravissima negotia, inquirere, decernere, expedire ingenio ita libero, ita celeri, ita expectato, ut ipso corporis labore purgari animus atque illustrari videretur; tantoque magis exsurgere atque unus dominari, quanto illud magis ex-
cru-

cruciatum ac miserum contabesceret, Ubi porro stare, ubi sacras vestes sumere, ubi exire cubiculo poterat, statim quæ Pontificis munia essent, peragere omnia; nulla in re sibi parcere; non infirmæ adhuc valetudinis, non æstus, non frigoris ratione habita, quo commissi sibi gregis utilitate vocaretur, promptissime advolare. Quoties ego illum imbecillis adhuc viribus, pedibusque labantibus ad Seminarium accedentem vidi, quem locum, traditæ sibi provinciæ partem certe non ultimam, miro patrocínio ac benevolentia prosequabatur; quoties cum mane ibi fuisset, vespere redibat; quoties per multos dies sine intermissione exercitationibus nostris aderat: ut studiorum morumque rationes exigeret; ut omnes non præceptores modo, sed etiam discipulos nosceret; ut cuncta investigaret, pervideret, distribueret; ut litterulas nostras, qui maximus mihi semper fructus laboris fuit, sua præsentia iudicioque honestaret? Hinc sibi potissimum, nomine ipso Seminarii admonitus, fûrculos illos sumendos esse intelligebat, qui in omnem Patavinæ Ecclesiæ agrum pro temporum ac locorum necessitate transferrentur: de hoc & ipse libenter loquebatur, & alios loquentes audiebat; in hoc sibi magnopere placebat; huc hospites mittebat suos; nihilque abire patiebatur, quod ad istius pulcherrimæ atque utilissimæ institutionis incrementum quispiam moneret. Jamvero eo deveni, ubi cogor tamquam scopulo adhærescere. Cogitatio hæc una ita me totum obruit atque occupat, ut nihil versare aliud animo possim; ita me angit atque enecat, ut vocem jam ipsam pæne intercludat. Te

ne Seminario tuo, te ne mihi, Optime Præful ac Parens, tam subito casu ablatum? O cæcas hominum mentes! Te ne mihi tam multa, pridie quam ægrotares, benevole amanterque dixisse, quæ nostræ causæ cuperes, nulla plane tantæ hujus calamitatis præfensione, quæ tibi tam prope nobisque imminebat? Ita ne illa omnia momento temporis cecidere, quæ mihi constitueras, ut hoc ipso die, quo studiorum nostrorum cursus veteri more absolvi consuevit, tuo nomine edicerem? Ille, ille igitur dies mihi ultimus erat, quo te alloquerer, nec tamen, homo tibi devinctissimus, ullo naturæ motu commonebar, quam dicunt sentire in posterum terribilia? Pro dolor, pro fatum, pro rerum omnium repente facta conversio! Sed ille jamdiu humanarum rerum tædio affectus, quod æterno dolore conflictaretur, usuque pedum ferme omni careret, ad quietem & beatitatem æquo animo ac libenti commigravit; neque mehercule verbum ullum protulit his totis octo diebus, quibus se morti proximum sensit, dimissaque cura rerum ceterarum, se proximum esse unus asseveravit; nullum, inquam, verbum protulit, quo vitæ longioris desiderium ostenderet, malletque aliud, quam quod Deus ipse vitæ necisque dominus constituisset: nos vero lacrimarum pleni, multarum rerum meditatione suspensi, abjecti, profligati, unde abierit aspicimus, non quo ascenderit. Erigamus tantisper animum, Auditores; & siquid esse solatii potest, ab eo loco ducamus, ubi ille susceptæ ad nostram utilitatem sollicitudinis præmio fruitur: quod certe ægre ferre non debemus, nisi ingrati videri volumus.

lumus. Quamquam quæ ego solatia quæro? Vix humana mens humi defixa summum illud immortalitatis bonum, quod nemo nisi moriens consequitur, intelligere potest; & ad hujusmodi calamitatum levamen sincere vereque transferre: nos autem, ut in hoc tandem illius causa conquiescamus, adhuc tamen rerum nostrarum cura tangit, tangetque diu; minuenda fortasse aliquando, numquam prorsus deponenda.

E P I S T O L A

Præposita editioni primæ hujus Orationis.

Fervens adhuc erga Episcopum de se optime meritum Civitatis studium & voluntas, insolito omnium ordinum luctu significata, jubet me Orationem hanc emittere, quam ad ejus funus impetu quodam doloris effudi. Ac si mihi persuaderem, laudes ejus equari dicendo posse, valde dole-rem, paullo plus biduo ad rem tantam comparandam ingenio tam exiguo concessum fuisse: sed cum ita vixerit, ut a nemine pro dignitate laudari possit, id unum faciendum puto, ut de tota ejus Vita quædam præmittam annalium more, qualia fere ad Ughelli supplementum altero abhinc anno brevi simplici-que narratione exaravi. Ego equidem virtutem ejus, dum viveret, non fortunam admiratus, mortuum quoque perpetuo colam; nihilque omittam eorum, quæ ad ejus memoriæ propagationem quoquo modo facere videbuntur.

GEORGIUS CARD. CORNELIUS natus est
ex Federico Equ. & Cornelia Contarena Kal.

O 4

Aug.

Aug. MDCLVIII. Paucis post annis Melitensem Ordinem accepit, & Magni Commendatarii Cypri titulum, hujus Familiae hæreditarium. Politioribus litteris Veronæ, Philosophia & Jurisprudencia Patavii instructus, more maiorum, anno MDCLXXVII. Doctoris nomen & insignia sumpsi; statimque per Europam iter instituit. In patriam cum rediisset, Navalibus præfectus est anno MDCLXXXV: quo in munere ita se temporibus difficillimis gessit, ut gravioribus curis par judicatus, ad Gallicam Legationem designatus sit. Sed ille quidem alio spectabat. Itaque Ecclesiasticæ militiæ nomen dedit, Romamque commigravit anno MDCXC. Biennium fere in ea urbe commoratus, per eos Magistratus, quibus maxime solent Præsulum ingenia explorari, magnam de se expectationem movit. Proinde maritimæ oræ in magnæ pestilentie suspitione præpositus est, deinde annonam curare iussus, demum vero ad Petrum II. Lusitanie Regem Legatus missus anno MDCCXII. Insignem jacturam rerum suarum in eo itinere cum fecisset, incredibili virtute fortunam elusit. Tanta enim rerum omnium apparatione & magnificentia, tanta fide ac sapientia munus illud longe gravissimum sustinuit, ut XI. Kal. Aug. MDCXCVII. ab Innocentio XII. Cardinalis creatus sit, & paullo post Episcopus Patavinus, cum in ipso Legationis initio Archiepiscopi Rhodiensis titulum obtinisset. Inde igitur Patavium venit ingenti omnium civium lætitia & expectatione, quam postea non explevit modo, sed etiam superavit. Omnino is unus efficere poterat, ut optimi Decessoris Gregorii Card. Barbadii desiderium in hac urbe moderate ferretur: quippe instituta ejus omnia non retinuit solum, sed etiam

iam amplificavit; ac siquid necessitate temporum aut moderari, aut tollere coactus est, id singulari quadam prudentia fecit, sine qua ipsum quoque religionis ac disciplinæ studium interdum vanum, interdum etiam exitiale est. Diocesim litteris, aut pietate cultiorem, haud facile invenies: unde satis apparet, tantæ rei momentum in uno fere Episcopo esse. Capitulum habuit magna sibi observantia & caritate conjunctum, sed præsertim Ecclesiastica disciplina & morum honestate supra vetera exempla laudabile. Trestense Collegium sustulit, quod a primæ institutione degenerare cœpisset, nec jam remedium pati posset. Ejus loco publicum Grammaticæ Gymnasium in urbe aperuit, optimosque præceptores sine ulla juventutis impensa docere jussit. In Seminario multa egregie constituit, quæ undique alumnos supra ipsam loci capacitatem invitarunt; sed quod caput est, Magistrorum numerum auxit; suæque humanitate & æquitate obtinuit, ut non deessent, qui se, libertatem, ac valetudinem, tenuissima spe proposita, devoverent. Duobus Conciliis Pontificiis interfuit, quorum altero Clemens XI. altero Innocentius XIII. Summus Ecclesiæ Pontifex creatus est. Patavii diem obiit IV. Id. August. MDCCXXII: ipsique Idibus elatus est, cum paucis ante horis Joannes Venetiarum Dux, frater ejus carissimus atque amantissimus, dira prorsus fatorum consensione decessisset.

ORATIO XII.

IN FUNERE

ALOYSII PISANI

DUCIS VENETIARUM.

LAtendi consilium, quod Superis bene faventibus anno superiore ceperam, numquam sane deposuissem, nisi acerbissimus casus, qui nec opinato civitatem perculit & afflixit, me quoque excitasset, communemque calamitatem fletu & lamentatione prosequi coegisset. Obiit Dux & caput Venetiarum ALOYSIUS PISANUS, quod bonis omnibus debet esse grave: atque ita obiit, ut quasi Romulus alter ex oculis spectantium repente sublatus, mentes hominum stupore quodam defixas reliquerit. Dii meliora! Nondum plane depulso terrore illo, quem nobis repentina intulit Patriarchæ CORRARIi mors, statim succedit alter, & casus celeritate, & mole rerum aliarum super alias decidentium longe atrocissimus: ut nemo mirari debeat, si inter ipsa civitatis gaudia pro rerum vicissitudine consecuta, multi adhuc silentio hærent, prima illa cura & cogitatione suspensi. Cum enim in privata domo hoc genus mortis siquando contingat, vicinos terret, tum præsertim in viris principibus fatale aliquid habere videtur, quod non finibus illis, nec capite uno coerceatur. Sed juvat bene ominari.

Quod

ORAT. XII. FUNEBRIS. 219

Quod autem in magnorum virorum funeribus institutum est, ut eorum facta ad animi solatium e suggesto referantur & ornentur; id in præsentis vix locum habet. Nam quæcumque ALOYSIUS fecit tum in primo illo privatae vitæ genere, tum in altero hoc publicis insignibus titulisque ornato, cum omnia ad benemerendum de humana societate firmo quodam animi proposito constantique retulerit, quomodo ego vos amissa bona commemorando solari potero? Non sum nescius, præsidia quædam ab eloquentia peti solem, quibus rerum formæ coloresque mutantur: at horum præsidiorum copia mihi quidem pæne nulla relicta est, qui per annos admodum sexdecim longe aliis exercitationibus occupatus, nihil aliud quæsi, quam quomodo rerum veritas, quolibet siue fuco, siue ornamento spoliata, in aperto poneretur, hominumque studia ipsa per se alliceret. Ergo qui mihi id oneris imposuerunt, magis quid vellent ipsi, quam quid ego possem, æstimarunt; vel si hoc ipsum æstimarunt, hominem quæsierunt, qui cum industriæ vires omnes laudando contenderet, idem tamen fidem & pudorem retineret. Sed illud quoque fortasse spectarunt, ut cum in ceteris funeribus Oratores adhibeantur, qui præficarum more ad vanam quamdam doloris speciem querelas e medio sumant, sciteque jacerent; is ALOYSII funus dicendo ornaret, qui multis officiis obstrictus ex animo loqueretur, concionemque ipsam veri doloris explicatione commoveret. Et vero si quæ animo complector, assequi verbis potero, simul illud efficiam, ut intelligatis, me non temporis servire, sed

sed personæ: sin minus, efficiam tamen hoc ipso, ut quæ non dixerò, qualia & quanta sint, cognoscatis.

PISANA domus, cujus origo in ipsa civitatis hujus antiquitate latet, cum in Rep. cursum perpetuo tenuit, ut vel in summa opum ac dignitatum copia careret invidia. Ac si quis ex illa in hujusmodi instituto recte feliciterque permansit, is certe ALOYSIUS fuit, cui ad honores ac divitias, quantum ordinis & loci natura patitur, cum fere nihil deesset, ipsa se quoque hominum benevolentia, & communis quædam animorum propensio comitem adjunxit. Neque enim propinqui solum & amici, sed populus omnis, atque adeo illi ipsi, qui ne de facie quidem hominem nossent, nomini ejus mirifice favebant; ægre admodum ferentes, si quis forte utcumque de patria meritus, in contentionem veniret aliquam, & cum illo dignitates peteret. Itaque nihil illi in hoc ambitionis cursu difficile fuit, nihil non expeditum. In ipso juventutis flore ad consultandum de Rep. Sapientum Collegio adscriptus est, cum fuisset annali lege solutus ob patrui Laurentii merita Cretico bello sublati. Atque in illo quidem gravissimo Consilio ita se gessit, tantamque sui spem excitavit, ut ad Gallicam legationem, ubi primum licuit, delectus sit. Iter ejus adhuc est in ore hominum, institutum comitatu ingenti, præmissis ad principes urbes, qui laute exciperent advenientem, effusis in hospitia cuncta & diversoria regio more pecuniis, quæsticis opera omni benigne faciendi occasionibus. Per hæc Luteriam cum venisset, in Aulam totius orbis

bis splendidissimam, ipsi per vos cogitare animo & conicere potestis, qua rerum omnium apparatione, quam copiosa, quam inusitata legationem instruxerit. Illud certo constat, ipsum Regem Ludovicum XIV. & nōmine magnum, & ad magna omnia natura factum, non sine admiratione aliqua tantum privatæ fortunæ splendorem adspexisse. Valuit hoc ad gratiam & benevolentiam, & quod consequitur, ad eam gerendi negotii rationem valuit, quæ sine benevolentia ejus, quicum agitur, multis est difficultatibus impedita. Incidit enim in tempora valde aspera, primo quidem cum de Hispanica successione, vivente adhuc Hispaniæ Rege, agitari cœptum est, intentis in curam hanc Principibus cunctis, aliis causâ alia: deinde vero cum, illo mortuo, Italia bello flagravisset; nosque in terris nostris ingentes exercitus, amicos illos quidem, sed tamen exercitus, pro illa rerum ac temporum conditione vidimus. In tanto rerum motu quanta prudentia opus esset agenti cum Rege illo, qui unus omnia miscebat, non est, cur pluribus explicem. Ea fuit Ludovici natura atque indoles, ut audendum in loco crederet, & fortunæ fidendum, quæ nimis consultationibus fatigatur; cum ex adverso Rerump. ratio poscat, ut nihil fiat nisi consulto, nullaque conditione committatur, ut liberæ civitatis homines ad incerta casuum trepidare debeant. Quapropter Regis consilia cum laudarentur officii causâ, resistere tamen periculosa proponenti oportebat, atque ita moderari responsa, ut & causam suam probari crederet, nec tamen in illam posse descendendi. Attamen Rex,

ut

ut erat summo ingenio summaque prudentia præditus, non solum non querebatur, sed quoties opus esset, PISANUM libenter audiebat, complexusque favore omni, credi mallebat, se homini tribuere, quod tempori dabat. Absoluta legatione, quæ jam quinquennium excefferat, discedendum fuit: quo tempore maxime apparuit, quantus esset erga ALOYSIUM non Regis modo, sed Aulæ totius, atque adeo civitatis amor, colatis in illum undique officiis, donis ultra morem & exempla liberaliter datis, votis etiam pro ejus itinere, tantum non publice, susceptis.

In patriam cum rediisset, Sexvir publicis regendis consiliis creatus, singulari quadam innocentia, fide, integritate Remp. administravit; eamque de se omnibus opinionem indidit, ut locum hunc tam celsum non alia de causa quærere crederetur, si modo quæsitum umquam, nisi ut multis beneficeret. Itaque nemo unus inventus est neque ætate nostra, neque superioribus, qui tanta illum civitatis approbatione, tamdiuque tenuerit, donec ad summum evectus est. Inter hæc, jactatis Europæ rebus, cum Britannici regni possessio ad Annam venisset, Legatus extra ordinem ad gratulandum missus est, una cum Equite Nicolao Eritio, magni nominis Senatore. Quid quæritis? Cum res tota ad dignitatem & pompam referretur, nec ignoraret ALOYSIUS, hac ipsa de causa munus hoc sumtuosum & grave sibi potissimum fuisse delatum; quibuscumque rebus potuit, efficere conatus est, planeque effecit, instituto per Germaniam itinere, ut Veneti Senatus majestatem circumferre videretur. Ubi ve-

ro Londini fuit, ubi se Britannis ostendit, ubi in conspectu Reginae stetit, ut officiose pro Rep. faceret; quanto rerum omnium apparatu, quam splendido, quam magnifico usus est! Magnopere vereor, ne quis exiltimeat, me ex communibus locis laudes ALOYSIO quærere; qui tamen illa ipsa cum faceret, quæ communia sunt, pro animi sui magnitudine ita faciebat, ut communia esse desinerent, ejusque propria viderentur ac singularia. Hinc factum est, ut cum Carolus VI. Romanorum Imperator Mediolani esset, & Catholici Regis titulo urbem illam teneret, idem ad gratulationes & officia eligeretur; addito collega Andrea Legio D. Marci Procuratore, qui animo præditus æque magno, cuncta fieri veller, quæ in tanta Italiae luce Veneto digna nomine judicaretur. Nihil profecto Legatione illa neque fieri, neque cogitari magnificentius potuit, nihil ornatius, nihil gravius; ad quam celebrandam, præter ipsum Legationis comitatum longe pulcherrimum, fama rei ex vicinis civitatibus viros nobilissimos acciverat. Eminebant supra omnia Legati ipsi, hominumque oculos ad se trahebant; quod constaret, non mitti extra ordinem a Senatu nisi summos viros & in rebus gravissimis exercitatos.

Jam vero litteræ quoque præsidium ab ALOYSIO sibi quærebant; litteræ, inquam, quæ si magnis patrociniis careant, vel parum procedunt, vel in ipso cursu fatigatæ contabescunt. Hunc igitur sibi patronum deposcebant, & rerum suarum moderatorem, qui honestatem & verecundiam amaret, velletque modeste petentibus, vel

et-

etiam non petere ausis, jura sua tribui. Res ex voto cecidit. Nam Patavini Gymnasii cura & administratio ad illum delata est, hominem non dicam litteratum (cur enim illi bonis suis tam multis ornato tribuantur aliena? *Tu regere Imperio populos, Romane, memento: hæ tibi erunt artes.*) sed tamen nec illitteratum, & ad recte de litteris judicandum natura ipsa rerumque usu satis idoneum. Magistratu hoc tam gravi, quem majores nostri inter primos esse voluerunt, iterum ac sæpius defunctus, quantam sibi existimationem & benevolentiam apud singulos & universos, qui in hoc curriculo sumus, comparavit, cum multa declarant, tum in primis monumentum illud, quod ejus nomini in ipso Gymnasio communibus impensis positum est ad memoriam posterorum sempiternam. Nos, quod unum licuit, voluntatem erga illum nostram verbis testati sumus: at Resp. titulis & honoribus, quantoscumque capere civis potest, non dicam datis, sed effusis ALOYSIUM ornavit, auxit, cumulavit. Nam cum Eques jam esset, qui fructus communis legationum est, eosque magistratus teneret, quos modo memoravi, ipsa quoque D. Marci Procuratio, dignitas in civitate maxima, & uno Principatu minor, incredibili civium consensu populique studio, ubi primum tulit occasio, adjecta illi est. Statim erecti omnes in gratulationes, & publicæ possessionis spectaculum; quod fane fuit ejusmodi, ludis, congiariis, totius urbis ornatu, ut neque tot annorum cursu, neque exemplorum similitudine ejus memoria deleri potuerit. Fama rei late pervascerat, nihilque magis homi-

mines expectabant, quam ut vertentibus annis supremam in civitate sedem ALOYSIO fortuna præberet: fortuna, inquam, quæ in hac una Reip. parte plurimum valet, & cum virtute meritisque ita certat, ut interdum superior sit. Ventum igitur est ad interregnum. Meministis, opinor, qui concursus ad Pisanorum ædes statim factus sit, quantus universi populi favor, quæ voces, & quam insolitæ animorum significationes. Forte accidit, ut cum eo peteret Senator gravissimus, ætate major, Eques ac D. Marci Procurator, Carolus Ruzzinus, cui cum a virtute nihil deesset, ne fortuna quidem deesse voluit. Magnum repente consecutum est civitatis silentium ob summam hominis auctoritatem, quem ordines omnes suspiciebant, & loco dignum sine controversia fatebantur. Verum fervente adhuc in Pisanos patrum populique studio, ipsa D. Marci Procuratio a Ruzzino deposita ad ALOYSII fratrem Carolum Equitem translata est; quod uni accidit ex omni memoria non petenti. Ego equidem quoties reputo tantum illum animorum motum, de quo nec dici satis, neque fortasse cogitari potest; sic existimo, si illi ipsi, qui Remp. hanc constituerunt, patriæ parentes in hanc honoris contentionem cum Carolo venissent, repulsam fuisse laturos. Nolim tamen existimetis, impetu potius, quam consilio factum, ut dignitas tanta Carolo tribueretur. Modus & tempus ad gratiam, qua summo opere valet Pisanum nomen, referri debet; res ipsa stat jure suo. Cum enim vellent cives obrectanti fortunæ resistere, & desiderio suo facere satis, quæsierunt aliquid, in quo ratio sola

& libertas valeret. Non est hic locus, ut de Caroli meritis dicam, quem a prima adolescentia in omnibus Reip. bellis fortuna virtusque exercuit, ipsum quoque Principali fastigio dignum, nisi maluisset fratri cedere. Interim ALOYSIUS animum revocavit, suamque repulsam recte, ut debuit, interpretatus, fratris honorem erectus & alacer excepit. Satis enim perspiciebat, pro consueto naturæ cursu non sibi negari, quod petierat, sed differri, ut familiæ tituli dignitatesque augerentur; & hoc ipsum in beneficii loco ponendum sperabat, quod non statim obtinuisset. Ita prorsus evenit. Etenim extincto Ruzzino, quasi jus ad rem prima illa petitione acquisivisset, nemo præter illum inventus est, qui nomen suum profiteretur. Non deerant sane, qui putarent, sibi causas esse profitendi; sed noluerunt cum eo de dignitate certare, qui esset omnium sine controversia meritissimus. Hic vero ineptus plane sim, si putem posse me speciem aliquam illorum dierum informare dicendo, quibus de novo eligendo Duce actum est, electusque ALOYSIUS in populi conspectum venit. Cum ordines omnes præter morem læti essent, plebs bacchari quodammodo & furere lætitia videbatur; viæ, fora, templa novo quodam genere plausus & acclamationibus personabant; cives civibus non tamquam de communi bono, sed de suo quisque, gratulabantur. Hic mihi triduum illud explicandum esset per ludos & spectacula splendidissime actum. Sed utcunque dicendo contendam, nunquam tamen illis, qui viderunt, satisfaciam. Sunt enim quædam, quæ verbis exprimi nequeunt;

&

& cum eloquentia res parvas ornet, in magnis sæpe deficit. Enimvero siqua umquam in hac urbe Romani triumphi imago fuit, ex illa novi Ducis processione species aliqua ad conjiciendum duci potuit. Reliqua subinde consecuta ad initia tantæ dignitatis illustranda processioni paria fuere. Ceterum traducta in Prætorium familia omni, Hermolaus frater a domestica bibliotheca divelli non potuit. Hermolaus, inquam, Senator emeritus, quo uno neminem vidi, qui animum ab honorum cupiditate facilius revocet, qui seipso magis gaudeat, qui humanæ vitæ vicissitudines benignius interpretetur. Hujus in primis cura factum est, ut bibliotheca ad civitatis commodum in Pisanis ædibus construeretur; nullaque conditione committendum putavit, ut honoris speciem suum illud senectutis solatium defereret, in quo jamdiu quiescebat. Interim Aloysius viam omnem ac rationem quærere cœpit, qua se suis civibus probaret, & veterem, quæ de ipso erat, expectationem sustineret. Quid enim fuit, quod a Veneto Principe vel in Rep. administranda præstari posset, vel in personæ dignitate tuenda, vel in publicæ majestatis splendore suis exterisque ostendendo, quod non abunde præstiterit opera, consilio, largitate?

Negari profecto nequit, magnum aliquid in divitiis esse, quod homines capiat & in admirationem trahat: attamen sapientum judicio majores habentur, qui eas contemnunt, quam qui habent. ALOYSIO utrumque contigit, & habere, & contemnere. Tantam hanc seu virtutem, seu felicitatem reliqua comitabantur animi bona, quæ

quidem mortalis natura capit, & quæ qui habent, beati dicuntur; singularis quædam ad optima quælibet suscipienda voluntas; ordo & constantia vitæ non ad legem modo, sed ad rationem compositæ; eximia rerum omnium diligentia etiam minimarum; exquisitum & elegans in vestibus, in servis, ceteroque rei domesticæ apparatu judicium; summa in rebus contrahendis æquitas & facilitas; dictorum & factorum omnium pro sua dignitate gravitas, & cum gravitate conjuncta moderatio; pietas & religio nec privatim intermissa umquam, & publice ad exemplum splendide culta. Hæc scilicet homines movebant, ut ALOYSIUM magnopere admirarentur ac diligenter, ut honores omnes illi delatos vellent, ut prodeunti sine satietate acclamarent. Accedit, quod natura quoque suavitatem quamdam induxerat ori ejus, quæ aspicientes statim alliceret, & ad benevolentiam conciliaret. Quid vero si se tibi daret, si alloqueretur, si operam suam promitteret? Tum sane non vultus dumtaxat, sed ipsæ quoque cordis affectiones apparebant: ut si nihil daret nisi verba, tamen verba ipsa, ex animo ducta minime tecto, pro factis acciperentur.

Sed quæret fortasse aliquis, numquid in tanto prosperitatis cursu ALOYSIO contigerit, quo se hominem esse & humanis casibus obnoxium reputaret. Est enim quiddam in ipsa quoque felicitate nimium; si humanam naturam & mortalitatem Christianis momentis expendamus: Quin etiam contingere multa gravia & atrocia, eaque fere in ipso secundarum rerum articulo. Sed qui alienis calamitatibus ita commovebatur, ut eas aspi-

aspiceret tamquam suas; idem in suis fortissimus erat. Nolo singulas commemorare, ne illam attingam mihi quoque acerbissimam, quæ Principatus initia contaminavit. Id unum dicam, quod omnibus notum est, & crebris sermonibus per hosce dies ad miserationem repetitum, vidisse illum non modo parentum suorum interitum, quod æqua naturæ lege comparatum modice ferri debet; sed & uxoris, & fratrum, & filii, & nepotis, temporibus alienissimis: cumque suos omnes vehementer amaret, nullam tamen in tantis luctibus doloris significationem dedisse, quæ modum excederet. Accidit, audiente me, ut honesta læticia exultanti luctus denunciaretur. At ille composito celeriter animo respondit, quidquid boni Deus dederit, eo loco ponendum esse, ut idem repetere, nobis non repugnantibus, statim possit; se quidem nec extolli rebus prosperis, nec adversis deprimi. Ceterum si quis inter ejus infortunia recenset, quod repente sublatum se mori non senserit, is mihi de humanis rebus non recte judicare videtur. Hoc ego ipsum ad quemdam quasi cumulum felicitatis refero, quod non morbo prostratus & sensim confectus luctari cum natura debuerit; quod non fœdam mortis speciem ac terrificam aspexerit; quod propinquorum lectulo adstantium lamentationes non audierit; verbo dicam, quod vitam cum vita commutarit. Cum enim ille in hoc postremo quasi actu, quo Principis personam sustinuit, nullis ambitionibus distractus sibi uni vacarit, atque ita vixerit, ut siquid humanitus accideret, quotidie paratum inveniret; quid erat optandum magis, quam ut e-

jās animus, fractis repente vinculis, momento temporis liberaretur? Quidquid est igitur in hac repentina morte calamitatis, non ad ALOYSIUM, sed ad nos pertinet, coactos carere adjumentis, quæ adversus mala summa paullatim ingruentia parari solent. Si ille febris correptus jacuisset dies aliquot, ac veluti per gradus venisset ad extrema; licuisset nobis inter spem metumque jactatis parare animos in partem utramque; licuisset haurire oculis aviditate ultima vultum ejus; licuisset ad Superos abeunti supremum vale dicere, nosque illi ac nostra commendare: id quia non licuit, jure dolemus. Veruntamen quia dolemus de incommodo nostro, videndum est viris bonis & fortibus, ex hoc genere quantum liceat. Excitemus mentis vires; & quod tempus est allaturum, consilio & prudentia prævertamus. Non probat ille certe dolorem nostrum in æterna animorum quiete collocatus, qui dum viveret, ferre non poterat, quippiam alteri sua causa molestum esse. Desiderio nostro delectari potest, mœrore non potest. Demus hoc Principis memoriæ de nobis meritissimi, ut nihil agamus, quod non sit ex voto ejus. Hac vos in primis cogitatione animum confirmate, Religiosissimi Patres, qui peculiari hoc officii genere Duci optimo parentare voluistis, factisque pro more sacris ad expiandas minores culpas, quibus in tanta naturæ infirmitate nulli fere mortalium carēnt, laudes supremo Numini gratesque agite, quod vir tam bonus, tam integer, tam pius, humanæ vitæ laboribus ac periculis egregie functus, in beatorum sedes subito faciliq̃ue transitu convolarit.

At-

Atque hæc ad hominem. Ad patriam quod attinet, quidquid in hoc infortunio jacturæ est, sacris superque publici Consilii prudentia reparavit, suffecto cive illo sui ordinis principe, qui ab ipsa adolescentia in Reip. administratione versatus nihil unquam suscepit, sive domi sive foris, quin summa felicitate perfecit; quem tota civitas singulari studio ac benevolentia prosequitur; cui natura ipsa & rectum ingenium, & speciem imperio dignam largita est. Ergo cum justa Pisano solverimus, pro novi felicitate regiminis vota faciamus; ut quando in humanis nihil est æternum, sic tamen diuturnum sit, ut nostra omnium desideria expleat.

E P I S T O L A

A D L E C T O R E M.

Orationem hanc semel atque iterum ab aliis editam, & publici juris jam factam, mihi quoque proferre libet, ceterisque conjungere. Et quia pro temporis brevitate, quo scripta est, alicubi paulo angustior videbatur, magisque Orationis Commentarium, quam Oratio, ubi commode fieri potuit, eam nonnihil extendi. Principis tanti merita fortasse poscebant, ut capita rerum singula plenius explicata pro dignitate dilatarentur; sed nec fides publica patitur, nec stili ratio ad eas temporis angustias accommodata, ut nimis multa adjiciantur. Intelligentibus id erit satis, litterariæ plebeculæ admodum nihil. Vale.

ORATIO XIII.

AD DIALECTICAM

Habita in Gymnasio Patavino coram

JO. ALOYSIO MOCENICO
PATR. VEN. URBIS PRÆTORE.

Dialectica quasi contracta & adstricta Eloquentia putanda est; Eloquentia vero Dialectica dilatata.

Cic. in Brut. cap. xc.

QUa sexdecim ante annos alacritate Philosophicum studium intermisi, ut humanitatem & eloquentiam, ad quam me natura ipsa illiusque ætatis impetus ferebat, amplecterer, eadem nunc, defervescente jam sanguine, ad primum illud institutum redeo; rerumque mearum fata, manifestis indiciis cognita atque comperta, libentissime sequor. In quo videor mihi, si licet cum magnis parva componere, divini illius hominis, cujus ingenium unice admiratus, imitari etiam pro viribus semper studui, M. Tullii dico, litterarum cursum vitæque institutionem aliquo modo tenere: nisi quod ille, mutato reip. statu, ab arte dicendi cum jactationibus fori curiæque conjuncta, in Philosophiæ quasi sinum & complexum se se recepit, ubi conquiesceret; ego improvisa quadam mutatione rerum a Rhetoricis ad Philosophica rejectus, in novum discrimen adducor, eoque periculosius, quo locus hic in totius Eu-

Europæ luce collocatus, majorem operam industriamque requirit, quam quantam ad veteres illas nostras exercitationes, honestas quidem ac liberales, sed tamen angustis terminis circumscriptas, olim afferebamus. Atque utinam Cicero, quæ initio Topicorum pollicitus fuerat, absolvere potuisset; aut, si quidem absolvit, vetustas & barbaries non confecisset; ut quemadmodum in dicendi studio ab eo numquam discessi, ita in hoc differendi, quod nunc aggredior, eo duce atque interprete uti possem. Attamen erit in posterum quoque, ubi illum cum Aristotele non inepte componam: non quod nullam esse Dialecticam putem in scholis ferendam, nisi ex fontibus Rhetoricæ manet, vel in eos demum derivetur, quod ipsum tamen nec sine ratione, nec sine auctore facerem; sed quod artes ipsæ natura valde similes in eadem sæpe vestigia incurrant, & communionem quadam rerum plurimarum contineantur. Ex quo fit, ut in eodem stadio manere quodammodo mihi videar; aut certe non tam longe abire, quam homines quidam existimarunt, de nobis illi quidem optime meriti, sed pro humani ingenii cura plus nimio solliciti. Ipse quoque me ad eorum judicium aliquando composui; & in speciem dolentis conformatus, quod ita requirere viderentur, quasi ad Antipodas mitterer, officiose respondi. Nam & periculosum putabam, quid esset Rhetorica & Dialectica, extra loci hujus auctoritatem docere velle; & utcumque acciperer, plane videbam, tam gravem disputationem tamque illis inauditam familiari sermone expediri non posse. Nunc jam publico decreto muni-

tus, & quod in hujusmodi rebus valere plurimum debet, sapientissimorum virorum præsentia & judicio confirmatus, curam illis omnem ac dubitationem eximam; tantamque ostendam horum studiorum consensionem esse, quanta esse maxima in litteris potest. Quod antequam faciam, Triumviris litterariis, totique Veneto Senatui, musarum nostrarum custodi, præsidi, moderatori, laudes gratesque ago; quod hoc mihi bonarum artium omnisque doctrinæ domicilium patere voluerint; ubi, siquid possem, ad florentissimæ juventutis institutionem expromerem, & immortalis Reip. gloriæ ipse quoque ingenio tam exiguo pro virili parte consulerem. Fecere illi sane pro suæ magnitudine auctoritatis, cum me nihil tale cogitare ausum, & in umbra pæne privata delitescentem, repente in hanc lucem extulerunt, quam siquis non reformidat, is mea quidem sententia aut supra mortales videt, aut nihil videt. Et quamvis certo sciam, ab eorum consiliis divinam quamdam vim ac providentiam pro rerum humanarum ordine abesse non posse; quæ me cogitatio valde erigit atque confirmat: attamen cum reputo, quibus me quantisque Viris adjunxerint; quidque præstare debeam, ut in clarissimum ordinem non irrepsisse videar, sed venisse, magno quodam æstu commoveor; nec mehercule, siquid est in tanta honoris amplitudine jucunditatis, ut certe debet esse plurimum, ejus ego fructum, nisi factio virium mearum periculo, magnaue itineris parte confecta, percipere me posse spero. Sed jam audere incipiamus, & quæ sit Rhetoricæ cum Dialectica affinitas, uti modo possum

tum

tum est, ex ipsarum natura, & antiquitatis testimonio explicemus.

Sentio me in quæstione versari neque nova, neque difficili; in qua multa de medio sumta, & Latinis Græcisque litteris vulgata afferre necesse sit. Sed primum qua de re Dialectici Rhetoresque omnes initio suorum operum scribere solent, non mihi de illa tacendum puto; nec siquid verum ab illis dicitur, iccirco omittendum, quia sit occupatum; quæ ratio si valeret, jamdudum homines de rebus præclarissimis siluissent: deinde non omnia, ut spero, communia erunt: tum communia ipsa & publica siquis conferre voverit, inveniet a nobis more quodam nostro pertractata, & quomodo jubet Horatius, *privati juris facta*. Atque hoc primum constituo, orationem omnem, quæ sit modo litteris ac luce digna, Grammaticorum opera indigere ad emendationem, Rhetorum ad ornatum & elegantiam, Dialecticorum ad fidem & probabilitatem. Id enim mihi dari puto atque concedi, nostram hanc sive Dialecticam, sive Logicam ἀπὸ τῆς λέγειν, id est a loquendo nomen invenisse, in eoque esse positam: qua de re vix ullus jam dubitat; nisi forte illi, qui eam *Cogitandi Artem* appellare malunt, de quibus postea verba faciam. Igitur, cum sit nihil homini pulchrius, quam loqui; nihil vero dignius homine litterato, quam recte loqui; totum hoc tanti momenti opus triplici disciplina comprehensum est, ut veluti per gradus perficeretur. Ætas prima, quæ minus ingenio valet, in sermonis proprietate cognoscenda exercetur; & cum pure atque emendate potest, hoc est sine solæcismis

&

& barbarissimis verba componere, Grammaticæ loqui dicitur: proxima, in qua roborari animus incipit, & ipse per se aliquid parere, ad ornandum & augendum promovetur, in quo est eloquentiæ virtus: tum demum quæ ordine succedit ætas, ad inveniendum & judicandum apta, argumentandi vim & rationem persequitur; ut rebus dubiis fidem faciat, & assensum temere negantes tamquam telo pervincat & jugulet. Quamquam vero hæc rationis inveniendæ atque adhibendæ facultas, quæ Logica dicitur, aliquo modo stare sine Rhetorum arte potest, velut ossa nervis adstricta; attamen Rhetorica ipsa sine Logicæ præsidio nulla est, ut succus & sanguis humani corporis sine ossibus ac nervis consiliteri nequit. Quod si quis recte accipere voluerit atque expendere, cito intelliget, quicumque probationes ab Eloquentiæ scholis ablegarunt, in quo graviter ab Aristotele Rhetoricorum initio reprehenduntur, non eos quidem existimasse, dicendi artem tueri se nomenque suum sine probationibus posse, sed eas petendas ab alia facultate esse, cujus tota ratio & natura in hoc uno consisteret. Nunc quandoquidem cum Aristoteles, tum Cicero, tum etiam Quintilianus (quid enim alios attinet commemorare?) probationes quoque in Rhetorum ditione esse voluerunt, iisque locos assignarunt, quibus ad inveniendum uterentur, non jam mihi duæ istæ facultates sociatæ videntur ad eam, quam modo dixi, loquendi virtutem perficiendam, sed in unam quodammodo coaluisse; quæ cum fuse lateque incedit, verborum ac sententiarum luminibus ornata, Rhetorica appellari solet, cum
sub-

subtilior est & squalidior, Dialectica nuncupatur. Nam cum ajunt horum studiorum duces atque antistites, Rhetoricam rebus Civilibus contineri, reliquis Dialecticam; alteram certa tempora causasque complecti, quæque illis convenient videre; alteram in summis generibus versari, non habita rerum singularum ratione; hanc scrutari naturam rerum, uti est, vel sapientibus esse videtur; illam populares opiniones sequi, ex iisque argumenta ducere; discrimen afferunt sane aliquod: at cum iidem scribunt, utramque in rebus omnibus cerni, nullis regionibus clausam; quæstiones finitas ad infinitas revocari; tum Oratorem, tum Dialecticum disputare in partes contrarias; utrumque communia quærere; utrumque ab judiciis hominum pendere; utrumque fidem facere dubiam & labantem; tum vero cuncta miscent, & unum quoddam atque idem disputandi & dicendi genus efficiunt. Hinc nihil frequentius apud illos, quam alteram facultatem ex altera efflorescere; sibi invicem respondere; mutuis rebus ali; Dialecticam contractam esse Eloquentiam, Eloquentiam Dialecticam esse dilatatam: quæ loquendi formæ quamquam nisi in res duas aliquo modo diversas cadere nequeunt; attamen differentia ita est exigua, ut nec rerum variare naturam, nec omnino in quo consistat explicari facile posse, viri sapientissimi judicaverint. Sed hæc singillatim atque ordine videamus. Quacumque de re disputetur, tria sunt ferme consideranda, id de quo ambigitur, argumenta ad probandum comparata, & argumentorum explicatio; quæ singula si suis ponderibus examinentur, vix leve quiddam in-

ve-

veniemus, in quo non sibi inter se Artes istæ convenient. Et ut a primo incipiam, quæ disputandi materia est, & quæstio in scholis dicitur, illud firmum ratumque puto, tam Rhetoricam quam Dialecticam per omnia rerum genera fundi, & in omnibus suo quodam modo dominari. Sunt quædam, Auditores, ita simplices ac perspicuæ veritates, ut verbis explicari, & ostendi quasi digito possint, probari rationibus omnino non possint. Non multis igitur contendam. Quidquid in rerum natura, aut supra naturam est, qualecumque sit, aut esse videatur, ne in mentem quidem cadere potest, & intelligentia comprehendere, nisi sit ejusmodi, ut dici de illo, ac differi possit. Quod si quis Hermogenis auctoritate moveatur, aut Cornificii, qui quæ moribus ac legibus ad usum civilem sunt constituta, Oratori tribuunt; cetera a vulgo remota, quæ intelligendi disciplinam constituunt, Dialectico assignant; hunc ego ad illos adducam, quos paullo ante nominavi, rei litterariæ constituendæ quasi Triumviros, Aristotelem, Ciceronem, Quintilianum, quibus si credimus, & dicendi & intelligendi & judicandi magistris sine controversia peritissimis, nullis neque Rhetorica, neque Dialectica coercenda finibus est; quamvis altera in foro præsertim sedem habeat ac domicilium, altera libentius in rebus versetur Philosophicis. At illis, credo, respondere difficile fuerit, qui statuunt Oratoris operam intra causas & controversias concludi, quas Græci hypotheses dicunt, quæstiones autem universales in potestate esse Dialecticorum. Ita videlicet, nisi idem ille Cicero, qui hæc in primo
de

de *Inventione* scripserat, contraria deinde & in *Oratore*, & in *Topicis* præcepisset, omnemque thesimum ad dicendi copiam Rhetori concessisset. Porro cum dico, Ciceronem præcepisse contraria, ex aliorum sententia dico. Nam ego quidem ita existimo, cum ea, quæ in facto sunt, proprie & per se ad Oratorem pertineant, id primum ab illo fuisse præceptum; deinde vero cum animadvertisset, latius de toto, quam de partibus dici posse, non sane quæ scripserat, improbasse, sed illud insuper addidisse, ut in media causa a certis personis ac temporibus, velut ex angustiis, advocaretur oratio, & in ampliorem arenam adduceretur. Quare cum illi pro Sex. Roscio Amerino dicendum esset, non thesimum de parricidis posuit, sed hypothesimum, num Sex. Roscius patrem occidisset; quam deinde a Roscii persona ad summum rei genus traduxit, & de culpa supplicioque parricidarum divinitus disputavit. Sequitur argumentum, ex quo alterum discrimen, siquod modo est, duci debet. Ajunt enim, Logicam scrutari naturam rerum, ex eaque rationes capere, quæ aut veræ sint, aut proxime ad veritatem accedant; Rhetoricam argumentis uti popularibus, qualibet contentam veritatis specie, magisque fidem & persuasionem, quam scientiam parere. At mihi quidem non ita videntur Dialectici de veritate solliciti, quæ una est in rebus omnibus: siquidem eorum est institutum differere in partem utramque; & parens artis Zeno (Eleatem dico) bilinguis est appellatus, quod contraria defenderet. Nam quod aliqui clamant, Sophistarum esse in Rhetorum ditionem irrepere, & per ea disputare.

putare, quæ nihil habeant veri nisi speciem: videant, opinor, quantum sibi licere in Sophistas existiment, & quatenus ab hoc nomine abhorreant, quod ipsum per se neque turpiter sonat, nec antiquis temporibus caruit honore. Sophistæ enim & Solon, & Pythagoras fuere, ut scribit Themistius in Orat. 4. quî cum animi & ingenii causa, non fraudis aut quæstus differerent, tantam doctrinæ & sapientiæ famam collegere, quantam nemo ignorat, nisi omnem ignoret literarum historiam. At vero cum honesta & liberalis exercitatio in vitium decidit; multique se huic studio dederunt, quibus aliud nihil propositum erat, quam ut homines minus sagaces fallacibus conclusiunculis implicarent, & ex alieno errore lucrum facerent; magna invidia Sophistæ laborare cœperunt, & in novam quamdam familiam compulsi sunt, quæ a germanis Dialecticis non quidem *δυνάμεις* (ut verba ipsa Aristotelis teneam) sed *προαίρεσιν* differret. Tanti ne igitur istorum audacia, qui nobilissimam facultatem corrumpere tentarunt, apud nos erit, ut eorum causa de jure nostro decedamus, in locum coacti tam angustum, quam angusta in rebus humanis veritas est? Totam ne igitur Logicam, levium Sophistarum odio, ad exiguam illam partem contrahemus, quæ ne Logica quidem dicitur ab Aristotele? Si enim veritatis nomen suis terminis coercere velimus, ut nihilo plus significet, quam quod explicari per causam potest ac demonstrari, non Logici, sed Analytici juris est. Quod si vocem hanc late sumimus, ut omnia complectatur, quæ aliquo modo vera & necessaria sunt, tamen

Rhet. I. I.
C. 1.

si per causam non demonstrantur; Logica quæ dicitur ab Aristotele, non ita veritatem occupavit, ut sola teneat. In hanc quoque segetem interdum Rhetores veniunt; nullisque sibi legibus edictum putant, ut vera ubi invenerint, iis abstineant. Id nisi esset, cur in Porticus & Lyceæ a Cicerone & Quintiliano mitterentur, ut divinarum humanarumque rerum scientiam sibi compararent? Cur & jura civitatum, & populorum mores, & Deorum immortalium religiones, & quidquid a Philosophis de natura scriptum est, cognoscere juberentur, si se ad imperitorum caput ubique conformare deberent; nihilque possent ex veritatis & sapientiæ fontibus ductum oratione explicare? Pauca sunt, inquit Aristoteles in lib. 1. Rhetor. t. 91. *necessaria, ex quibus Rhetorici syllogismi sunt*. Concedo esse pauca; sed tamen sunt aliqua. Ex quo sequitur illud, nullum esse locum, cujuscumque tandem sit notæ, Rhetori interclusum; sapienterque factum a Cicerone esse, cum illos ipsos, quos Philosophus noster ad Logicas disputationes paraverat, Oratoriis exercitationibus causisque accommodavit. Topica dico; quorum interpretationem cum quæsisset Trebatius, ut est ejus libri initio, ad Rhetorem missus est. Quamquam mihi ex Topicis cito abundum esse intelligo, quod pulcherrimam hanc artis partem, & natura primam, & usu planissimam, Dialectici nostri dudum omiserint, ut se totos alteri darent, quæ in judicando posita est. Moverant aliquando scholas rei tam necessariæ indormientes, viri doctissimi Agricola, Ramus, Gorscius, Titelmannus, Perionius, Carbo, Tra-

pezuntius: sed quia nimis multa requirere videbantur, quæ simulari non possent, vicit consuetudo; jamque ætas nostra, cum Aristotelis Categorias, & pauca quædam de enunciationibus delibavit, octo ipsos Topicorum libros, tamquam alienos prætergreditur, & in illo Analytico Mæandro, multiplici, obscuro, impedito consenescit. Omnis igitur eorum, qui nunc regnant, Dialecticorum industria ad argumenti refertur tractationem, quod erat a nobis tertio loco positum. Quia porro non unus est argumentandi modus, syllogismus & inductionem sibi sumunt, enthymema & exemplum relinquunt Oratori. Siquis autem ab iis quærat, quid sit enthymema & exemplum; alterum ad syllogismus, alterum ad inductionem referunt, tamquam partem ad totum, & imperfectum ad perfectum. Primum quidem hæc ipsa partitio satis ostendit, ea in quæ cadit, genere saltem convenire: deinde illud quæri posse videtur, quomodo argumentationis forma imperfecta & angusta Eloquentiæ tribuatur, cujus natura nihil magis refugit, quam jejunitatem; plena & perfecta assignetur Dialecticæ, quæ copiam & ubertatem neque desiderat, neque capit. Sed num enthymema sit id, quod isti putant, & qua ratione differat a syllogismo, alias examinabimus. Nunc, quoniam in argumenti explicatione versamur, illud per mihi mirum videri solet, cur ab Aristotelis more desciscant, qui se pusillos Aristoteles putant, homines nescio qui, quorum oratio tota argumentis constat eodem cadentibus, & per veterem quamdam cantilenam numeratis, non brevis, non pressa, non facilis, non per-

perspicua, non ulla denique earum virtutum prædita, quas ipsi magno supercilio ab aliis requirunt. Hosne ego Dialecticos appellem, hoc est acres & concisos disputatores, qui quæcumque proferunt, in longas & inanes propositiones atque assumptiones dilatant, crebris conclusionibus in orbem volvunt, bis terve singula repetunt, in minimas quasque particulas secant; ne illa quidem enunciata sine suis formularum ambagibus dimittentes, quæ notissima cum sint, nemo nisi bardus ad garrulitatis gloriolam impugnat? Si hoc ex arte fit, valeat Aristoteles, qui hac arte tota caret. Hæc enimvero illa Dialectica est, cum qua nihil commune Rhetores habent; quæ tantum ab Eloquentia, quantum a sanitate distat; quæ tota argutulis fallaciis constat ad ostentationem comparatis; quam nemo neque profiteri, neque mehercule intelligere potest, nisi omni abjecta litterarum humanitate, in barbariem ac cœnum se se conjiciat. Quid? An tu, inquiet aliquis, ne illud quidem concedis communi opinione vulgatum, Dialecticorum esse adstrictum loquendi genus, fusum ac multiplex Oratorum? Nempe concedo libens: sed primum quidem velim, duo hæc genera recte finiri; quod certe non faciunt Logici nostri, dum rebus sunt pressi, verbis redundantes: deinde illud quoque velim, nequid nimis. Nam & Dialectici interdum cum rerum scientia eloquendi suavitatem conjungunt: qui mos est Aristotelis ipsius; Aristotelis dico, veteris illius Stagiritæ, qui Græce scripsit, non Latine: & sæpe Oratores nudis brevibusque argumentis adversarium urgent; unde est illa caus-

farum forensium pars, quæ dicitur Altercatio. Probo equidem, vehementerque laudo, quod primum a Zenone dictum, multis deinde placuit harum rerum Scriptoribus, Dialecticam esse pugno similem, Rhetoricam palmæ: at simul illud moneo, utramque facultatem una eademque manu significari; una inquam manu, quæ neque contrahitur, neque diducitur nisi per gradus. Atque ego hætenus perinde dixi, quasi cum veteribus Dialecticis agerem, qui toti in differendo erant; cum ad eos potius convertenda sit oratio, qui nunc scholas tenent, seque *cogitandi Artem* docere profitentur. Horum autem duo sunt genera; alteri totam hanc laudem in eo collocant, ut notiones inveniantur a communi sensu remotissimæ, & in rerum universarum contemplatione positæ, quas ne illi quidem ex toto intelligunt, a quibus tractantur; alteri diligenti quadam idearum omnium, quæ formari possunt, meditatione, quid in re qualibet verum, quid falsum sit, perspicere student; & hanc sive scientiam, sive solertiam, quamvis in animo insistant, nec foras ad usum disputandi exeat, Dialecticam nominant Platonica loquendi consuetudine. Non quæro, in duplici hac cogitandi via, utri magis apposite cogitent: id dico, non esse mirum, istiusmodi studia, quamvis pulcra & sublimia, cum Rhetoricis non convenire, cum absint a Logicis quoque. Nihil potest esse nobilius, quam animum corporis pondere humi dejectum ad res altissimas meditando tollere, & veritatis lumine undique expresso collustrare: at nisi totum hoc in disputationes conferatur, & comprehendi dis-

pu-

putando possit, ad aliam quamdam pertinet facultatem, non ad hanc nostram, in qua versamur: siu autem & confertur, & comprehenditur, quid est, oro, causæ, cur cogitandi artem, quam disputandi appellare malimus? Logicæ nomen in medium afferunt: λόγῳ autem ajunt rationem & cogitationem significari. Mitto, antiquum artis nomen, Græcis Latinisque familiarissimum, Dialecticam esse, hoc est disceptatricem, ut Cicero; disputatricem, ut Quintilianus interpretatur: mitto, ab Aristotele dici διαλόγων τέχνην, a Platone προσομιλητικήν, a Protagora ἐριστικήν, ab aliis modo ἐρωτηματικήν, modo ἐπιχειρηματικήν: quarum vocum si habenda ratio est, aliquid profecto amplius sonant, quam quod cogitatione perficitur. Hæc, inquam, mitto omnia; Logica sit: quid sentis de hac voce, M. Tulli? Te enim libenter interrogo, tamquam Apollinem quemdam; cujus auctoritatem si quis est qui contemnat, miror, non dicam, cur hic sedere audeat, sed quomodo hæc subsellia possit aspicere. *Altera* (inquit l. 1. de Fin. c. 7.) *Philosophiæ pars, quæ λογικὴ dicitur, est ars quærendi, ac differendi.* Percurrite singulas Organi Aristotelici partes, duobus exceptis de Demonstratione libris: quidquid ubique præcipitur, id fere omne ad interrogandum & respondendum pertinet, & in quadam vertitur duorum aut plurium concertatione. Omnes illæ de syllogismo regulæ; doctrina illa omnis de vocibus Categoricis, de definitione, de divisione, de enunciatione; omnis denique ratio arguendi ac refellendi frigida est ac jejuna, si extra cogitationem non progrediatur. Jam vero quo se modo

tuebitur Socrates, quomodo Pyrrho, quomodo Arcefilas, quomodo Carneades, quomodo reliqui veteres novique Academici, qui nihil sciri posse putabant, omnesque ingeniorum suorum contentiones ad disputandum referebant? Academicos dico? Dogmatici ipsi, atque adeo Græcia tota, disputandi studiosissima, omnem prorsus veri investigationem contemnat, quæ muta sit, & cogitatione finiatur. Habeant ergo sibi suam *cogitandi Artem* viri doctissimi, & ad eximia quæque invenienda nati; dum nobis in antiquo pulvere libenter manentibus communem illam multis ætatibus ac populis differendi rationem, quod æquum existimamus, non gravate relinquunt. Nunc illud fortasse requiretur, utrum eos quoque Dialecticos cum Rhetoricis jungam, qui se *Summulistas* dicunt, & in nectendis ac solvendis verborum cavillationibus otium & ætatem consumunt. Sunt illi sane magni ingenii magnæque industriæ disputatores, & si quidem vera narrant, ducem sequuntur Aristotelem. Unde hoc sit, quove spectet, jam habete. Cum in ea tempora magnus hic Philosophus incidisset, quibus Megaricæ captiones valerent, eoque plus famæ sibi quisque compararet, quo plures posset suis interrogationibus irretire, & in arctum compellere; id serio cogitare cœpit, quomodo insanam istam veritatis contaminandæ cupiditatem extingueret, vanosque homines ad silentium adigeret. Itaque ratiocinandi artem ingenti contentione scribere aggressus, miras subtilitates excogitavit; quibus, tamquam clavo clavum, istiusmodi fallacias truderet; atque ab hac lue jam late fusa,

&

& in dies gliscente Philosophiam liberaret. Id posteris imitatione dignum visum est, & cum temporum felicitate Sophistas non invenirent ad oppugnandum, ipsi se abundantia quadam otii calumniari cœperunt, sibi que respondere; & quæ prius necessitas fuerat, in ludum vertere. De his Seneca epist. 45. *Nescimus nodos, inquit, & ambiguum significationem verbis alligamus, deinde dissolvimus. Tantum nobis vacat.* Quid vero si nobiscum viveret, totumque hoc artificium videret infinitis rebus exaggeratum, quæ, ut ipsius verbis utar, *nec ignorantibus nocent, nec scientibus juvant?* Quid si grandia ista volumina aspiceret de ente prædicamentali & transcendentali, de terminis univocantibus & univocatis, de dici de omni prioristico & posterioristico, de futuritionis radice, de præcisionibus objectivis, de principio individuationis, de suppositualitate, suppositione, subalternatione (sic enim inscribunt) quorum ne titulos quidem aut fando audisset, aut cogitando perciperet? Cum enim id quoque in arcanis habeant, non oportere Philosophum usitate loqui, nemo ad illos accedere potest, nisi prius discat, quam cuique voci rem subjiciant. Novi equidem, morem hunc a Stoicis manasse, qui non sententia modo, sed verbis quoque a populo differre volebant: sed ut multa a Zenone suo Seneca sumsit de bonorum & malorum finibus, omninoque de beata vita, ita nodos illos, & ἀπόρητες λόγους, in quibus reliqua Stoicorum turba sibi placebat, neque probavit umquam, neque duxit imitandos. Ex quo intelligitis, quid mihi sentiendum sit. Nihil magis Sophisticum puto, quam quod ab

hoc genere hominum adversus Sophistas disputatur. Opponunt enim acumina acuminibus; & rigidam quamdam metiendi sermonis superstitionem docent, per quam ad oppugnandi & repugnandi exercitationem fortasse proficitur, ad eam, quam quærimus, veritatis illustrationem certe non nimis. Quod si teneamus, quid sit nomina pro rebus sumere; ludere in ambiguo; tribuere omnibus, quod convenit alicui tantum; ex fortuitis necessaria colligere; componere quæ non sunt componenda; dividere quæ dividenda non sunt; denique si illa captionum genera non ignoremus, quæ sunt ab Aristotele in Elenchis descripta, & ab optimis interpretibus ex communi consuetudine explicata, non erit opus istorum bibliothecis impallescere, ut per multas ambages & salebras tandem aliquando discamus, signum cæleste non latrare, etsi *canis* nominetur; Solem & Lunam non esse septem, quamvis ex *septem* planetis sint; poma non esse fugienda, licet *mala* dicantur; quamvis Deus sit *ubique*, tamen non esse adverbium. Quæstiunculæ istæ tam leves, tam minutæ, tam frugis expertes, neque dicentem, neque differentem decent; & quod idem Seneca monet, subtilius solvuntur, si contemnantur. Gravius quiddam est atque præstantius, in quo nos disciplinæ hujus nostræ rationem ponimus, & cum Oratoris opere conjunctum dicimus. Serio disseratur oportet: serio autem disserere, non est cavillosa verborum comprehensio, ne populum admirantem, quæ non intelligit, ludificare, aut cum ludificantibus congregi; sed certa ab incertis, a veris falsa, probabilia ab improbabili-

babilibus, si fieri potest, & quatenus potest, plana
 & perspicua oratione separare: quæ quidem ora-
 tio quamdiu temperate fertur, Dialectica est;
 ubi assurgit, figurisque & affectibus incitatur,
 cognatæ facultatis nomen assumit. Abeant vero
 hinc apud barbaros, quicumque societatem hanc,
 non tam ab hominibus, quam ab ipsa natura
 conflata dirimere conantur, & Logicæ genere
 nescio quo nauseantes juvenum animos imbuere,
 per quod omnis antegressa litterarum cognitio,
 libero capite & ingenuis moribus digna, obliteretur.
 Quærant sibi alias terras, ubi se suamque il-
 lam tam exsuccam blaterandi formam venditare
 possint, quæ cum hujus loci more atque institu-
 to, cum hoc Patavino ingenio ad humanitatem
 & elegantiam facta, cum hoc cælo atque solo a
 nugis alienissimo pugnat mirum quantum. Sed
 hic certe numquam pedem ponent, quamdiu vos,
 Viri doctissimi, quemadmodum facitis, exemplo
 vestro inter pauca præteritarum ætatum memo-
 rando resistetis. Audiant, si quis eorum tamquam
 vento jactatus ad hos parietes umquam accedit,
 audiant, inquam, ab his Philosophis, ab his Theo-
 logis, ab his Medicis, ab his Jurisperitis, quid
 sit vere & sapienter disputare; hinc cujusque rei
 quæ natura sit, & quomodo explicari debeat, si
 qui remanet sanitatis, aliquando cognoscant; ex
 hoc tamquam templo Palladis voces & oracula,
 hoc est disciplinarum dogmata rectis momentis
 examinata, & ad publicam felicitatem volentibus
 nolentibusque proposita, accipiant; ita denique
 statuant, se, siquid sapere supra horum sapien-
 tiam velint, omnino desipere. Ego certe mihi

disputandi leges non aliunde sumendas duco; quas ubique tenere tametsi pro dignitate non potero, voluisse tamen & contendisse cum erit mihi semper apud æquos æstimatores honorificum, tum illa carebit invidia, quæ insolita afferentes comitatur. Hæc mihi exempla ante oculos posita dies noctesque contemplanor; & si quid umquam aut dicendo aut docendo potui, in posterum eo conferam, ut ad hujus consuetudinem loci conformetur, in quo Dii hominesque Italicarum litterarum fortunam multis casibus jactatam statuisse videntur, & ad immortalitatem firmasse. Voluntatis hujus meæ consiliique testes habebo vos, lectissimi adolescentes; teque in primis, nobilissime atque ornatissime *Prosyndice*, qui fraternæ laudis æmulator, non solum auctoritate reliquis præses, sed morum elegantia, gravitate, & splendore quodam plurimum præstas: neque vero vos appellare auderem, si aut quippiam pollicerer, quod non esset e re vestra, aut quod polliceor in tanta celebritate, non quavis conditione præstandum putarem. Quod si rerum agendarum felicitas omine aliquo continetur, gratulor egomet mihi, quod primum hunc meorum laborum industriæque diem tu præsentia tua, optime ac præstantissime Senator, ornare volueris, ac pignus veluti quoddam mearum contentionum publico nomine accipere. Conspectus hic tuus admodum gravis, sed idem tamen longe suavissimus, ita me recreat atque confirmat, ac si Venetum ipsum Senatum, illamque majestatem summis Principibus verendam repente in has ædes translatam viderem, ejusque me judicio ac sapientiæ committerem. *Mocenicum* nomen ex
omni

omni temporum memoria Patavinis faustum, & singulari quadam ratione, quantum in Republica licet, a nobis cultum, numquam se magis prodidit, & quale quantumque esset ostendit, quam cum tu, *Aloysi*, Præturam hanc dudum jacentem summo nostro bono suscepisti; tuaque ista prudentia plane Veneta, benignitate ista plane tua, gravissimis rerum angustiis ac difficultatibus aut levamen, aut solatium attulisti. Tene hunc virtutis ac beneficentiæ cursum a Majoribus cœptum: habes in memorem Civitatem, in qua tibi tuorum benefactorum gratia diutissime constabit. Ego certe, ut de me spondeam, cum aliorum beneficiorum, quæ plurima & maxima accepi, tum hujus præsertim memoriam totius vitæ observantia studioque colam; & si quis addi sponte currenti stimulus potest, tu mihi animo perpetuo obversaberis; neque committam, ut quod opus tam bonis auspiciis inchoavi, ullo umquam tempore refrigescat.

Habita est xiiii. Kal. Febr. MDCCXXIV.

EPISTOLA

Præposita editioni primæ hujus Orationis.

AD GYMNASII PATAVINI MODERATORES.

Julvit me, SENATORES AMPLISSIMI, Oratoriam Artem cum Dialectica vel ob id maxime conciliare, ut primum hoc laboris specimen jussu vestro suscepti ad vos ipsos ominis gratia asferre possem;

fem; & siquidem recte caderet, alia subinde generis ejusdem producerem, vestrisque nominibus longe splendidissimis exornarem. Nam ipsa per se Dialectica, ut est in Isocratis epistola ad Alexandrum, non pertinet ad viros Principes, qui neque inter se contendere verbis debent, neque aliis concedere, ut contra se disputent. Agnoscite igitur facultatem illius affinem, cujus in primis ad populorum regimen & reip. administrationem magnus est usus. Quamquam vobis totius rei litterariæ moderatoribus nihil est ex hoc quidem genere, quod non magnopere conveniat; nisi ea forte de causa, quod ab auctore non satis idoneo profisciscatur. Et nimirum hoc restat excusandum, quod tam infirmi ingenii homo primum ad vos accedam daturus aliquid, deinde vero exiguum libellum promam, quod horæ unius opus videri possit. Ita sunt, credo, principia omnia: quæ si vos modo non improbabit, tempore ita crescent, ut etiam timendum sit, ne magnitudine ipsa aliquando laborent. Quidquid hoc erit, nutu vestro temperabitur, quibus me totum fidemque meam ita obstringo, ut laboribus extinguere malim, quam aut ignavia deficere, aut malitia fallere. Valete.

ORATIO XIV.

DE DIALECTICÆ

AC RHETORICÆ DIFFERENTIA

Habita in Patavino Gymnasio anno MDCCXXIX.

OMnes fere, qui in hunc locum ascendunt, ut publice doceant, diligentissime cavere solent in tanta ista, quæ sæculum tenet, opinandi licentia, ne quid forte proferant, quod aliquando revocare conentur. Ego vero illo ipso die, quo me primum vobis dedi, tale aliquid in medium attuli, & persuadere conatus sum, quod sane intelligerem me non perpetuo defensurum. Quid enim? Cum contendebam, tantam esse inter Rhetoricam & Dialecticam similitudinem tantamque affinitatem, ut vix altera ab altera discerni posset, videbar ne vobis ex animi sententia loqui, an vero causæ temporique servire? Scilicet cum ex mitioribus studiis ad dura hæc atque aspera transirem, & ipse me collectis undique similitudinis rationibus solari quoquo modo conabar, & aliis nimia quadam cura in rem novam intentis admirationem excutere. Nunc quis me jure reprehendat sive Academicum hominem, ut mihi placet; sive Peripateticum, ut placet illis, qui studia nostra moderantur; quis me, inquam, jure reprehendat, si animo jam confirmato & ab humanis judiciis securo in contrariam partem dicere aggredior; & ostendo, quam

quam longo intervallo Dialectica a Rhetorica distet? *Mihi semper* (inquit Cicero in Tusc. 2. c. 3.) *Peripateticorum Academiaque consuetudo de omnibus rebus in contrarias partes differendi non ob eam causam solum placuit, quod aliter non posset, quid in unaquaque re verisimile esset, inveniri; sed etiam quod esset ea maxima dicendi exercitatio, qua princeps usus est Aristoteles, deinde eum qui secuti sunt. Quamquam nihil est a nobis in prima illa exercitatione ad extrema ductum: sed ita quæ communia & similia sunt inter duo hæc studiorum genera commemoravimus, ut non dedecet hoc tempore, tamquam ex parte altera, afferre propria ac dissimilia. Addo etiam illud, venientibus primo in lucem hanc more majorum statim eloquentiæ campum pateferi; neque tam ab iis postulari in hujusmodi ingenii periculo, ut vera disputent, quam ut acute copioseque ostendant, se instrumentis illis non carere, quæ ad publicam disputandi formam necessaria sunt. Ac vero dudum occupata a nobis provincia, traditaque iterum ac sæpius veritatis inveniendæ ac judicandæ ratione, turpe esset, artium naturam adhuc obtegere; & per vana quædam simulacra, ad illius conditionem temporis quæsitæ, hominibus fucum facere. Accipite igitur non jam ab Rhetore, sed a Dialectico, quid inter utrumque differat; ne forte existimetis, artes ac disciplinas sine causa multiplicari.*

Cum Dialecticam dicimus, vel institutionem quamdam significamus, quæ recte differendi leges continet a rebus avulsas, & *docens* vulgo dici solet; vel ipsam differendi exercitationem intelli-

gi-

gimus, cum rebus, de quibus differitur, conjunctam, quæ *utens* comuni scholarum nomine appellatur. Eodem ferme pacto dividi Rhetorica potest, ut alia sit, quæ rationem dicendi tradit, alia quæ in dicendo occupatur. Utraque igitur utrique conferri potest. Nos nequid ambiguum afferamus, primum Dialecticam *docentem* cum *docente* Rhetorica comparabimus; tum ad utramque *utentem* ordine deveniemus.

Dialectica igitur, primo illo modo si accipiat, est ars, quæ veri inveniendi ac judicandi præcepta tradit, qualia sunt ea, quæ Topicis & Analyticis libris ab Aristotele comprehensa sunt: quæ qui tenet, quacumque in re versetur, recte differit, unde nomen ipsum Dialecticæ est. Qui Artem hanc a Rhetorica differre nolunt, statim inveniendi præcepta communia faciunt; totamque illam institutionem Topicam, quam Aristoteles in Dialecticorum ditione posuit, ad Rhetoras propagant. Quod autem gravissimum est, id ipso fieri ajunt Aristotele auctore, qui initio Rhetoricorum multis verbis ostendit, argumenta in primis ad oratoriam pertinere facultatem; eosque valde reprehendit dicendi Magistros, qui antea floruerant, quod nihil nisi de movendis animis & ornanda oratione præcepissent. Primum igitur animadverto, non defuisse ex veteribus sapientissimis viris, qui de argumenti inventionem nihil laborandum Rhetori existimarent. Non defuisse autem? imo vero fuisse omnes, qui de Rhetorica ante Aristotelem scripserant, si ejus testimonio credimus, quod nobis opponunt. Deinde concedo equidem, Topicam doctrinam causis adhibi-

hibitam, id est quæstionibus finitis, quæ tempus, locum, personam respiciunt, in Rhetorum potestate esse; sunt enim cuilibet disciplinæ pro varietate materiæ Topica sua: attamen communia hujus artis præcepta de generibus & formis, de causis & eventis, de absolutis & comparatis, de antecedentibus & consequentibus, ceteraque ordinis hujus per generales argumentorum classes digesta, & Logicis formulis expressa, non ab aliis, quam a nostris peti debent. Testem producimus illum ipsum, quem tanti faciunt, Aristotelem. Hic enim in Topicis libris, ut refert Catulus apud Ciceronem 2. de Orat. c. 36. *proposuit quosdam locos, ex quibus omnis argumentandi via non modo ad Philosophorum disputationem, sed etiam ad hanc qua in causis utimur, inveniretur.* Et sane cum Rhetorica & sit, & ab eo dicatur in libro Rhetor. 1. c. 9. *propago quædam & particula tum Dialecticæ, tum Civilis scientiæ; quemadmodum quæ ad mores & civilia instituta pertinent, non ipsa per se tractat, neque ex suo fundo ducit; ita aliunde mutuari debet quidquid sibi ad defendendam argumentis veritatem opus esse cognoscit.* Nolim videri difficultates difficultatibus augere apud eos, qui non facile concedunt, atque adeo ne intelligunt quidem, quomodo Rhetorica Civilis scientiæ pars sit. Id non una explicari ratione potest. Quidam ajunt, idcirco Rhetoricam eo referri, quod propria ejus materia actiones sint humanæ; ut est in Dialogo de Causis corrupt. Eloq. c. 31, *Veteres intelligebant, opus esse, ut his artibus pectus implerent, in quibus de bonis ac malis, de honesto ac turpi,*
de

de justo & injusto disputatur. Hæc enim est Oratori subjecta ad dicendum materia. Nam in iudiciis fere de æquitate, in deliberationibus de utilitate, in laudationibus de honestate dicimus. Sed quia res omnes, quæcumque in disceptationem cadere possunt, revera subjectæ Oratori sunt, quamvis aliæ magis, aliæ minus subjiciantur; alia quadam via Rhetorica ad Civilem rationem revocanda videtur. Sic igitur habete, tria esse in dicendo, quibus maxime victoria comparatur; primum ad dicentem spectat, cujus mores ad fidem faciendam maxime valent; alterum ad auditores, quorum animi affici debent atque inclinari; tertium ad rem ipsam, a qua probationes ducendæ sunt. Ratio omnis dicendi (inquit M. Antonius in libro Ciceronis 2. de Orat. c. 27.) tribus ad persuadendum rebus est nixa: ut probemus vera esse ea, quæ defendimus; ut conciliemus nobis eos, qui audiunt; ut animos eorum ad quæcumque causa postulabit motum, vocemus. Quæ verba ex ipsis ducta sunt Aristotelis verbis 1. Rhet. c. 13. Αἱ μὲν πίσεις εἰσὶν ἐν τῷ ἡδέι τῶ λέγοντι αἱ δὲ ἐν τῷ τὸν ἀκροατὴν διαθεῖναι πως, αἱ δὲ ἐν αὐτῷ τῷ λόγῳ διὰ τῶ δεικνύναι, ἢ φαίνεσθαι δεικνύναι. Adhibendi sunt igitur loci de vita & moribus ad conciliandos & permovendos auditores. Ac nisi volumus locos istiusmodi Rhetoricos facere, totamque Civilem scientiam suo jure spoliare; ne illos quidem, quibus ad probandum Oratores utuntur, Dialecticæ auferre debemus.

At quærat a nobis fortasse aliquis, si Topica doctrina omnino ad Dialecticum pertinet, qui fiat, ut eam tamen Rhetores tractent ferme soli.

Dicam libere, quod sentio, quandoquidem mihi contigit in utraque facultate versari. Ex quo cœpit Rhetorica ante disciplinas rationales tradi, factum est, ut puerorum animi, rebus vacui, haud aliter possent ad tolerabilem aliquam, si non eloquentiam, saltem loquentiam præparari, nisi dicendi magistri communes argumenti inveniendi locos in artem inferrent. Itaque nostræ huic disciplinæ Topicam doctrinam quasi clavam Herculi eripuerunt; ut jam Dialecticus de Topicis ne hiscere quidem audeat, aut paullo plus hiscere, quam licet in re ab alio usucapta. Quidam id censent eo fieri, quod cum olim Rhetorica, nondum inventa Dialectica, scholas occuparet, ipsi sibi Rhetores inveniendi præcepta formare coacti sunt; non quidem universe, quod postea a Dialecticis factum est, sed quatenus suo illi instituto, quod intra judiciorum controversias tenebatur, satis esse putabant. Quæ res in causa fuit, ut posteri eandem rationem secuti; &, ut sit in acquirendo jure, terminos prægressi, intra quos invenere quos sequebantur; ipsi Dialecticæ jam repertæ & ad summam perfectionem adductæ propria quædam hujus generis abstulerint, quorum in Rhetorica vix ullus sit usus. Qualiscumque tandem rei hujus causa sit, Stoici quoque ipsi, qui omnium subtilissimi in disserendo habiti sunt, & ob excellentiam Dialectici nominati, Topica omittebant; non quod inventionem argumenti carere se posse existimarent, sed fortasse quod pars hæc ipsis prærepta, & juventuri mature tradita in Dialecticas scholas afferretur. Hoc nomine reprehenduntur a Cicerone in capite Topico-

picorum secundo; qui locus notissimus est. Quamquam inveniendi argumenti artem qui totam Rhetori tribuunt, minus ægre ferendi sunt, quam qui, nostri quoque juris ratione habita, possessionem communem faciunt. Quid enim opus est, artes duas in rem unam venire, eodemque cardine verti? Cum ego Dialecticus tibi aperui, quæ sint in genere universo cujusque rei facies, unde omnis inveniendæ veritatis ac defendendæ ratio colligitur, quid necesse est, esse Rhetora, qui doceat idem? Aut si Rhetor est, cur Dialecticus sine caussa consultitur? Aut si uterque idoneus habetur, quis tamen non videt, alterum esse dominum solummodo *χρήσιμ*, alterum etiam *κτῆσιμ*; alterum uti propriis, alterum commo-

Utinam tamen hic hærent; nec in judicando vero, quod est alterum differentis munus, se nobis Rhetores conjungere vellent. Porro judicare verum nihil est aliud, quam invento argumento aliquo, ita illud explicare verbis, & Logica rutina examinare, ut quæ sit ejus vis, quantaque sit, perspicue cognoscatur. Id cum ex arte fit, quæ abstrusa latebant, statim emergunt; omnesque seu veri, seu falsi gradus recte cernentibus ac judicantibus se produnt. Vix puto esse aliquem ex vobis, qui non videat, totum id ad eam disciplinam pertinere, cujus est, ut Cicero scribit in Bruto c. 41. *rem universam tribuere in partes; latentem explicare definiendo; obscuram explanare interpretando; ambigua primum videre, deinde distinguere: postremo habere regulam, qua vera & falsa judicentur; & quæ quibus positæ sint,*

quæve non sint consequentia. Definit profecto etiam Rhetor, dividit, argumentatur; sed ex legibus a Dialectica acceptis: in his autem ipsis non admodum diligens est, quod facile sibi putet orationis fuco fallacias occulere, & rem pro re concioni venditare. Sunt qui concedant, iudicia veri ad Dialecticum pertinere: iidem tamen similia vero judicari ab Rhetore volunt; & quemadmodum ille syllogismi atque inductionis naturam aperit, quibus veritas manifestatur, ita hunc enthymematis & exempli leges explicare ajunt, unde efficitur verisimilitudo. Ita ne igitur, quot erunt veritatis gradus & conditiones, totidem constituentur disciplinæ? Non sic profecto sensit Aristoteles cum scriberet in libro Rhetor. I. c. 5. τὸ τε ἀληθὲς, καὶ τὸ ὅμοιον τῷ ἀληθεῖ τῆς αὐτῆς ἐστὶ δυνάμειος ἰδεῖν, *eiusdem facultatis est, verum & simile vero cognoscere.* Quamobrem idem eodem loco Rhetora ad Dialecticum mittit, ut ab eo argumentandi rationem sumat: quod cujuscumque sit diligenter attendite. Omnis argumentandi ratio procedit vel ab universalibus ad singularia, vel a singularibus ad universalia; hoc est vel a mente ad sensus, vel a sensibus ad mentem. Primus modus syllogismum constituit, ut cum dico: *Affectio omnis differt a re, cujus est affectio: figura autem huius tabulæ est affectio ejus: igitur ab ea differt.* Hinc manat Rhetoricum enthymema, quod naturam syllogismi habet, nec ab eo differt nisi modo quodam; ut nos alias ostendimus adversus Dialecticam turbam. Modus alter, qui a sensu ad mentem pergit, & ex singularibus colligit universale, inductio vocatur, cujuscumque erit, si dicam:

Præ-

prudencia, iustitia, temperantia, fortitudo id habent singulae ut laudentur, laus igitur omnem virtutem consequitur. Hinc enascitur Rhetoricorum exemplum: quod licet in singularia tendere videatur, & progredi ἀπὸ μέγας πρὸς μέγας, ut loquitur Aristoteles; attamen res ipsa tendit in universale, & ab eo vim suam capit. Nam cum dico: *Gracchi sunt occisi; ergo & Catilina debet occidi*: huiusmodi argumentatio eatenus valet, quatenus tacita quadam virtute efficitur, si Gracchi sublatis sunt, omnem seditiosum civem tollendum esse, proindeque & Catilinam. Quæ cum ita sint, nulla est Rhetorica argumentandi forma, quæ ad Dialecticam non referatur. Et ut à capite arcessam, tota veri judicandi ratio, imo & invenienti, ut est paullo ante demonstratum, nostra est; nec de illa præcipere aliquid nisi ex hoc fonte petitum Rhetores possunt. Quid est igitur, inquires, de quo præcipiant jure suo? Scilicet de modo ornandæ ac dilatandæ orationis. *Esse* (inquit Cicero in Orat. c. 32.) *perfecte eloquentis puto, non eam solum facultatem habere, quæ sit ejus propria, fuse lateque dicendi, sed etiam vicinam ejus atque finitimam Dialecticorum scientiam assumere. Quamquam aliud videtur oratio esse, aliud disputatio, nec idem loqui esse, quod dicere; attamen utrumque in differendo est. Disputandi ratio & loquendi Dialecticorum sit, Oratorum autem dicendi & ornandi. Quid est autem per Deos immortales, cur Rhetoras suæ conditionis poeniteat? An levis operæ & exiguæ judicant, quod jam sit inventum, eloqui & expolire, nisi nostræ quoque artis munia sibi sumant? Teneat quisque fines*

suos. Cum rebus egent, a nobis petant; nos vicissim, cum verbis egebimus, ab illis mutuabimur. Neque enim ii sumus, ut quod nobis deest, turpi verecundia diffiteamur; aut cum fateamur, inquinata tamen velimus obscure disputare, ne ad alios artifices confugiamus. Utrique in omnem disceptationem venimus; idem tamen utrique præstare non possumus. Vires conjungamus: nos illis argumentorum vim, illi nobis sermonis nitorem impertiantur.

Hic vero etiam a nostris mihi timendum video. Audivi enim nonnullos, qui gravi supercilio dicerent, se non rhetoricare, sed veritatem quærere: quasi vero cum barbarie veritas coalescere possit, cum sermonis elegantia non possit. Quæ malum est veritas ista, quæ tam male habitat; quæ in luto volutatur; quæ lucem ferre non potest; quæ inter barbara & inquinata eminet, inter culta & nitida jacet? Nempe veritas Sophistica, quæ qualis sit, statim apparet, si ex suis tenebris & ambagibus educatur. Accipio excusationem, cum illud Manilii nobis occurrant lib. 3. v. 39.

Ornari res ipsa negat, contenta doceri.

Sed interim tamen mecum ipse reputo, quanta sit istorum hominum calamitas, qui suorum ingeniorum conatus ad monstra tam deformia adjecerunt, ut omnem respuant humanitatem. Nullum clarius esse puto argumentum pessimi, quam hoc ipsum, quod jactant ad excusandum. Nam quid isti simile Manilii habent? Ille rem novam atque intentatam poeticis numeris comprehendere nitebatur, planetarum stationes, sortium discrimina, horoscopus, athla,

athla, & alia id genus Astrologica nomina, quæ ne flecti quidem Latine poterant. At qui naturales disciplinas, aut civiles, aut sacras tot locis, tot ingeniis, tot litteris elegantissime proditas atque explanatas, rursus dare aggrediuntur, novisque commentationibus amplificare, qua fronte Manilium appellant, & Poetam, & pro illo instituto nitidissimum, ut cœnum sordetque suas tanto nomine tegant? Appellent Ciceronem potius, omnium litterarum omnisque doctrinæ magistrum; & ab eo tandem aliquando discant, quo se modo metiri debeant, & quibus terminis suas contentiones definire. *Fieri potest* (inquit Tullius. 1. c. 3.) *ut recte quis sentiat; & id quod sentit, polite eloqui non possit. Sed mandare quemquam litteris cogitationes suas, qui eas nec disponere, nec illustrare possit, nec delectatione aliqua allicere lætorem, hominis est intemperanter abutentis & otio & litteris.* Qui ita scribunt, perinde faciunt atque illi, qui optimas dapes in mensa conspurcant, ne ab aliis tangantur: ac proinde *suos libros*, ut idem ait Cicero, *ipsi legunt*, ceteri stomachantur. Magna hæc apud vos animi confidentia dico, ubi nemo sibi dicta suspicari potest. Quilibet vestrum & sumit ipse, quæcumque potest, ab arte dicendi, ad squalorem suarum disputationum detergendum; & alios plura sumere ad nitorem & ornatum, dum intra modum faciant, sine invidia & sine obreftatione patitur.

Sed jam de Dialecticæ, ac Rhetoricæ præceptis satis multa diximus. Nunc ad utriusque usum veniamus oportet. Et ne ab ordine in parte prima instituto discedamus, videtur ne vobis Ora-

tor communibus locis eadem ratione uti, atque Dialecticus? Hic plenas & perfectas definitiones requirit; ille descriptione quavis contentus est. Dialecticus dividendo & partiendo cavet, nequid desit, nequid redundet: Orator nihil fere hujusmodi habet legibus adstrictum. Alter causas rerum proprias & proximas, eventa causis respondentia, signa necessaria, antecedentia & consequentia adhibet in argumentando: alter causas quaslibet idoneas existimat, quamvis alienas & remotas, eventa fortuita, signa sive adjuncta sive conjuncta, affectiones cujusquemodi rerum ac personarum; uno verbo, quidquid aliquo modo valet ad tractandos sensus hominum, & popularibus opinionibus imbuendos. Dialecticus refert probationes suas ad res ipsas, Rhetor ad auditorum animos accommodat: quia hic movere studet, ille non item, satis beatus si vicerit. Quid opus est pluribus? Orator cum populo agit, Dialecticus cum sapientibus: ille actionem, hic cognitionem spectat: illius virtus fere tota in civilibus negotiis cernitur, hujus in disputationibus scholasticis; alter vincere acutis interrogationibus, alter persuadere morata oratione conatur. Hinc, opinor, manifestum est, quam diversis indigeant ad inveniendum locis; eosdemque cum adhibent, quam diversa ratione adhibeant.

Sed longe maxima in usu veri judicandi harum disciplinarum differentia est. Quamvis enim ratiocinandi forma una sit, a Dialecticis profecta; attamen aliam quamdam rationem nomenque induit, cum Rhetoricis argumentis inducitur. Nos, quia vera tantum, & veris proxima quaerimus,

rimus, syllogismis atque inductionibus disputamus ex ipsa rerum natura petitis, & ad exquisitas artis leges castigatis. Oratores, qui persuadere quovis modo student, & populum ducere, primum quidem externa quædam argumentandi genera adhibent, ex tabulis testibusque ducta: deinde parium comparatione utuntur, quorum genus omne exemplum vocant; tum, ad interna quoties veniunt, non vera & necessaria curant, sed veris ac necessariis quoquo modo similia. Probationes porro ipsas, quarum partes Dialectici uno ordine semper efferunt, eoque recto, Oratores multipliciter variant & invertunt, a complexione fere incipientes, in propositionem desinentes. Quo spectat illud Cicer. in Partit. c. 13. *Altera argumentatio* (id est Rhetorica) *quasi retro, & contra prius sumit quæ vult, eaque confirmat; deinde id, quod proponendum fuit, per motis animis, jacet ad extremum.* Quid quod Dialectici universi generis quæstiones tractant, quarum finis non ultra cognitionem & victoriam in disputando progreditur; Oratores autem, quorum opera quæstionibus finitis est adjecta, id propositum habent, ut eos, quibuscum agunt, ad assensionem & actionem trahant, inclinent, impellant? Ex quo fit, ut Dialectica argumenta Græci dicant *ἐνδοξα*, id est opinabilia; Rhetorica *πιστα*, id est persuasibilia. Neque enim satis Oratori est ita in foro, aut in Senatu dicere, ut qui audiunt, se minime pares resistendo fateantur: nisi animo victi atque inclinati id assentiendo probent & faciant, ad quod oratione impelluntur. Dialectico linguam vicisse satis est; quamvis ille, quicum

disputat, ut scribit Seneca ep. 82. *ad confessionem perductus aliud respondeat, aliud putet*. Hoc nihil est, si recte reputamus, in præsentī negotio valentius; quandoquidem nulla major excogitari distinctio potest, quam quæ oritur a fine, in iis præsertim facultatibus, quæ instrumenti rationem habent, & aliis inserviunt. Vulgo ea solet haberi differentia princeps, quod Dialectici presse & anguste, Oratores fuse lateque differant; Dialectici loquendo, Oratores dicendo; illi jejunis aridisque interrogatiunculis, hi plena perpetuaque oratione. Alii totum discrimen hoc contemnunt, tamquam in modo, non in re positum. Sed revera gravissimum est, & ab ipsa istarum artium natura officioque petitum. Etenim, si rem altius ab ipso capite repetere volumus, differentis officium est, primum quidem eas notiones invenire & apte conjungere, quæ vera germanaque societate sibi cohærent; tum eas quoque componere, quæ aliquam inter se affinitatem aut similitudinem habent. Primum illud qui præstat, Dialecticus dicitur; qui in altero excellit, Oratoris nomen sibi adsciscit. Uterque autem in Sophistam degenerat, si ea colligat, simulque sociare velit, quæ sibi respondere videntur, nullo tamen modo respondent. Dialecticus igitur cum ea conjungat, quæ vel natura, vel firmo quodam sapientum judicio inter se continentur, modo res clare nitideque explicet, nullis præterea indiget adminiculis. At Orator cum levia multa affinitatis ac similitudinis genera complectatur, quæ vel a suspitione nascuntur, vel a vulgari persuasionē, vel ab ipsa etiam sermonis ac litterarum figura,
tam

tam tenue differendi genus modis omnibus, quoscumque causa capit, fulcire & roborare debet, tum miscendo animi motum, in auxilium adscita Civili scientia, tum augenda & coloranda oratione, quæ ipsi propria supellex est.

Hæc cum ita sint, non tamen negare ausim, duas has facultates inter se coire, seque mutuo sustentare; ut in uno eodemque sermone utriusque vires ac virtutes appareant. Id cum sit, inventio ac dispositio Logici juris est; elocutio & actio pertinet ad oratorem; quod recte vidit, & luculenter explicuit acerrimo vir ingenio, Gaspar Scioppius in *Pædia Politices* p. 21. Qui rem his momentis expendet, jam intelliget, cur olim integra oratione contenderim, ad Rhetoricam accedenti magnam esse in primis verborum curam suscipiendam. Nam cum stilus Rhetoricis exercitationibus formatus est, cetera subeunt aliunde adscita, & ad fidem faciendam facile promoven-
tur. Minutuli quidam declamatores, qui plus judicant, quam intelligunt, statim putarunt, me veteres artium fines movisse, ac veluti Gracchum quemdam reip. litterariæ tranquillitatem perturbasse. Itaque alii alia requirere, iidemque alio tempore alia, quæ me artis ignoratione, quam a me ipso accepissent, omisisse finge-
bant. Sed cum maxime nitebantur, Tullianis formulis ex Nizolio sumtis & insulse compactis, modo hoc, modo illud Rhetori adjicere, informe nescio quid, & confusum edebant, falsa quadam Latinitatis specie oblitum, in quo nihil esset nisi sonus inanis. Hos ego jamdiu, qui tam stulte obrectando inclarescere student, in ordinem coegissem, nisi navi

&

& honesti hominis ira faciem hanc Rhetorici Iudi
prorsus indignam existimassem. Est illis supplicii

Hor. l. 2.
ep. 1.

loco & thus,

Et piper & quidquid chartis amicitur inepris.

EPISTOLA

Præposita editioni primæ hujus Orationis.

AD GYMNASII PATAVINI MODERATORES.

Quemadmodum Oratio hæc non potest ab illa se-
parari, quam habui sex abhinc annis, cum
primum publice docere cæpi, ita eisdem auspiciis uti
debet, idest vestris. Aliter si esset, vix auderem ad
exigui libelli præsidium nomina tam splendida com-
pellare. Quamquam, utut est, res istiusmodi qui
mole metitur, nihilo plus videt, quam quod in sen-
sus incurrit: ac siquid est in mole pretii, ea mihi
litterarum pars a vobis commissa est, in qua non
difficile sit grandia volumina invenire. Nam cum
superioribus annis opinio increbuisse, Dialecticam es-
se fallendi artem ad alendas scholasticas pugnas,
fallendi autem via sint plane innumeræ; factum est,
ut non singuli modo homines, sed Collegia quoque
in idem institutum sacramento adacta, bibliothecas
potius, quam libros ederent. Ego cum a Cicerone
didicissem, disciplinam hanc nihil esse aliud, quam
viam & rationem veri inveniendi; recta autem ad
verum via una sit, eaque brevis; omnes ingenii
mei contentiones eo contuli, ut veterem simplicita-
tem ac brevitatem revocarem. Habuistis alias rei
hujus testimonium; & nisi me amor rerum mearum
fal-

fallis, etiam probastis. Nunc mihi visum est in literarii huius curriculi instauratione Dialecticæ naturam magis magisque aperire; & a gravi quadam ambiguitatis suspicione, in quam cum ab aliis, tum etiam a me ipso olim conjecta fuerat, liberare. Quod volui, num recte præstiterim, vestrum erit judicare; pronamque in hæc studia voluntatem, non verbis, sed re, ut profecto soletis, promovere.



ORATIO XV.

Habita ab Adolescente Scholastico ad instauranda
Artium Studia Gymnasii Patavini.

De Literarum & Artium felicitate.

A Nimadverti (NN.) omnes fere Oratores, qui superioribus annis in hunc ornatissimum locum ascenderunt, de artibus ac literis verba facturum, unam ex omnibus Medicinam summis, de qua dicerent, in eaque una versatos esse. Quasi vero dies hic non artibus omnibus recensendis institutus sit; aut Medicinæ nomine ipsa quoque Theologia, Mathesis, Philosophia, Humanitas denique ipsa, & omne literarum genus contineatur. Ego vero artibus ritu solemni proludere iussus, ita de universis dicam, ut nulla de silentio nostro queri possit; ita universas defendam, ut nullius causa prætermissa videatur. Placet enim mihi eorum criminationes refellere, qui antiquitatis admiratione capti, ac pæne limphati, sæculi hujus studia contemnunt; nihilque probant nisi *quæ terris semota sui;que temporibus defuncta vident*. Contendam igitur, illos injuria queri, qui de nostrorum studiorum conditione queruntur; & quantum in me erit, conabor ostendere, ad literarum & artium felicitatem nihil prorsus hac ætate desiderari. Id dum facio, tu primum fave, Præsul amplissime, qui totus ad facilitatem & benevolentiam compositus es; fave nos deinde,

inde, præstantissimi Civitatis hujus Moderatores, in quorum præsidio ac tutela non ego modo tantulus adolescens, sed universa hæc clarissimorum virorum Corona libentissime conquiescit. Tu quoque nobis adesto auspicio tuo, nobilissime Pro-Rector ac Syndice, & hoc primum die fac ut significes, qualis in posterum toto literario curriculum futurus sis.

Duo sunt, quæ passim queruntur gravissimi antiquitatis patroni, & esse jam nimio plus a veteri studiorum industria descitum; & in hac tamen artium ac literarum incuria non deesse homines, qui novo quodam usi critices studio, Scriptores ipsos vetustate verendos ac pœne sacros, sine ulla verecundia aggrediantur. Alterum illud cum sit minime verum, minime criminofum alterum; non erit, opinor, difficile utrumque refutare: eisque re tota literaria interdicere, qui privatas ignaviæ suæ causas in communem temporum conditionem stultissime conferunt. Quid enim deest hoc tempore homini, non invito prorsus Apolline nato, ad omne literarum genus vel in patria, vel non procul a patria facillime capessendum? Quam multa in omnibus fere urbibus ad liberalem juventutis institutionem constituta Collegia? Quot ubique artibus ac scientiis excolendis positæ Academiæ? Quam varia ad animi corporisque cultum inventa exercitationum genera? Ut jam non toto orbe, quemadmodum olim, magnis impensis ac laboribus conquirendi Magistri sint, sed contra Magistris innumeris ubique invitantibus, juvenus ipsa evocari debeat, rogari, coerceri. Numquid est igitur, cur heroi-

cæ

cæ illi Pythagoræ, aut Platonis ætati invidemus, quorum alter ut edoceretur, Ægyptum, Persiamque totam lustrare coactus est: alter & Tarentinos sapientes adire, & Locrenses, & Ægyptios, & alibi sane multos? An vero illa sui desiderium reliquerunt aurea, ut appellant, Romanorum tempora, ad quos nec pervenere literæ nisi sero, & cum pervenisse visæ sunt, in Atticam tamen ad eas comparandas migrare oportebat, aut Atticos homines domi alere: quod pleraque melius Græce, quam Latine, quædam etiam Græce tantum disputari posse crederentur? Illud ipsum civile jus, quod amplius poterat esse nuspian, quam ibi, unde jura toti terrarum orbi dabantur; ita tamen erat jejunum, ut se triduo jurisconsultum fieri posse, Tullius in causa Mureniana profiteretur. Nunc autem & facultatum omnium professores passim occurrunt, & facultates ipsæ amplissimæ sunt, & qui ad eas contendunt, tanto sunt ubique numero, ut Collegia quædam loci angustia laborare cœperint. Sed qui nobis veteres Athenas opponunt, aut Latium, auctoritate magis & fama tantorum nominum, quam re ipsa congrediuntur: cumque nos literarum atque artium initia eo libenter referamus, quid est cur illi incrementa longe maxima nostræ huic ætati gravate concedant? Ætatem porro nostram cum dico, ab Antoninorum usque imperio memoria repetens, sæcula statim apage prope duodecim; quibus accisæ literæ atque prostratæ, semel atque iterum efferre caput conatæ sunt, sed rursus labefactatæ miserrime contabuerunt. Eo velim mentem advertant severi nimium rerum

rerum nostrarum contemptores: tum vero ex fœdo illo musarum squalore ac situ judicent, utrum jure nos beatissimos hac in parte prædicemus. Nihil est, cur dissimulent, & iniquissimis Attilæ edictis Latinitatem primum exulare jussam, & litteras deinde omnes usque adeo fuisse probro, ut Amalasuntham Theodorici uxorem gravissime increparint Gothi Principes quod Athalaricum filium præceptoribus instituendum tradidisset. Putabant enim stolidissima capita, litterarum studio frangi ingenia hominum, & ad otium inclinari; eaque erat in primis egregiæ fortitudinis commendatio, si quis ne scribendi quidem artem tota vita didicisset. Hinc non barbari modo Reges Theodoricus Ostrothorum, Vithredus Cantix, & alii præterea multi fuere scribendi imperiti, sed & Chlodoveus, & senior Justinus, & ipse ille Carolus magnus, elegantiorum ceteroquin artium pro ea temporum calamitate instaurator. Ad Ecclesiam videlicet, tanquam ad asylum confugerant pulsæ undique litteræ: jamque obtinuerat consuetudo ad meliorem usque ætatem sermone scriptisque usurpata, ut litterati quicumque essent, Clerici appellarentur. Sed quam ibi quoque acceptæ non laute! cum argumento constet non uno, & Clericos bene multos, & Presbyteros quoque, addo etiam, quod calamitosissimum est, Episcopos aliquos, ne scribendi quidem artem tenuisse. O vos miseros, quicumque aut hæc ignoratis vulgata per omnes, aut cum ignorare nullo modo possitis, nescio qua tamen morum perversitate a veritatis confessione alienissimi, in præteritorum quotidie temporum laudatione versamini! Quis

nunc non dicam Princeps, non patricius, non civis paullo honestior, sed sutor, sed tonsor, sed agricola in sua illa fortuna aliquanto copiosior, qui non litterulas aliquas, seu faventibus musis, sive adversis, sibi comparet? Neque vero est, cur bella caussati majores nostri vix unquam intermissa, turpissimæ inscitæ causas in fata potius, quam in hominum segnitiam tarditatemque conjiciant: cum bellum intuiti, qui sæculi hujus initia fœdavit, facile intelligere possimus, nec plures umquam uno tempore ad arma procurrisse gentes; nec opibus odiisque majoribus in mutuam perniciem conspirasse; nec latius ad humani generis exitium protulisse luem; nec diutius in magna varietate fortunæ constantiam retinuisse. Quo tamen tempore utrum est aliquid tota Europa de veteri musarum disciplina remissum? Numquid aut sublata literarum studia, aut impedita, aut paullum retardata? Ne vivam, nisi per annos ferme quindecim, quibus acerbissimo incendio conflagravimus, & novæ institutæ sunt artium pulcherrimarum Academiæ, & veteres aliquæ jam intermortuæ rursus excitatæ: & innumera excusa volumina, & litteratorum commercium mirum in modum amplificatum. Tutæ enim littæræ innocentia sua, vel in castra ipsa libere excurrunt; ictoque jam olim cum armis fœdere, commune sibi cum illis numen, ut est a Græcis sapientissime confectum, Palladem constituerunt. Videtis, opinor, Auditores, quam nullum mihi negotium faceffant, qui litterarum gloriam tam longe repetunt.

Sed profecto major quædam cum iis futura pugna

gna est ac difficilior, qui duobus ante nostrum proxime sæculis bonarum artium laudem ita deferunt, ut partem vix minimam ad nos redundare patiantur. Floruit enim revera per eam ætatem & in Italia, & extra Italiam ingens quædam doctorum hominum copia, qui bonas artes ac litteras, illuvie situque obsitas, in pristinam lucem ac dignitatem vindicarunt. Sed quemadmodum iis solet contingere, qui per avia loca & abrupta, procul a luce hominumque commercio, iter susceperunt, ut cum denique in amœni alicujus ac belle ædificati prædioli conspectum exeunt, ad Hesperidum hortos repente se raptos existiment; tantamque animo capiant delectationem, ut cætera subinde, quæ invenerint, multo licet amœniora, non valde mirentur; ita erutz tunc primum ex tenebris suis litteræ adeo repentino splendore hominum oculos perstrinxerunt, ut nihil amplius ad eas accessisse diuturni temporis opera videatur: imo præclare secum agi aliquando putent, si usu ipso frequentissimo quasi protritæ, de parta olim gratia & exultatione non multum amittant. Cæterum quis non videt, quam nunc late diffusa Græca Latinaque eruditio, ab elegantioribus populis ad Sarmatas quoque ipsos, & Moschos pervenerit; quæ exiguis quondam terminis conclusa, non tam re ipsa, quam spe majoris progressus laudanda videbatur? Quod si non totam litterarum provinciam uno linguarum studio contineri velimus, ut profecto non continetur, quam sibi exiguam laudem, ac pœne nullam in ceteris facultatibus, ac disciplinis tempora illa pepererunt! Jacuere Philosophica studia,

jacuere Mathematica; nemoque unus inventus est ad sæculum usque decimum septimum, qui Philosophi dignus nomine, veterum Sectarum jugum excuteret, rerumque naturalium scientiam novis inventis illustraret. Resonabant undique Aristotelis nomina & Platonis, Hippocratis & Galeni, Euclidis & Archimedis; jamque sibi quisque vel Philosophi, vel Medici, vel Mathematici laudem sine controversia tribuebat, si, quæ illi tamquam ex tripode tradidissent, per quamdam quasi historiam memoriter didicisset. Primi vos scilicet exitistis, Galilæe in Italia, Bacone in Anglia, Helmonti in Belgio, Gassende in Gallia, qui antiquis repagulis tandem aliquando refractis, studiorum pomeria magno animo protulistis. Tum vero sublato veluti libertatis signo, Cartesius, Herveyus, Bartolinus, Borellius, Malpighius, & ubique innumeri, tanto conatu in barbatos illos scholarum Principes ac Dominos irruerunt, ut de antiquissima possessione prope dejecerint. Jam enim non singuli homines, sed magnæ quædam societates, studiorum ratione conjunctæ, meditando, investigando, experiundo, ita præsertim animalium Historiam, Anatomen, Mathesin, Meteorologiam emendarunt, auxerunt, ornarunt, ut non illæ quidem olim fuisse minores, sed omnino vix fuisse videantur. Pudeat ergo Capreolos, Toletos, Durandos, Jandunos, Picolomineos, & id genus alias ejus ætatis delicias, quibus piaculi loco fuit Aristotelicos terminos, tamquam Herculis columnas tantulum præterire: nec velint cum hominibus nostris, ad præclarissima quæque invenienda natis, in laudis contentionem descendere.

Sed

Sed nimium ajunt abuti nos inveniendi libertate: jamque honestissimam illam Philosophiæ propagandæ industriam in temerariam carpendi licentiam degenerasse. Hic enimvero, Auditores, necesse est de nostra levitate fateamur: si modo ex vitiosis nescio quibus triobolarium philosophorum conatibus quippiam in nos temporum conjunctione redundat. Sunt enim, ut in castris, ita in hac philosophandi palæstra gloriosi quidam milites, seu potius gladiatores, qui in magna virium infirmitate præstandi libidine ducti, laudatissimos totius antiquitatis viros injuriis strepituque laceſſunt; secumque ipsi diu sine hoste coluſtati, de parſa demum victoria, deque proſtigato Stagirita ſibi magnifice gratulantur. Stagiritam enim appellant pyrgopolinicæ iſti, quem virum, bone Deus! ita inquam appellant Ariſtoſtelem, quaſi unum de turba ſine nomine, cui nihil ſit gloriæ præter patriam. Ecce tibi homines, qui artem criticam in hujus ſæculi invidiam adduxere. Quorum vitio ſiquis cenſet ſtudium per ſe optimum ablegari oportere, cur non iſ artes ceteras, & bona generis humani univerſa ableganda putat, & procul removenda, quod aliquando abutentium malitia in hominum perniciem convertantur? Ceterum ſi res non aliunde, quam ex natura ſua judicandæ ſunt, nihil eſt, aut excogitari poteſt in toto hoc litterarum genere præſtantius, quam libera illa, eademque honeſtiſſima Scriptorum cenſura, quæ parum detorto a Græcis nomine Critice appellatur. Hanc ſi tollas, noctem quaſi aliquam veritati offundis; & atrum quoddam artibus ac literis chaos indu-

cis, quale fuisse ab initio orbis totius poetæ fabulantur. Hæc enim non una aliqua facultas est definitis regionibus circumscripta; sed late vagatur facultatum omnium vindex, ubique in provincia sua, ubique domina, quoties aut falsa de- tegere, aut obscura illustrare, aut expedire confusa necesse est. Huc tamquam ad Lydium lapidem Chronologia, Historia, Philosophia, literæ demum cujuscumque generis universæ revocari per omnes ætates consueverunt; tantumque crevere singulæ copia rerum, & fama celebritatis, quantum illis industriæ pro temporum varietate navarunt Critici homines. Præinde qui nos hoc nomine reprehendunt, conanturque ad ignavam rerum omnium patientiam adducere; ii videntur mihi literas oppugnare ipsas, & conditionibus premere multo durioribus, quam passas olim accepimus, cum barbarorum illuvione obrutæ diutissime conticuerunt: quod longe præstet, literas esse plane nullas, quam esse depravatas. Sed qui ad ætatis suæ mores sunt adeo delicati, nihil ne unquam apud Græcos offenderunt, nihil apud Latinos, quod criticam sapiat libertatem? Nunquamne Plato, boni viri, in Parmenidem, in Protagoram, in Zenonem censoriam exercet potestatem? Nunquam ne in Platonem ipsum Aristoteles, in Aristotelem Theophrastus, & ne singulos homines perenseam, Scholæ omnes in se mutuo? Itane igitur Aristophanes Grammaticus, & Aristarchus fuere meticulosi, itane Socrates ipse, vir siquis alius ea tempestate modestissimus, ut nihil umquam in Hesiodo, in Theognide, in Pindaro, in Homero castigare ausi sint? Me
mi-

miserum qui hæc tanta contentione disputo! quasi vero ullus in hac hominum coronalectissima possit esse dubitandi locus, quin Græcia per assiduas contentiones ad eam litterarum gloriam pervenerit, quæ posteros deinde omnes in sui admirationem pertraxit. At Romani minus certe contentiosi: minus tamen etiam sapientes, quod & sero admodum disciplinas susceperint, & cito intercidere passi sint. In sua tamen illa, qua usi fortuna sunt litterarum & artium, unum gentibus aliis opponunt Ciceronem, qui, qua plurimum valebat facultate, oratorum omnium ingenia viresque ad trutinam revocavit in pulcherrimo illo de claris Oratoribus libello; cum idem ipse tantus vir, Calvi Brutique censura non caruisset. Quod si ad ea sæcula descendamus, quæ vel ob Hetruscas literas egregie cultas, vel ob Græcas Latinasque reparatas, aureis proxima solent appellari, quanta nobis repente se se offert utilissimarum seges contentionum! Ecce tibi manus conferentes, hinc Politianus cum Scalla, Nizolius cum Majoragio, Sigonius cum Robortello: illinc Castelvetrius cum Caro, Guarinus cum Norelio, Tassus cum Salviato; tamque præterea inter se multi, quot fuere per ea tempora litterati: quorum si quis forte fortuna præsentē caruit adversario, omnem antiquitatem provocavit. Tantum enim abest, ut cordati scriptores pugnas detrectent, aut ægre recipiant, ut potius undique sibi adversarios comparent; seque non raro in se ipsos, quod maxime mirum est, fictis criminatibus arment. Adeo se tenuem adeptos gloriā existimant, si nulli videatur invidenda.

Quæ cum ita sint, etiamne eorum querelas pati possumus, qui nullius causæ patroni, in hujus ætatis criticos quotidie declamant! Cum enim illi nihil trutina dignum efferant, quique trutina castigantur, in hoc sibi etiam placeant; cur non aliquando ridiculam curam abiciunt, & suis potius, quam communibus incommodis remedia quærunt? Sed nolunt, mihi credite, præclaram illam inertię excusationem amittere, quod nihil sit tutum a criticorum injuriis. Verum injuriosi siqui sunt in aliorum scriptis judicandis, eos ego non Criticos, sed conviciatores appello: nec satis intelligo, quo jure in litteratorum numerum obrepere velint, si ea non sunt humanitate imbuti, quæ cum litteris adeo conjuncta est, ut ipsum litterarum studium, humanitatis studium nuncupetur. Solent enim homines liberaliter educati, bonisque artibus ac disciplinis instructi, non tam inter se opinionis contentione, quam mutuis officiis certare: fitque plerumque, ut hujusmodi controversiæ, magno partis utriusque consensu compositæ, vel veteres benevolentię necessitudines confirmant, vel novas constituent, ad litterarum & artium commoda magis magisque propaganda. Ne igitur sæculo nostro injusta de causâ bella moveant; discantque suum esse criticæ exercitationi campum, longe lateque patentem, præter obrectationes & sumptas de trivio contumelias. His qui delectatur, Momus quasi aliquis habetur inter Musas; cui si locus est in Republicæ literaria ullus, non ea conditione est, ut nobis ad imitandum proponatur; sed ut quid potissimum nam fugere debeamus, sua sceditate demonstret.

stret. Erit hoc etiam ad ætatis hujus felicitatem referendum, ut cum bonorum copia tanta sit, quanta olim certe numquam; mala ipsa, quæ rerum humanarum conditionem sequuntur, in usum aliquem bonum convertantur.

Sed ab intento jam cursu me temporis ratio revocat. Multo vero magis vos ipsi revocatis, quos magna cum animi mei læticia præsentis intueor, Clarissimi Professores; quorum singuli vel altissimæ scientiæ, vel artis egregiæ, vel mitioris facultatis, vel omnium simul facultatum & artium eruditione præditi, exemplo magis vestro, quam ullius possit oratio, importunos antiquitatis laudatores ad silentium compellit. Illud propterea est reliquum mihi unum, ut hos, qui me circumstant, adolescentes diligentissime moneam, ne tanta sæculi fortuna, ne parentum suorum cura; ne tot insignium Professorum industria, ne Principis Serenissimi liberalitate ad otium abutantur. Tanto enim major secutura ignavos poenitentia est, quanto circa se plures literatos viros, quocumque se verterint, aspicient.

E P I S T O L A

Præposita editioni primæ hujus Orationis.

AD ASSANIUM LASCARUM SYNDICUM.

Veteri instituto receptum est, ut orationes, quæ in hoc Patavino Gymnasio ad instauranda literarum & artium studia quotannis haberi solent, Syndicorum nomine & auspiciis in publicum emittantur.

tantur. Cur ita faciat orator quilibet, satis causse habet, quod ita semper fieri consuevit. Ego vero, cum ad te venio, si more veniam, & id facere me dicam, quod ceteri faciunt, injuriosus profecto sim & ingratus. Domi scilicet auspicia sunt; Græcus Græcum, Sodalis Sodalem appello: nec ego alium invenire poteram, in quo spes meas libentius collocarem; nec tu alium, a quo officia magis debita reposceres. Quod si in hujusmodi rebus nobilitas in primis spectari solet, qua potissimum homines Superum beneficio hominibus excellunt, quis est in tota Græcia, qui se Lascares præferre audeat? Nullum prope est Græcæ historiæ monumentum, in quo Lascares aliquis non celebretur, Genus late fuscum, gratia opibusque abundans, armis ac literis per omnem ætatem insigne. Hinc tu ad hujus Academiæ præsidium & ornamentum exiisti, unde omen & bene sperandi argumentum. Fac digna loco tam nobili: ut civitas hæc intelligat, Græcas terras evasisse barbaras, Græcos homines adhuc humanitatem retinere. Vale.

ORATIO XVI.

Habita ab Adolescente Scholastico ad instauranda
Studia Gymnasii Patavini.

*Quam facile est videri, tam difficile est
Litteratum esse.*

NON deerit fortasse (NN.) qui miretur & quærat, cur ego, qui anno superiore loci hujus majestatem magnopere veritus, publice dicendi munus ingenti trepidatione suscepi, nunc in idem periculum sponte veniam, artibus ac litteris more solemni prolusurus. Non venissem profecto, nisi me quorundam rumusculi excitassent, passim querentium, nimium me oratione illa sæculo nostro tribuisse; & ignavos adolescentes, quasi explicato supra fidem & veritatem domestico patrimonio, in ignavia confirmasse. Ego vero, Auditores, nihil minus cogitavi. Ac proinde rursus prodire volui; ut siquid forte commodorum nostrorum commemoratione aliquibus nocui, nunc incommoda ipsa memorando remedium adhibeam. Neque vero mihi telam retexere in animo est, aut ullo modo labefactare, quæ tanta animi corporisque contentione in æde hac tam augusta, testibus Superis vobisque, firmavi. Iterum ajo ac defendo, artium ac litterarum studia hoc sæculo vel maxime florere: sed idem tamen ostendere aggredior, esse in iis studiis pro magnarum rerum natura fallacias difficultatesque tantas, ut quam facile est litteratum videri, tam sit difficile revera litteratum esse. Ecce vobis capita

pita duo, quibus quasi terminis hodiernam hanc exercitationem circumscribam: ex quibus demum apparebit, quanta animi providentia studiosi adolescentes inanes & fucatas litteras vitare debeant, quanto labore veras & solidas consecrari. Exercitationis hujus nostræ testes atque auspices habemus illos ipsos, quos tam benevolos anno superiore experti sumus, hujus civitatis Præsides ac Moderatores ex omni sæculorum memoria optimos ac vigilantissimos. Habemus eundem ipsum Pro-Rectorem ac Syndicum ASSANIUM LASCARUM, cui in annum alterum ob insignem virtutem dignitas propagata est. Habemus eundem Professorum sapientissimorum Ordinem, qui jam nobis favere cœpit, & omnibus adolescentibus qui in hunc locum ascendunt favere solet. Itaque primo illo die, quo me vobis dedi, bene sperare volui: nunc ad experta beneficia, quasi-que obstrictam benevolentiam cum veniam, diei hujus felicitatem in tuto positam esse certo scio.

Cum præmia litteris ac disciplinis proposita sæculo nostro nec pauca sint nec exigua, minime mirum videri debet, esse homines etiam minus idoneos, qui ad illa contendant. Desiderium hoc sive laudis, sive commodi, sive utriusque, multis commune, fecit ut qui sua parere hoc in genere nequeunt, aliena ornent atque explicent: atque ita cum ipsis rerum auctoribus sociati & conjuncti eundem in locum veniant. Ajunt, fuisse primum viros sapientes, qui res præclaras in commune bonum invenirent; non defuisse subinde, qui inventas augerent & absolverent; denique co jam ventum esse, ut ad famam & gloriam

riam satis sit, has ipsas faciliore quadam via & ratione digestas atque illustratas posteris mandare. Hactenus tamen ferenda esset conditio litterarum & artium, nisi eorum fallaciis deterior fieret, qui omnem doctrinæ laudem in eo collocant, ut librorum inscriptiones syllabique addiscantur, & plurima Scriptorum nomina pro re nata recitentur. Hinc magno natu homines, quidvis potius quam litteras vita superiore consecrari, repente bibliotheca comparata, per argutulos quosdam controversiarum libellos, per epitornas, per elenchos, per ephemeridas inter magistros irrepunt, & prima subsellia occupant. Quam enim callide abdunt seque suasque merces, ubi insurgat aliquid gravius! quam nihil hæsitanter expromunt se totos, ubi in suam provinciam ventum esse animadvertant! Tam multos tibi de re proposita scriptores referunt & interpretes, tam belle narrant de tempore, de loco, de causis quibus editi libri sunt, oppugnati, explanati; tam prompte judicant, castigant, attendent; ut eos recens ex Apollineis Musarum ædibus demissos pene arbitreris. Quod si futile adeo litterarum genus non magna quadam calliditate tuerentur, omnia potius ferre parati, quam extra sua illa munimenta aperto loco pugnare; intelligeres profecto, quam nulli sint, quamque inepte in libros illos judices sedent & quæsitores, de quibus nihil fere norunt, nisi quod ex actis litterariis & compendiis didicerunt. Acta hæc ad memoriæ magis quam ingenii exercitationem comparata, etsi in homine artibus disciplinisque gravioribus prædito sperni minime debent, sola tamen si inveniantur,

tur, vix honestiori bibliopolæ ad mercaturam exercendam satis præsidii afferunt & ornamenti. Hinc facile patior, hujusmodi homines queri passim, nihil a nostris in lucem edi; ea demum esse valida ingenia, quæ typis quotidie aliquid committant; infirmos ac desides homunciones domesticis tenebris contineri. Scruta laudat Scrutarius: quique librorum titulis perdiscendis nominis sui celebritatem & famam definiunt, nihil mirum si, non quidem bonos, sed multos libros laudant, ex quibus pro suo instituto proficiant. Equidem fateor eum qui revera scit, non sibi uni scire debere; miseramque esse quorundam modestiam planeque ridiculam, qui se contemptu gloriæ famæque latere dicunt: sed tamen quodnam genus hoc impudentiæ est, omnes sine delectu ad cælum ferre rerum Scriptores; neque cogitare, quid quisque protulerit, sed quantum? Videte, quæso, a bonæ illius antiquitatis moribus ac studiis quantopere desciverimus. Cum enim olim nihil esset magis in viris doctis reprehendendum, quam scribendi cacoethes, tanta nunc rerum facta conversio est, ut vitii loco habeatur, *peritura parcere chartæ*. Imo didiceris quantumvis multa, multa docueris; sis licet & Philosophus, & Jurisperitus, & Orator, & Poeta, & quod lubet; attamen nisi magni voluminis atque adeo multorum voluminum auctor es, in postremis jaces. Recinitur tibi identidem illud: quid habes hoc anno a te editum? quæsti prostant opera tua? quo librario uteris, quo bibliopola? Perinde quasi non strenue quidem pugnasse egregia militis laus sit, sed sæpius in acie fuisse: & ille ipse Ther-
tes

tes suam sibi gloriæ partem, Trojano bello confecto, vindicaverit, quod in Græco exercitu una cum cæteris fortissimis viris decem annorum stipendia meruerit. Si hos demum intra fines doctrinæ fama continetur, frustra in hac aquula velis remisque laboramus. Quid enim potest esse facilius homini non invita Minerva nato, quam vel obsoleta quædam Scriptorum opera parum immutata pro suis venditare, vel adversaria extrudere, vel externa patrio, vel patria externo idiomate reddere? aut, si nihil hujusmodi in promptu est, ad illam confugere populi totius segetem, Epicedia, Genethliaca, Epithalamia, Panegyricos? Qui via hac ad litterarum gloriam eniti constituerunt, multum se profecisse putant, cum adhibitis in consilium amicis, de titulo deliberarunt. Votorum hæc summa est, si verba eupressis similia, plena, sonantia, pluribus ex linguis composita inveniant, quæ voluminis frontem impleant luculente. Neque enim quid opere toto præstare possint, solliciti sunt, sed quid initio statim polliceri debeant: polliceri autem sibi videntur egregie, si portenta verborum præfigant, quæ vix possint continenti spiritu singula pronuntiari. Jejunum est apud illos ac frigidum, *Demosthenis orationes, Plutarchi opera, Ovidii carmina*; multoque plus saperent probabiles isti ceteroquin auctores, si mimallonea διαγράμματα excogitassent, quibus accedentes statim oculos in admirationem perducerent. Usque adeone, Auditores sapientissimi, nativus litterarum vigor extabuit, ut ampullas has, & (quod Synesius ait) φλεγμαίνοντα ὀνόματα homines probent? castam vero
illam

illam dicendi scribendique simplicitatem aut vetustæ superstitionis, aut inficetæ siccitatis nomine contemnant? Vetera nimirum fastidio sunt; ac sicuti vestes, ita litteræ videntur nobis exolescere. Inhæres, inquiunt, religiose nimium Cicero-
ni illi tuo; nimius es in Terentio lætitando; totus Plauti quisquiliis oles: tu te erige, si vir es; pone leviculam istam veterum verborum curam; magnosque animos sumens, aude aliquid dignum re, dignum hac sæculi gravitate & sapientia. In dubio tanti negotii discrimine salva tamen res erit, nisi qua tibi societas sit cum Aristotele. Huic vero homini bellum ubique indictum est, magno quodam ejus flagitio, quod diu nimium discendi studiosis placuerit, eorumque animos & ingenia per sæcula multa prope solus ex Philosophis occupaverit. Ita facilis quædam ad nominis prædicationem & gratiam patefacta via est: ut siquis, cetera bardus, ausit in Philosophum facile principem impudenter garrere, statim incipiat esse aliquis, & ad publicam lucem emergat. Si auditoris judicium auferre satius esset, quam mereri, teterrimam hanc litterarum pestem a nobis non deprecarer; quod jamdiu fusa in plures late grassetur, plaususque & fortunæ bona, id est vulgi beatitatem, sæpissime pariat. Sed cum beatius mihi multo videatur soli placere Platoni, quam toti Atheniensi populo, quemadmodum Antimacho Clario recitanti contigit, quæso vos obtestorque, Juvenes ornatissimi, quibus me in hoc curriculo fortuna conjunxit, quæso inquam, ut sanioribus studiis incensi, non ad levem paucorum dierum laudem, sed ad immor-
tali-

talitatem contendatis. Hoc siquidem fatuæ plebis studium clamoresque ut excitare facile est, ita quod nullo satis firmo nitantur fundamento, vel statim evanescunt, vel tota ad summum vita perdurant. Ipsa hæc mehercule facilitas rei pretium imminuit; semperque cordati viri per difficilia & abrupta vadere ad gloriam maluerunt, quam una cum populo planis tritisque itineribus ferri, ad asperiora quælibet trepidantes. Quæ cum ita sint, quid est quo ego vehementius possim lectissimæ hujus juventutis animos ad litteras artesque inflammare dicendo, quam si ita ostendero auctas hoc tempore & exaggeratas, ut revera litteratum esse tam difficile sit, quam est facile videri?

Profecto si alibi dicerem, quam Patavii, magnum quoddam onus ac prope immensum suscepissem; cui vel numquam facerem satis, vel tum demum facerem, cum vetera memoria repetens novisque conjungens, universam artium ac disciplinarum provinciam longa oratione perlustrassem. Nunc autem ibi dico, quo tamquam in Musarum templum rerum pulcherrimarum professores ac magistri ex omni Europa confluxere, quorum singuli artes minimum singulas, non nemo plures, universi autem simul omnia rerum genera, quæ certa aliqua regula ac ratione constant, & illam ipsam *ἐγκυκλοπαιδείαν*, quantumvis magnitudine rerum, copia, & varietate diffusam, complectuntur. Hos ego testes appello, num Historiæ, num Geographiæ, num Theologiæ, num Juris Legumque cognitio latius ætate alia patuerit: num Medicæ facultatis, num Physicæ, num Mathematicæ studia, vel auctorum, vel interpre-

T

tum,

tum, vel sectarum numero varia magis fuerint ac multiplicia. Quænam non dicam civitas, vel paullo honestior academia, sed qui ludus, quinam homo est, vel homini similis, qui malit in publica hac scriptitandi libertate alterius sectator esse, quam nova excogitando familiam ducere etiam per inania, modo sua? Nullus jam certus auctor, nullæ hoc tempore certæ leges, fines denique nulli discendi studiosis præstituti, quo sibi ad extremum perveniendum intelligant, difficili aliquo, definito tamen, confecto itinere. Alibi obstreperitur Aristoteli; Democrito alibi; alibi Epicuro: cariola nonnulli Etruscorum rudera movent; in recentibus quidam curiose exultant; nec desunt qui nihil probantes, Socratico more in omnes promiscue insurgunt, omnemque rursus personam suscipere parati, nullo sibi vel tempore, vel loco satis constant. Ipsum hoc oratorium artificium quam est, bone Deus, Criticorum omnium disputationibus excussum; opinionum varietate distractum; formis ac præceptis infinite auctum! Quodque mirabilius videri debet, non Græce modo, aut Latine dicentibus & Asiaticæ, & Rhodiæ, & Atticæ, & Laconicæ pro Rhetorum libidine præscriptæ formæ; sed ipsa Italica lingua, quam in omnibus vitæ negotiis usurpamus, tam multis legibus illigatur, ut quæ olim videbantur terræ patriæ beneficia, labore comparare debeamus. Certe mecum ipse dum reputo, Græcos Poetas in altissimo jugo Deas litterarum præfides collocasse, quo esset hominibus per invia & confragosa omnia multis laboribus perveniendum, videntur illi mihi aut fuisse delicati nimium,

mium, aut suo illo divino furore, ut appellant, in futuras ætates prospexisse. Præclare enim cum illis agebatur, qui nullo linguarum studio retardati, statim se ad rerum cognitionem conferebant; in hac autem ipsa, angustis terminis conclusa, spe citius eminebant. Nobis primum & Latinæ & Græcæ litteræ diligenter tractandæ; tum vero tardius multo, quam sit pro artium difficultate satis, ad discendum aggredimur: vixque ullo licet esse numero, antequam & singulas Philosophorum familias cognoverimus; & egerimus cum Mathematicis; & Jurisperitos audierimus; & Historicis, & Oratoribus, & Poetis familiariter usi simus. Ut propterea quæ olim singula septenos Græciæ homines, totius antiquitatis principes, ad famam sapientiæ sempiternam abunde ornarunt, ea omnia simul collecta ne sapientiæ quidem studiosum nostris hisce temporibus difficilimis satis ornent atque instruant. Quid ita? Nimirum nascentibus tunc primum artibus sua vel mediocribus ingeniis laus erat: nunc autem ad justam ætatem & magnitudinem cum pervenerint, nemo suæ consulit gloriæ satis, nisi Herculi, ut ajunt, clavam extorqueat, & prodigiis similia faciat. Ita prorsus cum primum institui cœptæ sunt navigationes, Jason ceterique Argonautæ exiguum mare mensi, cælum ipsum attigisse visi sunt, navisque illa luculenta, tamquam res divina, multorum commentis inter sidera est collocata; nunc vero vix paucis noti sunt Sebastianus Decanus, Franciscus Drake, Thomas Candiſchius, qui tamen per maria omnia fœda monstris, prædonibus infesta, scopulis ac tempestati-

bus formidolosa totum hunc orbem quaquaversus obiere. Etenim principia rerum admirationem sibi insolentia & novitate conciliant; quæ aliquo exemplo sunt, usu ipso & consuetudine plerumque vilescunt. Quid vero si ad hæc hominibus non valde copiosis maxima omnium accedat difficultas, librorum & præceptorum inopia? Quis non videt amplificatis adeo bonorum promiscue malorumque scriptorum licentia litteris ac disciplinis, nec sine ingenti bibliotheca tentari quippiam cum laude posse, nec pericissimo sine duce feliciter urgeri opus, & ad exitum duci? Hæc autem nisi sumptibus immensis, gratia, & auctoritate non paranda, quam longe mediocritatem hanc nostram privatamque fortunam superant? scilicet hoc unum deerat temporibus asperis, ut cum hominum externa bona pecuniæ imperio subjiciantur universa, animus quoque ipse, animoque insitæ facultates ab ipsa penderent: sicque miserrime fieret ad artium & litterarum detrimentum, ut quemadmodum pecuniosi homines laboris tædio in scholis sedere nolunt, ita tenuiores multarum rerum inopia impediti arcerentur. Ego equidem, nisi nobis divinitus contigisset, Adolescentes, ejus Reipublicæ auspiciis dare operam litteris, quæ nihil patiatur deesse bene conantibus, ad alia vos impellerem, unde certus aliquis laborum fructus existeret. Sed quoniam nihil est in hac urbe ad doctrinam & eruditionem cuiquam desiderandum, nolite per vestram fidem Principis liberalissimi voluntati segnius respondere. Est sane ratio omnis litterarum ardua, salebrosa, pene ultra modum diffusa: magnum quid-

quiddam est litterati nomen, splendidum, augmentum; vixque uni aut alteri singulis ætatibus concessum: sed tamen reputate, nihil esse experietis ingeniis tam invium, quo nequeant acri adhibito conatu operaque diuturna tandem aliquando pervenire. Dixi.

EPISTOLA

Præposita editioni primæ hujus Orationis.

AD ASSANIUM LASCARUM SYNDICUM.

UTrumque nostrum incredibili modo consentit alterum. Juvat enim iisdem te affari verbis, quibus Horatius Mecenatem suum. Tu iterum Syndicus, ego iterum Orator; eademque fata nos hoc anno conjungunt, quæ superiore conjunxerunt. Sed in negotio valde simili dissimiles causæ sunt. Tibi enim idem honor in annum alterum iccirco propagatus est, quod experta virtus expectationem fallere non possit: ego rursus in eandem arenam vocor, ut priore periculo monitus tolerabile aliquid enitar. Itaque tuum nomen in tuto est; meum vero majori cuidam discrimini obicitur. Illud me tamen erigit & solatur, quod infirma firmis sociata facile consistant; nec possit non probari, qui prodit in medium auspicio bono. Tu igitur me tegere debes; & efficere, ut omnes intelligant, publicarum exercitationum præfides nescio quid numinis habere, & exercitationes ipsas pro mortalium conditione fortunare. Ego, quantum quidem in me erit, mihi non deero, ausus etiam supra vires, quod bis in eodem peccanti nulla venia speranda sit. Vale.

T 3

ORA.

ORATIO XVII.

Habita ab Adolescente Scholastico ad instauranda
Jurisprudentiæ Studia Gymnasii Patavini.

De Lege Regia.

Cum publicæ lucis experimentum (NN.) tam difficile sit ac periculosum, quam quod maxime, mirum videri profecto debet, inveniri quotannis, adolescentes famæ securos, qui hujus auctoritatem loci non reformident. Id ea fortasse de causa fit, quod qui de Jurisprudentia, de Medicina, de Philosophia dicturi accedunt, nihil aliud sibi propositum putant, quam ut harum disciplinarum naturam in genere toto patefaciant: cujus quidem rei tanta copia est, ut aliena describere volenti, sibi que arrogare, magis laborandum sit, quid omittat, quam quid sumat. Ego præter meam & multorum expectationem in hanc provinciam vocatus, statim cogitare cœpi, quomodo ex campo tam vasto exire possem; meque certis terminis concludere, quibus animus veluti compressus vires colligeret, ac de suo aliquid niteretur. Non tenebo vos pluribus, Legem illam, quæ *Regia* dicitur, prima hac studiorum nostrorum exercitatione, ad auspiciū comparata, infirmare conabor, ac veluti surculum loco non suo per dolum & fraudem insitum excindere. Non ignoro, quantum laboris ac periculi suscipiam, quoties reputo, Legem hanc viris longe omnium
con-

consultissimis fuisse probatam, & tanquam aureum antiquitatis monumentum ad firmandam Imperatoriam Majestatem in Romano Jure collocatam: attamen rogo vos atque obtestor, ne magnorum Scriptorum nomine capti, contra adolescentem, causa nondum audita, pronuncietis. Primum enim nihil prohibet, quin magni Scriptores magnis Scriptoribus repugnent; deinde fieri potest, ut illi ipsi, qui minus doctrina valent, in ancipiti controversia eam partem suscipiant, quam viri docti æstu quodam ingenii rapti deseruerunt. Adeste animis de re non levi judicaturi; meque, sicubi defecero, benevolentia & humanitate sustinete.

Sed quia video, qui Romani Juris periti non sunt, eos non satis intelligere, quid *Regiæ legis* nomine significetur, & quo spectet tota hæc controversia, initio rem totam aperiam. Cum Tribonianus digestionem illam suam, vetustis Legibus & Romanæ civitati minime commoda, multa turbasset, quæ ad legitimæ potestatis discrimina pertinebant; mentionem injecit legis cujusdam antiquæ, quæ *Regia* nuncuparetur, quæque omne Jus omnemque Populi Romani potestatem in Imperatorem transferret. Lege hac antiqua roboratum putat Ulpiani responsum, per quod (nisi in hoc ipso aliquid fraudis latet) summum rerum omnium arbitrium Imperatori recens creato tribuebatur; quo fiebat, ut & βασιλεὺς a Græcis diceretur, & regio more populos civitatesque gubernaret. Atque ita quidem tales tantasque tenebras Jurisconsultis atque Interpretibus offudit, ut existimaverint Rempublicam omnem ejusque auctori-

tatem ab Augusti dominatu intercidisse, & in quandam Regni formam transisse. Id nos scilicet negamus, contendentes nec legem *Regiam* fuisse antiquis temporibus ullam, nec per illud Senatus consultum, quod hoc nomine fertur, *regiam* auctoritatem Imperatoribus fuisse collatam.

Quod antequam facio, peto a vobis hanc veniam, ut liceat mihi, ducibus magnis viris, de Triboniani fide dubitare, qui ut erat ad adulandum projectus, nulla commenta omittebat, quibus posset Imperatoriam potestatem amplificare. Age igitur videamus primo loco, num probabile sit, post Reges exactos latam fuisse legem, quæ *Regia* nuncuparetur. Qui ita sibi persuadeat, oportet illum in moribus atque institutis Romanæ civitatis rudem ac peregrinum esse. Ex quo populus ille, præter modum libertatis cupidus, Tarquinius eiecit, ita cavit in minimis quoque rebus, ne quid sibi regium vel re vel nomine obtruderetur, ut hac in parte abiisse ad extrema visus sit. Siquid umquam crudele patratum ab eo populo est, ceteroquin ad humanitatem mirifice comparato, in eos duntaxat patratum est, qui aliquam Regii nominis suspicionem movissent. Suspicio hæc prodidit homines de Republica optime meritos, Gracchos, Melios, Capitolinos, atque insuper alios, quos non est opus commemorare: quique eos in populi invidiam adduxerunt, non aliud egerunt, quam Reges appellarunt; scilicet quod nimiam quandam præstandi cupiditatem præferrent, quæ fortasse in civitate æquo jure vivente ferenda non erat. Neque vero cum primum Imperatores libertatem labefecerunt, ul-

lius

lius nominis, aut potestatis Regiæ mentionem facere ausi sunt; rati populum Romanum iniqua omnia pati posse vel infra servilem conditionem, regiam vocem pati non posse. Quid existimatis in causa fuisse, ut illi ipsi, qui maximis beneficiis, propinquitate, familiaritate Julio Cæsari conjuncti erant, ei necem molirentur, nisi quod imprudentia quadam M. Antonii Rex fuerat in Luperilibus salutatus? Etsi enim Cæsar & Regium nomen, & Regis insignia publice repulerat, attamen tantum illi invidiæ ex hac ipsa ludicra salutatione conflatum est, ut multi statim in illum exarserint, & quavis conditione perire voluerint. Post exempla hæc persuadere nobis conabitur Tribonianus, legem latam de Imperatoris auctoritate fuisse, quæ *Regia* nuncuparetur? Nisi forte putat, legem, quæ sub Regibus fuisset, a populo Romano esse renovatam, & ad Imperatorium dominatum translata. Mitto, hoc ipsum odiosum esse, sicuti cetera quæ hætenus dixi, jura illa Regia convalescere, quæ Regibus exactis penitus abrogata sunt, magnisque contentionibus ex publicis tabulis & ex omni memoria sublata; mitto inquam odiosum esse, ac proinde minus credibile: illud quæro, qua ratione, aut quo monumento probetur, & fuisse hanc legem, & esse renovatam. Si verbo ais, verbo nego. Mirum est enim, Auditores, quomodo illi qui legem *Regiam* nobis venditare conantur, nihil de loco, nihil de tempore, nihil de auctoribus hujus legis dicant; sed tanquam levem quandam Juris particulam, quæ ad privata negotia componenda pertineat, eam dicis causa, & aliud a

gentes in medium proferant. Qui hoc quo spectet non intelligit, aut nihil intelligit, aut certe non is est, qui ad Scriptorum fraudes cognoscendas accedere possit. Sed videte quam liberaliter agere velim. Concedo legem *Regiam* fuisse, si Imperatores hoc jure vivebant, & imperabant. Et ne verbis laudamus, habete quid sit *lex Regia*. Eam legem hoc nomine significari puto, quæ uni homini supremum rerum omnium & perpetuum arbitrium tradit; quæ illum vitæ & necis, belli & pacis sine provocatione dominum facit; quæ omnibus civitatis legibus & oneribus liberat; quæ denique unum statuit, a cujus nutu universi ac singuli pendeant. Nunc ipsi vos, qui Romanam historiam tenetis, cum animis vestris reputate, num Imperatores hac lege uterentur; ex quibus Adrianus quidem palam edixit, cum imperium caperet, se Rempublicam ita gesturum, ut sciret populi rem esse, non propriam; Alexander vero dispensatorem se publicum profitebatur. Neque enim Principis nomen, quod Imperatori tribuebatur, *Regium* aliquid significat, cum ipsa quoque florente Republica, quem dignissimum Senatorem Censor judicasset, is Princeps Senatus diceretur. Itaque cum Tiberius agebat, se esse Dominum servorum, Imperatorem militum, & Principem ceterorum, nihilo plus sibi potestatis tribuebat, quam quod liberæ civitatis Capiti debebatur. Non sum nescius & Tiberium ipsum, & Imperatores reliquos, impotentia dominandi abreptos, tantum sibi licere voluisse, quantum poterant: sed hoc quidem tantum abest, ut ulla lege facerent, ut contra, quod ita facerent, in

in magno civitatis odio & perpetua quadam capitis dimicatione versati sint; donec populus consuetudine malorum fractus, & veteris libertatis plane oblitus iniquam dominationem pati didicit. At enim superest adhuc inter vetustatis reliquias Senatus Consultum, ex quo apparet infinitam quandam potestatem Vespasiano tributam fuisse: nec vero difficile est conjicere, ad cujusque principatum constituendum tale aliquid fuisse usurpatum. Videte, Auditores, quam varia sint hominum judicia. Ex quo monumento adversarii argumenta ducunt ad legem *Regiam* confirmandam, ego hoc maxime utor ad eam evertendam. Nam si Princeps quilibet indiget Senatus Consulto, ut possit in Civitate jure dominari, nulla igitur unquam lex *Regia* lata est; quæ quidem si lata esset, Senatus populique auctoritas exaruisset. Sed ex ipso Senatus Consulto cognoscamus, quænam sit tanta hæc potestas, quæ Imperatori confertur. Primum permittitur illi, ut possit *Senatum habere ac remittere, relationem ac Senatus Consulta facere*. Hic Reipublicæ Caput video, Regem & Dominum non video. Deinde statuitur, *rationem habendam esse illorum extra ordinem, quos in petendis honoribus Imperator Senatui populoque Romano commendaverit, quibusque suffragationem suam dederit*. Videtur ne vobis *Regia* potestas in hac commendatione esse? Si verba hæc serio recteque perpendimus, nihil significant ejusmodi, ut Senatus populusque Romanus abdicasse sibi suam auctoritatem dici debeat, & in alium transfuisse, a cujus voluntate tanquam a lege unice pendeat. Additur, *ut liceat Imperatori pomerii fines*

fines proferre, cum e Republica censebit. An non idem in summa Civitatis libertate multis civibus permissum est? Verum ibi maximum rei totius momentum est, ubi habetur Imperatorem solutum esse legibus. Hic vero auxilium peto ab incomparabili viro Joanne Vincentio Gravina, qui difficultatem hanc in omnes partes versavit, ac penitus sustulit. Dicam igitur illa, quæ tantus hic Jurisconsultus dixit; sed ille more suo, hoc est elegantissime, ego more meo, hoc est exiliter. Primum igitur solutum esse legibus, si Dioni credimus lib. 53. nihil est aliud quam liberum esse a pœnis, quæ in legum sanctionibus continentur. Quamvis enim nihil tam proprium Imperii sit, quam legibus vivere; ut scribit Alexander in leg. 3. Cod. t. 23. de Testam. attamen si Imperator deliquerit, non punitur. Præterea ut ut concedamus, Imperatorem legum vinculis fuisse solutum, non tamen solutus est vinculis legum omnium, sed certarum duntaxat, quibus adjectum fuerat, ne Princeps teneretur. Hujusmodi erant leges conjugales, caducariæ, & aliæ id genus, quæ solemnia quædam juris continebant, quibus obstringi dignitatem tantam non deceret. Ceterum nemini, qui in Romano jure parumper versatus sit, ignotum esse potest, teneri Principem lege Falcidia, & multis præterea testamentariis: ut proinde Augustus non ausus sit, aliquid supra legitimam portionem Livix uxori relinquere, nisi venia legis Voconix a Senatu petita. Nunc reputate, quanti valeat lex ista Regia, quæ Imperatorem aliis legibus liberat, aliis non item. Atque ego tam multis verbis eminus

tela

tela jeci. Congrediamur. Si lege *Regia* Imperatoris munus & auctoritas nitebatur, cur Imperatores singuli, vel ii ipsi qui superbissimi erant, & in omne crudelitatis genus profligati; cur, inquam, & Consulatus sumebant, & Pontificatum maximum, & Censuram, & Tribunitiam potestatem? Cur Augustus proficetur in monumento Ancyrano, se *Patriciorum numerum auxisse jussu populi & Senatus, cum esset Consul V. & Senatum ter legisse, & in Consulatu VI. Censum populi Romani M. Agrippa Collega egisse?* Concedo enim, interdum Imperatores tanta potestate civitatem rexisse, quanta prope reges solent: sed tamen ajo, non per legem aliquam *Regiam* id sibi tribuisse, sed per potestates populares ac Senatorias, quas sumebant, & per temporum vices repetebant. Nolim videri justo longior, præsertim apud homines Juris legumque peritissimos, quibus nihil est hujusmodi ad intelligendum difficile. Habetis industriæ nostræ specimen, ut hinc cognoscere possitis, quam viam & rationem in Jurisprudentiæ studio teneamus. Reliquum est, ut rogem vos atque obtester, ne contendentibus nobis ductu vestro & sapientia deesse velitis. Non deerit certe Eminentissimus hujus Civitatis Episcopus, a quo de more ante omnes auspicia petimus, ut appareat quantopere litteræ cum religione conjungi debeant. Non deerunt Patavini populi Præsides ac Moderatores vigilantissimi, qui in hoc ipso sui Regiminis initio multis rebus demonstrarunt, se quidem totam Civitatem benefaciendi voluntate complecti; attamen partem hanc singulari quodam studio prosequi, &

tan-

tanquam filiulam deosculari. Non deerit postremo loco generosi animi adolescens, *Pro-Rector ac Syndicus*, qui munus hoc natura sua tam splendidum, quam is a quo sustinetur, moribus, sedulitate, liberalitate ornare cœpit: unde liceat toti huic studiorum curriculo bene ominari. Dixi.

EPISTOLA

Præposita editioni primæ hujus Orationis.

AD SYNDICUM.

Cum Orationem hanc, quæ publici juris sit, ad te potissimum assero, more & consuetudine facio: sed tamen lætor, morem hunc cum mea erga te voluntate studioque consentire. Nam si mihi integrum esset, unum aliquem ex his omnibus nobilissimis adolescentibus, qui in Patavina Academia vivunt, appellare, & auspicem rei hujus constituere, tu certe is esses, quamvis tanto honore ac dignitate careres. Neque enim admirror Syndici nomen, quantumvis illustre: sed indoles ista tua ad omnem virtutem & humanitatem conformata, & me & illos omnes, qui paullo altius res spectant, vehementer capit, tenet, obstrictum habet. Cetera hominis bona possunt esse a fortuna, quæ temeritate regitur, hoc unum hominis ipsius bonum est. Mature cœpisti veræ laudi operam dare; & siquidem ita perges, ut procul dubio perges, videbis nomen tuum, non jam istiusmodi lucubrationculis, sed maximis & gravissimis litterarum monumentis, ad hominum commendationem, & posteritatis memoriam propagatum. Vale.

ORA-

ORATIO XVIII.

Habita ab Adolescente Scholastico pro Artium
instauratione Gymnasii Patavini.

*Juniorum Philosophorum inventa a Græcis
fontibus derivari.*

Si cur forte mirum videtur (NN.) cur ego,
qui hujus discrimen loci, in quod me anno
superiore Jurisprudentia conjecerat, vix supera-
vi, rursus fortunam tentare audeam Artibus pro-
lufurus, is quæso reputet in humana vita quæ-
dam contingere, quorum causa vel reddi omni-
no non possit, vel publice reddi non debeat. Id
pro certo habete, mihi quidem primi illius pe-
riculi nondum oblito alterum hoc supervenisse;
quod nisi libenter & animose subeam, illorum
consilio injuriam facere videar, quibus rerum no-
strarum cura Principis judicio commissa est. At-
que, ut ingenue fatear, quod res est, jamdiu
cupiebam in eum locum adduci, ut de philoso-
phicis studiis publice dicerem; quod concoquere
nequeam, esse tam multos hac tempestate, qui
veterem Græcorum nostrorum philosophandi ra-
tionem contemnant, seque junioribus nescio qui-
bus, non dicam in disciplinam, sed in obsequium
& adulationem tradant. Ego equidem, quantum
ætas hæc mea ferre potest, in istorum provin-
cias excurri, qui nostræ infesti sunt: nova re-
bus nomina indita, experimenta passim jactata,
ma-

machinæ, tabulæ geometricæ, omnia in spectaculum & admirationem composita. Neque vero diffiteor, in his ipsis quædam latere ingeniose inventa, quorum accessione philosophicum studium crescat, & novam quamdam figuram induat: veruntamen ita mihi persuadeo, siquis velit ex animo nobiscum agere, cum facile concessurum, rivos istiusmodi a Græcis fontibus derivari. Id si ostendero, quemadmodum spero, nolo vos iccirco, adolescentes optimi, a novis Philosophis desiscere, sed eos cum veteribus consociare: quæ societate fiet, ut undique muniti adversus pericula omnia in litterariis exercitationibus stare possitis.

Veteris philosophiæ nomine non prisca quælibet Græcorum dogmata intelligo, quæ jamdiu coli desierunt, Pythagorica, Platonica, Stoica, Epicurea, sed doctrinam illam multorum sæculorum usu comprobata, & in dies magis per obstantia florentem, quam ab auctore Aristotelem, a schola Peripateticam nuncuparunt. Hanc ego ajo ejusmodi esse, ut si teneatur, ceteræ etiam, quæ novæ dicuntur, facile parari possint; & in unum quoddam sapientiæ genus omnes omnino coerceri. Id vero non iccirco tantum dico, quod Peripateticum philosophandi genus subtile & acutum, ita hominum ingenia patefaciat, explicet, exaquet, ut omnia, quæ deinceps aggrediuntur, plana & expedita judicent; sed eo præsertim, quod pleraque omnia recentium philosophorum inventa ab illo prodierunt, aut cum illo consentiunt, aut ad illud sine cura ingenti referri possunt. Et quidem cum universa philosophia in tres partes distributa sit, ut est apud Ciceronem in libro

bro de Oratore primo, *in natura obscuritatem, in diffidendi subtilitatem, in vitam atque mores*, hoc est in Physicam, Logicam, & Moralem, lubet ne per singulas ire, ut has corniculas denudemus? Agedum a moribus exordiamur, quæ una olim habita est philosophia. Quid nobis tam divinum afferunt homines isti de virtutibus ac vitiis, de animi tranquillitate & perturbatione, de vera & falsa felicitate, quod non multo ante docuerit Aristoteles in libris ad Eudemum, in magnis moralibus, in Ethicis ad Nicomachum? Equidem non inficior, Sacrarum Scripturarum lumine multa nobis ad mores componendos innotuisse, quæ frustra quærantur in schola Peripatetica: veruntamen si quæ philosophi ante Aristotelem omnes, Pythagoras, Socrates, Plato, si quæ ceteri post ipsum litteris tradiderunt, non theologica, sed philosophica trutina examinemus, hunc unum vidisse omnia fateri cogimur; quæ vix singula singuli, & quæcumque ipsa per se capere potest philosophia. Nunc qui se plus sapere credunt, virtutesque ab Aristotele positas accusant, aut ordinem, aut officia mutant, non illi quidem suo, sed verbi divini lumine ducuntur; nec inde oculos avertunt, quin volentes nolentes in nostram incidant cogitata. Audivi aliquos ita acerbè animatos in Aristotelem, ut cum hæc negare non possent, eo devenirent, ut Ethicos libros ad alium auctorem vindicarent. Sed hoc vetus crimen est, & a Græcis Scriptoribus, & a Latinis abunde dilutum. Regnet igitur hac in parte late dominus, quam ne hostes quidem ipsi valde petunt in ceteris occupati.

Ad Logicam veniamus. Sed quid Logicam dico? *Artem cogitandi* hoc tempore appellant; ut Peripateticis nomen quoque ipsum vetus ac pene sacrum extorqueant. Verum bene habet, quod præter nomina & ordinem vix quippiam mutant. Nisi forte illi magnam rerum mutationem inducunt, qui decem Aristotelis Categorias numero minore concludunt; aut qui hominis cognitionem a sensu incipere negent, innatasque ideas propugnant. Interim tamen easdem cogitationes, eisdemque cogitationis modos admittunt; nullam novam syllogismi formam, nullam veritatis notam de suo penu producunt; quidquid Aristoteles de simplicibus, ac compositis notionibus, quidquid de enunciatione, de argumentatione, de Analyticis, de Topicis, de Sophisticis pronunciat, ratum habent. Ergo valde homini Peripatetico laborandum est, ut Dialecticas juniorum meditationes comprehendat; non est ingenii nostri ad hos elegantissimos libellos accedere, quos Aristoteli opponunt; sudandum & algendum, ut antiquis studiis oblitteratis, nos quoque cum Gallis, & Batavis recte cogitare incipiamus. Enimvero si tota horum hominum industria his finibus contineretur, nihil omnino causæ esset, cur se à nobis alienos putarent, & nova sibi subsellia construerent; sed nequid dissimulem, hanc nobis ultro provinciam concedunt, seque in Physica jactant, quæ tertia est philosophiæ pars initio proposita.

Haud equidem ita desipio, ut inficiari velim, multa juniores ex ultima antiquitate reparasse, multa etiam de novo reperisse, quæ vel Peripateti-

teticis absunt, vel desunt, vel contraria sunt; at-
tamen id peto, ut mihi quoque pro sua humani-
tate non gravate concedant, ea quæ cum disci-
plina nostra non pugnant, conjungi posse; quæ
pugnant, explicari, & in concordiam adduci. Non
omnia tam brevi tempore complecti possum; sed
tamen si capita rerum tantisper attigero, nullo
negotio patefaciam, dissidia fere omnia verborum
esse. Cur enim nostra principia *materiam*, *for-
mam*, & *privationem* tantopere exagitant? An non
illi quoque, si ullam rerum naturalium mutatio-
nem admittunt, idem re affirmant, tamen si ver-
bo negent? Nulla certe mutatio fieri potest, ni-
si sit terminus a quo res mutanda recedat, qui
a nobis dicitur *privatio*; terminus ad quem pro-
cedat, qui a nobis dicitur *forma*; res ipsa deni-
que recedendo, & procedendo mutata, quæ a no-
bis dicitur *materia*. Quamquam cum *privationem*
dicit Aristoteles, eo dicit ut *negationem* excludat;
quod quidem in generatione quam sit necessa-
rium, illi satis intelligunt, qui hujus Philosophi
Logicam non ignorant. Aliter explicari terminus
ille voce una non poterat. At enim Peripatetica
materia *neque quid est, neque quale, neque quan-
tum*. Ita; quia nulla res definita est, sed unde
res omnes. Atqui ne tuæ quidem particulæ, o
Gassende, neque trina Cartesii materia aut homo
est, aut equus, aut lapis, sed aliquid unde
omnia. Pergite porro. Peripatetici putant formas
esse substantias. Grave enimvero crimen. At si
placet, esse accidentia, adite per vestram fidem
tertiam & sexagesimam particulam libri primi
Physicorum, ubi omnes omnino motus Aristote-
les

les numerans, quæcumque sunt, aut figuratione fieri, dicit, ut statua ex ære; aut accessione, ut res aucta; aut detractiōe, ut ex lapide Mercurius; aut compositione, ut Domus; aut immutatione, ut quorum materia graves affectiones subit, & quodammodo variatur. Numquid est aliquid hoc loco præter accidentia? Numqua substantiæ genitiæ mentio? Nulla enimvero, nulla. Hinc facile turbas illas querelasque sedabimus, quæ in nos excitari solent, quod novas formas quotidie, veteribus pereuntibus, nasci dicamus, ortumque & interitum perpetua vicissitudine sibi succedere; quasi vero tritum illud vulgatumque ignoremus, *gigni de nihilo nihil, in nihilum nil posse reverti*. Sive enim forma hæc substantia nuncupetur, sive natura, sive essentia, vocabula quidem ipsa varia sunt, sed nihil omnino significant, quod cum superiori Aristotelis sententia pugnet, & ab illa materiæ modificatione, quæ per hodiernas scholas resonat, diversum sit. Id nempe ætatis hujus nostræ proprium est, ut vocibus ac nominibus diligentius studeat: priscei homines in rebus occupatissimi sine magna verborum cura scriptitarunt, unde tam multæ controversiæ, disceptationes, commentarii ad unam sæpe voculam explicandam profecti sunt. Neque vero omnia Aristotelis sunt, quæ Aristotelici quidam, Latini præsertim, intemperantia quadam speculandi, & unum ex alio deducendi, ad illum referunt: multa multi ingeniose affigunt; alii aliter explicant; cumque inter se nullo modo convenient, videntur tamen sibi cum Aristotele singuli convenire. Contentiones istæ juniorum deliciae sunt, qui cum Peripateti-

teticum aliquem feliciter oppugnarunt, tunc se magnos Imperatores existimant, triumphum parant, & Aristotelem ipsum inter captivos ducunt ante currum. Est inter Peripateticos qui putet, vim quamdam innatam esse corporibus, qua se ipsa per se naturaliter moveant? Statim dies dicitur Aristoteli; quantumvis Physicorum octavo ingenti voce clamet, multisque verbis confirmet, *quidquid movetur, ab alio moveri*. Inducit aliquis bonus homo species nescio quas *intentionales*, a corpore spirituque distinctas? Scilicet reus agitur Aristoteles, quod formas sine materia sensiles in secundo de anima posuerit. Perinde quasi cum sensiles dicit, non satis appareat corporeas esse, sed ita tamen tenues ac defæcatas, ut si corporibus compares unde effluunt, materia carere videantur. Enimvero nihil aliud sonant, si lites tollere volumus, juniorum effluvia, quæ a corporibus jugiter erumpunt, sensusque movent. Placet ne cuipiam de populo sectæ hujus lucem appellare qualitatem a lucidis rebus plane distinctam? Jam ipse pænas luit Aristoteles; tamen si in libro de Anima 2. affirmative doceat, *lumen esse lucidi corporis in aliquo loco præsentiam*; & in secundo Poster. 1. 13. *lumen per laternam transmitti, quod subtilioribus partibus constat*. At illi certe nunquam in mentem venit, ut ea præstaret omnia, quæcumque posterius suæ doctrinæ studiosi pro libidine commenti essent. Gravia sunt, quæ dico, Auditores, sed multo remanent graviora. Quid enim si ostendam, Atomis pepercisse Aristotelem, aut cum his aliquando in gratiam rediisse? Sane in primo Physicorum libro, & in ter-

tio de Anima res naturales definitos habere suæ parvitatæ terminos docet, infra quos descendere nequeant. Tunc igitur, inquit aliquis, Aristotelem Democriticum facis? Ego vero hinc tam longe absum, quam qui maxime: sed tamen, si modo, ut ante dixi, societas placet sententiarum, primum quidem juniores in familiam nostram invitabimus; deinde vero, si cedere noluerint, nos cum suppellectile nostra in eorum domos non inviti migrabimus. Videmus enim illos nostris spoliis magna ex parte decoros; nec sane tam acerbos putamus, ut nullo umquam tempore in tanta cogitationum similitudine fœdus & amicitiam nobiscum inire velint. Quam enim multa de elementis, quam de gravitate multa, de motu, de tempore, de sensibus, de ideis, de patiente & agente intellectu disputare possem, quæ infinitam litium segetem juniores inter & Peripateticos excitarunt, cum tamen sine ira explicata ad idem omnino sensum revocentur!

Sed cogenda vela, ut aliquid etiam de Metaphysicis postremo loco ac veluti extra ordinem dicamus. Jam vero si hæc altissimarum rerum contemplatio de materia generatim differat, si de spiritualia tractet, tota Peripatetica est, nullisque prorsus rebus non dicam ab junioribus castigatur, sed ne augetur quidem, aut ornatur. Percurrite omnia, viri sapientissimi, quæ de ente ac modo entis, de ejus attributis ac primis notionibus ubique gentium disceptantur; accipite universa, quæ de Angelis, de Deo, de mente humana aut dicuntur, aut scribuntur, nihil aliunde, quam ex fontibus nostris manasse intelligetis. Nisi for-

te illa ad Metaphysicam pertinent, quæ olim ad nos adveſta, hoc nomine jaſtabantur; cum tamen revera tam longe abeſſent a Metaphyſica, quam illi qui jaſtabant, ceteroquin non indocti, ab hoc genere ſtudiorum & a cogitandi ſanitate aberant. Sed nimio plus mihi ſumo, qui coram doctiſſimis Philoſophis tam audacter de omnibus philoſophiæ partibus judico. Iſti vobis, adoleſcentes optimi, recte philoſophandi leges dicent; iſti vobis viam ad ſapientiam patefacient: quo in curſu nunquam deficientis, ſi vos ornatiffimis Nationum Conſiliarius ſtrenue præeuntibus conjungetis. Aderit etiam vobis Eminentiffimus hujus Civitatis Antifles pro ſua erga litteras & diſciplinam propenſione: aderunt Patavini Populi Moderatores, viri ſummi, & ad benefaciendum nati; quibus nihil gratius facere poteritis, quam ſi, quod veſtra plurimum intereſt, ſerio facietis.

EPISTOLA

Præpoſita editioni primæ hujus Orationis.

AD URBIS PRÆFECTUM ET PRO-PRÆT.

ORatio hæc habita coram Te, SENATOR AMPLISSIME, non aliis auſpiciis, quam Tuis, in publicum exire debet, graviffimumque oculorum judicium ſubire. Neque vero id ad tuam iſtam dignitatem ſolummodo reſero, quæ ſumma eſt in hac Urbe, omniumque vota & obſequia jure ſuo ſibi vindicat; ſed mentis acumen & præſtantiam maxime ſpecto, qua totam hanc litterariam provinciam

complexus es, unusque potes, vel pene unus de parte eius qualibet rectissime judicare. Nunc demum intelligimus, quantum intersit ad Civitatis omniumque ordinum felicitatem, si viri sapientes imperent, suisque oculis uti velint, ac possint. Nos litterarum ordinis adolescentes supra ceteros Tibi debemus, incredibili quadam beneficiorum copia cumulari; nec aliter respondere possumus, quam ingenua hac debitionis professione, tamquam aeterno ad posteritatis memoriam documento. Perge, quemadmodum cepisti, bonis artibus litterisque favere; unde religionis morumque ratio, populorum felicitas, Reipublicæ gloria, & si quid est in terris majus, potissimum pendet.



ORATIO XIX.

Habita ab Adolescente Scholastico pro Artium
instauratione Gymnasii Patavini.

De Medicis Judiciis.

QUOD nautæ facere solent (NN.) ut quamvis in magna tempestate deprehensi, otium & quietem per omne votorum genus a Superis petierint, tamen paullo post discriminis obliti rursus se mari committant; id ego quoque facio, qui superioris anni periculo defunctus, iterum publicæ lucis aleam subeo, hominumque de me judicia pertento. Sed illi quidem cum sponte agant, Deos hominesque iratos habent, si quando novis incommodis laborent. At ego improvise gravissimi Magistratus Decreto, cui resistere nefas est, in hanc arenam vocatus, benevolentia vestra sublevari profecto debeo, si qua in parte deficere, aut labare, dicendo videbor. Quanquam nihil est dubitandum, auctore tam bono:

Invalidas vires ipse excitat, & juvat idem,

Qui jubet: obsequium sufficit esse meum.

Facit enim ad rem nostram, quod scripsit Ausonius ad Theodosium. Interim quandoquidem tempus tulit, ut rursus ex hoc loco de Medicina dicamus (quod volentibus, ac nolentibus bene vertat (causas & rationes explicare volumus, cur Medica judicia difficillima sint. Video enim,

V s.

Me.

Medicos omnes in duo veluti genera dispartiri, quorum alteri illud firmum decretumque habent, ut statim atque accedunt ad ægrotos, fauste ominentur, eosque bene sperare jubeant; alteri velut ex instituto gravia ac molesta prænunciant. Habent utrique quid sequantur, magis tamen ex ea, quam sibi proposuerunt, callide vivendi & agendi lege, quam ex Artis natura petitur. Nam primi illi bene polliciti, operam suam initio commendare student, nihil de exitu laborantes; alteri exitum spectant, qui quidem Artem probat, si malus sit, vera prænunciantis; si bonus, mira patrantis. Num recte agant, atque utri rectius, non ausim decernere. Illud certe hinc colligo, firmiterque defendo, vel ex hoc ipso apparere, Medicorum judicia multis gravissimisque difficultatibus implicari. Non opus est pluribus, ut intelligatis, qua de re dicturus accedam. Quod tamen antequam facio, ratio postulat, ut Medicum judicium in suas partes dividam, & ab omni ambiguitate liberem. Totum igitur hujus nostræ Facultatis judicium vel ad morbi causam & naturam, vel ad exitum pertinet; quorum alterum a nobis *διαγνώσις*, alterum *πρόγνωσις* appellatur. De utroque, si mihi ea benignitate, qua cœpistis, adfueritis, singillatim disputabo; & quam potero planissime, utriusque difficultates explicabo.

Et ut de eo primum verba faciam, quod ipso naturæ ordine antecedit, id est de *διαγνώσει*, neminem unum esse existimo, qui non videat, ad rectam morbi cognitionem corpus illud recte cognosci debere, in quo morbus est. Porro cum corpus quodlibet partim ex fluidis constet, par-

tim

tim ex solidis, ille demum corpus cognoscere dicitur, & quod consequitur, corporis morbos, morborumque causas, qui tum solida, tum fluida probe tenebit, sciteque explicare poterit. Hoc autem quantum est, bone Deus! Nam, ut a fluidis incipiam, quis unquam tam feliciter in re Physica versatus est, ut fluidorum omnium figuram, contextum, mixturam ex iis glandulis sæpe manantem, quæ oculorum aciem effugiunt, aut perspexerit ipse, aut ab aliis didicerit? Quis eorum motus, quis cursus ac recursus, quis velocitatis & tarditatis momenta mensus est? Conjicere, divinare, suspicari possumus, scire non possumus. Cum igitur fluida nemo cognoscat, videtis quam difficile sit, eorum temperationem cognoscere; quando in rectam, quando in malam valetudinem vergat; num confirmari, an corrigi debeat, num Medico, an Coquo indigeat. De uno sanguine, ut aliis fluidis parcam, tam varia atque adeo contraria observata & scripta sunt, ut quotidie de ejus natura, de salibus, de acidis, de familiaribus & extraneis particulis, & quod maxime mirum est, de colore ipso, qui sub oculos cadit, deque coloris significatione in Medicis scholis disputetur. Tantas has difficultates Medici quidam ut superarent, aut imminuerent, infundendi artem instituerunt: id est latices quosdam pararunt, variosque iis succos miscentes in brutorum venas infuderunt, ut alienis periculis docti, suæ nostræque saluti consulerent. Sed hoc ipsum quam fallax experimentum sit & frugis expers, vel ex eo apparet, quod ejus usus jam intercidit, præter quam apud illos, qui ad erudi-

tionem & ornatum res Medicas tractant.

Verum de fluidis hætenus. Ad solida veniamus, quorum genera cum plura sint, pluribus item difficultatibus sunt obnoxia, quas superare nostrorum temporum Anatomici valde nituntur. Illud pro certo habete, quamvis homines isti diligentissimi multa in humano corpore detexerint, & in dies detegant, majoribus nostris ignota, tamen multo plura esse, quæ adhuc latent. Quis musculos omnes numerare potest, vascula, fibras, nervos, glandulas, stamina denique universa, quibus machina hæc per infinitos pæne anfractus & ambages in hominis figuram consurgit? Attamen qui velit de iis recte judicare, prius cognoscere singula debet. Sed fac, in universum cognosci. An idcirco etiam in quolibet individuo cognoscentur? Si paucissimæ partes, quæ hominis vultum componunt, & eodem ferme modo dispositæ sunt, tamen pro exigua varietate fitus, quem tenent, ita variant humanas facies, ut in orbe toto duæ plane similes inveniri non possint; quodnam judicium ferendum erit de interna cujusque structura, quæ infinitis partibus constat? Nunc ipsi per vos cogitate, num eorum morborum, qui a solidis manant, magis lubrica *διάρρησις* sit, an illorum, qui a fluidis. Utraque certe anceps, periculi plena, & plerumque fallax. Si quemadmodum se quidam jactant, re vera Physici essent, hoc est totius naturæ periti, facile concederem, posse illos fluidorum & solidorum causas, quæque ex his causis pendent, sive bona, sive mala, perspecta & cognita habere. Sed nullum nomen magis vanum est, quam quo ipsi

DE MEDICIS JUDICIIS. 317

ipsi se appellant *Medicos Physicos*. Scilicet Physicos se dicunt Galenici, cum vocibus quibusdam ad rixandum inventis de substantia Peripatetica, de elementis, de qualitatibus disputare cum suis didicerunt: Physicos se vocant Epicurei, cum omnia momentis, declinationibus, figuris, atomis definierunt: Physicos se nuncupant Cartesiani, Gassendistæ, Neutroniani, & reliqui minorum gentium disputatores, cum per quantitatem, & motum quæcunque in hac rerum universitate contingunt, callida oratione eolverunt. Cum veritas Physica una sit, omnes autem isti tantopere inter se differant, quo jure se Physicos dicunt? Pythagoram ferunt, cum reputaret, quam difficile sit, sapientiam acquirere, noluisse se *Sophum* nuncupare, sed *Philosophum*, unde nomen ad reliquos manavit. Maxime vellem, ut nostri quoque non se *Physicos*, sed *Philophysicos* nuncuparent; hoc est cognoscendæ naturæ studiosos. Si veretundia hac rerum Physicarum studia tractarent, eadem prorsus in Medicam provinciam venientes, diu multumque dubitarent, hærent, quærent, cogitarent, antequam ad alicujus morbi *diagnosis* se duci paterentur. Neque vero cum id dico, eos Medicos laudo, qui tamquam Harpocrates ægrotis assident, nihil judicare ausi. Hos ne Medicos quidem existimo. Cautum judicium laudo; nullum condemno.

Quod si quis ab hac parte repulsus, ad alteram migrat, & in Medica *προγνώσει* se conquirere putat, huic ego initio statim divini Hippocratis monitum recito. *Moneo* (inquit Prædict. lib. 2. c. 3.) *ut quam prudentissime agatur, tum in reli-*
qua

qua arte, tum in hujusmodi prædictionibus. Nam is, cui successerit prædictio, in admiratione erit apud ægrotum intelligentem; is autem, cui non successerit, non solum odio erit, sed etiam insanus judicabitur. συμβαλέω ὡς πωφρονες ἄτας εἶναι καὶ ἐν τῇ ἄλλῃ τέχνῃ, καὶ ἐν τοῖσι τοιαυτοῖσι προῤῥήμασι. γνόντας, ὅτι, ἐπιτυχῶν μὲν αὐτοῖς τὰ προῤῥήματα, θαυμασθεῖν ὑπὸ τῶ ξυνιόντος ἀλγέοντες. ἀποτυχῶν δ' αὐτοῖς, πρὸς τῷ μισεῖσθαι, τάχ' ἂν καὶ μεμνημένοι δόξαιεν. Scilicet nihil est difficilius, quam prædicere quid sit futurum de re, quæ ab innumeris causis externis internisque pendere potest; quæ in corpore quolibet peculiari-bus conditionibus prædita est; quæ variatur in horas; atque ita interdum variatur, ut divini aliquid intercessisse, homines ignari naturæ sibi persuadeant. *Audivi ego, hujus ætatis adolescens, Medicos gravissimos, & fama nominis celeberrimos, repente ludibrio habitos, quod suprema fata ægrotis quibusdam prænuntiasent, eosque proinde deseruissent, qui tamen postea mulierculæ curatione sunt restituti. Itaque nostri, qui plane sapiunt, nihil umquam affirmate pronunciant. Accedunt ad ægrotum graves & meditabundi, venas tangunt, quærunt de tempore, de vitæ instituto, de postremis exercitationibus. In has fere morbi causam conjiciunt; & ambiguus verbis rem totam describentes, curationem ex alto ducunt; eorum, quæ præscribunt, vim & effecta ambagibus involvunt; sperare simul ac timere jubent; uno verbo ita orationem moderantur, ut quidquid acciderit, siue sua, siue naturæ causa, multo ante prædictum esse videatur. *Hac iter ac superos.* Enimvero si in Arte ipsa certæ firmæque leges essent, quibus mor-

inorborum exitus sine errore cognosci posset, at-
tamen cum plura intervenire soleant sive ægro-
tantium impatientia, sive assidentium incuria,
sive aeris siderumque mutationibus, quæ sane in
officio contineri nequeunt, prudentis Medici es-
set prædictionibus abstinere.

At enim dicet fortasse aliquis vestrum, Medi-
cam Facultatem, quæ sui operis exitum neque
polliceri, neque scire potest, inter liberales non
esse numerandam. Ita ne vero? Quin igitur &
Oratoriam Facultatem, & Politicam excludimus,
quarum neutra suæ contentionis exitum aut no-
vit, aut præstat? Oratoris enim est dicere apte
ad persuadendum, non persuadere; Politici est non
feliciem Rempublicam facere, sed illa omnia adhi-
bere, quæ ad felicitatem Reipublicæ comparandam
sunt idonea. Quemadmodum igitur satis est ad
Oratoriam, & Politicam laudem, si omnia fiant
boni exitus gratia, quamvis minime fortuna re-
spondeat, ita ad optimi Medici nomen debet esse
satis, si omnia adhibeantur, quæ ad morborum
curationes conducere videntur, quamvis neque
prædici, neque præstari sanitas in tantis difficul-
tatibus possit.

Nolim vero quispiam judicet, me talia com-
memorando adolescentum nostrorum studia retar-
dare voluisse. Illud potius reputate, Juvenes studio-
fissimi, eatenus a nobis διαγνώσεως & προγνώσεως
difficultates recenser, ut disciplinam latissime su-
sam, dubiisque rebus implicatam mature susci-
piatis, sine intermissione tractetis, per omne la-
borum & industriæ genus cognoscere nitamini.
Habetis in hac Urbe magna exempla ad imitan-
dum.

dum, in hac inquam Urbe, in quam Athenæ ipsæ migrasse videntur. Habetis Hippocraticos Viros, habetis Philosophiæ Naturalis studiosos, habetis Anatomicos, & Botanicos, qui omnes, in sua quisque arte, peritissimi sunt, & toto terrarum Orbe notissimi. Nolite abuti fortunæ beneficio, quæ vos eo loco collocavit, in quo ad proficiendum nihil deesse potest nisi voluntas. Monet atque excitat vos Eminentissimus Episcopus Patavinus, qui in tanta pietatis ac religionis cura, litterarum curam non intermittit. Monent Civitatis Moderatores, Amplissimi Viri, qui cogitationibus in nos conversis, id agunt in primis, ut ex Patavina Academia, tamquam ex equo Trojano, Viri præstantes quotidie exeant. Monent denique nobilissimi ac studiosissimi inclytarum Nationum Consilarii, qui non ordine modo, sed contentione, & industria reliquos antecedunt, offusa illis verecundia, qui vel sequi nolint, vel tarde sequantur.

EPISTOLA

Præposita editioni primæ hujus Orationis.

AD CIVITATIS PRÆFECTUM
ET PRO-PRÆT.

OMnes homines ita sunt natura comparati, ut res suas, qualescumque sint, ornari velint, & in pretio haberi: nec ullus est artifex tam ipse de se demisse sentiens, quin quod facit, non maxime cupiat placere aliis, & commendari. Ex quo fit,
ut

ut qui aliquid dicunt, aut scribunt, quod prodire debeat, & hominum judicia subire, si forte dubitant de ingenio suo, aliunde præsidia quærant, seque magno aliquo nomine, tamquam *Ajacis* scuto, adversus irruentia tueantur. Ecce tibi, Senator amplissime, quid mihi animo proposuerim, cum orationem hanc, auspiciis tuis habitam, non aliter in vulgus exire volui, quam iisdem auspiciis, eodemque nomine tectam: ut cum ipsa per se parum valeat, titulo saltem ornata & munita, tantam hanc litterarum lucem sine periculo sustineat. Quamquam quid ego mihi præcipue arrogo? Quem potius, si recte cogitamus, appellare *Musa* nostræ debent, quam illum, in cujus ditione & imperio sunt, a quo uno potissimum in hac urbe pendent, cujus manu aluntur & sustentantur? Eas igitur tibi sisto, ad quem jure veniunt: meque in primis earum nomine quasi facem anno huic litterario præferentem tutelæ tuæ fideique committo. Tantum autem nobis in posterum de tua bonitate pollicebimur, quantum in præsentibus velut ad omen conferre volueris. Vale.

PARS II.

QUÆ CONTINET

PRÆFATIONES LIBRORUM,
EPISTOLAS PHILOLOGICAS,
ET EXERCITATIONES

ad usum

SEMINARII PATAVINI.

AD LECTOREM.



*I*nstituta ab Auctoribus Seminarij Patavini in qualibet disciplina Disputationes ita frequentes sunt, ut nullum sit ex florentissima ista adolescentum caterva tam exiguum ingenium, quin prodire in arenam cogatur, suasque vires qualescumque in omnium conspectu experiri. Prima difficultas, & haud scio an maxima, in eo est, quod initio statim eleganti aliqua & ad tempus comparata oratiuncula Auditorum animos parare oportet; tum iis, absoluta concertatione, officiosis verbis gratias agere: quo in loco cum illi etiam plerumque deficiant, qui ceteroquin doctrina excellunt, quivis intelligit, quid possit adolescentulus, nisi aliena ope & auxilio utatur. Auxilium hoc ab eo peti solet, qui studiis praestit: at ego, cum munus hoc atque officium sustinerem, saepe facere malui, quam rescire; ut ex his apparebit, quae nunc certo consilio ductus, publico iudicio committo. Ac si nihil huiusmodi perire sivistem, jam non librum, sed bibliothecam, ut ita dicam, dare possem. Verum & sero colligere in mentem venit, & pauca opus esse duxi, quibus Juventus haec, tamquam imaginibus ante oculos positis, cogitationes suas regeret, ac pro re nata similia faceret.

Sed quia disciplinarum studiosi carere prorsus minorum litterarum studiis non solent, neque mehercule debent, ideo Academiae quaedam Commissiones sunt

sunt instituta, in quibus de Latina Græcaque facundia semel in hebdomada certatur. In hac quoque parte Proemia & Gratiarum actiones requiruntur; sed Silvas insuper, & lucubratiunculas, ut mos est, Græce reddendas singulis argumentis adjunxi; cum ut totum illarum scholarum ordinem ostenderem, tum vero maxime, ut iis, qui me in munere tam operoso ac molesto consequentur, testimonium aliquod diligentiae ad commonendum relinquerem. His addere placuit librorum Praefationes, quod exemplo feci magnorum virorum; tum etiam Epistolas quasdam philologicas, ex quibus aliquis ad hoc Latine scribendi studium posset esse fructus. Inanes & otiosas si quis quæret, alibi quærat: non quod ego tale aliquid non scripsitarim, sed quia non puto esse tanti, ut proferri ad exemplum debeat. Vale.



PRÆFATIONES LIBRORUM.



I.

De harum Lucubrationum Collectione prima.

*Ad Hieronymum Canalem D. Marci
Procuratorem.*

QUandoquidem cultus atque observantia erga te mea, SENATOR AMPLISSIME, ad eam crevit magnitudinem, ut nihil possit esse supra; jam illud est reliquum, ut ejus diuturnitati consulam, & quantum fieri per me potest, ad immortalitatem producam. Ac si mihi aditus per has potissimum lucubrationes ad tuam benevolentiam est patefactus, quem quidem maximum earum fructum semper existimavi, in his ipsis tanti beneficii memoria consignanda est; ut omnes intelligant, nec litteris deesse patronos, nec suis patronis litteras deesse. Utinam vero adhuc ille viveret meorum studiorum auctor atque auspex, Georgius Card. Cornelius, qui, qua erat in te voluntate, meum hoc grati animi officium valde
pro-

probaret; & siquid assequi conjectura possum, jussu etiam & auctoritate promoveret. At ego vel hoc ipsum memoriæ ejus perpetuo tribuam, ut quos ille, mirabili acumine & sapientia Vir, suo judicio ornare solebat, omni studio colamus tantumque connitar, quantum viventis atque imperanti ad meam fidem industriamque ostendendam satis esset. Vides, quæ me in primis rationes impulerint, ut libellum hunc tuo nomine & auspicio in vulgus ederem. Accedit, quod ea sunt in te omnia, quæ ceteri Scriptores sequi solent, quoties unum aliquem deligunt egregium virum, ad quem sua opera instituunt. Si enim Familiæ decus & nobilitatem specto, tua est inter paucas illas, quarum antiquitas in patriæ primordiis latet; quarum splendor ac dignitas ad summum fastigium pervenit; quarum opes & auctoritas nullo sæculo intercidit. Sin autem in te ipsum oculos conjicio, si animi magnitudinem, si ingenium, si rectum atque elegans in re omni judicium perpendo, quis potest esse unus, cui magis me laboresque meos commendatos velim? Verum etsi omnia tibi deessent, quæ a natura & fortuna profiscuntur, quorum certe nihil deest; tuus tamen iste Latinarum litterarum amor perpetua optimorum scriptorum lectione in dies magis auctus me valde cepisset, & quadam veluti contentionis similitudine ad hanc observantiæ significationem adduxisset. Ut enim sua quisque amat, plurimique facit, ita libenter ad eos accedit, in quibus videt esse similia. Non hoc ad gratiam dico. Cave enim tibi persuadeas, tantum me in cujusquam dignitate atque amplitudi-

ne collocare, ut si minus aptus mearum litterularum iudex videatur, eas tamen ad illum afferre velim, eique dicatas emittere. Quod, ut opinor, & ipse nosti moris mei totiusque p̄ae vitae conscius; & ideo commemoro atque confirmo, nequis forte dubitet, num tibi tuoque ingenio plus aliquid tribuam, quam quantum revera tribuendum est. Sed ego sane, etsi mea omnia a te legi malo, quam ab aliis; tamen hoc ipsum cum reputo, quam acute videas, nemo est unus, ne ex iis quidem, qui ex instituto Latinam eloquentiam profitentur, cujus iudicium magis verear. Quod non ita accipi velim, quasi vero monitiones effugiam: nam tuas quidem etiam cupio, quas certo scio neque sapientia carere posse, neque benevolentia. Vale.

II.

De eadem Collectione prima.

Ad Lectorem.

SI dixero, multos mihi doctos viros auctores fuisse, ut has Orationes uno volumine comprehensas emitterem, veterem cantilenam recinere videbor, qua non gravium modo rerum, sed etiam levissimarum scriptores uti solent. Huic igitur causae parcendum est; quod eam nimis multi occuparint, & in fidei suspicionem adduxerint. Sequitur altera, & quidem potior, in eo
po-

posita, quod cum ego singulas ad nostrarum exercitationum celebritatem superioribus annis foras dedissem, paucis diebus perituras, ut fere sit, nunc denique majorem quamdam famæ curam suscipere debeo, talemque adornare editionem, cujus auctoritatem nullo tempore nullaque excusatione defugiam. Ego sane illis plurimum debeo, qui lucubrationes tam infirmas suo judicio ornaverunt; iterumque ac sæpius editas, in majore quodam litterarum lumine collocarunt, quam mihi quidem ferre posse viderentur: sed si integrum est, vehementer illos oro atque obsecro, ut nostra hæc nunc primum pro nostris habere incipiant, cum jam in publici judicii discrimen rite prodimus, tota vita præstaturi quidquid, fata omnia librorum animo volventes, ratione & consilio vulgamus. At quæret fortasse aliquis, cur Orationibus alia quædam addiderim valde minuta. Is si cogitabit, me cum possem aliis Orationibus, quas publice recitavi, volumen augere, tamen istiusmodi lucubrationunculis maluisse locum dare, nihil temere factum judicabit. Tempus & locus ita postulavit. Jam vero & inter gravissimas Demosthenis orationes talia quædam leguntur; & Cicero ipse proœmiorum volumen habuit, ut ad Atticum scribit lib. 16. epist. 6. Verum unusquisque, ut videbitur, accipiat. Numquam ego moveri me hominum opinionibus passus sum, quominus ea facerem omnia, quæ mei muneris esse existimavi. Porro autem certo scio, non defuturos, qui Latinæ linguæ ingenium intelligentes, ejusque difficultates scribendo experti, æquo animo ferant, me hujus quoque generis,

quod medium est, magisque varium & elegans, quam grave & exaggeratum, adolescentibus eloquentiæ studiosis exempla posuisse.

Nunc universe dicendum aliquid de stilo esset. Sed ego ita semper existimavi, ut sua cuique sunt lineamenta oris, suaque membrorum conformatio, miro prorsus naturæ artificio ab aliis distincta, & in magna similitudine dissimilis; ita uniuscujusque certam esse quamdam orationis formam & quasi faciem, in ipsa natura sitam, de qua nihil magnopere quæri debeat. Illud curavi diligenter, ut siquis in dicendo essem, quantuscumque essem, pro virium mearum tenuitate Latinus orator viderer: sed plura in tam difficili negotio polliceri non ausim. Verborum structuram & compositionem ad optimæ ætatis consuetudinem figurare & exprimere volui; ac verba ipsa, ubi opus fuit, ex media quoque, atque adeo ex infima Latinitate sumsi, modo ne peregrina miscerem. Et si autem aliquando necessitate compulsus ad Græca sum; hæc tamen neque inculcavi sine modo, quod monet Cicero in libro Officiorum primo; & Latinis litteris Latinaque positione plerumque molliui, ut pluribus morem gererem. Si doctis tantummodo & intelligentibus scribendum fuisset, multo mihi magis indulgissem.

Sed quorsum tam multa verba? Non ego is sum, qui hominum iudicia impedire possim, aut velim. Totum hoc, quidquid est, in medio pono; amicis, inimicis, civibus, exteris in illud jus esto; qui volet, carpito; invitus ne legito; officii gratia ne laudato. Nihil enim magis miserum videri solet, quam eorum contentio, qui
cum

cum suos libellos vulgarint, concurrant, sollicitant, rogant, minantur; gratia, auctoritate, pecunia, artibus omnibus laudatores quærunt. Impotens hæc famæ libido reip. litterariæ libertatem, summum ejus bonum ac pæne unicum subruere conatur: verum bene habet, quod neque omnibus fucum facit, neque diu. Ego mihi beatus videbor, si æquum monitorem inveniam: & utcumque res cadat, neminem in judicium vocabo.

III.

Ad Institutiones Politicas.

*Duci Aurelianensi, Galliarum Rectori,
dicatas.*

N N.

CUM te Superi, Senerissime Princeps, in eo dignitatis fastigio collocarunt, ut ingentem alterius Ludovici famam, alterius expectationem sustineres, duorumque Regum fata conjungeres, id simul oneris imposuerunt, ut non tuos modo, sed alienos quoque pro regia consuetudine exciperes, omniumque mortalium vota exaudires. Ecce tibi igitur Italum hominem, qui ex umbra domestica exire cum velit, seque nomenque suum publico judicio subicere; non ante se dare in discrimen audet, quam tuum sibi præsidium & auctori-

etoritatem adjungat. Quid hoc, inquires, rei est, ut Summi Principis auspiciū ad privati hominis litterulas postuletur? Scilicet cum litterarum genus nullum est a Regia majestate prorsus alienum, cum nostrum hoc ei maxime convenit, numquam contemptum nisi ab illis, qui tantum sibi licere putarunt, quantum possent. Habes hic regendorum populorum institutiones, moribus, legibus, auctoritate, multorumque exemplis confirmatas; te vero ea potissimum ratione dignas, quod uni inter omnes nihil exprobrare videbuntur. In quo illud mihi potius timendum est, ne laudandi quæsisse occasionem videar; easque regendi leges collegisse, quæ tibi probatissimæ essent, quasque ultro tute tibi imposuisses. Nihil est hujusmodi, sed malo tamen ita videri. Quod superest, non has modo pagellas, sed me ipsum tibi totum trado, & eo quidem animo, ut tua virtute, non fortuna commovear. Vale.

I V.

Ad Historiam Bizantinam

Philippo V. Hispaniarum Regi, Catholicae Religionis adsertori, dicatam.

Typographus.

Si quod opus litterarium est, Philippe Rex maxime, quod Regiis auspiciis dignum videatur, una est Historia Bizantina, quæ magnitudi-
ne

ne molis, & rerum præstantia non liber, sed Bibliotheca dici potest. Itaque nemo mirabitur, me, qui rem tantam aggredior, quantam ne ipsæ quidem ad hanc diem Typographorum societates longe ditissimæ ausæ sunt, conatui parem quæsisse Auspicem. Sentio enimvero Regiæ Majestatis celsitudinem, sed non tam me illa deterret, quam indulgentia allicit, quæ magnos Reges semper comitata est. Quicumque autem ego sim, non me quidem, sed magnam hanc Scriptorum nobilissimorum catervam spectare debes; quæ olim, cum primum prodiret, Ludovici magni Avi tui præsidio feliciter usa, nunc eo sublato, qui supra mortalitatem positus videbatur, ad Nepotem tantarum virtutum hæredem sua vota convertit. A Gallo porro ad Hispanum transit, fortunam amplificatura, non mutatura. Tu enim is es, qui duas has florentissimas Nationes gloriæ contentione jamdiu certantes, & quod consequitur, ingeniis studiisque dispares, incredibili quadam ac prope divina prudentia conciliasti; & in tot tantisque longissimi ac periculosissimi belli vicissitudinibus effecisti, ut nec Galli nisi de Hispanis, nec Hispani nisi de Gallis solliciti essent. Nunc rebus vel compositis, vel pœne compositis, & immutabili pace firmatis, quid est reliquum, nisi ut artes ac disciplinas ad populorum tuorum felicitatem promoveas? Regno tam longe lateque fuso nunquam deerunt opes: Sed, quod opes ipsas regere potest, & ad humani generis usum accommodare, rectum de rebus omnibus judicium, a litterarum studiis proficisci debet, litterarum studia a librorum & librariorum tutela, Debes hoc

Divi-

Divinæ providentiæ quæ Domum tuam supra reliquos Europæ Principes pulcherrima prole fortunare voluit; ut jam non modo Hispano Regno in seram posteritatem suffectura videatur, sed aliarum quoque Provinciarum spem & expectationem commoveat. Non potes ingenti huic Dei Opt. Max. beneficio aptius respondere, quam si tu quoque exemplo ejus beneficias; in eoque maxime beneficias, in quo appareat, quantopere privatorum tenuitati Regia amplitudo præcellat. Ars hæc nostra, Philosophiæ, Theologiæ, Sacri Civilisque Juris, totiusque sapientiæ administra, privatis opibus & consiliis stare nequit: nec vero ego tam ingens opus movere ausus essem, si de me tantummodo cogitasset. In humanarum rerum fastigia oculos mentemque conjeci; & quod in primis mihi præfulgere visum est, eo tanquam fidere, quod faustum fortunatumque esset, moliri cœpi. Ades igitur homini (ut veterum Hispanorum more loquar) devoto Numini Majestatique tuæ; industriamque meam in re tam gravi occupatam Regio nomine tege, auspicio fove, præsidio sustentata.

V.

Ad Conciliorum Collectionem maximam

*Carolo VI. Romanorum Imperatori
dicatam.*

Typographus.

Volumina hæc, Imperator Augustissime, tam multa numero, mole tam grandia, rebus quas comprehendunt tam sublimia, non aliunde petere auspicia debent, aut possunt, quam ab eo Principe, in quo omnia summa sint, id est a te. Neque enim aut in Ecclesiasticæ politię tabulariis ulla monumenta sunt Conciliis majora; aut in rerum humanarum regimine quippiam majus Cæsare est. Ita Deus mortalia composuit ac distribuit, ut inter se coirent Imperium, & Sacerdotium ad humani generis incolumitatem; & utraque ex parte infima infimis, media mediis, suprema supremis responderent. Cum igitur in hoc Opere Religionis summa contineatur, totusque Ecclesiasticæ Hierarchiæ ordo; non poterat ad alium asferri, quam ad Principem terrarum gubernatorem, eundemque Ecclesiæ universalis Advocatum, Tibi quidem in tanta rerum potestate, quantam nemo unquam post firmatas Christianas opes Princeps habuit, ne eruditio quidem deest & antiquitatis cognitio; proindeque non commemorabimus, quid

quid curæ veteres Imperatores susceperint, quoties de Conciliis convocandis ageretur. Id tibi dicemus unum, quod ad rem præsentem facit, huic Conciliorum quasi thesauro Imperiale patrocinium a te quodammodo deberi: ut quando protui felicitate Imperii non est opus Concilia cogere, coacta olim & absoluta tuearis; eorumque Decreta, his codicibus comprehensa, tutor & auspex facta testa conserves. Illud quoque dicere audemus, non tam necessarium esse Christianæ ditionis fines propagare, & novas Provincias veteribus adjicere, quam sacros hos canones incolumes præstare, eorumque asserere auctoritatem: si quidem Christi Domini gloria non tam populorum multitudine, quam fide, disciplina, veritate & probitate constat. Quando autem ita singulari quadam Dei providentia datur, ut tu non nomine tantum ac dignitate, sed potentia quoque supra reliquos orbis terrarum Principes emineas; in te unum populi gentesque oculos convertant tanquam belli pacisque arbitrum; ab aula tua, tanquam ab ipso tanti corporis capite, motus omnis in membra reliqua diffundatur; fac pro tua pietate, gratoque in Deum animo, ut bonum hoc sentiat in primis Ecclesia mater; gaudeatque habere se juris sui defensorem ac vindicem, qui revera esse possit, & velit. Enimvero Principes omnes per illum & pro illo regnant, qui Rex Regum, & Dominus Dominantium appellatur; omnes aliquo modo sacri sunt: at Romanorum Imperator, sive originem spectemus nominis hujus, sive ceremonias, quibus tantæ dignitati initiatur, sive nomenclationes primis illis Chri-

Christianis Imperatoribus tribui solitas, Sacerdos quoque & Episcopus certa quadam ratione dici potest. Itaque tua tibi quodammodo commendamus, dum hæc commendamus. Sed hætenus nos alienam causam egimus. Quid est enim, quod Typographus jactare in hoc Opere possit præter typographicas curas & impensas? At hoc ipsum tamen pertinet ad majestatem Imperii tui, in quo ars hæc reliquarum omnium, quæ manu exercentur, facile princeps, in tuo solo nata, & a tuis Germanis primum culta & propagata, jam prope ad summum fastigium pervenit. Erat hoc dignum sæculo tuo, erat Carolo VI. dignum, ut parta jam & conservata per te inter Christianos Principes diutissime pace, litterarum studia artesque studiorum administræ efferatos superiorum temporum bellis animos ad civilem cultum & humanitatem traducerent. Post bella tot annorum feliciter gesta & profligata, post tot tantasque victorias, quibus pulcherrimæ & nobilissimæ Europæ regiones in potestatem concessere tuam, suscipe librorum & Musarum curam; atque adeo perge magno animo constantique in hac cura, quam ultro suscepisti. Auxisti mirum in modum Bibliothecas tuas; præfecisti illis viros summos; antiqua monumenta ad ornatum & eruditionem undique collecta addidisti; hoc ipsum declarat, non posse te Typographis non favere. Facit hoc etiam ad plenam perfectamque nominis tui laudem & immortalitatem, nullam esse partem illarum artium, quæ ad jungenda hominum commercia pertinent, quam non cures ac promoveas. Ceteri ante te Imperatores variis titulis gaudent,

singuli singulis, pro illa publicæ felicitatis parte, quam gentibus pepererunt; alius bello, alius pace, alius litteris, alius religione, alius civili administratione clarus: tu incredibili quadam magnitudine animi omnia complexus es, maxima, minima, interna, externa, sacra, prophana; tantoque consilio & sapientia rem quamlibet administras, ut totus in illa una esse videaris. Virtutem hanc prorsus divinam fortuna ipsa quodammodo veretur; nec in tanta multitudine Urbium & Provinciarum, quas tibi subjecit, quippiam movere audet: imo quidquid alibi movit, ad Imperii tui potestatem amplificandam per varios casus demum convertit. Multi se felices in publicis monumentis dici voluerunt, ex quo L. Sylla titulum hunc usurpavit: tu revera Felix es. Ex uberrimo isto ingentium bonorum fonte in nos quoque redundasse aliquid existimabimus, si conatus hosce typographicos auspiorum tuorum felicitate nobis fortunes, & Imperiali auctoritate ratos firmosque facias.

VI.

Ad Sirmondi Volumen primum

Benedicto XIII. Pontifici Maximo dicatum.

Typographus.

Mirari non debes, Beatissime Pater, si homines etiam postremi ordinis ad te accedere

dere confidenter audent, & licere sibi putant offerre sua. Tu enim cum tanta ista dignitate & amplitudine Cælo proxima Christianam quandam facilitatem, quæ moribus nostris obsoleverat, veteri exemplo conjungis; ut vere appareat, te illius vicariam potestatem gerere, apud quem *non est acceptio personarum*. Accipe igitur æquo animo Bibliopolam tuis pedibus provolutum, qui primum quidem sanctissima Religionis mysteria in Capite ipso Religionis veneratur, deinde tibi gravissimi Scriptoris lucubrationes, sua opera suoque ære Veneriis editas, tamquam auspici, præfidi, ac patrono commendat. Omnia fere litterarum ac bonarum artium studia ad Religionis rationem revocari possunt; at genus hoc, quod est a Sirmondo tractatum, totum ex eo fonte est; & in illum, quoquo versus ducatur, necessario redit. Si plura dicam, non te modo, sed me quoque ipsum ignorare videar. Illud unum postremo loco adjiciam, tantum mihi animi futurum ad istiusmodi monumenta in posterum edenda, quantum tibi, per quem Deus mortalibus loquitur, meam hanc bene merendi voluntatem probari cognovero.

VII.

Ad Sirmondi Volumen secundum

Benedicto XIII. Pontifici Maximo dicatum.

Typographus.

Auspicia mihi tua, Beatissime Pater, tam prospera fuere, ut quædam repente exierint ad hanc editionem ornandam, de quibus ego initio non cogitaveram. Habes igitur in hoc volumine altero princeps Facundi Hermianensis opus, non modo recentibus Viri doctissimi adnotationibus illustratum, sed infinitis prope locis castigatum & restitutum ex manuscripto Canonice Veronensium codice antiquitatis plane vrendæ. Non deerit, ut spero, aliquid ad ornatum reliquorum; quandoquidem jam ex hoc ipso tempore præsto sunt non solum vetustæ membranæ ad purganda & supplenda, quæ Sirmondus dedit in quarto, sed anecdota etiam quædam eodem pertinentia, quo magnum illum virum spectasse compertum est. De re tota tum mihi ipsi, tum tibi maxime publica hac declaratione gratulandum putavi; ut homines intelligant, res fausto omine susceptas plerumque fauste cedere. Videmus, te tuaque omnia peculiari quadam ratione Superis curæ esse: quoniam illa ipsa ingenti Ecclesiæ bono perfecisti, quæ cum susciperes, alii nimis ardua, alii supra humanas vires posita judica-

dicabant. Hæc me primum cogitantem moverunt, ut te ad præsidium compellarem : hæc eadem cogitatio in suscepto instituto nunc magis confirmat. Fac, ut nobis pro paterna Christiani gregis cura benedicas, & pro summi Sacerdotii auctoritate propositum hoc nostrum Deo Opt. Max. bonorum omnium largitori commendes.

VIII.

Ad D. Bernardi Opera

Petro Card. Otthobono dicata.

Typographus.

CUM primum D. Bernardi Opera, Mabillonis studio illustrata, ex Gallia prodierunt, Romæ sibi auspicem quæsiere magnum illum Pontificem Patrum tuum, virum sane dignum, qui Orbis terrarum religionem litterasque moderaretur. Vide igitur, P. E. num eadem hoc tempore Italico prælo commissa alibi quærere auspicia debeant, quam Romæ, & in domo tua. Ingens illa Alexandri mens, a qua nos aurea tempora sperabamus, vix tamdiu hominibus concessa est, quamdiu satis fuit ad eam cognoscendam. Tu nobis ejus memoriam quotidie renovas, facisque ut nostra desideria, quæ in illo expleri non potuerunt, in te tamen aliquo modo conquiescant. Neque enim tu eorum siderum similis es, quæ cum lumen totum a Sole mutantur, eo sibi erepto, statim

deficiunt & obscurantur. Tanta ista animi magnitudo, vis ingenii tanta, tam exquisitum rerum omnium iudicium tua sunt. Atque hinc factum existimo, ut in cursu tam longo, & in tanta regiminis varietate non solum nihil tibi de veteri splendore detractum sit, sed plurimum etiam additum ad nominis famam, ad civium atque exterorum admirationem, ad eam, quæ hinc sequitur, immortalitatem. Nunc te Religio arctiore quodam vinculo complexa est cum inter Episcopos recepit; poscitque jure suo, ut quidquid ad eam pertinet, auctoritate & patrocinio tuearis. Itaque jam non veteri illo titulo, sed novo isto D. Bernardus ad te accedit, seque Episcopo Sabinensi commendat. Hunc si benevole excipies, tibi que familiarem reddes, habebis longe optimum in Episcopali administratione monitorem atque adiutorem. Qui in magno rerum fastigio collocati, multis se negotiis exercent, ne vivere quidem possunt, nisi se identidem in alicujus viri docti lectionem abdant, animumque diuturna agitatione fatigatum ac divulsam quodammodo recipiant. Estne ullus ex omni Scriptorum Sacrorum numero, quem D. Bernardo præponendum putes ad hanc animi instaurationem tibi tantopere necessariam? Sed ego jam nimis ultra Typographum. Quod mearum partium fuit, curavi diligenter, nequid in hac editione aut incuria, aut avaritia operi tam pulchro detraheret; ut vel ex hoc ipso te dignum videretur. Proba hominis studium, qui de te bene mereri vehementissime cupit: nec tam cogites, quid valeat, quam quid velit.

IX.

Ad D. Augustini Opera

*Aloysio Pisano Equ. ac D. Marci Procura-
tori dicata.*

Typographus.

Nihil ego unquam vehementius optavi, quam
ut D. Augustini Opera typis meis vulga-
re possem; quod hæc in primis digna mihi vi-
derentur, ad quorum præsidium & auspiciū Se-
natoris nomen longè principis usurparem. Itaque,
Vir amplissime, vide, quid tibi afferam, non quis
afferam. Quamquam tanta ista fortunarum copia,
qua undique circumfluis, nunquam fecit, ut te-
nues homines contemneres, quibus te Divina
providentia præpositum putas, ut pro illis sis,
non supra illos. Quod autem mirabilius videri
debet, non hæc hominis laus est, sed familiæ.
Scilicet nullus est ex ista florentissima domo, qui
indole quadam sua ad benefaciendum non fera-
tur: & quamvis alius aliter in Rep. administran-
da sit occupatus, idem tamen cuique propolitus
est, ut quam plurimis profit. Egregiam hanc Pi-
sanorum laudem, ut ad exemplum propagaretur,
ipse quoque litterarum monumentis consignare vo-
lui; & quidem monumentis ejusmodi, quæ meri-
to suo æterna essent. Hactenus habes, quid spe-
ctaverim causa tua: nunc accipe, quid mea. Cum

large multa ad tantæ rei perfectionem pollicitus
sim, testem industriæ meæ in ipso veluti limine
producere debeo, cujus fidem & auctoritatem ne-
mo sit qui non vereatur. Tu enim occupasti
hominum famiam & publica judicia magnitudine
virtutis & constantia felicitatis; in quo potissi-
mum mortales mortalibus præstant, & eos ipsos
beatos efficiunt, quos numerant inter suos. Ipse
igitur quoque in partem venio boni hujus, si pa-
teris, conatus nostros illustrari nomine tuo, &
auspicio tam fausto in publicum prodire. Cur au-
tem non patiaris, qui ad rem litterariam promo-
vendam & publica cura, & privatis impensis
quotidie tam multa facis? Nemo est qui nesciat,
quam magnifico sumptu extructa domi tuæ Bi-
bliotheca sit, importatis undique pulcherrimis li-
bris, additis ad eruditionem & ornamentum ve-
teribus numis, accitis doctissimis viris & rei li-
brariæ peritissimis, qui omnibus proficere de tuo
volentibus præsto sint. Nisi forte in te non re-
dundant Fratris tui merita, Hermolai dico, gra-
vissimi senis, qui summis Reip. honoribus fun-
ctus, in hac voluntaria vacatione spartam istam
peculiari opera sibi ornandam sumpsit. Consilium
tam nobile & Pisanis opibus dignum Superi for-
tunent, producta in longum ævum Hermolai vi-
ta, auctis in majus familiæ fortunis, amplificatis
tibi ad summum fastigium dignitatibus. Æquum
est enim, humana bona ad eos pervenire, qui o-
mnia ad communem felicitatem referunt; & ne
bona quidem putant, si sibi solis commoda sint.
Non contemnes vota hæc, si reputabis, non Bi-
bliopolæ esse, sed Civitatis.

X.

Ad Romanam Historiam Nieuporti

*Aloyſio Piſano Equ. ac D. Marci
Procuratori dicatam.*

Typographus.

CUM duos ante annos Romanarum rerum Historia vernaculo sermone scripta typis Venetis edi cœpiſſet, volumen primum tuis auspiciis ornatum iudicia hominum feliciffime ſubivit. Nunc primi illius beneficii memor totam ſe tibi commendat, eo ſermone ſcripta, quo res tantæ ſunt adminiſtrata. Nec tibi ſane majus aliquid dici potest; nec liber hic majore præſidio communiri. Nam nihil habet antiquitas, quod ſit iuſtius, quam Romana Reſp. nihil ætas iſta, quod magis illi reſpondeat, quam Veneta; nihil Veneta, ſi privata decora conſideremus, quod Piſano nomini præferri poſſit. Fortaſſe miraberis, qui fieri potuerit, ut tanta rerum moles terminis tam anguſtis comprehenderetur: ſed videlicet ita nota omnibus eſt Romana Hiſtoria, ut jam non indigeat niſi monitore, qui ſumma capita recenſeat, & veluti in tabella paucis notis ſignata demonſtret. Id omnino præſtitit Nieuportus. Noli igitur rem aliunde metiri, quam ex re ipſa. Quamquam vel minima quæque videri magna poſſunt,

si tutelæ tuæ commendata producantur. Ita comparati sunt homines in judicando, ut nomina quædam cum videant, quæ famam occuparunt, nihil sibi animo obijciant, nisi grande & egregium. Sed cum Operis ratio in tuto sit, quid ego de me dicam? Non enim audaciæ crimine carere videtur Typographus, qui sortis oblitus suæ, ad amplissimi Senatoris penetralia accedere audeat, & munuscula offerre. Sic hoc alibi crimen: apud tantæ humanitatis Virum crimen esset non accedere confidentissime. Patent ædes tuæ tenuissimo cuilibet: litteris vero præsertim, ac litterarum ministris, inter quos certe Typographi sunt, non modo locus patet, sed sedes etiam ornatissima ab Hermolao fratre comparata est. Vides igitur, cur multi undique ad te convolemus; cur reculas nostras offeramus; cur opem & auxilium importune etiam interdum postulemus. Perge agere pro magnitudine animi tui: & quando tantum fortunarum habes, quantum mortalitati felicissimæ potest esse satis, compara tibi benefaciendo immortalitatem.

XI.

Ad Virgilii Opera cum Masuicio edita
Venetiis

Aloysio Pisano Venetiarum Duci dicata.

Typographus.

CUM Latinorum Scriptorum bibliothecam edere Venetiis constituissem, a Virgilio Poetarum Principe incipiendum putavi: nunc autem cum tanti Operis conatum primum auspicii causa dedicare velim, quem potius, quam Serenissimum Venetorum Principem appellem? Profecto si Virgilius ipse in vivis esset, non alios sibi penates eligeret, nec alium locum suis carminibus quæreretur, quam in ædibus istis Palatinis. Erat enim illi ut vis ingenii summa, ita animus intra virtutis modum sublimis & elatus, exigua quæque despiciens, & ad magnorum virorum amicitias unice idoneus. Oportet esse Augustum, vel Augusto similem, qui velit cum Virgilio vivere, eique se patronum profiteri. Quis autem in hac Civitate Augusti mores, tantamque illam munifici ingenii indolem magis exprimit, quam Tu, Serenissime Aloysi, cui vix Romanæ opes ipsaque illa tam ingens Augusti fortuna satis essent, si tantum dare posses, quantum velles? Ita porro cultum & ornatum Virgilium assero, ut decet
bat

bat venientem in ædes tuas, ubi omnia ad exquisiti iudicii formam composita sunt. Nec impensis, nec labori peperci, ut domestica Pisano-
rum bibliotheca non indignus judicaretur; in qua Hermolaus frater tuus, ne quid insigne ad elegantiam & utilitatem desit, pro suo in litteras animo impensissime curat. Hæc illi nunc provincia est, postquam floridam, & firmam ætatem, atque adeo etiam viridem senectutem in Rep. administranda occupavit; ut cum fatis pro mortali conditione cedendum erit, numquam se sibi soli vixisse affirmare possit. Pro ejus salute & incolumitate, non secus ac pro tua, cum boni omnes, tum nos præsertim typographi beneficiorum memores quotidie vota facimus. Erit etiam usui, ut spero, labor hic noster Andreæ Nepoti tuo, lectissimo juveni, quem quotidie videmus in spem magnam succrescere, & ex litterarum studiis ad patriæ bonum præsidia petere. Multorum Sapientum opinio est, majora quædam adjumenta ad virtutem Poetas suppeditare, quam Philosophos: quod cum dicunt, non præmiscue omnes significant (sunt enim quidam & ex Poetis, & ex Philosophis prorsus vitandi) sed Homerum præsertim & Virgilium, quos litterarum vitæque magistros antiquitas omnis appellare consuevit. Verum ad Te redeo, quem puto, quos progressus res libraria per hos annos fecerit, libentissime visurum. Te Triumviro studia moderante, movere quodammodo lacertos cœpit; teque in primis auctore & suasore, veterum typorum gloriam in hanc Urbem revocavit. Nunc eo pervenit, quo erat maxime optandum; nec
jam

jam ab aliis nationibus, nisi forte in minuta diligentia vincimur. Si Tu industriam nostram, Princeps Serenissime, probando fovebis, nihil erit hoc in genere tam magnum ac difficile, quod in posterum suscipere non audeamus. Nam hoc ipsum, quod nunc urgemus, si quis cogitando metiri voluerit, quantum sit, inveniet profecto esse hujusmodi, ut non sine causa a tantæ dignitatis fastigio auspicia ducere voluerimus. Hæc Superi rata esse velint.

XII.

Ad Salustii Opera cum Cortio edita
Venetiis

Triumviris Litterariis dicata.

Typographus.

IN hac, quam edere institui, Latinorum Auctorum Bibliotheca, Salustium ceteris præire volui, qui soluta oratione scripserunt: quod tamen non meo, sed sapientum virorum judicio & auctoritate feci. Id vero mei consilii est, quod vos potissimum, Viri summi, ad rei tantæ præsidium & auspiciū appello, vestraque nomina longe splendidissima huic operi præpono: ut si quis forte dubitat, num re præstare velim, quod pollicitus verbo sum, eos meæ hujus voluntatis veluti sponsores habeat, de quorum fide dubita-

re nemini mortalium liceat. Siqua procuratio est in hac Urbe, quæ magnos viros & publici Consilii principes poscere videatur, ea certe literaria est, quæ tanto aliis præstat, quanto animi cultus reliquis humanæ vitæ commodis & ornamentis præferri solet. Qui Rempublicam hanc constituerunt iis legibus moribusque temperatam, quibus maxime populorum felicitas contineretur, hoc vel in primis spectasse videntur, ut cunctas nationes, si opibus & potentia non posset, litterarum tamen & bonarum artium cura superaret. Id porro fieri non poterat, nisi simul de peculiari quodam Magistratu cogitassent, cui summa arcani hujus concederetur; quique ea esset dignitate ac potestate, ut rem tantam inter humanas vicissitudines, quæ omnia corrumpunt, sartam tectamque servare posset. Quanta porro cura sit adhibita, quot quantæque sollicitudines susceptæ sint, ne quid umquam detrimenti caperet, nihil attinet commemorare. Quod si tam graves cogitationes efficere non potuerunt, ut aliqua ejus particula interdum non laboraret; id tamen effecerunt, ut cito levaretur, & pristinas vires vigoremque reciperet. Videtis, opinor, me de industria loqui Typographorum, quæ cum superioribus annis remissior videretur, nunc rursus sese effert, & ad pristinam laudem reflorescit. Ego certe, quantum in tantulo esse homine potest, omnia movi, ut typis Venetis sua dignitas & fama redderetur. Quod cum ex aliis mea opera editis voluminibus judicare potestis, tum ex hoc ipso maxime judicabitis, quod vestris nominibus ornatum in vulgus exit. Ad externam formam &

appa-

apparatum quid præstiterim, quilibet facile cognoscet; internæ diligentiae, quæ rem ipsam attingit, illi duntaxat iudices erunt, qui Salustianas historias tractare voluerint, nostramque hanc editionem cum Lipsiensi conferre. Non magnum fortasse est, quod fecimus, sed certe fecimus aliquid. Quidquid est, in vestram fidem ac tutelam concedit, vobisque se etiam atque etiam commendat; a quibus tamen nihil aliud, quam communia illa præsidia petit, quæ ad rem litterariam promovendam majorum sapientia paravit, vestrisque judiciis commisit. Pergite, ut cæpistis, singulis atque universis ex ordine nostro benefacere; qui ordo jam ita crevit, ut ne illa quidem tempora, quæ aurea dicuntur, in hujus laudis contentionem venire possint.

XIII.

Ad Psalmos Davidicos cum Bossueti
interpretatione

Cajetano Joanello Episcopo Bellunensi dicatos.

Typographus.

Nullus Episcopus aut nostra aut patrum nostrorum memoria tam multa tamque utilia pro religione & Ecclesiæ disciplina scripsit, quam Jacobus Benignus Bossuetus: ut proinde sapienter facere mihi videantur, qui ad tantam digni-

gnitatem accedentes, hunc sibi Antistitem, tanquam exemplar, proponunt ad imitandum. Haud equidem dubito, quin tu id feceris, Præsul amplissime, quem scio totis viribus omnique contentione ad eas virtutes conniti, quibus veteres Episcopi beatissimis Ecclesiæ temporibus floruerunt. Caput Episcopalis muneris Sacrarum Litterarum interpretatio est: Sacrarum autem Litterarum pars nobilissima & utilissima communi omnium judicio Davidici Psalmi judicantur. Hos tibi offero Bossueti industria & acumine explicatos, ut si nihil præterea tantus vir edidisset, hoc uno tamen opusculo immortalitatem promereri potuerit. Sed cui hæc? Tu ne ignorare potes, aut quantum sit in Davidicis Psalmis dignitatis & utilitatis; aut quinam interpret cælestis illius eruditionis thesaurum melius reclusit? Tu, inquam, tanti nominis famæque Orator, qui Divini verbi semina cum late funderes per Italiam, & extra Italiam, Psalmis præsertim eorumque præceptis longe sanctissimis uti solebas, ut Christianos homines a virtute aberrantes in viam revocares, revocatos confirmares? Quantus es, totus ferme ex hoc fonte es. Itaque etiamsi meum in te studium contemnere velis, quod certe pro tua incredibili bonitate non facies, id tamen contemnere non potes, per quod tibi studium hoc ipsum declaro. Jamdudum insidet mihi animo voluntatis & observantiæ erga te meæ significandæ desiderium: maximeque velim, si fieri potest, Fratres tuos literis & Ecclesiæ addictos una eademque opera demereri. In diversa vitæ ratione singuli plane insignes, præclarissima Christianæ religionis Instituta

tuta familiasque ornant, doctrina prudentiaque instructissimi, & ad magna quælibet, non dicam facti, sed nati. Non est hic locus, ut singillatim de unoquoque dicam, quia nimis multa dicenda essent; sed certe Sacri Palatii Magister præteriri non debet, Vir summus & in summa luce positus, cui nihil tam magnum prænunciare possumus, quod non multi ante nos prænunciaverint. Huic ego quantum debeam, debeo autem plurimum, alio loco & tempore, si Superi faxint, significabo. Interim ad te redeo, de quo nihil amplius dicam, quam plures Pontifices, hoc est summos Christianæ rei iudices ac moderatores, tuorum meritorum fama permotos, honorifice sensitse, teque benevolentia & honoribus complexos esse. Judicia hæc tam gravis auctoritatis nos quoque pro virium & fortunarum nostrarum conditione sequimur, tribuentes tibi quantum possumus, nomenque tuum ad immortalitatem typis nostris propagantes. A te vero illud enixe petimus, ut contentiones nostras æquo animo excipias, consilio regas, auxilio promoveas; ne tot tantæque impensas in Codicibus Sacris edendis sine causa fecisse videamur. Si ita, ut spero, industriæ nostræ favebis, & facies pro dignitate personæ quam sustines, & nobis ad graviora suscipienda stimulos addes.

XIV.

Ad Opusculum Bossueti Venetiis editum

*Joanni Benedicto Joanello S. Palatii Magistro
dicatum.*

Typographus.

INter gratulantium officia, quæ te undique circumstant, Reverendissime Pater, noli tenuem hominem contemnere, qui qua una ratione potest, suum in te studium & observantiam publice testatur. Sicui iusta est in tuis dignitatibus lætitiæ causa, ea certe iustissima Typographis est, quorum industriam, cum Bibliothecæ Casanatensi præesses, tam benevole excitasti, ac bene sperare iussisti. Facit hoc porro ad immortalem sapientissimi Pontificis Benedicti XIII. gloriam, ut sæculo appareat, eorum fortunas promoveri, qui rem litterariam promovent. Numquam sane Christiana Religio detrimentum capiet, donec erunt, qui librorum curam suscipiant: & hi quidem tamdiu erunt, quamdiu Pontifices rerum domini illos non præteribunt. Te vero quis est unus in Italia tota, qui majore cura hoc in genere versatus sit; qui plures libros tractarit, excusserit, cognoverit? Neque tamen interim graves disciplinarum exercitationes omisisti: qua de re multa dicerem, si possem ultra crepidam. Quod attinet ad rem præsen-

sentem, habes, quid me in primis moverit, ut tibi volumen hoc nuncuparem. Quamquam si nihil aliud, quam virum quæsissem, qui de ejus præstantia recte judicaret, attamen tuum illi nomen apposuissem, atque hinc potissimum auspicia duxissem. Tu, si pristinam humanitatem & facilitatem in isto fastigio retines (cur autem non ætimeas?) voluntatem erga te meam non improbabis. Vale.

XV.

Ad Opusculum Bossueti

*Josepho Maria Caccia Episcopo Zacynthi
dicatum.*

Typographus.

Qui magnorum Scriptorum opera his temporibus edunt, omnem ferme curam & industriam in papyrum typosque conficiunt. Ego sane cum Bossueti opus prælo committere instituissem, partem hanc non omisi; sed tamen, ut editionem emendatam, quam ut nitidam darem, multo diligentius laboravi. Id ipsum in causa est, ut a te potissimum auspicia petam, Sapientissime Præsul, qui conatus hosce nostros non modo dignitate nominis illustrare potes, sed & ingenio expendere, & auctoritate, veluti testimonio quodam, de quo dubitare non liceat, ad aliorum

commendationem propagare. Agitur de Episcopo pietate doctrinaque plane insigni: cujus proinde scriptis si quod præponendum nomen est, tuum certe præponi debet, qui utroque in genere tantopere excellis. Habes in hoc volumine, quod ad commissi tibi gregis utilitatem traducas: habes in Auctore tanquam Episcopalis vitæ canona, quem imiteris. Quamquam ipse ita te geris in munere tam gravi, ut aliis exemplo esse possis. Non est profecto Typographi in hujusmodi fastigium oculos conjicere, multo vero minus de illo judicare; attamen maximarum rerum splendor late funditur, nec summis modo, sed etiam infimis se prodit. Utcumque sit, præclare mecum agi existimabo, si quid mea opera & impensis fecisse videbor, quod tibi probetur. Vale cum tibi, tum nobis, tum vero maxime populis istis, ad quorum salutem & felicitatem animi tui cogitationes operamque contulisti.

XVI.

Ad Opusculum Bossueti

*Josepho Maria Caccia Episcopo Tigurino
dicatum.*

Typographus.

ECce tibi alterum Bossueti opus nec minus eruditum, quam quod anno superiore dedi,
nec

nec te minus dignum. Illud tibi Romam eunti
 tanquam comitem adjeci; hoc redeunti obviam
 fit, & nova nomina novosque titulos gratulatur.
 In Urbe illa, quæ nihil fere admiratur, id con-
 tingere plerisque omnibus solet, ut eorum præ-
 sentia famam minuat, tuam auxit. Itaque te o-
 ptimus ille Pontifex Benedictus XIII. incredibili
 benevolentia complexus est, donisque & honori-
 bus cumulavit: Clemens vero XII. acerrimi judi-
 cii Princeps ad alium Episcopatum, priore vix
 suscepto, inusitata quadam beneficentia transtulit.
 Enimvero singulari virtute & prudentia præditum
 esse oportet, qui utrique Pontifici tantopere pla-
 cuerit; qui temporibus admodum diversis idem
 sit visus; quem prior illa, & altera hæc Aula,
 ingenio studiisque dispar, eodem animo excepe-
 rit. Quod autem plurimi faciendum est in tanta
 dignitatis amplificatione, nunquam oblitus Soda-
 litii tui, nihil omisisti, quod ad ejus honorem &
 commodum pertineret: ut omnes intelligerent, te
 non modo spectare, quo ires, sed etiam unde exi-
 res. Id demum sapere est, seque adversus invi-
 diam probe munire. Ex isto igitur fastigio, quo
 te Superi extulerunt, noli Bibliopolam despiciere,
 qui suam operam, suasque impensas tuis auspiciis
 promovere cupit. Episcopus nec sine litteris fe-
 rendus est, nec litterarum studiosus videbitur, si
 artem hanc nostram contemnat. Ego nervos o-
 mnes contendere statui, ut res bene cedat: sed
 multis præsidiiis indigeo, quæ nisi a summis vi-
 ris, fama nominis & exultatione præditis, spe-
 rari nequeunt. Te nunc appello, cui præla ty-
 posque meos commendavi, quem auspiciem & au-

florem mearum contentionum jam constitui. Fac pro animi tui magnitudine, ut cœptis annuas, spesque nostras probando confirmes.

XVII.

Ad Conciones D. Thomæ de Villanova

*P. Magistro Zazzeri ex Ordine D. Augustini, in Romano Archigymnasio
S. Litterarum Professori
dicatas.*

Typographus.

Quem tu tibi vitæ morumque ducem ac magistrum, post D. Augustinum, jamdiu elegisti, is ad te venit, tuoque nomine & auspiciis Venetam hanc suorum operum editionem ornari jubet. Potesne animo minus æquo patronum excipere, qui se tutelæ tuæ fideique committit? Scilicet cum ego cognovissem ex honestissimo viro, eodemque doctissimo P. Magistro Jo. Thoma de Bonis, ejusdem familiæ alumno, te in primis D. Thomæ Villanovani ingenio delectari, ejusque Conciones habere in deliciis; in eam opinionem veni, ut has ipsas Conciones meis typis editas tibi instituerem; ut me quoque muneris dignitate commendatum benevole exciperes. Jamdiu fama percrebuit, quanta sapientia & eruditione Sacras Litteras in isto Gymnasio Christiana-

stianæ ditionis principe profitearis; & pro instituti mei conditione satis intelligo, quid ab ingenii tui magnitudine & fecunditate sperare libarius possit. Magnum tibi exemplar proposuisti, Oratorem, Theologum, hominem publico bono natum; qui non solum fecit, sed docuit, nec ætati modo consuluit suæ, sed posteritatis quoque rationem habere voluit. Laudo, quod cultum ejus pie religioseque promoveris; quod actiones accurate descripseris; quod dicta ejus factaque omnia in bono lumine ad imitandum collocaveris: at illud quoque sperare juvat, ut quemadmodum Thomas suarum exercitationum monumenta extare voluit, & ad famam sempiternam propagari, ita tu quoque lucubrationes tuas exire aliquando patiaris, totique Europæ, non uni dumtaxat Civitati, usui & ornamento esse. Interim meam hanc in te voluntatem, studium, & observantiam vel proba, vel saltem noli contemnere; quandoquidem vides, me, quod facio, non ideo facere, ut grande aliquid nomen huic volumini præponam, sed ut nomen idoneum. Virum quæsi, non titulos: nec tam reputavi, quid Typographo, quam quid Operi conveniret.

XVIII.

Ad Goari Euchologium

Nicolao Caragiano Viro Navo dicatum.

Typographus.

OPUS hoc tam eruditum, idemque tam rarum, suatore & auctore te, Vir præstantissime, typis meis recudendum suscepi: in quo cognoscere potuisti, quantum judicio tuo tribuam. Nunc cognosce, quantum auspicio & patrocinio. Alii sibi magna nomina quærunt: ego magnum hominem quærere volui. Jamdiu enim in te admiror (quis autem non admiratur?) incredibilem quandam consilii & prudentiæ vim, qua mercaturæ rationes universas ita tenes, ut fortunam auctorasse quodammodo videaris, & rationi subjecisse. Porro mercaturam cum dico, nervos Civitatis dico, unde privatæ publicæque opes, unde nationum potentia, unde humani generis felicitas. In hoc laudis genere cum tantopere excellas, non tamen hoc uno contentus es, sed in litteras quoque & eruditionem excurris. Horum alterutrum ingenia vel maxima fatigat; utrumque fatigare tuum non potest. Quandoquidem autem Græcis studiis, hoc est patriis, maxime delectaris, habes hic unde animum pascas cognitione pulcherrima, eademque utilissima. Sed non est opus, ut tibi commendem quod tibi jamdiu familiarissimum est;

est; atque adeo quod aliis multis probatum in
confido, quia tibi probatur. Pauci enim sunt in
re hac, qui utantur judicio suo; pessimeque no-
biscum ageretur, si illi dumtaxat libros compara-
rent, qui librorum pretium ipsi per se cognosce-
rent. Hac spe vel in primis fretus Goari Eu-
chologio animum adjicere non dubitavi; nullique
aut diligentiae, aut impensae peperci, ut, cum a
me exiret, nomen tuum ferre cum dignitate pos-
set. Ecce tibi totam voluntatis industriaeque mea-
rationem, cui si tu pro tua humanitate favebis,
invidorum rumusculos identidem in me conatus-
que meos excitari solitos magno animo conte-
mnam.

XIX.

Ad opus Cardinalis Quirini Venetiis
recusum

*D. Leopoldo Capello S. Georgii Majoris Ve-
netiarum Abbati dicatum.*

Typographus.

QUamquam Volumen hoc, Reverendissime
Pater, suis auspiciis uti potest, & jam pu-
blici judicii periculo perfunctum, sine metu pro-
dire; attamen libuit mihi consuetudinem sequi, &
nomen quærere Viri magni, quod ipso in limine
compellarem. Ac ceteri quidem, quidquid hujus-

modi faciunt, sua causa faciunt: ego autem cum cepi consilium hoc, nihil aliud cogitavi, quam ut tibi, tuisque Monachis publice gratularer, quod instaurata Benedictini nominis gloria, principes Ecclesiæ dignitates ad vos redeant, apud quos superioribus sæculis tantopere floruerunt. Alii dabunt causas alias. Sed nisi fallor, bonarum disciplinarum studia mirum in modum a vobis hoc tempore exulta Ordinem vestrum rursus erexerunt, & in veterem possessionem restituerunt. Ecce tibi monumentum rei hujus longe clarissimum: quod unum poterat, si reliqua defuissent, Auctorem ornare suum, & ad summos Ecclesiæ gradus provehere. Prodit typis meis, qui Romanos excipiunt: & ut auspicato prodiret, tibi potissimum commendari debuit, in quo uno summa sunt omnia ad communem non tuorum modo, sed totius Civitatis benevolentiam & existimationem. Video, quam parcus in judicando debeat esse Typographus: at certe communi sermone percrebuit, neminem unum Ordinis sui dignitates celerius obtinuisse, neminem, cum obtineret, magis dignum esse repertum. Jam fastigium tenes: attamen vota nostra longius protenduntur; nec pati possunt, virtutem tantam finibus domesticis contineri. Ita Superi faxint, uti volumus. Interim accipe ingenuam hanc cultus atque observantiæ significationem ab homine tibi devotissimo, qui si quid majus, vel melius haberet, hoc ipsum lubenti animo in obsequium afferret.

XX.

Ad Opusculum Eruditum

*Jo. Francisco Musello Capituli Veronensis
Archipresbytero dicatum.*

Typographus.

INcommode sane mecum ageretur, si libellum hunc ad eos afferrem, qui lucubrationes literarias non pluris æstimant, quam quanti moles ipsa, oculos, non ingenium adhibentibus, æstimanda videtur. Scio equidem, quod æstimatores hujusmodi frequentissimi sint, in morem venisse, ut magna nomina nisi magnis voluminibus non præponantur. Sed illud quoque scio, sæpissime contingere, ut tanta hæc nomina pluteis nostris inclusa æterno pulvere sædentur, vel quod miserius est, pisciculis involvendis devoveantur. Prodit auspicio tuo, Præstantissime Vir, exigua hæc Ecclesiasticæ eruditionis particula; quæ tum merito suo luce & cognitione hominum digna est, tum vel maxime, quod ab eo sit illustrata; qui & multis doctrinæ generibus valet, & rerum sacrarum totiusque Christianæ Historiæ pericia longe plurimum. Verum neque hic a nobis commendari vult; neque tibi commendanda sunt illa, quæ a te ipso profecta aliquo modo videntur. Siquidem huic Dissertationi causam præbue-

buerunt monumenta illa, quæ ex insigni Canonico-
 rum Veronensium Bibliotheca descripta sunt, &
 nos missa, auctore te, annuente Collegio toto,
 operam suam studiose navante Collega tuo Jose-
 pho Blanchino, tanti Thesauri custode, magni
 Patru æmulatore. Itaque meum hoc non tam
 donum tibi dicatum dici debet, quam gratiarum
 actio, & debita quædam cultus atque observan-
 tiæ significatio erga viros de nobis, totaque re
 libraria optime meritos. Abdant alii divitias suas,
 lucem perosi, & publicum litterarum bonum; a-
 lant blattas & tineas; caveant ne humano gene-
 ri utiles sint. Capitulum Veronense cum rebus
 aliis, tum hoc in primis emineat, quod ad sacra
 studia promovenda privatas opes in medio ponit;
 quæ certe ne opes quidem dici possunt, si in te-
 nebris jaceant. Hæc Typographus in gratulatio-
 nem effusus. Sed illi plura dicent, quorum ma-
 xime interest antiquas memorias evolvi, & in
 commune veritatis ac religionis commodum evul-
 gari. Vale, & perge similia facere.

XXI.

Ad Gravinæ Origines Juris Venetiis
recusas

*Carolo Pochino in Patavino Lyceo Scientiæ
Criminalis Professori dicatas.*

Typographus.

OPus tibi afferò & merito suo, & publico
judicio inter ea, quæ Classica dicuntur, col-
locatum. Si quid ad speciem & pompam littera-
rum ederem, quæsissem regalia nomina, quibus
tamquam Diis thura sacrarem. Homini tam gra-
vi, tam docto, tam rerum humanarum perito
nihil est exhibendum, nisi solidum & duraturum.
Illud etiam animo reputavi, tam insigne Juris-
prudentiæ monumentum aut nullius tutela indige-
re, aut ejus dumtaxat, qui in hac ipsa disciplina
longe multumque præstaret. Tutela porro hæc
unde advocanda erat, nisi ex Gymnasio Italiæ
principe? Ex eo vero Gymnasio quis potissimum
compellendus, nisi ille qui & in eo collocasset
ætatis florem, & post forenses quadraginta an-
norum operam maturos senectutis fructus eodem
contulisset? Ego equidem semper existimavi, sum-
mos illos Viros, quibus litterarum procurationem
Venetus Senatus commisit, eximia quadam pro-
videntia & consilio provinciam tantam admini-
stra-

strare; sed cum te in Patavinam Academiam revocarunt, visi sunt nobis non sua modo virtute regi, sed a fortuna adjuvari. Non enim facile erat hominem invenire, qui Doctrinæ Criminali tradendæ pro loci dignitate præficeretur. Reliquas Jurisprudentiæ partes ad usum & eruditionem plurimi colunt: Criminalia paucissimi ad fori contentiones tractant, ad publicam docendi laudem vix singulis ætatibus singuli. Jam in arena es: & expectationi, quæ de te fuit, cumulatissime respondes. Verumtamen est aliquid, quod non Scholæ modo istæ, sed nos quoque Typographi a te expectemus; scilicet Criminales Institutiones, sine quibus totum hoc studium videtur quodammodo claudicare. Sed nolo stimulos currenti addere; neque vero is sum, qui addere possim. Habes in Gravina hujus laudis exemplum. Hac via ad famam, & ad illam quam vocant immortalitatem contenditur.

XXII.

Ad Epithalamium

Veneto Senatori dicatum.

NN. NN.

MAgnum esse quippiam fortasse credes, præstantissime Senator, quod tibi a duobus offertur. Sed si eos pendes, qui afferunt, idcirco intelliges collatis viribus adniti voluisse, quod al-

ter

rer sine altero minus valeret, tuæque dignitatis fastigium formidaret. Non ipsa igitur res tanti est ut digna duobus judicari possit; sed ea est amplitudo tua, ut qui ad illam velit accedere, munire se debeat, & in negotii partem adiutores accire. Sentimus profecto, quid sit de tua familia dicere; sentimus, quid sit dicere de te, in quem unum totius familiæ decora per multos propagata descenderunt, ac velut in bono lumine posita conspiciuntur. Nec vero ita difficultatem superari posse, verumtamen fieri minorem putamus. Quod enim singuli facultate dicendi efficere non possumus, id vocum consensu & clamore quodam fortasse efficiemus. Sed cur, inquis, tam multa latine, cur Græce aliqua, cur Hebraice? Cathedram hæc, non thalamum sapiunt. Videlicet non pueris tædas ferentibus, aut populo dicenti Thalassionem hæc scripsimus; sed tibi optimis litteris excultissimo, tuique similibus, siqui sunt. Non deerunt chartulæ, quæ femellis; non deerunt, quæ popello propinentur. Ea nos una cura tangit, ut tibi probemur: probari autem nequit, qui ab antiquæ eruditionis ac sapientiæ fontibus longe abeat. Ecce tibi totam consilii factique nostri rationem. Sed vereor, ne magna conati simus, minima præstiterimus. Utcumque se res habet, accedimus magno animo non tam ad iudicem, quam ad patronum; nec putamus velle te lætissimo die gravius quippiam de nobis consulere. Quamquam non potes ullo tempore ab illa desciscere beneficiendi voluntate, qua nos tibi jamdiu devinxisti, nisi a te ipso desciscas. Nostra cum recipis, tua recipis; Tua enim sunt, quæ patrocinio muniuntur

untur tuo, foveantur bonitate, gratia, & auctoritate promoventur. Ita nobis Superi paullo plus virium aliquando concedant; faxintque, ut ingentibus beneficiis, quibus nos cumulasti, majore aliquo grati animi testimonio respondere possimus. Quod cum multis de causis tota vita desiderabimus, tum vero maxime, ne audacter nimium fecisse judicemur, cum nosmet tuis adnumeravimus.

XXIII.

Ad Scholasticam Concertationem

Urbis Prætori dicatam.

NN.

ET si conspectus vester, totaque loci hujus amplitudo ita me terret, ut vix spiritum vocemque regere possim: attamen gratulor, oblatum mihi tempus & causam esse, ut studia mea ab eorum injuria vindicem, qui in splendido quodam æquitatis nomine gloriantes, Romanas leges, omnemque Jurisprudentiam contemnunt. Neque vero mihi æquitatem oppugnare in animo est; quam si quis populus coluit, is certe Romanus fuit, ita in judicando æquus, ut si agendi formulas excipias vetustis verbis adstrictas, nihil umquam neque Græci, neque barbari hoc in genere desideraverint. Sed isti fortasse cum æquitatem dicunt, quid sibi velint, non satis intelligunt; quasi ve-

si vero æquus esse possit, qui juris principia non tenet, & arbitrio quodam nulla doctrina temperato de mortalium bonis & capite pronunciat. Æquus, nisi fallor, is est, qui in gravi controversia iudex constitutus, non rem ad verba legis, sed verba legis ad rem accommodat; & pro loci, temporis, ac personarum natura mentem ipsam Legislatoris interpretatur. Qui fieri igitur potest, ut hunc modum summo juri ponat qui jura non novit; mentemque explicet Legislatoris, qui leges quales sint, numquam didicit? Verum isti quidem, contra quos dicimus, non jura, sed Romana jura insectantur; nec ferre possunt, nos tantum unius gentis prudentiæ tribuere, ut ea una orbem terrarum regendum judicemus. Ajunt, mutatos esse mores, mutatum reipublicæ statum, mutatam religionem esse: & quemadmodum diversis morbis non eadem est adhibenda medicina; ita vitiis, quæ nunc sunt, ab illa ætate diversis non easdem posse leges opponi. Si dicerent hominum mutatam esse naturam, tum vero aliquid dicerent. Siquidem vix quippiam Romanis legibus præcipitur, quod non sit a naturæ præceptis aliquo modo ductum. Sed quando morborum similitudine delectantur, maxime velim ut reputent, neque morbos hoc tempore esse diversos, neque vitia; ideoque & easdem exerceri curationes posse, & eadem jura administrari. Consule igitur naturam, inquit, a cujus præceptis leges ipsæ prodierunt; atque ita multo facilius, multoque brevius ad æquum & bonum pervenies. Enimvero si natura teneri ac perspicui posset sine doctrinæ lumine, optime monerent; sed in hoc

summa laboris est, ut cognoscatur, quid naturā requirat. Quam quidem naturæ quasi vocem cum præclarissime omnium Romani Jurisperiti cognoverint, ejusque admonitione judicandi prudentiam constituerint, cur volumus per invidiam, quod est ante pedes omittere, peregrina consecrari? Videant, quæso, isti importuni æquitatis patroni, seu potius juris legumque hostes, quanti Romanas leges faciat sapientissima Venetorum Respublica, in qua tamen, tamquam in regno suo, æquitas dominatur: quæ sane Respublica non ex toto terrarum orbe principes Jurisperitos acciret, magnisque præmiis in hac urbe aleret, si Romana jura cum æquitate pugnare arbitraretur. Vos mihi, Auditores, eorum, quæ dico atque defendo adstipulatores, atque adeo auctores estis; quorum judicium apud me tanti est, ut etiamsi ratio desit, in hoc tamen uno conquiescam. Sed quod callidi Oratores facere solent, ut firmissimum quodque testimonium extremo loco ponant, eoque rem claudant, id ego quoque facio; teque testem voco, Senator amplissime, hujus Civitatis Moderator, cujus judicia satis superque ostendunt, quomodo possit legum jurisque ratio cum æquitate conciliari. Gratulor ego mihi etiam atque etiam, quod te Prætore ac judice, meum hoc in Romanas leges studium ostendere possim; totiusque industriæ meæ, qualiscumque est, in disciplina tam nobili collocatæ, specimen tibi potissimum exhibere.

XXIV.

Ad Scholasticam Concertationem

Duobus dicatam.

NN.

Quam nihil de me pollicear, Viri sapientissimi, vel ex hoc intelligi potest, quod me conatusque meos utrique vestrum commendo. Si enim mihi unum in tanto discrimine Patronum delegissem, non tam mihi ipsi diffidere, quam ex consuetudine facere visus essem: at vero duos cum appello, de insigni quadam virium mearum imbecillitate fateor, qui a duobus tanta dignitate & auctoritate viris auxilium petam. Sed quam, inquiet aliquis, tantæ molis provinciam susceperis, ut non satis tibi opis ab uno tanti nominis tantæque auctoritatis viro futurum sit? Equidem non ignoro, quos advocaverim, quorum alter amplissimæ Dioceseos negotia incredibili prudentia sustinet; alteri ad sustinendum non animus, aut vires desunt, sed occasio. Verumtamen, utcumque sit, juvat Adolescentem non una de causa perterritum habere plures ingentis pugnae auspices, a quibus bene sperare jussus, & in magnam boni exitus spem erectus animose congregiatur. Non ita facile in hanc arenam laboris aleæque plenissimam sine tantis auspiciis descendissem; quod & me ipse recte norim, & insignem rerum Logi-

carum supra ceteras Philosophiæ partes difficultatem. Facite igitur, Humanissimi, ut qui vestra bonitate ac sapientia confirmatus plura & majora viribus audere cœpi, in eadem illa sapientia & bonitate, si quando defecero, perfugium inveniam.

XXV.

Ad Thesium Libellum

Præsuli dicatum.

NN.

QUI se eximium aliquid fecisse putant, cum tibi, Præsul amplissime, Theologicas, vel Philosophicas Theses dicarunt, ii sane neque tuam istam Dignitatem divinæ proximam, neque seipsos fortasse norunt. Nisi forte hac in re ita fieri judicant, quemadmodum Midæ accidisse Poetæ narrant, ut quidquid ipse tangeret, novam continuo formam indueret, & in aurum converteretur. Nihil est enim tam leve ac minutum, ut si tibi placeat, non tua statim dignitate crescat, & supra naturam suam quodammodo effertur. Sed utcumque res se habeat, ego equidem non ausim hujusmodi munusculis ad Præsulem præstantissimum accedere, ipsique de me sine magna causa polliceri. Quid igitur, inquires, hocce libelli est, quod mihi obtrudis? Hoc scilicet tuum est, quippe tua sunt omnia, quæ ab hac nostra infirmi-

mitate ingenii proficisci possunt ; neque te tanta cum molestia detinerem, nisi ageretur de re tua, aut si meum hoc debitionis officium ullo modo dissimulari potuisset. Studiorum meorum ratio ita postulare visa est, ut cum elementa litterarum & artium prima in hac Urbe didicissem, continuo Patriam desererem, & secretiora Patavinarum Musarum penetralia subirem ; sed tamen ab eo usque tempore firmissime statui curriculum hoc absolvere auspicio tuo, & eo demum redire tamquam in portum, unde discessem. Excipe me igitur non velut alienum hominem munera ferentem, quæ me tibi commendent, sed omnino tuum patria, voluntate, obsequio, vitæ instituto. Ita enim fiet, ut ex probatione tua crescat in nobis laboris amor, tantumque nitamur, ut tandem aliquando, auspice te, grande aliquid, tuoque dignum nomine afferamus.

XXVI.

Ad Scholasticam Concertationem

Cardinali dicatam,

N N.

Qui tua sibi in publicis certaminibus auspicia poscunt, idem fere omnes profitentur, quantumvis non idem sentiant. Ego vero quid sentiam, non erit tibi difficile judicare, siquidem reputabis, quid mihi sentire necesse sit. Ac pri-

mum quidem si quid ad observantiæ significationem valet dicatio hæc, cui potius, quam tibi debebatur Principi ac Patrono, non dicam maximo, sed plane uni? Sin autem ad opem & præsidium implorandum instituta est, quis est omnium, qui magis indigeat, quam ego, qui præter morem & institutum sine ullo adiutore in præsens discrimen conjicior; aut a quo magis sperare debui, quam ab illo, cujus benevolentiae testem & laudatorem domi habeo? Nihil a nobis expectare debes ad adulationem compositum; nihil ex illa mercimonii lege, qua plurimi solent munuscula hæc ad viros principes afferre, ut majora quædam ab illis corradant. Id unum mihi proposui, ut præsidem atque auspicem industriæ hujus qualiscumque meæ invenirem; nec vero alius aut dignitate major, aut moribus gravior, aut bonis artibus ornatior in hac Urbe inveniri poterat. In hac Urbe autem? Singularia quædam sunt in te ornamenta virtutum, quæ Italiam universam in admirationem ducere possint. Sed non est hic laudum tuarum locus, nec multa in tantis angustiis dici possunt, nec pauca debent. Quod nunc agitur, fave conanti: tantum enim mihi esse virium in hoc periculo existimabo, quantum ipse humanitatis & benevolentiae attulisse videberis.

XXVII.

Ad Scholasticam Concertationem

Nobili Viro dicatam.

NN,

Multi mirari solent, cur adolescentes, qui hunc in locum ornatissimum veniunt, leve quoddam suorum laborum specimen daturi, magnorum virorum auspicia petant, & Numina ipsa, ut ita dicam, sine causa fatigent. Fateor equidem exercitationes has nostras non esse ejusmodi, ut ingenti præsidio egeant: sed nisi tales quasdam occasiones captemus studii nostri quoquomodo significandi, quid est aliud ætati huic tam imbecillæ, per quod possit benevolentiam sibi & æstimationem in litteris aliquam conciliare? Quamquam si nemo unus ad hæc officia descenderet, ego tamen illa præterire non possem, tum quod supra ceteros patrocínio indigeo, tum quod nihil omittere debeo, quo meum erga te cultum & observantiam multis rebus obstrictam significare possim. Accedit huc vetus parentum meorum, totiusque familiæ erga te studium: quod quidem me in hoc discrimine ad tuam fidem & tutelam non modo ducit, sed prope impellit. Oportet enim hoc velut hæreditarium esse, & quam fieri longissime potest, propagari. Nunc vides pro tua sapientia & æquitate, quid ego possim: in

posterum pro modo ætatis & virium conabor efficere, ut tua beneficia non male collocata in nobis existimes.

XXVIII.

Ad Scholasticam Concertationem

Monastica Familia Præsidi dicatam.

NN,

SÆpe mecum cogitavi, qui fiat, ut nemo velit publicas exercitationes suscipere, nisi sit aliquis, cui se suaque studia commendet tamquam auspici ac patrono. Hujus rei multas esse video causas, quas singulas si recenserem, nonnihil invidiæ, cum minime opus est, fortasse subirem. Ego, ut de me dicam, non aliunde mihi patrocinium peto, quam unde tota rerum mearum ratio pendet; unde domus hæc nostra & familia decus & præsidium nata est. Tu scilicet mihi auspex esse debes, præstantissime Vir, cui nec ingenium deest ad cognoscendum, nec humanitas ad ignoscendum. Multiplex habemus animi tui specimen singuli atque universi in studiis colendis, in disciplina asserenda, in templo hoc ornando, in rebus domesticis restituendis: neque ullus est qui non videat, ad summas in Ordine nostro dignitates consequendas nihil deesse tibi præter ætatem. Ego equidem tantas hæc animi dotes & ornamenta sæpe miratus tempus quæsi, quo
meum

meum in te studium publice patefacerem, mihi-
que meisque de bono tam insigni gratularer. E-
rit hoc non meæ modo, sed communis volunta-
tis argumentum ad omnem sæculorum memoriam
propagandum: ut qui tam gravi officio in poste-
rum fungentur, habeant quo aspiciant,

XXIX.

Ad Scholasticam Concertationem

Viro Nobili dicatam.

NN.

Nihil est, quod hominem homini procul a
patria degenti magis conciliet, quam vin-
culum patriæ ejusdem: quod eleganter expressit
Virgilius, cum Æneas in Epirum fato compul-
sus, Helenum & Andromachen invenit. Satis
dixi, ut intelligas, Vir nobilissime, cur ego in
præsentem mearum virium discrimine ad te potissi-
mum confugiam; teque mihi auspicem & patro-
num magna quadam animi firmitate fore confi-
dam. Venetus Venetum appello. Neque tamen
appellare auderem, nisi quid amplius, quam pa-
triæ nomen in te spectarem. Tanta ista ingenii
naturæque facilitas, tanta animi magnitudo, tan-
tus in omni victu cultuque splendor potest alli-
cere alienos quoque, ut in fidem tuam tutelam-
que concedant. Sentis, opinor, magno te Super-
rum beneficio ex illa Coreyrensi calamitate ser-

A a f

vatum

vatum esse, ut humano generi benefaceres, & multos mortales tuâ opera præsidioque servares. Sustines profecto ex illo die, si recte cogitas, ingens onus; reddendum tibi est, quod accepisti; ferendum periclitantibus auxilium; monumenta animi erga Deum memoris & grati ubique ponenda. Atqui ego perinde loquor, quasi stimulis egeas. Cæcus enimvero sim, nisi splendida hæc tuarum virtutum ornamenta videam, quibus incredibilem tibi exultationem & benevolentiam comparasti; deinde vero etiam amens, si verear, ne tuis deesse velis. Verumtamen parce hominibus sua infirmitate, quemadmodum debet, judicanti. Ita sumus natura comparati, ut cum reputamus, nihil esse in nobis eximium, quod aliorum erga nos studium & voluntatem movere possit, causæ nostræ valde timeamus: sed cum semel sperare cœpimus, nihil est tam difficile, quod nobis non polliceamur. Fac igitur pro tuo isto benemerendi desiderio, quod vultu ipso ad humanitatem mirifice composito significare soles, fac inquam, ut in spem aliquam tui beneficii veniam; & hoc velut omine loci hujus fortunam disputando pertentem.

XXX.

Ad Libellum D. Augustini de
Confessionibus*Lectōri*

NN.

ITa mihi videor hujus libri lectione profecisse, ut aliquam Auctori gratiam referri velim publica grati animi testificatione. Id vero cum multis rationibus fieri poterat, tum nulla certe magis opportuna & ad famam hominum diuturniore, quam nova ejusdem Operis editio, per quod profeci. Præterquam quod, si tanta exemplarium copia fiet, ut a pluribus legatur, non ab Auctore modo, sed ab iis omnibus gratiam inibo, qui de gravissimo animæ negotio solliciti, nihil eorum prætermittunt, quibus sibi ad cælestem patriam iter aut patefacere possint, aut expedire. Non sane multi sunt, qui ita sapiant; verumtamen hoc unum sapere est. Ceterum non sum nescius, talium libellorum multitudinem effecisse, ut fere fastidio sint: sed quæ sunt Augustini, aut ex Augustino collecta, e multitudine emergunt; tantumque eminent supra cetera omnia, quantum Augustini ingenium supra omnium Scriptorum ingenia eminere per omnes ætates judicatum est. Vides, humanissime Lector, quid tibi

bi proponam; nec potes meam in te voluntatem non probare, nisi simul æternæ salutis præsidia improbes.

XXXI.

In Summam D. Thomæ minore forma
recusam

Lectori

Typographus.

ECce tibi iterum D. Thomæ Summam, non illa quidem formæ magnitudine ac præstantia, qua nuper edidimus, nihilo tamen certe minore elegantia. Quod si de parte sollicitus meliore, internum nitorem spectes ac perfectionem; affirmare auisim, nec a nobis antehac, nec ab aliis umquam plus operæ ac studii ejus emendationi fuisse tributum. Non putabis, veterem a nobis librariorum recini cantilenam, si paullo attentius perpendes qua cura ac diligentia non verba modo D. Thomæ, sed ipsa illa quæ per D. Thomam aliunde accita fuerant, fidei suæ restituerimus. Hæc enim in parte cum laborarit prorsus nemo præter unum Nicolajum, vix dici potest, quam multa Scripturæ Patrumque loca mutila essent ac depravata. Ipse porro Nicolajus quam sæpe dormitat, bone Deus, sive immensi laboris tædio, sive nimia eorum fiducia, quorum opera
usus

usus est! Itaque nonnulla Angelici Doctoris ver-
bis inserta, & ad ipsum tamquam Auctorem
relata, quæ ab aliis petita cum essent, aliqua
erant typorum dissimilitudine distinguenda; quæ-
dam rursus ab eo sumpta, & ad alios falsis qui-
busdam notis traducta; trunca alia, alia plus ju-
sto amplificata; multa dominis abdicata suis, de
loco multa detrusa; uno verbo pleraque partim
semidoctorum audacia, partim librariorum incuria,
partim nescio qua diuturni temporis omnia læden-
tis injuria vario labis genere fœdata. In his pur-
gandis, corrigendis, reparandis toti fuimus; nul-
li neque impensæ neque labori parcentes, ut po-
tissimam divini plane Operis partem integram,
suisque absolutam numeris tibi daremus. Sed quid
tu, inquis, de variis lectionibus, ut eas vocant,
quid de manuscriptis exemplaribus, unde magna
peti solet hoc tempore Typographis commenda-
tio? Hic me tibi si venditem, nec jure faciam,
nec libenter. Id in primis curavi, ut optimam
& probatissimam ubique lectionem retinerem; tum
si qua dubia visa est, alteram addidi; ceteras
vero, unde nullus esset usus, sed inanis quædam
veterum manuscriptorum ostentatio, omnino re-
jeci. In his se alii jactent, id aliquando varian-
di libidine consecuturi, ut nihil certi atque ex-
plorati habere possimus. Qua de re nolo plura
dicere, ne videar velle sapere supra Typogra-
phum. Habes de opella nostra, quæ qualiscum-
que est, hoc saltem uno placere tibi debet, quod
suis auspiciis usa neminem palpat.

XXXII.

Ad Opusculum Sacrum

D. Augustino dicatum.

NN.

QUæ tuo quodam afflatu peperî, Augustine Doctorum princeps, tuis nunc auspiciis emitto, nihil hominum iudicia veritus, si me nomine tam augusto, veluti scuto, tegere poterò. Ac multi sane formula ista ad fœda erga mortales obsequia abuti solent, quorum impudentia ad illiberales adulationes projecta factum est, ut ii qui sapiunt, dicari sibi libros aliquando patiantur, cupiant vero numquam. Ego mihi reperisse videor, quem laudare possim merito suo, neque rogatus, neque emptus, neque turpi alia ratione obnoxius. Itaque illud etiam sequitur, ut stemmata & imagines omittere possim, quod genus passim jactant talium mercium institores. Ipponensis Episcopus, Catholicæ Ecclesiæ Doctor longe maximus, Scriptor ex omni memoria temporum sapientissimus, non eget laudibus aliunde quaesitis. De te igitur nihil. De me vero sic habe, nihil mihi umquam fuisse antiquius, quam ut tui studiosus in omni vita apparerem. Videbar enim ipse mihi fore aliquid, si contentionibus meis guttulam doctrinæ tuæ aliquam aspergere imitando possem, Hoc ipsum intelligo quam diffi-

difficile & arduum sit: attamen in laude aliqua ponendum est, nisi fallor, contendisse. Placet id in præsentī publice profiteri; Civitatemque de nobis optime meritam testem appellare. Tu voluntatem in te nostram ex illis beatorum sedibus proba, nosque & litterulas istas supremo Numini commenda.

XXXIII.

Ad Sacra Volumina

B. Mariæ Dei Genitrici dicata.

Typographus.

QUicumque ex nostris grave aliquid aggressuri homines quærunt, a quibus auspicia sumant, videntur illi sane rerum divinarum humanarumque discrimina ignorare. Est enim auspiciū, si recte judicamus, cæleste quiddam ex Numinum favore manans, quod a mortali natura expectari non debet. Ecce igitur, cur nos sacrarum rerum volumina magnis impensis edituri, te potissimum, Virgo parens, in ipso tanti operis limine auspicem appellemus. Tu nobis vires animosque supeditabis; faciesque pro tua apud præpotentem Filium auctoritate, ut hominum mentes ad hæc studia tam necessaria conversæ nostris laboribus faveant, & præsto sint. Id eo libentius facimus, quod in hujusmodi pietatis officio nulla fallendi suspicio latere potest, nulla blandiendi, nulla captan-

ptandi, nulla denique, ut omnia uno verbo complectar, dedicandi pro more sæculi: Nos igitur tibi typos nostros, præla, pluteos, remque omnem librariam damus, dicamus, donamus; rite recteque precari, ut habeas in ære tuo; & quandoquidem rerum Venetarum peculiarem curam geris (ut temporibus difficillimis compertum est) partem hanc longe nobilissimam, quæ ad animi cultum & religionem spectat, singulari aliquo patrocini genere tuearis. Alii templa magnifica tibi condent; alii sacrificiis & supplicationibus totam Civitatem ad spectaculum commovebunt: nos, quod unum possumus, munusculo isto tibi litamus, nihil in posterum facturi libentius, quam quod ad tui nominis commendationem pertinebit. Habeant sibi homines auspicia sua per titulos ac dignitates celebrata, sed tamen inania. Nos humana experti, in tuo Numine ac præsidio conquirere perpetuo volumus.

XXXIV.

Ad Tomum primum Opusculorum
Lipsiensium

Bernardino Zendrino dicatum.

Typographus.

NON una causa fuit, Vir Præstantissime, quæ me non dicam moneret, sed prope
im-

impelleret, ut primum Collectionis hujus Volumen tibi potissimum instituerem, tuoque nomine longe clarissimo illustrarem. Sed, ut ceteras omittam, quæ me tibi obstrictum habent, & publicam aliquam grati animi significationem postulant, hoc ipsum, de quo agitur, est hujusmodi, ut tibi vel in primis jure quodam debeatur. Tu enim mihi consilii hujus auctor fuisti, tu idem dux & adjutor: ut, si quid ex eo boni erit, spero autem fore plurimum, industriæ ac sapientiæ tuæ totum plane sit referendum. Interest, nisi fallor, reipublicæ litterariæ, quam multa & quam varia homo unus præstare possit, cognoscere. Nimis enim quidam angustis terminis humana ingenia circumscribunt, irridentes etiam tamquam ardelionem, si aliquem videant pluribus rebus operam dare. Latius patet hominis animus, quam artium ac disciplinarum provincia tota. Tu certe cum Medicinam facias tanta hominum approbatione, quanta esse potest maxima in Civitate principe; interim tamen & antiquam eruditionem, & aquarum doctrinam nostris temporibus mirum in modum amplificatam, & Mathesim universam, & Physicam complecteris; ut nihil jam ex litterarum atque artium studiis tibi novum accidat. Quid vero si non tibi tam sæpe publici muneris & officii causa modo huc, modo illuc commigrandum esset? Quid si non menses prope integros mechanicis operibus visendis, regendis, judicandis concedere deberes? Mirum sane est, quomodo possis tam multa aggredi ac perficere, nec tamen amicorum officiis umquam desis, & nobis etiam rem librariam gerentibus operam &

auxilium impendas. Ego sane numquam ausus essem hoc, quidquid est, quod sane multarum rerum peritiam rectumque iudicium requirit, sine te suscipere; ut proinde nemo mirari debeat, si in ipsa operis fronte a te ipso auspiciū peto. Sic porro velim tibi persuadeas, quod tibi probatum erit, omnes homines litteris deditos facile probaturos.

XXXV.

Ad Tomum tertium Opusculorum
Lipsiensium

Jano Planco dicatum

Typographus.

CUM Petrus Victorius, magnis propositis præmiis, Galliarum Rēgi Opera sua dicare posset, maluit honorem hunc, pro illis moribus minime vulgarem, Nicolao Ardinghello homini docto & amico suo deferre. Scilicet non omnibus omnia conveniunt, sed aliis alia. Jam satis intelligis, Sapientissime Jane, cur ego, instituta collectione hac ex omni litterarum & artium genere, quæ Actis Lipsiensibus continentur, viros quæsierim doctrinæ & eruditionis laude præstantes, quorum nomine volumina singula ad auspiciū exornarem. Sed illud quoque vides, opinor, exeunti mihi paullo longius cogitatione, &
Ita-

Italicas perlustranti Academias, non potuisse te non statim occurrere, quem pro suscepto consilio patronum & auspicem advocarem. Hominem quærebam, qui insignem aliquam naturæ cognoscendæ operam dedisset; & in magna Italiæ luce ejus arcana, sive ad Medicos usus, sive ad disputandi exercitationem aperiret. Est ne aliquis sæculo nostro, qui se tibi in hoc industriæ genere conferre audeat; qui plura quæsierit, notarit, adverterit; qui partes omnes non modo humani corporis, sed animantium quoque ceterorum, atque adeo illorum etiam, quæ *ζωόφωτα* Græci dicunt, diligentius perpenderit; verbo dicam, qui maria sua terrasque curiosius excusserit? Hoc consilio insignem naturalium rerum thesaurum domi tuæ collegisti; ut apparatu ipso ad sæculi ingenium composito sciendi cupidos alliceres; additis etiam ex omni antiquitate monumentis, ne quid deesset ad illam, quam multi requirunt, encyclopædiam. Scio, talia quædam interdum ab iis venditari, qui specie fallere student, & videri malunt, quam esse. Sed tu quidem & editis per nos libris, & privatis publicisque disputationibus, & quibuscunque rebus occasio tulit, quis quantusque esses, satis superque ostendisti. Proinde nihil mirum, si, cum Anatomicum studium Senis restituendum esset, in te unum Regii Consilii Proceres oculos conjecerunt; teque patriæ tuæ, conditione quavis retinere conanti, pæne dixerim, eripuerunt. Verumtamen viri docti non sibi, nec suis solum, sed toti humano generi sua bona debent; complexi, qua late patet animorum commercium & societas, immensa terrarum spatia, quibus sa-

pientiæ latices effundant. Patiantur non ægre ci-
ves tui ad alias quoque Civitates sua commoda
pertinere; sibi que ipsi gratulentur, quod pro sum-
ma soli Ariminensis fecunditate dare potius de-
beant, quam accipere. Tu vero interim perge,
ubicumque eris, Physicam Medicamque facultatem
colere & amplificare; illudque pro certo habeas
nihil me libentius typis meis, quam tua, vel
tuo judicio probata commissurum.

XXXVI.

Ad Moralem Theologiam P. Anacleti
Reinffestuel

*Minorum Conventualium in Veneta Provincia
Præsidi dicatam.*

Typographus.

SI Anacletus Reinffestuel in vivis esset, vide-
retque suam hanc Moralem Theologiam ty-
pis meis editam, a te potissimum auspicia petere,
totius Venetæ Provinciæ Minorum Conventua-
lium Præsidi, ipse sibi procul dubio gratularetur.
Fruges istæ in solo D. Francisci natæ, longe la-
teque propagentur ad alendas gentes omnes,
quæ Christiano censentur nomine, numquam ta-
men ex alieno crescant. Fovit eas primum & am-
plificavit alter Ordinis hujus Seraphici Magister
Matthæus Creslingerus; nunc in sinum convolant
tuum,

tuum, a quo tamen nihil petunt, nisi patrocini-
um. Potes sane & his addere, si quid desit;
& similia condere, si velis, & vaces; quandoqui-
dem ad istum dignitatis gradum recte atque ordi-
ne per omne studiorum genus pervenisti: cete-
rum, ut nunc est, nihil amplius optamus, quam
ut accipias muneris loco, quod aliqua ex parte
tuum est, acceptumque tueare. Commode porro
accidit, ut per hos dies Opus emitterem, cum te
Fratres tui unanimi consensu Provinciæ præposue-
runt. Neque enim mihi singulari quadam ratio-
ne obstricto satis esse videbatur communes lati-
tiæ significationes afferre, & in media turba gra-
tulari. Publicum esse volo notumque omnibus,
quod tibi persolvitur officium: ut quando pro
meritorum magnitudine grates referre nequeo,
videar saltem pro boni viri more debitionis con-
fessionem non refugisse. Superi tibi familiæque
tuæ contulerunt illa omnia, quæ in rebus homi-
nis bona dicuntur; Tu aliis confers, & pro ea,
quæ genus hominum continet, societatis lege cu-
ras atque efficis, ne operam tuam ullus deside-
ret, modo fateatur, se indigere. Liceat typogra-
pho esse gratum, quacumque demum ratione pot-
est: non potest autem nisi per hæc, quæ parum
intelligentibus videntur exilia, sed tibi ita viden-
tur, sicuti revera sunt, opibus ac divitiis nobi-
liora. Erunt certe quidem non injucunda, sive
reputes quæ sint, sive a quo.

EPISTOLÆ PHILOLOGICÆ.



EPISTOLA I.

Ad Amicum Cenetenſem

*De Philippi a Turre Episcopi Adriensis
Vita.*



Episcopi Adriensis mors ita me perculit & afflixit, ut vix animo constem. Adhuc ille mihi cogitanti obversatur, qualem prorsus in lectulo jacentem vidi, cum subsidentibus oculis, labris naribusque decoloratis, cervice inversa, cruribus contractis, brachiis inæqualiter dispersis, magna quadam luctatione spiritum extremum funderet. Cum enim ingravescere morbum sensit, ad me misit ut adessem. Statim advolavi; mecumque Vallisnerium adduxi medicum, ut nosti, in hac urbe primum. Sed cum Rhodigium pervenimus, jam morti proximus ne agnoscere quidem nos potuit. Intestato mortuus est. Fortasse de testamento ne cogitavit quidem umquam. Sed
certe

certe cum me advocari jussit, aliquid mente volebat saltem de scriptis suis, quibus credibile est consulere voluisse. Hastenus de ejus morte. De vita quod quæris, id vero longioris est operæ. Nunc pauca dabo: quæ tamen ipsa si edideris per tuum istum librarium, non ægre feram. Vale.

Nonis Mart. MDCCXVII.

V I T A

PHILIPPI A TURRE

EPISCOPI ADRIENSIS.

Philippus a Turre ea morum probitate fuit, eaque litterarum gloria, ut merito de fortuna queri potuerit, nisi ad ceteras animi dotes insignem moderationem addidisset. Non caruit ille quidem bonis, quæ fortunæ dicuntur; abundavit etiam, si fortunæ dumtaxat ratio ducatur; sed singularis illius atque inaudita virtus majus aliquid postulare visa est, unde hominem posterimetirentur. Natus est in Civitate Austria, vulgo *Cividale*, Kal. Maj. anno MDCLVII. parentibus apprime nobilibus Mario a Turre, & Camilla de Frumentinis. Quod in prima ætate rarissimum est, libros semper maluit, quam crepundia: cumque Rhetoricum & Philosophicum cursum in patria celerrime absolvisset, Patavium migravit. Hic rursus humanitatem, & politiores litteras tractare cœpit, ad quas potissimum factus videbatur; cum se Jurisprudentiæ dedit; nec interim Mathemati-

cum, aut Anatomicum studium, qua erat ingenii abundantia, prætermisit. Annos natus fere viginti, publicum utriusque Juris examen subiit, probatusque suffragiis omnibus, in patriam revertit; ubi paucis post annis Patruo Civitatis Canonico suffectus, antiquæ eruditionis studium suscepit, seu potius revocavit. Hunc enim amorem jam tum imbiberat, cum Patavii esset, & Octavium Ferrarium, eruditissimum superioris sæculi virum, frequentissime audiret. Tametsi Ferrarius elegantiorē antiquitatem sequebatur; Philippus vero ad eam se contulit, quæ rudioribus monumentis, & iccirco magis reconditis continetur; cujusmodi sane in ejus Capituli archivo plurima sunt. Per hæc & ornandæ patriæ, & obscurissimæ ætatis illustrandæ incredibili ardore succensus est: sed cum intelligeret hoc studii genus magnam librorum copiam, & eruditorum commercium postulare, Romam demigravit anno MDCLXXXVII. ibique ita se totum antiquæ historiæ tradidit, præsertim vero Ecclesiasticæ, ut non multo post inter Academicos Collegii de *Propaganda* relatus fuerit. Tum vero primum in magna illa non dicam multorum hominum, sed omnium fere nationum luce fulgere cœpit, & quantus futurus esset, ostendere. Ingenium multi admirabantur, sed acerrimus hominum æstimator Carolus Augustinus Fabronus, nunc S. R. E. Cardinalis, in primis ornavit, ejusque commendatione factum est, ut cum Eminentissimus Josephus Rhenanus Imperialius Ferrariam Legatus missus esset, Philippum sibi adjungeret, & juri dicundo præficeret, quod officium *Auditoris* appellant. Sexennium in ea Legatio-

gatione commoratus, ita se omnibus singulari prudentia, fide, integritate commendavit, ut cum Cardinalis provincia decederet, eum sibi retinendum putaverit, ut Romæ quoque in multarum *Congregationum* negotiis ejus opera uteretur. Quo in munere sane gravissimo, quidquid supererat otii, id totum in antiquitatis studium conferebat; eaque industria celeberrimo Cardinali Norisio plurimum probatus, ad intima ejus litterarum consilia admissus est, multisque benevolentiae testimoniis supra ceteros ornatus. Accidit per ea tempora, ut Antii rudera ad portus constructionem effoderentur; ex quo intellectum est, litteras quoque fortuna indigere; nihilque admodum valere sive ad opes, sive etiam ad famam, nisi illam sibi sociam adsciscant. Cum enim magnis illis effossionibus monumenta quædam antiquissimæ formæ detecta essent, hinc sibi Philippus occasionem arripuit ingenii prodendi sui eo Commentario, qui est *de Monumentis Antii*; in quem tam multa, tam varia, tam recondita ex omni eruditione conjecit, ut minima pars titulo significetur. Egregiam lucubrationem Innocentius XII. Pontif. Max. valde probavit, nec laudibus solum, quarum multi solent esse liberalissimi, sed etiam beneficiis ornavit, plura daturus, nisi fato interceptus fuisset. Verumtamen quod ille præstare non potuit, abunde præstitit Clemens XI. qui pro sua quadam non religionis modo, sed etiam litterarum cura Philippum complexus, Adriensem Episcopum renunciavit VII. Id. Febr. MDCCII. Qui hominis virtutes & ingenium noverant, non eum libenter discedere Roma patiebantur, ut in

Italiæ angulo nec prorsus illustri, neque saluberrimo delitesceret: sed ille tamen nihil tale recusandum ratus, in quo divina quædam vis appareret & providentia, Rhodigium statim profectus est, totumque se ejus Ecclesiæ rationibus addixit. Magna in eo fuit & intelligendi & agendi celeritas. Itaque cum omnia suæ provinciæ negotia ipse per se diligentissime expediret, optimique Præsulis partes impleret, sua tamen tempora Musis quoque tribuebat. Cujus industriæ quærenti socium, non defuit Comes Camillus de Silvestris, notum in rep. litteraria nomen, ætate pæne pari, morum vero elegantia & antiquitatis studio nihil dissimili. Hunc sibi Philippus tamquam divinitus datum in urbe multis quidem rebus ornata, sed litteris colendis non admodum opportuna, cupidissime adjunxit, eoque uno familiarissime, quamdiu vixit, usus est. Curavit etiam sibi a Dominicana familia virum in primis clarum Thomam Minorellum, ex cujus politissimo ingenio, quo tempore Rhodigii fuit, & ipse magnum cepit consuetudinis fructum, & Rhodigina juvenis institutionis. Sed & absentium amicitias studiosissime coluit, quicumque aliquo insigni litteraturæ genere præstarent; & Patavium identidem excurrerebat, iis præsertim diebus, quibus Seminarii census ab Eminentissimo Georgio Card. Cornelio haberi solet, cum ut se omnium fere disciplinarum linguarumque disputationibus continenter habitis recrearet, tum vero maxime ut Antistiti optimo, & ad litteras promovendas incitatissimo gratificaretur. Cetera lætus, & quod in humanis rarissimum est, sua contentus sorte,

id

id unum primis annis dolebat, quod librorum copia careret; nec satis haberet fortunarum, quibus & Episcopalem dignitatem sustinere posset, & honestissimum hoc desiderium explere. Post aliquanto respiravit, instructaque decenter domo, de libris comparandis cogitare cœpit, quod ipsum ita præstitit, ut vel ex hoc uno de summa ejus sapientia conjici possit. Per hæc adjumenta non paucas pro re nata Dissertationes composuit *de Taurobolio, de Vermibus corporis humani, de Solis Eclipsi, de Annæ Faustinae numo, de annis Imperii Elagabali*, ab iis editas, ad quos per epistolam missæ sunt, præter ultimam, quam edidit ipse typis Seminarii Patavini ann. MDCCXIII. Scripsit præterea ad amicos multa, non soluta modo, sed etiam ligata oratione; quæ singula quidem minuta sunt, sed in unum tamen collecta corpus, justum volumen efficerent. Nolim equidem, quæcumque in scriptis reliquit sive serio, sive joco fusa, statim vulgari; quam ego librariorum curam magnorum virorum existimationi sæpe fatalem animadverti: sed quædam tamen de militaribus itineribus, & de tota illa controversia, quæ ipsi cum præstantissimo adversario Joanne Vignolio *de Imperio Severi Alexandri* fuit, omnino jacere non debent; quod jam ad umbilicos pervenerint, & famam ejus sustinere possint. Multa etiam mihi de Patriarchis Aquilejensibus legit, multa ostendit ex abditissima antiquitate deprompta: sed pleraque informia sunt, nec lucem sperare possunt, nisi forte a clarissimo viro Justo Fontanino, qui & ea eruditione est, ut nihil hujusmodi formidare debeat, & iis moribus, ut nihil

hil omittere possit, quod ad Præfulis amicissimi gloriam conducere videatur. Reliquum est, ut de ejus morte dicamus, quod paucis absolvetur: nam ne dissecto quidem exploratoque cadavere, medici ipsi ceteroquin peritissimi statuere potuerunt, quo genere morbi consumtus sit; quique hydro-
pem accusant, ita rem involvunt, ut nec satis appareat quomodo gigni potuerit, nec quomodo cognosci, nec quomodo sanari. Quod certum est, duos ferme antequam moreretur menses, perpetua siti laboravit, eodemque tempore *δυσξία*, morbo illo quidem non novo, sed pæne jam familiari. Sitis in febriculam desiit, quæ & ab ipso contemta est, nec a medicis valde oppugnata, quod ex *δυσξία* proficisci crederetur, nihilque ejusmodi portenderet, quale postea consecutum est. Quid plura? Sic erat in fatis: repente in extremis fuit. Itaque cum se ad supremum illud certamen rebus divinis comparasset, incredibili virtute & constantia decessit V. Kal. Mart. MDCCXVII. Rhodigii sepultus est ingenti totius civitatis luctu, quæ calamitatem hanc acerbissime tulit, & pro summa temporum difficultate etiam in omen vertit. Talis fuit Episcopus, ut non solum cum probatissimis hujus ætatis, sed cum veteribus etiam comparari potuerit. Severus & gravis, sed idem, cum tempus posceret, blandus & affabilis supra quam ejus yultus plane censorius polliceri videretur. Sermo compositus, & in re qualibet ita eruditus, ut semper meditatam crederes. Id fuit in illo singulare, quod cum plurimum temporis litterarum studiis concederet, non tamen se rebus agendis subducebat; quo factum est, ut doctissi-
mus

mus idem esset, idemque prudentissimus. Hoc ipsi apud suos magnam auctoritatem conciliavit, liberalitas vero gratiam & benevolentiam. Amicitiiis usus est omnium ferme sui temporis litteratorum, multorum etiam hospitiiis: nam id in primis curabat, ut hospites frequenter haberet; cumque ipse tenuissimo victu uteretur, alios splendidissime excipiebat. Sed hæc narratori satis: plura dabunt laudatores.



EPISTOLA II.

Ad eundem

De Actione Oratoria.

Fateris, nihil esse vitiosius in Oratore, præsertim sacro, quam motum vocis & corporis arte quæsitum: & tamen, quæ sint artis præcepta, cognoscere cupis; meque non litteris modo tuis, sed etiam amicorum auctoritate urges, ut de re hac aliquid scribam. Non artem, opinor, sed siquid est in arte nimium, reprehendis. Constitueram Quinctiliani Institutiones ad te mittere: & sane misissem, nisi paullo esses ad iram pronior, quam oporteat. Quid enim? Putasne me, aut nostrum quempiam posse meliora? Sed quando falli vis, fallamus officiose.

Oratoria Actio dividi solet in *Pronunciationem*, & *Gestum*. Ad illam quod attinet, etsi vocis bonitas non est in nobis, ut ait Cicero; tractatio tamen atque usus in nobis est. Quapropter in sua illa, qua pollet unusquisque, vocis facultate bonus Orator videri poterit, si magna in primis cura animadvertat, ne præptopera quotidiani sermonis festinatione verba mutilet. Fere enim familiaris locutionis vitia ad actiones quoque publicas afferuntur; & solent blaterones, cum dicunt e rostris, ut ut aliqua in parte naturam conando vincant & consuetudinem, extrema saltem periodorum deglutire. Ita porro distincte pronun-

cias

ciabimus, ne tamen diutius in verbis immorantes singulis, hiulcam faciamus orationem, aut memoria laborare videamur, aut syllabas numerare. Quamquam vitium hoc non est ita commune, ut primum illud: quod ut tollatur, nulla me quidem re adjuvari magis expertus sum, quam clara expressaque litteræ caninæ pronuntiatione. Fit enim hac adhibita unius litteræ recte efferendæ diligentia, ut omnes bene pronuncientur. Imo si cui balba quædam hæsit minusque aperta aliorum verborum pronuntiatio, quæ pro consuetudine vetustissima tolli non posse videatur, R, sibi dumtaxat, si quod est in verbis illis, valde proponat spiritu linguaque premendum; brevique sentiet, in aliis quoque litteris efferendis nectendisque se mirifice expeditum.

Cum perspicue pronunciare poteris, illud deinde cura quam diligentissime, ut vocis varietate rerum, de quibus dicis, varietatem consequaris. Nihil enim æque audientes enecat, atque unus ille, constans, & perpetuus quasi cantus adolescentis e schola. Vitium tamen hoc, quod in foro & in curia ferri non potest, Oratori sacro interdum condonatur reverentia quadam rerum, de quibus dicit, si cetera sit gravis & facundus. Adde etiam illud, ipsam variandi curam hoc in genere, si nimia sit, & loci oblita videatur, magis offendere, quam *μωρολογία*. Ceterum vocis variandæ leges longe plurimas & pulcherrimas habes a Quintiliano: quibus addere qui velit aliquid, præsertim ad fori consuetudinem, nugæ agat. Ego inde pauca ducam pro modo Epistolæ, quæ non nimis enucleata existimabo. Sit igitur

gitur vox lætis in rebus exponendis ipsa quoque quodammodo hilaris, plena, explicata, & suaviter fluens: in contentionibus audax, elata, & nervis omnibus intenta: atrox in ira, aspera, densa, & respirationibus crebra: paullo in invidia creanda lentior & subobscura: in blandiendo, fatendo, satisfaciendo, rogando lenis & submissa: in suadendo, monendo, pollicitando, consolando gravis: in metu & verecundia contracta: in miseratione ægre faucibus exiens, flexa, reducta, impedita: in aggressionibus fusa, secuta, incitata: in expositione teres, quasque media inter gravem sonum & acutum; ad summam, attollatur concitatis affectionibus, compositisque descendat; & pro rerum natura, loci, temporis, & personarum, elata modo sit, modo demissa. Nolim tamen religiose nimium omnes animi motus imitemur. Nam & exultare clamose, & muliebres lamentationes edere histrionum more, oratoriam dedecet gravitatem. Illud vero tibi certum decretumque sit, ut initio magnæ Orationis voce utaris demissiore; ne cum paullatim crescere debeat pro ipsa contentionis natura, supra vires augeatur, & quod consequitur, in asperum quendam sonum degeneret, gallorum clamori persimilem. Præterquamquod modesta illa vocis tenuitas, qua dicere incipimus, idonea est ad significandum timorem, quem debet Orator reverentia quadam concionis initio profiteri; modo ne quid sit ex abrupto alicui exprobrandum, quale illud Ciceronis in Catilinam: *Quousque tandem*, &c. Esset enim præter artis leges, præterque rationem, tale quippiam timide proferre. Univer-

se

se cavendum, ne rursi nimiaque excreatione, quem Græci πτυελισμὸν vocant, intercidatur oratio; ne spiritus per nares emittatur; ne vox subsultet inæqualibus spatiis, quasque claudicet; ne rudis sit, dura, pinguis, rusticana: sed quam maxime fieri potest, clare, suaviter & urbane flectatur, sonumque efficiat sine molestia æquabilem. Si vis autem pronunciationem & gestum ipsum egregie moderari, oportet paratus accedas; remque totam, de qua dicis, firmissime teneas. Nam si quid ex tempore, vel animo non satis firmo aggredieris publice ad dicendum, ita eris totus memoriæ diffidentia metuque occupatus, ita in quolibet periodo proferenda simul de futura sollicitus eris, nihil ut de actione possis cogitare. Sed hætenus de *Pronunciatione*: venio nunc ad partem alteram, quæ *Gestu* continetur.

Gestus nomine totius corporis habitum, figuram, motumque intelligo: cujus ea summa lex est, ut vel ex hoc ipso rerum dicendarum species aliqua statim offeratur. Vestium & capillorum primum habenda ratio: illudque maxime curandum, ne nimia negligentia a civili cultu abhorere videamur, concionemque contemnere; neve cura putidiuscula in mollitiei suspensionem incidamus. Coma vestibisque decore compositis, de fronte, oculis, manibus, pedibusque cogitare debes. Recta enim horum membrorum conformatio & motus dicentem mirifice adjuvat; magisque capit auditores, quam ipsa propemodum oratio. Frons itaque celsa & explicata lætitiæ index est, demissa obsequii vel doloris, caperata indignationis, dura contumaciæ, aversa despectus & irri-

sionis. Celsam porro cum dico, nolim putes Palæmonas mihi probari. Nam ita attollere frontem, ut in tergum inclinetur, numquam decet; quemadmodum nec ita demittere, ut sinum prope tangat: illud impudentis hominis est ac superbi, hoc timidi & vecordis. Oculi, ex quibus maxime dicentis animus ejusque affectiones eminent, in sublimē elati arrogantem hominem atque impetiosum ostendunt, demissi humilem & orantem, averſi negantem ac despicientem: niſtando malitiam significant, lacrymando dolorem, connivendo simulationem: clausis optime describes cogitabundos, valde apertis attentos, incensis minitantes: nihil denique in oratione tam varium est, quod vario oculorum motu Orator consequi non possit, unde qui audiunt, maxime pendent; dicendaque intelligunt, antequam dicantur.

Manus, quibus secundum linguam nihil est vocalius, tantam vim addunt actioni, ut sine earum adjumento plane frigeat. Sinistra non bene sola gestum agit, sed inservire dexteræ debet. Sive tamen sola, sive alteri accommodata moveatur, intra humeros semper est continenda. Quod si Oratori averſanti aliquid necesse sit manus ambas in lævam partem valde propellere, tum vero humerus ipse & caput illuc protendatur. Dexteræ motus a sinistra parte incipiat, & secutus verborum sensum desinat loco suo. In ea componenda multum operæ collocavit Quinctilianus; & superstitiose adeo digitis singulis leges imposuit, ut neque in scena hoc tempore tantam diligentiam requiramus. Minus sane peccat, qui intra familiaris sermonis usum manus continet, quam

quam qui nimia quadam gesticatione digitis micat, & ad verba singula motum aliquem accommodat. Modus ubique servandus; & pro rei propositæ ratione videndum, quid deceat. Quædam enim sunt, quæ multiplicem gestum celeremque postulant, quædam tardum, quædam etiam nullum. Præsertim vero initio dicendi ab omni gestu abstinere oportet; ita tamen ut ad secundam periodum manus paullatim excitentur; quarum deinde motus incalescente oratione percrebrescet. In rebus magnis & lætis manus extendi solent, in parvis & tristibus contrahi: lentiores promittunt, citatæ hortantur & urgent: dextera sublata jurantem linguam recte comitatur; itemque robur & potentiam significat; ori admota silentium indicat, porrecta fœdus & fidem, protensa extra humerum odium & averfationem. Manus utraque pectori adposita precantis est, & miseras suas proferentis, contracta avari, explicata largi & gratulabundi. Digitorum commissio anxios ac dolentes ostendit, brachiorum complicatio pigros ac desides, jactatio immodica iratos & furentes. Hæc singula advertere si quis potest, & in dicendo præstare, ex arte faciet: verum cum ardet oratio, dicentem rapit, nec cum patitur ex præceptis consilium capere.

Pedes quoque suas partes habent, sed postremas. Ac primum quidem curet Orator, ne pedes quasi varicando distorqueat; neve præter modum supplodat. Deinde oportet ejus excursions per suggestum esse quam moderatissimas, saltationes vero omnino nullas. Qua in re cum Q. Haterius (ut refert Seneca in Controversiis) frequentissi-

me ardore dicendi peccaret, monitorem a tergo habere solebat, qui se tactu veltis, ubi opus esset, ad moderationem revocaret. Qui sedens ex scripto recitat, paucioribus indiget: illud tamen monendus videtur, ne crus cruri fœdum in modum imponat. Quod quidem multis etiam ex concione dictum volumus, qui in hanc se otiosæ pecudis figuram componere solent.

Atque hæc de *Gestu* satis tibi fore putamus. Quamquam neque ex his, neque ex aliis, quæ de *Pronunciatione* dedimus, fructum aliquem capies, nisi usus accedat & exercitatio. Dicendo homines apti fiunt ad dicendum, agendo ad agendum. Desere aliquando umbram istam: in sole & pulvere non modo nobis, sed ipse tibi magis placebis. Vale.

EPISTOLA III.

De voce Mehercule.

Vix conijcere divinando possum, cur ad me per hosce dies Latinas litteras dederis. Nihil minus Venetis Bacchanalibus convenit, quam quod vetustos libros & lucernam olet. Tamen si lingua ipsa, qua scribis, operosa est; epistola non est operosa: quod pro nostra familiaritate monere volui, ne cui præterea Latine scribas, nisi cum paullo magis animo vacabis, & attentius scribere poteris. Quod quæris de particula *Mehercule*, utrum adhiberi possit a Latino homine, qui de Herculis gestis fabulam scribat; incidit in veterem

rem Angeli Decembrii querelam ad Amphitruonis Plautini actum 1. sc. 1. & actum 3. sc. 4. ubi juratur per Herculem, quo tempore Hercules nec Deus erat, nec omnino erat, sed illa ipsa nocte Jovis opera gignebatur. Ac Decembrius quidem, Poetam defecisse putat, temporis sui consuetudine abreptum. Sunt qui juramentum hoc ad Herculem Ægyptium referant, Græco Alcumænæ filio antiquiorem. Taubmannus censet, Plautum more suo risum captare: siquidem tota fabula composita videtur ad illius poeticæ Theogoniæ nugas irridendas. Sed quid opus est in re tam plana commentationibus & conjecturis? Quo tempore hæc acta finguntur, ne lingua quidem Latina erat; attamen tota fabula Latine scripta est. Quid igitur mirum, si Latinæ jurandi formulæ adhibentur, qualescumque tandem formulis istis numen significetur? Ita nos Christiani, qui Deum unum colimus, multiplicemque illam deorum Latinorum turbam irridemus, attamen cum Latine loquimur, *per deos* jurare solemus. Huic simile est illud Terentii in Eunuchio act. 2. sc. 2. *Concurrunt læti mi obviam cupedinarii omnes.* Cum enim fabula palliata sit, & tamquam in Urbe Attica agatur, non erat facienda mentio *cupedinariorum*, qui ita dicti sunt a Romano foro Cupedinis, ubi esculenta vendebant. Scilicet cum actores Latine loquantur, formulis utuntur linguæ suæ, quamvis Græcam fabulam recitent. Quid illud in Adelphis, quæ Comœdia itidem palliata est, act. 3. sc. 4. ubi Pamphila opem sibi & auxilium ab *Junone Lucina* poscit? Quomodo Græcæ huic fœminæ *Lucina* in mentem venit?

Cur non potius *Ilithyiam* vocat, ut in more Græcis erat? Ipse jam per te vides: ac proinde illud quoque vides, quantum particulæ *mehercule* tribui possit. Hæc in prima epistolæ tuæ parte. Ne in altera quidem ab Hercule discedis: de quo recte omnia; sed illud fortasse non recte, quod cœlestem ejus patrem *vitio patrem* vocas. Laudo modestiam, quod hominum regem atque deorum nolueris appellare adulterum. Sed quid significat *vitio pater*? Illum, inquis, qui filium stupro genuit, ut docent Grammatici ex Martiali, & est in accuratissimo Fabri Thesauro. Ego vero dubito, num locus quem afferunt ex Martiali lib. 12. 53. id efficiat. Ibi Poeta Paterni avaritiam & rapacitatem reprehendit: cum autem Paternus vitii sui causam in filium conjiceret, ita eum Martialis objurgat.

Sed caussa, ut memoras, & ipse jactas,

Diræ filius est rapacitatis.

Ecquid tu fatuos rudesque queris,

Illudas quibus, auferasque mentem?

Huic semper vitio pater fuisti.

Ait igitur, Paternum etiam antequam filium haberet, rapacitati fuisse patrem; id est semper quæsisse pecuniam, non filii, sed avaritiæ causa.

Herculem furem si vis Italis nostris dare Latina non intelligentibus, nihil moror: sed illud ferre non possum, quod ais ejus fabulæ auctorem, quicumque sit, *equitare in verbis aliis*. Quid hocce monstri est? Sumsisisti, opinor, ab eo qui Pindarum dixit *ἰν' ἰπποβάμωνα πρῶματα πέοντα*. At hoc nihil significat aliud, nisi *verba equestria fundentem*. Recte enim dicitur *sermo equestris*, ut dixit Ho-

Ho-

Horatius in epistola ad Pisones v. 95. *sermonem pedestrem*. Siquis tibi Græca illa interpretatus reddidit *equitantem in verbis altis*; vide quid hominis sit. Ita enim velim tibi persuadeas, nullum esse eruditionis genus, in quo vani homines facilius fallant & fallantur, quam quod Græcis litteris continetur. Mediocria ingenia cum eo pervenerunt, ut Grammaticam teneant, Græca ubique sine modo crepant, seque multitudini jactant. Ex quo fit, ut qui revera sciunt, levitatem hanc indignati, quod Socrates adversus Sophistas faciebat, se scire dissimulent.

De Scardeonio nolim te urgere diutius. Ejus caput devovi, qui libellos meos in posterum loco movebit. Cum enim singulos superioribus diebus lustrassem, rationesque collegissem, nonnullos deesse comperi, quos inter Stobæum, Paullum Diaconum, & antiquissimæ formæ Columellam. Nihil propius est factum, quam ut reliquos comburerem: tanta me primum indignatio, deinde tædium, postremo velut insania cepit. Sed vicit demum ratio. Rariores tamquam carcere conclusi, meque ipse gravissimo sacramento obstrinxi, ne ullum exire patiar conditione quavis. Si me amas, ut profecto debes, accipe excusationem: quod tum denique te fecisse putabo, si mea opera aliis in rebus uteris. Vale.

EPISTOLA IV.

De Petro Bembo.

OMnem lapidem movi, ut proverbio dicitur : neque tamen lapidem illum tuum reperire potui. In æde D. Bartholomæi nihil est hujusmodi, neque extra ipsam, neque apud ipsam, neque in tota illa vicinia. Ædituos omnes diligenter interrogavi, numquid scirent, aut fando audissent de *Morosina Petri Bembi concubina*. Sed heus tu, nimis bonus es. Itane vero tibi persuades, Patavii ea tempestate talibus sepulcrorum titulis locum fuisse? A quo vis positum? Certe non ab alio, quam ab inimico, qui vellet criminis memoriam, ut in tali viro non levis, ad postereros propagare. At id amici, & consanguinei patiebantur? Quid leges de libellis famosis? Nullæne erant? Hæc videlicet eorum commenta sunt, qui vitiis suis excusationes quærunt in antiquis moribus & exemplis. Neque vero fabulæ defuit occasio. Nam in dextero ædis internæ latere, quod januæ majori proximum est, sub pictis pellibus, quibus parietes omnes sunt instrati, latet epigraphæ veteri marmore insculpta : *Morosina Torquati Bembi matri. Obiit VIII. Idus August. MDXXXV.* Plura mitte quærere : nam frustra quæres.

Ceterum summus ille vir Patavino cælo in primis delectabatur, & ad otia litterarum maxime idoneum existimabat : ut vel hac ipsa de causâ

nos

nos ejus memoriam colere debeamus. In Latina ejus historia non video quid requiras, nisi forte firmiorem quandam eloquendi facilitatem. Omnia sunt Latine scripta, non suo tamen quæque modo. Scilicet hoc est, quod explicari præcepto non potest; atque adeo ne intelligi quidem nisi ab iis, qui diuturna legendi scribendique exercitatione aures & judicium conformarunt. De ejus epistolis recte judicas. Sed nihil dicis, cum *hominem* vocas *emunctæ naris*. Scio equidem eruditis omnibus modum hunc laudandi familiarem esse, quod sibi persuadeant, Lucilium Poetam ita fuisse laudatum ab Horatio lib. 1. Sat. 4. At ego nec Lucilium, nec hominem ullum *emunctæ naris* esse existimo, sed modo *emunctæ*, modo *emungendæ*. Fallacia orta est ex divisione non recte apposita verbis Horatianis. Ecce tibi locum integrum, ut ego legendum puto:

Hinc omnis pendet Lucilius hosce secutus,

Emunctæ naris durus componere versus.

Nam fuit hoc vitiosus: in hora sæpe ducentos,

Ut magnum, versus dictabat stans pede in uno.

Cum flueret lutulentus, erat quod tollere velles.

Garrulus, atque piger scribendi ferre laborem;

Scribendi recte: nam ut multum, nil moror.

Igitur Horatius ait, Lucilium durum fuisse in componendis versibus *emunctæ naris*; quod multos, non bonos scriberet, ideoque flueret lutulentus. Est enim versus *emunctæ naris*, idem atque *emuncta nare fusus*, quia, *emuncto* & purgato capite, animus intenditur, & fit ad intelligendum acrior. Interpretes qui divisionem adhibent ante vocem *durus*, vix defendere & expli-

care possunt, quæ sequuntur. Si enim Luciltus *durus erat componere versus*, quomodo ducentos fundebat hora una? Si homo erat *emunctæ naris*, quomodo fluebat lutulentus? Arcessamus a capite. Si ais, quæ Bembus scripsit, emunctæ naris esse, libenter annuo; si Bembum ipsum emunctæ naris hominem vocas; ego vero, quid hoc sit, non intelligo. Maluissem tibi blandiri; sed in rebus hujusmodi qui blandus est, officium deserit. Vale.

EPISTOLA V.

De voce Ἀντιχείμενος.

ACcepi tuas litteras, in quibus nimis tu quidem Græce. Quid enim est in oratiuncula illa, quod hominem delectare possit tam multis litteris tamque reconditis ornatum? Volumus imponere, non tibi, sed populo. Utcumque tamen se res habet, ἡδισον ἀκασμα ἔπαινος. Quod scribis, te de hominibus occidendis cogitare, *mi homo, Di melius dunt*. Sed nolo joculari in re tam seria. Hinc tibi planissima ad opes via, nec tamen ad gloriam interclusa.

Ἰατρός γὰρ ἀνὴρ πολλῶν ἀνταίχιος ἄλλων.

Cardinalis meus propediem in urbe erit, quicum de Libanii editione agam. Sed ægre sibi persuadebit, primum volumen prælo committi oportere, antequam alterum in promptu sit. Schedulam tuam huic epistolæ adjiciam, in qua verbis paucis ad quæstiones singulas respondere conatus sum. Illud vero, quod est in extremo, de voce

ἀντικείμενος, pluribus indiget. Hoc loco idem est, atque ἀντίστροφος apud Aristotelem initio lib. 1. Rhetoric. ubi ait, τὴν ῥητορικὴν εἶναι ἀντίστροφον τῇ διαλεκτικῇ, *Rhetoricam affinem esse Dialecticam* (ut vertit Majoragius) & quasi ex altera parte respondere. Suate natura *contrarium* significat; nec est, cur a Lexicis plura petas. Verum ea quoque ἀντίκεινται, quæ sunt relata, ut est in Categoriis; hoc est quæ ita se mutuo respiciunt, ut alterum alteri amice respondeat. Rem hanc plane intelliges, si tibi errorem patefaciam omnium Aristotelis Interpretum, quos ego quidem vidi, ad librum secundum Rhetor. cap. 23. t. 297. Ἀντίκειται δὲ τῷ, ἐλθεῖν μάλιστα μὲν ὃ καλῶσι νιμεσάν. τῷ γὰρ λυπεῖσθαι ἐπὶ ταῖς ἀναξίαις κακοπραγίαις ἀντικείμενόν ἐστι τρόπον τινὰ καὶ ἀπὸ τῶ αὐτῆ ἡθὺς τὸ λυπεῖσθαι ἐπὶ ταῖς ἀναξίαις εὐπραγίαις. Quæ verba ita interpreto: *Respondet autem misericordie ea maxime, quam vocant indignationem. Nam dolori qui oritur ex adversis, quæ accidunt immerenti, respondet quodammodo, & est ab eadem indole dolor qui oritur ex prosperis, quæ accidunt immerenti.* Alii verbum ἀντίκειται reddunt *opponitur*, ἀντικείμενον *contrarium*. Sed primum quidem verbis pugnant cum Aristotele, deinde sententia. Verbis, inquam: siquidem post ἀντικείμενον statim sequitur καὶ ἀπὸ τῶ αὐτῆ ἡθὺς, *ab eadem indole*. Cui incommodo ut consulant, particulam καὶ interpretantur *quavis*. Sed aliud est καὶ, aliud καίτοι, vel καὶ εἰ. Sententia vero in eo laborat, quia Aristoteles id sibi proposuit ut ostendat, indignationem cum misericordia convenire, quod utraque sit dolor ex injustitia ortus. Nam qui misereretur, dolet

ali-

aliquem injuste miserum esse ; qui indignatur, dolet aliquem injuste esse felicem . Ambo viri boni sunt, & officia commutant : proindeque perturbationes istæ sibi ex æquo respondent, & quodammodo recipiuntur . Eodem modo usurpatur ab Aristotele verbum ἀντίκειται paullo inferius τ. 300. δόξεις δ' αὖ καὶ ὁ φθόνος τῷ ἐλεῖν τὸν αὐτὸν ἀντικείμενον τρόπον, ὡς συνέγγυς ὢν καὶ ταυτὸν τῷ νημεσίαν. Quæ verba ita vertit Majoragius : *Possset autem aliquis suspicari, invidiam misericordiae eodem modo esse contrariam, tamquam vicina sit, aut eadem quæ nemesis.* Ita ne vero? Nempe Majoragius non discedit a prima τῆς ἀντικειμένης significatione . Ego sic interpretari malim : *Videri autem potest invidia quoque convenire quodammodo cum misericordia, tamquam affine aliquid indignationi, ac prorsus idem.* Cum enim dixisset Aristoteles, indignationem convenire cum misericordia, nunc quærit, utrum ipsa quoque invidia cum misericordia conveniat : siquidem etiam invidia dolet de alterius bonis tamquam immerito occupatis . Negat : quia misericordia & indignatio de eo dolent, quod accidit immerenti ; invidia de eo, quod accidit æquali . Neque enim invidus laborat, utrum qui felix est, merito sit felix, an immerito : id tantum dolet, eum esse felicem : & si forte in calamitates decidat, lætatur . Ex quo sequitur, invidiam esse improbi hominis, misericordiam & indignationem probi . Sed sit epistolæ modus . Tu quoque pone modum aliquem tuæ isti Græcarum litterularum cupiditati, quæ jam cœpit esse nimia ; teque Latio redde . Vale .

EPISTOLA VI.

De voce Nepos.

Binas a te his quatuor ferventissimis diebus accepi litteras, & quidem latinas. Itane igitur neque tibi parcis, neque mihi? Urget te scilicet Pædianus ille cum sua caterva: monetque in singulas horas, ac pæne in iudicium rapit, quod eum *nepotem ex fratre* dixeris, qui fratris filius dicendus erat. Quamquam ego istorum hominum nullam esse habendam rationem duco, qui quod pauculas voces, in quibus vulgo peccari solet, a Vossio sumserint, ac memoriæ mandaverint, magnos se Cicerones putant, cetera indoctis: attamen ostendere conabor, quomodo possis cornicum oculos configere. Sed tu vide, quid jubeas; ego enim spectabo aliud nihil, nisi ut paream. Aio igitur, vocem *Nepos*, quæ natura sua ad filios filiorum pertinet, ceterosque ex iis genitos, aliquando etiam ad fratris & sororis filios, & ab iis natos traduci posse, atque adeo debere; ne hunc veluti scopulum plus nimio declinantes, ad alium appellamus, qui foedior sit ac periculosior. Ea enim interdum animi sensa exprimenda sunt, quorum ratio non aliter constet, quam si hoc nomine declarentur. Siquidem vasta illa verborum circumductio, & similium casuum continuatio, qua morosi isti aureæ latinitatis custodes fraternas cognationes describunt, sermonem non solum enervat, sed plerumque etiam obscurat; ut pau-

pauca post diebus ne ipsi quidem intelligant, qui scripserunt. Ego itaque non in singulis latinæ linguæ particulis, sed universe in toto genere aurum requiro: ac sæpe quidem animadverti, ex aureis verbis luteam orationem fuisse conflata. Sed nunc tuis istis obrectatoribus, quandoquidem nihil detrimenti latinitas capit, morem geramus: valeat in minima quoque vocola aurum; indulgeamusque tam splendidæ cupiditati; verumtamen ita, ut conveniat inter nos quid sit aureum. Augusti obitus, inquiunt, auream clausit ætatem. Ecce tibi igitur aurum ab Ovidio, qui Cupidinem pro Augusti felicitate precatur, ex Ponto lib. 3. Eleg. 3. v. 61.

Sic regat imperium, terrasque coerceat omnes

Cæsar, ab Ænea qui tibi fratre nepos.

Vides, ut Poeta elegantissimus Augustum appellet nepotem Cupidinis, quod genus duceret ab ejus fratre, id est ab Ænea Veneris filio? Etiam in epistola Didonis Æneas dicitur frater Cupidinis: *Parce, Venus, nurui; durumque amplectere fratrem, Frater Amor.* Quid si dicant, inquis, tam alte peti cognationem hanc, ut in nomina minus propria degeneraverit? Id si dicant, pulchre eludent, seu potius eludere tentabunt: sed ne nos quidem ex toto gladiaturam ignoramus. Nimirum quo stirpes longius procedunt, nepotes quidem minus propinqui sunt, sed tamen nepotes: cognatio minuitur, non variatur. Verum agamus cum iis liberaliter. Nosti, opinor, qua sit Plautus auctoritate, cujus ore Romanas Musas prisco illo sæculo locutas ferunt: hic igitur tam locuples auctor in Amphitr. Act. 4. sc. *Quis tam*

va-

vaslo &c. sic habet: *ego ille idem sum Amphitruo, Gorgophones nepos, imperator Thebanorum*. Fuit autem Gorgophone Amphitruonis amita, quia soror Alcei ejus patris. Videturne tibi satis propinqua cognatio, quæ tueri vocabulorum dignitatem possit? Hic tu me etiam rides hominem semidoctum, qui carmina supposita a Plautinis non distinguam. Rideas licet, dummodo illud mihi primum concedas, Comœdiæ hujus Supposita omnia latini hominis esse, & quidem antiqui, ut Grammatici peritissimi constituunt; deinde moneri te sinas, hanc, quæ Suppositorum ultima scena est, Plauti germanam judicari cum ab Jano Gulielmio in quæst. Plaut. c. 7. tum ab aliis Criticis viris, quos refert Frid. Taubmannus in Plauti commentario. Quod si quam nos liberales sumus, tam Pædianus tuus æquus esse velit; nec aureis tantum verbis, sed argenteis quoque, & quod multos fecisse video politissimos scriptores, etiam æneis locum aliquem in Latio concedat; jam ea illi ex omni memoria exempla proponam, quibus fidem negare non possit. Quid enim? An illum Quintilianî auctoritas parum movebit, qui, si ætatem quæris, ab ipso Neronis exitu florere cœpit; si doctrinam & eruditionem, viginti annos erudiendæ juventuti impendit, tanta æstimatione ingenii, ut & salarium e fisco, & senatoriam dignitatem, & consularia ornamenta consecutus sit? Hic igitur tantus eloquentiæ magister in proœmio, quæ pars Orationis cultum & elegantiam maxime postulat; in proœmio, inquam, libri quarti suarum Institutionum, multum se debere profitetur Domitia-

no Impetatori, quod sibi sororis suæ nepotum curam delegaverit. Ad quem locum accipe Turnebi animadversionem: *Nove dixit sororis Nepotes pro Nepotes ex sorore*. Neque enim dubitari debet, quin illi fuerint Flavii Clementis filii, quos etiam cum parvulos Domitianus successores destinaverat, ut narrat Suetonius in Domit. cap. 15. Hujus autem Clementis uxorem fuisse Domitillam Domitiani sororem refert Philostratus in vita Apollonii Tyan. lib. 8. c. 10. (al. 25.) Ἐτυχε Κλήμεντα ἀπεκτονῶς ἄνδρα ὑπάτον, ὃ τὴν ἀδελφὴν τὴν ἑαυτῷ ἐδέδωκεν. h. e. *Interfecit Clementem virum Consularem, cui sororem suam collocaverat*. At enim Suetonius in Vespas. c. 3. unam dumtaxat memorat Domitillam Flavii filiam, Domitiani sororem, quæ, vivo adhuc, imo & privato Vespasiano patre, diem obiit; cum Domitilla Clementis uxor, in insulam Pandatariam a Domitiano relegata, illi superstes fuerit. Esto, num iccirco neganda Philostrato fides, qui proxima ætate vixit, & in ipsa domo Augusta epistolarum magister fuit? Fortasse alteram hanc Domitillam Vespasianus suscepit ex Cænide, quam, mortua Flavia, *pene jussu uxoris loco habuit*; ut est in eodem Suetonii loco. Fortasse hanc quoque Flavia genuit, sed ex Statilio Capella, quo tempore in ejus contubernio erat: quod in causa esse potest, ut a Dione, seu potius Xiphilino, non ἀδελφῇ, sed συγγενῇ, id est cognata Domitiani dicatur. Nonnulli Philostrati auctoritatem subruere conati sunt, sed adhuc inani conatu; ac ne timorem quidem ullum tibi injicere debent, nisi si quando ipsius verba sollicitare incipient, ut ἀδελφῇν.

Φῆν.

φῆν vertant in ἀδελφίδην, hoc est *sororem* in *sororis* *filiam*; nam fuit altera Domitilla Domitillæ filia, de qua inscriptio apud Gruter. p. 245. n. 5. FLAVIA DOMITILLA FILIA FLAVIÆ DOMITILLÆ IMP. CÆSARIS VESPASIANI NEPTIS. Majus illi negotium exhibent, qui nos ad Grammaticorum subsellia vocant; justoque sacramento contendunt, genus hoc constructionis aut aliud significare, ac nos existimamus, aut, quod Turnebus animadvertit, ab usitata latini sermonis consuetudine abesse. Ergo si Quintilianus *nepotes ex sorore* dixisset, manus darent. At mihi diligenter perquirenti idiotismus hic coties occurrit, ut fidentissime statuam sororis meæ filium a Latinis scriptoribus tam recte dici *sororis nepotem*, quam *nepotem ex sorore*, aut *nepotem per sororem*; omnino ut vernaculo sermone dicimus vel *mio nipote di sorella*, vel *nipote per via di sorella*. Quod ita ostendam, ut non solum Turnebo satisfiat, sed illis quoque, qui vocem *Nepos* omnibus prorsus ex fratre ac sorore genitis denegant; siue sola sit, siue adjunctis *ex fratre*, aut *per fratrem*, *ex sorore*, aut *per sororem* applicata. Suetonius in Cæs. c. 83. *Tres inquit, constituit hæredes, sororum nepotes, C. Octavium Q. Pedium, L. Pinarium*. En tibi, Turnebe, *nepos sororis* pro *nepos ex sorore*; nam Pedius & Pinarus ex Julia majore geniti erant, Cæsaris sorore; Octavius autem, natus ex Atia Juliæ minoris filia, simpliciter ac sine ulla adjectione Cæsaris *nepos* dicitur ab Eutropio in Breviar. l. 7. c. 1. Jam vero Tacitus prodeat, dignus etiam fortasse, qui Suetonio præiret. *Crispum* (inquit an-

Procul
dubio le-
gendum
ἀδελφίδην,
atque ita
solvitur
nodus.

nal. l. 3. c. 30.) *equestri ortum loco C. Sallustius rerum Romanarum florentissimus auctor sororis nepotem in nomen adscivit*. Fuit autem Crispi mater Sallustia C. Sallustii Historici soror, ut videre potes in Glandorpii Onomastico. Prodeat Spartianus, qui sic habet in Hadriano, c. 2. *Nep̄e per sororem Trajani uxore accepta*, h. e. Sabina nep̄e Trajani per sororem ejus Marcianam. Prodeat denique cetera turba, sed non sine nomine. Orosius l. 7. c. 28. *Licinius adolescens, Licinii Augusti filius, Constantini autem ex sorore nepos*. Vetus monumentum, Galliēno imperante positum, apud Keines. Class. 8. num. 37. **AVVNCVLVS NEPOTI B. ME.** Ambrosius l. 6. epist. ad Pat̄r. num. 48. *Avunculus iste illius; ista hujus nep̄tis vocatur*. Venant. Fortunatus l. 6. carm. 4. v. 16. *Non cecidit patruus, dum stat in Urbe nep̄os*. Sed jam ad ea tempora pervenimus, quibus ferme nemo latine scripsit, quin promiscue nepotem dixerit cum filii, tum fratris filium; quod ita notum est omnibus, ut supervacuum sit auctoritates congerere. Illud cave, ne tibi persuadeant, Latinam linguam exinde interuisse, quæ quamvis in communi loquendi consuetudine esse desierit, attamen in scholis, in Academiis, in publicis monumentis, & universe in optimo quoque scriptionis genere, quæ singula populari locutioni infinito intervallo præstant, semper viguit ac dominata est: qua de re multa jamdiu animo volvo, sed ea non capit epistola. Etiamne igitur quis dubitabit de hujus vocabuli potestate; seque miris modis contorquebit, quoties fratris, aut sororis filium unica voce notare voluerit, aut
etiam

etiam pluribus, sed quæ tamen cognationem hanc sine magno verborum circuitu, ac sine ambiguitate significant? Muretus, sui sæculi Tullius, ex Apulejo quoque, ac Sidonio quædam esse petenda scribit lib. 1. Epist. 36. nos vero ne ab Quidio quidem audebimus? Hinc videlicet nostræ illæ macræ atque jejunæ scriptiones, in quibus nihil magis apparet atque extat, quam metus & sollicitudo. Qui quidem morbus vetulissimus est, & ab ipso Quinctiliano exploratus. *Iniqui iudices* (inquit lib. 8. cap. 3.) *erga nos sumus, ideoque paupertate sermonis laboramus.* Mone igitur monitorem tuum, ne sibi, ac tibi sine causa crucem figat. Hactenus jussu tuo; nunc aliqua etiam sponte mea; ne, ut soles, de litterarum brevitate queri possis. Atque ego quidem non valde miror, nomen *Nepos* fratris filiis posterisque eorum fuisse tributum, quia cum proprio cognatio ista careret nomine, ex proximo arcescere debuit: quod in aliis quoque linguis ex Latina propagatis postea factum est, *exemplo monstrante viam.* Illud mihi potius mirum videtur, cur etiam ad prodigos appellationem hanc pertinere Latini voluerint: cum enim multæ rationes afferri soleant, nullam tamen adhuc video, quæ homini veritatis studioso possit esse satis. Accipe, quid ego de re hac, homo, ut scis, non valde acutus, nudius tertius excogitaverim. Cum Romani inter antiquas virtutes frugalitatem in primis numerarent, inter sæculi vitia maxime prodigiam, hinc factum esse crediderim, ut profusum hominem & æquo largiorem nepotem dicerent. Quid palles, quid ad extrema oculos ab-

ſicis? Nempe times, ne multa de veterum Romanorum frugalitate exempla, hiftorias, verſiculos, quandoquidem ita uſuvenit, ad eruditionis ſpeciem & pompam tibi obtrudam. Non ita ſum laudis cupidus, aut certe non laudis hujus. Sed fac me unum aliquem eruditum ex *Theatro vite humane*: ego ne tibi tam vulgares eruditiones? Scio cui ſcribam: Id modo dico, Romanos ſcriptores nihil frequentius memorare, quam nepotum luxuriam ab avita parſimonia degenerantium; quod apud illos adeo increbuit, ut ne nōminis quidem inter nepotem, & prodigum voluerint eſſe diſcrimen. Hic tu mihi Calepini lexicon objicis tres ante annos mea opera editum. Vide, numquid gravius. Sed primum de toto illo volumine ita velim judices, ut eſt in epiftola ad Lectorem, nec plus a me poſcas, quam promiſerim; deinde ad hoc ipſum quod attinet, ſic tibi perſuadeas; nihil prorſus certi atque explorati conſtitui poſſe; ex quo factum eſt, ut non ſolum aliaſſe, ſed ego ipſe alias aliter ſcripſerim. Erit fortaſſe, cui priora illa magis arrideant, erit qui neutra probet: ſed quod in re hac facillimum eſt, multi reprehendent; quod unum in rebus omnibus eſt difficile, nemo optima reponet. Habes jam quo ſtudio ea curem, quæ te velle, quæque ad tuam laudem pertinere intelligo; neque vereor, ne te non expleverim: quod utinam tu quoque noſtrum deſiderium expleas videndi tui, iſtiſque ſilvis aliquando relictis, in ſole rurus vivere incipias. Vale,

EPISTOLA VII.

De vocibus Artopta, Locare, & Nota.

QUOD Pædiano isti tuo Juvenalis & Persii Satyræ tantum placeant, quantum scribis, haud equidem miror: placent enim magnopere etiam nobis, quamvis non audeamus Horatianis opponere. Illud vero per mihi mirum videtur, qui fiat, ut sibi persuaferit, nullum esse horum Poetarum versiculum, quem ipse non probe intelligat. Ut ut est, ego tibi auctor sum, ut libus abstineas. Quod tamen consilium ne videar dedisse fugiendi laboris gratia, duo loca adscribam, alterum Juvenalis, Persii alterum, quibus tentare hominis ingenium possis, & belle, nisi fallor, includere. Debes igitur te in laudantis speciem totum conformare; os ejus atque oculos ingenii indices admirari; interrogare, quam pridem se dederit his auctoribus; quidquid responderit, magna accipere admiratione. Cum maxime intumuerit, cum veluti discipulus aliquis in Pythagoræ ludo post silentium quinquennale, calide arguteque urge, nec quidquam abire patiaris. Est, inquires, in quinta Juvenalis Satyra vox *Artopta* (v. 71. *salva sit artopta reverentia*) cujus, quæso, vim ac significationem pro tua ista intelligentia mihi expedi. Si imparatum invenies, ut fere solent esse gloriosi homines, mitte ad Interpretes, unde verbosior redibit, sed paullo doctior. Cum enim omnes excusseris postrema editione ab Henninio

collectos; id, si recte conjicio, pronunciabit, quod Henninio ipsi probatur, *artoptam panem esse nonnihil assatum*. Hæc scilicet opinio fuit Octavii Ferrarii Elect. l. 2. c. 10. qui tamen si animadvertisset Plauti verba in *Aulular.* a. 2. sc. 9. *Ego hinc artoptam ex proximo utendam peto*, facile sibi persuasisset, *artoptam* vas esse, in quo panis assatur, non panem ipsum. Vides enim, opinor, vas utendum a sene Plautino peti potuisse, panem utendum non item. Jam vero cum *artopta* vox Græca sit ab ἀρτόπτῃ, quam describit Pollux lib. 10. c. 25. τὸ σκέυος, ἐν ᾧ τὰς ἄρτας ἐροπτῶσι. *vas in quo panes coquunt*, quære a Pædiano tuo, cur putet a propria certaue significatione abeundum. An non sensus & urbanitas constat, cum jubetur Parasitus abstinere pane, qui in *artopta* coctus est: atque ita vereri vas in domini delicias, velut ad sacra, comparatum? In quo quidem non tam usum ipsum rei, quam Græcam appellationem irridet more suo. Quod si malit Lubini interpretationem tibi obtrudere, qui *artoptam* panis dispensatorem & custodem esse putat, ab ἄρτος panis, & ὀπτομαι video, fac primum ostendat, ubi novam hanc vocem, & quidem masculini generis, sive apud Græcos sive apud Latinos invenerit; deinde quomodo cohærere existimet consequentis carminis verba, *supereſt illic, qui ponere cogat*, nam si *artopta* custos est, ipse quidem *ponere coget*, non alius servus. Sudabit, mihi crede, atque algebit; sed explicare se ex ambagibus non poterit. Fortasse ad illos accedet, qui *artoptam* pistorem dixerunt, tamquam ab ἀρτόπτης. Esto, amplificemus Latinam linguam, siquidem vox ἀρτόπτης apud ul-

lum

lum Græcum scriptorem reperitur. Quid si dicat, mulierem panificam significari, testemque appellet Plinium? Nihil novi dixerit, sed nihil item veri. Ecce tibi Plinii verba lib. 18. c. 11. *Pistores Romæ non fuere ad Persicum usque bellum &c. Ipsi panem faciebant Quirites, mulierumque id opus erat, sicut etiam nunc in plurimis gentium. Artoptam Plautus appellat in fabula, quam Aululariam scripsit; magna ob id concertatione eruditorum, an is versus Poetæ sit illius; certumque sit A. Asteii Capitonis sententia, coquos tum panem lautioribus coquere solitos. Primum igitur narrat Historicus, pistores ad Persicum usque bellum Romæ non fuisse; deinde ipse sibi hac super re difficultatem movet, quod in Plauti fabula mentio fiat artoptæ, hoc est pistorii vasis, & quidem ex Græcia allati, ut ex ipso nomine patet; denique difficultatem tollit, tum quia non satis constat, an is versus Plauti sit, tum vero maxime quod artoptæ coqui uterentur, non pistores. Hinc artopticii panis eodem capite meminit, qui ab artoptæ dicitur, sicut a furno furnaceus. Videsne, quam nihil afferant probabile, qui artoptam apud Plinium mulierem putant? Igitur pro certo habeas, artoptam vas esse ad panem delicatiorem coquendum; neque sinas, te per vanas commentationes induci. Vide porro, ne Pædianus ad incitas redactus, viderem Juvenalis editionem in medium afferat anni 1473. quæ non artoptæ habet, sed artocopi. Vox artocopus, qualiscumque est, etiam Britannico placuit: sed tu illi & invidiam novitatis oppone, & optimorum codicum fidem, & eruditorum consensum pro artoptæ. Antequam manum de tabu-*

la, illud quoque te monitum volo, unum ex omnibus veterem Scholialtem subdubitalle, utrum *artopta* pistor esset, an vas: qui hunc consecuti sunt Juvenalis enarratores, pro pistore nonnulli steterunt, vas omnes omnino rejecerunt.

Jam ad Persium veniamus. Sed victus atque afflictus Pædianus suis se castris tenebit. Si tamen provocando rursus educere in aciem potes, quære ab illo, quid putet per vocem *Rhenos* significari in Satyra Persii VI. v. 47. *ingentesque locat Cæsonia Rhenos*. Si accipis, inquiet suo periculo cautus, quod scribunt Interpretes, *Rhenos* posuit pro Rheni incolis. Tum tu: Principio quidem perinde loquebaris, ac si Juvenalis, & Persii anima in te migrasset; sed ut nunc est, de tuo vis. Itaque vero nihil nisi ab Interpretibus? Recita, o bone, quinque ipsos Persii versus, quibus tota clauditur sententia.

----- *Missa est a Cæsare laurus
Insignem ob cladem Germanæ pubis, & aris
Frigidus excutitur cinis: ac jam postibus arma,
Jam chlamydes regum, jam lutea gausapa captis,
Essedaque, ingentesque locat Cæsonia Rhenos.*

Describit igitur apparatus triumphalem C. Caligulae, qui victoriam de Germanis relatam jactabat, laureatis litteris ad Senatum missis: qua de re legendus Suetonius in ejus Vita, cap. 45 & seq. Itaque Cæsonia ejus uxor parabat aras ad sacrificia, & inter ceteras triumphi pompas Belgica vehicula, & Rheni imagines fieri curabat. Nolli oppidorum ac fluminum iconas, imo rerum & locorum omnium, quæ ullo modo ad victoriam pertinerent, in triumphum ferri consuevisse.

se. Tacitus Annal. 2. c. 41. *Vesta spolia* (in triumpho Germanici) *simulacra montium, fluminum, præliorum*. Ovidius de triumpho Drusi l. 4. Trist. Eleg. 2. v. 37.

Hic lacus, hi montes, hæc tot castella, tot amnes,

Plena feræ cædis, plena cruoris erant.

Imo ipsum Rheni simulacrum ejus pompæ pars fuit v. 41.

Cornibus hic fractis viridis male tectus ab ulva,

Decolor ipse suo sanguine Rhenus erat.

Quare Cæsonia ingentes Rhenos, hoc est ingentes Rheni imagines fieri volebat, quoniam ad Rhenum ridiculam illam victoriam maritus retulisse dicebatur. Rheni porro incolas, qui tamquam captivi ante currum ducerentur, non Cæsonia, quæ in Urbe erat, sed Caligula comparare debebat; & revera comparavit, & ad pompam seposuit, ut narrat Suetonius cap. 47. Equidem non video, quid opus sit in tanta sententiæ perspicuitate ad hanc *μετανομίαν* confugere præsertim tam duram, ut aliquos coegerit de codicum fide male suspicari, vocemque *Rhenos* in *Rhedas* convertere. Ecce vero si *Rhenus* pro Rheni incola dici potest, jam reliquum est, ut & Patavium pro homine Patavino, & Adria pro pisce Adriatico, & alia hujusmodi nimis ridicula dicantur.

Si vis autem illum uno telo prorsus conficere, hic veluti duplicato ictu, ad explicationem compelle verbi *Locat*. Quid tibi ab illo expectes, nisi quod interpretes omnes docti indoctique habent, videlicet idem valere atque accommodat, collocat, disponit? Id cum dixerit, impune ride-

bis. Quid enim minus ad rem? quasi vero Cæsonia tanto ante triumphi diem, qui dies ne advenit quidem umquam, arma in templorum postibus collocaret, captivos vestiret, effeda & imagines in pompa disponderet. Tu, si paullo reputabis attentius, statim intelliges, *locare* nihil esse aliud, quam opus faciundum redemptoribus tradere. Nam cum Caligula *procuratoribus scripsisset* (Sueton. c. 47.) *triumphum appararent, quantus numquam alius fuisset*, inveniendi erant artifices, quibus & arma postibus figenda, & vestes ad captivos ornandos, & effeda, & imagines, & apparatus denique totus locaretur. Id vero usuveniebat etiam in veris ac legitimis triumphis, ut vel tota, vel maxima pompæ pars, quamvis in speciem advecta longius, in Urbe tamen conderetur: ideoque deesse non poterant id genus redemptores. Non aliter, credo, quinque Julii Cæsaris triumphi, quorum quatuor eodem mense acti, parari tanta celeritate & varietate potuerunt. De his Vell. Paterculus l. 2, c. 56. *Quinque egit triumphos: Gallici apparatus ex citro, Pontici ex acantho, Alexandrini testudine, Africi ebo-re, Hispaniensis argento rasili constitit.* Hæc si tu magna asseveratione & confidentia dices, non solum tamquam vera, sed etiam tamquam tua, excuties vano isti Grammatico jactationem; nec amplius audebit mirificum se tibi Juvenalis, aut Persii interpretem venditare. Quod reliquum est, non li de patria queri: sunt & nobis Pædiani nostri; verumtamen non audent cuilibet imponere.

Jam flagitat tabellarius; nec tamen scribendi finem facere possum, antequam te moneam, ne,
quod

quod in tuis litteris semel atque iterum animadverti, vocem *Nota* pro adnotatione seu explicatione temere usurpes. Quid stupes? Latina non est. Nihil te pulcherrimorum librorum tituli moveant, in quibus *Notæ variorum*, *Notæ Criticæ*, *Notæ Selectæ*, & similia; nihil quotidianus eruditorem hominum usus, nihil ne nostræ quidem scriptiunculæ olim emissæ, cum magnis nominibus crederemus. *Nota* signum est: *notasque apponere*, quod habet Cicero in Pison. c. 30. est signa quædam appingere ad ea probanda, vel improbanda, quibus appingimus; non explicare, ut vulgo increbuit. Multa generis ejusdem in Latinis scholis & Academiis quotidie resonant; at ego nolo movere Camarinam, quam olim cum tentassem, vix *me servavit Apollo*. Ea cum tibi excident ad nos scribenti, nisi ægre feres, significabo. Pauci mihi crede, Latine sciunt: neque ego mihi tantam hanc laudem assumo; sed tamen quid ea sit, & quibus desit, intelligere mihi videor. Vale.

EPISTOLA VIII.

De Latinis transitionum formulis.

ORatiuncula me tua mirifice delectavit; eamque non solum, ut aliquid calumniarer, quod te velle significasti, semel atque iterum legi, sed etiam multo magis, quod nullus esset calumniæ locus. Totus es a Cicerone: nisi quod apparet alicubi nimia quædam connectendi cura.

Natu-

Naturam sequaris oportet, quæ multa distraxit. Neque enim in hoc Orationis virtus est, ut omnia sint unum, sed ut ad unum omnia referantur. Est ubi ipsa quoque negligentia tamquam simpliciter numerantis ad artem pertineat. Tu vero etiam a me petis Latinas transitionum formulas, quasi in hoc augere maxime diligentiam velis. Equidem non puto, velle te superare Ciceronem tuum. Atque ille quidem adeo nihil sollicitus de transitionum varietate est, ut in duabus pagellis orationis pro Cælio sine controversia elegantissimæ quinquies eandem formulam usurpaverit. Etenim sic habet cap. 2. *Nam quod de pietate dixistis &c.* Tum ibid. *Nam quod est objectum municipibus &c.* Deinde cap. 3. *Nam quod objectum est de pudicitia &c.* Deinde c. 4. *Nam quod Catilinæ familiaritas objecta Cælio est &c.* Deinde cap. 7. *Nam quod æs alienum objectum est &c.* Miraris, stupes, ac pœne stomacharis tantam in Cicerone jejunitatem. Lege, si vacat, epistolam secundam lib. V. ad Familiar. quam licet accuratissime scripserit pro rei gravitate, attamen in variandis transitionibus nullam curam suscepit. *Quod scribis, inquit, pro mutuo inter nos animo &c. Quod scribis de reconciliata nostra gratia &c. Quod scribis non oportuisse Metellum &c.* Neque tamen nimis est longa. Sed tu videlicet nimis in tenui laboras. Ut ut est, obsequar desiderio tuo; ne me, ut soles, valde acutum in labore declinando judices. Sed, mihi crede, copulandi modus res ipsas sequitur, & sub stilum scribentis subit non quæsitus. Exercitatione consequeris, ut frigida hæc adjumenta contemnas. Nunc ea poteris

teris adhibere, non solum tamquam vincula, quibus quæ inveneris, apte componas; sed multo magis tamquam signa, quibus admonitus invenias.

1. Satis multa verba fecisse videor de honestate; restat, ut de utilitate dicam. 2. Satis est argumenti, me nihil tibi debere; quid si ostendo, debere te mihi? 3. Satis, opinor, intelligitis, quid ego illi; videte nunc, quid ille mihi debeat. 4. Sed hæc fortasse ferenda; illud vero quis ferat? 5. Sed illud minime tacendum est. 6. Sed operæ pretium est illa percurrere. 7. Sed his non decrit locus: interim quod initio proposui, persequamur. 8. Sed nimis multa de nugis; ad seria veniamus. 9. Sed hæc vulgaria: illud maximum est. 10. Sed constantiam hominis videte, Auditores. 11. Sed jam aliquando pedem conferamus. 12. Sed id alias, nunc quod instat. 13. Sed adhibeat oratio modum, & redeat illuc, unde deflexit. 14. Longum est persequi singula: manebo, ut institui, in genere universo. 15. Jam ad reliqua properabimus, si prius illud unum adjecerimus. 16. Jam vero ad id, quod est hujus causæ caput, accedamus. 17. Jam quantum illud est, quod in tantis familiæ negotiis numquam intermisit litterarum studia? 18. Atque, ut facilius omnia intelligatis, ab initio rem totam vobis exponam. 19. Atque hæc ad utilitatem referebat, illa ad jucunditatem. 20. Atque ego de re ipsa postea disseram: nunc de consilio dicere libet. 21. Ac de me satis: sequitur, ut de te dicam. 22. At dices, me multis largitum. Nempe de meo; quid enim? 23. At enim hæc sunt communia multis. Esto: quid illud? Nonne pro-

proprium Verris, & singulare? 24. At enim solum id est, ut me Siculi velint: alterum illud, credo, obscurum est, quem Verres nolit. 25. Sunt hæc maxima: neque vero minora sunt illa. 26. Hæc privatim: nunc quæ publice. 27. Hæstenus, quæ domi gessit; deinceps quæ foris. 28. Habetis de simplicibus verbis: accipite jam de compositis. 29. De moribus satis: nunc de doctrina reliquum est ut dicamus. 30. De his plus satis: nam quæ restant, sunt multo graviora. 31. Alter erat locus cautionis, ne major sit impensa, quam vires. 32. Quid his immoror? Ad illa veniamus. 33. Quorsum alio nolentes abrepti sumus? Ad rem redeamus. 34. Quid illud, quod proprie ad milites pertinet, quale quantumque est? 35. Quid quod seipsum etiam superavit, cum &c.? 36. Quid vero, ut te ipse proderes, id nonne divinitus factum est? præsertim, qui posses &c. 37. Nam quod de litteris objicitur, non est tanti, ut &c. 38. Nam illud quid attinet commemorare? 39. Neque vero illud me commovet, quod &c. 40. Age vero ad bellum in Italia gestum veniamus. 41. Contra argumenta dictum est; contra testes dicamus. 42. Verum ubi testes adsunt, quid opus est rationibus? 43. Verum quid opus est testibus, ubi ratio non deest, & necessitas cogit? 44. Verum quidem hæc hæstenus: illud unum postremo loco dicam. 45. Hæc missa facio: illud quæro. 46. Nimis hæc, inquires, vetera sunt. At non vetus illud. 47. Pueritia illius exposita, reliquas ætates attendite. 48. Grave est, quod dico, non ita tamen, ut ab illo non superetur, quod &c. 49.

Plu-

Plura de illo jam dixi, quam putabam dici posse: nondum tamen illa commemoravi, quæ &c. 50. Multa hujusmodi proferre possem: sed ad illa properandum est, quæ &c. 51. Sinite, Auditores, me hæc prætermittere, quæ notissima sunt, ut ad illa vos adducam &c. 52. Illud tamen, quamquam ad exitum festinat oratio, præterire nullo modo possum. 53. Hæstenus de Principe: quod sequitur de Tyranno. 54. Ex quo debet intelligi, quam turpe sit &c. 55. Sunt exposita jam fere, quæ de facto quærentur. Nempe igitur ea restant, quæ de jure. 56. At malo, inquis, eorum metum mihi excuti, quam naturam indicari. Sequar, quo vocas. 57. Est hoc amplissimum: sed tamen nihil magnificentius, atque ornatus illo esse potest, quod &c. 58. Videte jam porro cetera. 59. Et quoniam incidit de nobilitate sermo, quis est &c. 60. Requiretur fortasse nunc, quomodo fortunam tulerit. Cognoscite, Auditores. 61. Omittamus de genere dicere: videamus hominem ipsum. 62. Quoniam de impudentia dixi: castigemus segnitiam quoque. 63. Sequitur illud, ne deterioribus honos augeatur. 64. Quoniam magistrum cognovistis; cognoscite jam discipulum. 65. Veniam, neque ita multo post ad hunc locum: in præsentī illa magis urgent &c. 66. Postularet locus, ut de canibus quoque dicerem: sed nolo in re non valde gravi nimius videri. 67. Nolim videri longior: sed tamen, ut bene emensum detur, nonnihil de causis adjungere placet. 68. Nolo plura dicere, quam temporis ratio postulet. Itaque minora illa prætereo &c. 69. Porro autem quis ignorat, quæ
hinc

hinc consequuntur? 70. Adde his, Accedit his, Huc accedit, Huc pertinet, Eodem refertur. 71. Ad hoc, Ad hæc, Ad hunc ordinem referendum est, Huic proximum est illud, &c. Satin' nugarum? Ego vero volui te vel copia ipsa fatigare. Vale.

EPISTOLA IX.

De particula Admodum, & verbo Aborior.

EGone, is quem nosti, egone, inquam, aut tibi, aut ulli mortalium succenseam, qui me siue prudens, siue imprudens *admodum illustrem* appellet, & in hanc formulam litteras scribat? Quid si ostendo, nihil meo quidem iudicio, aut fere nihil discriminis esse inter *admodum illustrem*, & *illustriissimum*? Multum sane in iis, quæ ab hominum opinione pendent, tribuendum est usui: at ego, qui jam Philosophus sum, & mihi res, non me rebus submittere conor, rationem & veritatem sequor, populi iudicium contemno. Rem novam tibi aperiam; sed tamen veram; Particula *Admodum* perperam adhibetur pro *Valde*, cum suapte natura significet *omnino*, παντελῶς, h. e. summum rei statum, non excellentem aliquem gradum. Accipe Latinorum Scriptorum consuetudinem perpetuam, atque constantem. Cicero s. de Fin. cap. 5. In quo multum *admodum* fortunæ datur. Livius l. 23. c. 29. Equestris pugna nulla *admodum* fuit, Idem l. 40. cap. ult. *Armorum* magnam vim

vim transfudit, nullam pecuniam admodum. Idem l. 44. c. 43. Secuti sunt eum admodum quingenti equites. Idem l. 22. c. 24. Sex millia hominum caesa, mille admodum Romanorum. Idem l. 42. c. 65. Mille admodum capiuntur. Idem l. 43. c. 11. Exacto admodum mense Februario. Curtius l. 4. c. 9. Mille admodum equites. Florus l. 2. c. 6. Prætextatus admodum filius. Id mihi præsertim clarum fit, cum dicitur nihil admodum. Cicero in Brut. cap. 9. Plane quidem perfectum Oratorem, & cui nihil admodum defuit, Demosthenem facile dixeris. Idem ibid. c. 58. Curio litterarum admodum nihil sciebat. Conradus Schwarzius in Particulis Lat. Orat. c. 8. explicat pæne nihil, nec aliter explicari posse existimat. Malebam homini docto parcere; sed quia in eo deceptus est, in quo omnes Ciceronis interpretes, & Grammatici longe optimi, juvat locum examinare, unde communis hic error manavit. Is est Cicer. de Orat. lib. 2. cap. 2. Alter (Crassus) non multum, quod quidem extaret, & id ipsum adolescens; alter nihil admodum scripti reliquit. Secundus hic Antonius est, qui exiguum libellum de ratione dicendi scripsisse dicitur in Brut. cap. 44. Ex quo & Schwarzius, & omnes ante illum Grammatici colligere se posse putarunt, verba nihil admodum scripti idem valere, ac pæne nihil. Sed vide, quomodo aberrant. Non negat Cicero, Antonium scripsisse aliquid, quod ad doctrinam pertineret; sed negat, reliquisse orationes, aut sermones, aut aliquid hujusmodi, per quod ejus eloquentiæ memoria servari posset, & a silentio vindicari. Locum universum si leges, ac perpendes, nihil amplius dubitabis.

Præsertim vero, si cum iis compones, quæ sunt in Orat. c. 38. *Crassi perpauca sunt, nihil Antonii, nihil Cotta, nihil Sulpicii.* An huc quoque particula *pæne* vocanda est, ne *exiguo libello de ratione dicendi*, quem scripsit Antonius, injuria fiat? Porro autem causam afferre solebat magnus hic Orator, cur Orationes non scriberet, de qua consulere potes Val. Maximum l. 7. c. 3. n. 5. Jam vide, quæso, quos lapides moverit Schwarzio, ut suum illud *pæne*, invitis Diis Deabusque, tueretur, idemque faceret atque *admodum*. Est Salviani locus de gubern. Dei lib. 6. *Omnes admodum in perditionem ruunt, aut certe (ut aliud dicam lenius) pæne omnes.* Hic enimvero tam perspicua est harum particularum distinctio, atque adeo oppositio, ut nihil magis. Attamen accipe ejus judicium: Si *ADMODUM* (inquit) *referas non ad OMNES, sed ad verbum RVVNT, tum etiam elegans resultat oratio; neque ADMODUM, & PÆNE opponuntur.* Rides, opinor, præsertim qui nosti Salvianum hac particula mirifice delectari, & ubique pro *omnino* uti. Sed rideas licet multo magis, cum legeris eodem capite n. 3. moneri nos a Schwarzio, *Admodum de numero varius esse.* Enimvero quid hoc sit, vix puto intelligi posse. Nam si solas auctoritates a me allatas consideres, nihil fieri potest elegantius. In viam redeamus. *Qui admodum illustris est, nihilo plus illustrari potest.* At enim omnes, qui Latine scribunt, particulam hanc pro *valde* usurpant. Moveres me scilicet, si diceres *usurparunt*. Neque enim video, quinam ex nostris tantæ sit auctoritatis, ut linguam latinam augere possit, aut

aut mutare. Quid vero? Putasne in hac una voce communiter ab omnibus peccari? Plurima sunt generis ejusdem: inter quæ illud ipsum *Aborior* referendum judicio, quod in fine tuarum litterarum adhibuisti, pro oriri ante partus maturitatem. Verbum hoc, si quæris, nihil valet aliud, quam mori; opponiturque τῷ orior, præpositione *Ab* vitium significante, ut in *Abrogo*, *Abfimilis*. & aliis ejusdem notæ. Varro l. 4. de ling. lat. *Idem hic Diespiter dicitur, infimus aer, qui est conjunctus terræ, ubi omnia oriuntur, ubi aborimur.* Idem in fragm. apud Nonium c. 2. n. 24. *Vinum, quod ibi natum sit, si prægnans biberit, fieri ut aboriatur.* Fœtus videlicet: quemadmodum dixit Gellius l. 12. c. 1. *Ut fœtus quoque ipsi in corpore suo concepti aboriantur.* h. e. intereant. In nitidissima Gronoviorum editione 1706. dicitur *Aborior* hoc loco passive adhibitum esse; quod a vero quam absit, ipse per te vides. Lucretius hanc ipsam significationem transtulit ad alia lib. 3. v. 155. *Pallorem existere toto corpore, & infringi linguam, vocemque aboriri.* h. e. intercludi, deficere; quod in magnis timoribus evenire solet. Adde huc ipsum quoque *Aboriscor*, quod in unam eandemque significationem convenit. Lucretius l. 5. v. 732. *Inque dies privos aborisci quæque creata.* Quamquam verbum hoc fortasse nullum est; nam neque alibi invenitur, quantum ego quidem omni adhibita diligentia affirmare possum; & hoc ipso in loco alii leg. *aboriri*, alii *abolescere*. Multa fortasse miscebis, ut verba Gellii, & Varronis apud Nonium ad vulgatam consuetudinem detorqueas: sed quamdiu nihil certi afferes, non po-

teris a nobis jure discedere, qui satis ostendimus verbi hujus significationem, & extra aleam posuimus. Incerta enim ad certa sunt revocanda. Siquid habes, quod opponas, modo sit locupletis Auctoris, noli dissimulare. In libera Civitate vivimus, quicumque litteris operam damus. Vale.

EPISTOLA X.

De T. Livii Patavinitate.

NON putabam, esse amplius, ut ullo umquam tempore in Italia fore, qui de Livii Patavinitate quærent. Itaque non laborem, ut exprobras, superioribus litteris detrectavi, sed molestiam sum deprecatus. Nunc, quando urges, juvat me ipsum quoque Principis Historicorum gloriæ (utar enim Livianis verbis) pro virili parte consuluisse. Vetus hæc Asinii Pollionis accusatio est, quam refert Quintilianus in lib. viii. instit. c. 1. Fortasse ne dici quidem accusatio potest. Non enim id obrectandi causa objecit, sed quod delicatissimi fastidii homo aliquid sibi in Liviana scriptione sentire videretur, quod Romani sermonis indolem & naturam non prorsus sciret, magisque civitate donatum, quam civicum, ut ita dicam, appareret. Habent enim ejusdem sermonis populi pro regionum diversitate suas quisque loquendi formulas, & certam quamdam verborum structuram, quæ interdum etiam in una

ca-

eademque Urbe, si paullo sit amplior, nonnihil variatur. Id vero est, nisi fallor, quod Lipsius voce duriuscula peregrinitatem vocat. Paulus Benius in lib. 11. de Hist. eumque secutus Angelus Portenarius suspicantur, Patavinitalis nomine nimium erga Pompejum studium ab Asinio fuisse notatum, cujus causa Livius ab Augusto Pompejanus dici soleret, ut est apud Tacitum annal. 1v. c. 34. Asinius autem, Vellejo teste, Antonianus fuit, ideoque Cæsarianus, & quod consequitur, Patavinis omnibus, qui Pompejo ac reip. faverant, maxime infensus. Sed nimio plus eruditus viris adnitendum erat, ut probarent, inter Italix populos, qui bello Civili Pompeji partes & reip. susceperant, Patavinorum studium fuisse præcipuum, quasque proprium usque adeo, ut per quandam antonomasiam Patavinitas diceretur. Quid enim? An non magis Pompejo favit Corfinium, ubi primum Cæsaris victorias remorari Domitius conatus est? An non majore in eum fide Brundisium fuit, quam ultimam Italicarum urbium Pompejus reliquit? An non fortius & constantius ab eo steterunt Massilienses, qui totius Italix auctoritate minime moti, portas Cæsari clausurunt, & usque ad discrimen ultimum obsidenti resisterunt? Non defuere, qui reputantes nimiam quandam severitatem Patavinis objici consuevisse, ut colligitur ex Plinio lib. 1. epist. 14. & ex Martiali lib. xi. epigr. 17. hanc ipsam in Liviano dicendi genere ab Asinio notatam vellent. Fere enim Itilius cum vivendi ratione consentit, & in suis quisque libris non ingenii modo, sed vitæ morumque imaginem quandam

posteris relinquit. *Profert mores* (inquit Quintilianus l. xi. c. 1.) *plerumque oratio, & animi secreta detegit; nec sine causa Græci prodiderunt, ut vivat, quemque etiam dicere.* Atque isti quidem Patavinitatem in laudis loco ponunt, sed paulio studiosius quæsitæ; quasi nihil sit aliud, quam nimis accurata latini sermonis castitas & pæne superstitiosa severitas. Idque eo fidentius affirmant, quod Quintilianus hanc in rem illius Atticæ anus exemplum affert, quæ Theophrastum hominem disertissimum, adnotata unius affectatione verbi, hospitem dixit; nec aliunde se deprehendisse interrogata respondit, quam quod nimium Attice loqueretur. *In virium ducit culpæ fugæ.* Quæres fortasse, quinam isti sint Grammatici tam benevoli. Equidem non memini. Immo ne illud quidem memini, utrum ego id aliquando legerim, an audierim, an vero ipse ita olim cogitando conjecerim. Nunc certe longe aliter mihi videtur. Idcirco enim arbitror, objectam fuisse Livio Patavinitatem, quod Romana urbanitate careret. Testis mihi locupletissimus Tullius est in Bruto c. 46. Quod enim ille de externis Oratoribus dicit, idem mihi ab Asinio dictum videtur de Historico externo. *Quid tu, inquit Brutus, tribuis externis Oratoribus? Quid censes inquam, nisi idem quod urbanis, præter unum, quod non est eorum urbanitate quadam quasi colorata Oratio? Quid est, inquit Brutus, iste tandem urbanitatis color? Nescio, inquam; tantum esse quemdam scio.* Ita velim respondeat Romanus homo de Livii Patavinitate interroganti: *Quid sit nescio; tantum esse quamdam scio.* Sed hætenus satis.

Si

Si plura cupis, & vacas, adi Morhofium, qui ait in suo Polyhistore lib. IV. c. XI. se de Livii Patavinitate tam multa scripsisse, ut ea in compendium redigere pigeat. Mihi quidem in præsentî vacui temporis non est satis. Vale.



ACADEMICÆ COMMISSIONES,

Qua qualibet hebdomada in Seminario Patavino publice haberi solent.



COMMISSIO I.

De Linguae Latinæ studio.

PROOEMIUM.



Ereor, ne mihi in præfenti exercitatione simile quippiam eveniat, ac veteri cuidam Sophistæ, qui in publica concione Herculis laudes persequi constituerat. Cum hic florem ipsum Spartanorum magnæ cujusdam expectatione rei uno in loco adesse iussisset, jamque spectantibus omnibus in suggestum ascenderet, tum ex iis unus, qui in corona sedebant, Antalcidas nomine, vir cum primis dignitate & auctoritate gravis, Sophistam interrogavit, qua de re dicere vellet: **Herculem**, inquit, laudandum suscipio. Hic vero Antalcidas otiosum Declamatorem nova interrogat-

rogatione exanimavit, percunctatus, quis Herculem reprehendisset, ut opus esset laudatore. Habebant enim Herculem Lacedæmonii in Deorum numero, eumque omnes in primis colebant. Ecce me vobis, Auditores, eo consilio, ut linguæ Latinæ studium in hoc ejus quasi portu, in quem denique multis jactata tempestatibus, Deorum immortalium providentia confugit, quam maximis potero, laudibus ornem. Video, quam nihil indigeat laudatore, me vero præsertim, quem ex hac ipsa contentione intelligetis neque Latine admodum scire, neque ullo doctrinæ aut eruditionis genere valere. Illud vos tamen etiam atque etiam obsecro, ne putetis, mihi temere cogitanti in mentem venisse, ut Sophistam agerem. Nam si quis a nobis Antalcidas quærat, utrum sit aliquis tam vecordis animi ac desperati, qui Latini sermonis præstantiam dignitatemque non agnoscat, respondebo, ne litteris quidem sua monstra deesse. Absunt enim vero ab hoc loco: utinam aliquando absint provincia tota; cedant humanitati ac veritati locum; purgent cælum hoc fallaciis; in suas terras, hoc est barbaras concedant. Interim tamen ne cui nostrum officere possint, si quando conentur huc quoque pestilens virus afflare, ego hodie pro virili industriam omnem operamque adhibebo; non sane quod sperem me posse aliquid, sed ut eorum studia commoveam, quos & plurimum posse video, & ubi opus fuerit, paratos esse ad resistendum certo scio.

SILVA.

EXercitatio hæc ad genus Laudativum pertinet. Laudabitis enim Latinæ linguæ studium.

Primum ob dignitatem : quia lingua hæc fuit principis terrarum gentis ; quia adhuc in publicis monumentis, in sacris, in cærimoniis locum habet ; quia una demum ex omnibus perpetuo duratura videtur, quod cum religione juncta sit. Ac ceteræ quidem linguæ, quibus nunc utimur, pendent a populi voluntate, qua nihil levius ; Latinam ab hac servitute eruditi vindicarunt, & certis firmisque legibus constituerunt.

Deinde ob jucunditatem : quia pulcherrima est, gravis, numerosa, dives, ad omnia animi sensa exprimenda & ornanda supra ceteras apta.

Hinc ab omnibus nationibus, tamquam cujusque propria, arrepta est : qua ratione gradum facietis ad ejus utilitatem ostendendam. Nam per hanc unam cum omnibus hominibus jungere commercia possumus, & Babelicæ turris incommoda compensare.

Postremo ob necessitatem : nam qui litteris deditus est, aliis omnibus linguis carere potest, hæc una non potest. Omnes enim artes ac disciplinæ Latine traduntur ; omnes Academiæ Latino sermone circumsonant ; frigidus est Theologus, Philosophus, Jurisperitus, qui suarum rerum gravitatem aliis verbis assequi conatur, quam Latinis.

Ergo hæc litteratorum lingua dici quod immo-
do debet, in qua qui præstat, non iam inter
turbam, sed inter ipsos litteratos eminet. Quod

COMMISSIONES. 443

si homines brutis animalibus antecellunt, quod animi sensa inter se conferre loquendo possint; litterati ceteris hominibus, quod melius possint; quanta erit ejus præstantia, qui litteratos ipsos elegantia sermonis prætergrediatur?

Ultimo loco ad absurdum res duci poterit. Nam cum in tanta brevitate vitæ tam multa discere debeamus, absurdum est per alias linguas vagari, quarum monumenta omnia in hac una continentur. Ac siqua contendere cum Latina posset, Græca scilicet esset. Verum quid habent Græci, quod non sit Latinis litteris mandatum? Cum tamen contra ex Latinis paucissima Græco sermone legantur, &c.

AD GRÆCAM

INTERPRETATIONEM.

*Lingua Latina per Ven. GREGORIUM CARD.
BARBADICUM in Patavino
Seminario restituta.*

Italico regina solo dominabar, & ipse
Lacteus edebat verba Latina puer.
At cum se nostro Gens barbara miscuit orbi
In latebras linguæ me pepulere novæ.
Pulvere sub turpi damnata silentia duxi,
Et blattas Cicero, Virgiliusque tulit.
Tum Petrarcha meis sumlit pro juribus arma,
Conatus veterem restituisse locum.
Jamque reflorescens complebam lumine terras,
Visaque sunt nobis aurea sæcla iterum.
Post-

Postea sed variis rursus concussa duellis,
 Heu, dixi, melius delituisse fuit.
 Denique Gregorius sortem miseratus acerbam,
 Me sedis voluit sceptrâ tenere suâ.
 Regna angusta nimis, tantoque minora vetusto
 Non placuere mihi, sed placuit Dominus.

GRATIARUM ACTIO.

MUnera multiplici creverunt ordine vestra;
 Nec pensari ulla jam bene voce queunt.
 Huc linguæ coeant omnes, & pignore certent,
 In re non facili quæ sit inepta minus.
 Siqua suis poterit tam grandia reddere verbis,
 Huic uni cedit lingua Latina locum.

COMMISSIO II.

De studio Linguæ Græcæ.

PROŒMIUM.

SÆpe ego constitui, siquando mihi dicendi copia apud vos daretur, in disceptionem vocare, cur Græcæ litteræ, florentibus Romanorum rebus, tam male audirent, ut mores corrumpere crederentur; tamen si nemo esset unus, qui negaret, disciplinas artesque omnes ad civilem cultum libero homini necessarias ex illis profectas esse. Ut enim nihil de Satyrarum scriptoribus dicam, morosis ingeniis atque acerbis, quorum princeps Juvenalis (si modo princeps appellari debet)

bet) neque hominibus Græcis, neque verbis pepercit; nonne Cato ille Censorius, gravitatis & sapientiæ imago, ad Marcum filium scripsit, *Bonum esse Græcas litteras inspicere, non perdiscere?* Quid M. Cicero Oratoris pater? Nonne hujus viri omnium opinione prudentissimi illud est, quod refertur in libris de Orat. a filio conscriptis, *Ut quisque optime Græce scit, ita esse nequissimum?* Quod vero mihi magis mirum videtur, tantum abfuit ut voces istæ Romanorum studia retardarent, ut ipse quoque Cato, nihil inconstantia famam veritus, inclinata jam ætate Græcas litteras avidissime secutus sit, quas recta firmaque improbaverat. Verum id totum ut excutiat, suisque momentis in partem omnem examinetur, longioris disputationis est, multoque gravioris, quam ut a nobis suscipi possit, & in horæ spatium vel paullo amplius includi. Itaque ad nostra potius tempora conversi, de illis queramus, quod Græcæ litteræ, incredibili rerum ac voluntatum mutatione facta, laudatoribus abundant. cultoribus vero magnopere egeant. Neque enim nos eas colere dicendi sumus, quorum plerique inviti nolentesque accedimus; tantumque operæ illis tribuimus, quantum ferulæ metu tribuere cogimur. Sic enim fit, ut eorum, quæ quotidie discimus, nihil animo adhæreat; & cum universum scholarum cursum obierimus, adhuc de Grammaticis elementis timide dubitanterque respondeamus. Fastidium hoc rerum optimarum gravissimi morbi indicium est: cui demum ut aliqua ratione occurramus, declamationem adversus nos ipsos præsentis exercitatione instituimus. Quo quidem stimuli

gene-

genere siquid nos ad ignaviam ambigendam proficere intelligemus, reliquas omnes litterarii negotii partes hunc in locum afferemus, eandemque singulis operam & diligentiam adhibebimus.

S I L V A.

DEclamationem instituite adversus illos, qui Græcarum litterarum studia vel prorsus oderunt, vel segniter colunt: quod commode præstabitur earundem litterarum laudatione.

In duo genera dividi possunt, quæ faciunt in rem hanc; alterum est eorum, ex quibus efficitur Græcarum litterarum dignitas; eorum alterum, ex quibus utilitas existit.

I. Pars. A nobilitate rerum, quæ Græce scripta sunt. Ea lingua plena est dignitatis ac splendoris, qua usi sunt principes liberalium artium ac disciplinarum auctores: atqui a Græcis omnes ferre artes ac disciplinas accepimus: ergo eorum lingua, &c.

Ab antiquitate. Antiquissima litterarum monumenta, si sacra Biblia excipias, Græca sunt. Ab his autem reliqua omnia sunt propagata, Latina præsertim.

A multitudine Scriptorum. Magnus est eorum numerus, qui in quolibet rerum genere Græce scripserunt: unde in hanc linguam tanta verborum copia redundavit; tam varia declinandi, componendi, figurandi ratio; tot schemata, tot dialecti, &c.

A testimonio. Romani, omnium ætatum omnique memoriæ prudentissima natio, tantum honoris

noris Græcis litteris detulerunt, ut iis ferme unis per annos quingentos usi sint; & cum gentes omnes, quibus imperabant, barbaras dicerent, Græcos tamen & honorifice appellare consueverunt, & vel in summa potentia bonarum artium magistros habuerunt.

II. Pars. Ostendite ad solidam eruditionem non satis esse Latinas litteras; sed quia res non caret invidia, antequam rationibus confirmetur, præmittite magnorum virorum testimonia. Familiam ducat M. Varro, quid apud Cic. Academ. 1. c. 2. eos qui Græce scirent, *doctos* appellavit, reliquos omnes *indoctos*.

Varronem sequatur Cicero, qui in Bruto c. 45. ait, C. Titium eo pervenisse, quo potest Latinus orator sine Græcis litteris.

His adjungatur orator sæculi sui eloquentissimus idemque doctissimus M. Antonius Muretus, cujushæc sunt verba lib. 2. Var. lect. c. 20. *Sine Græci sermonis cognitione manca omnis & mutila est doctrina: & qui ejus expertes sint, ab eis ne Latine quidem scripta penitus percipiuntur.*

Tum rationes in medium afferte. Nam pulcherrima litterarum atque artium monumenta Græca sunt, quorum cognitione qui caret, quomodo dici potest eruditus?

At enim Latino sermoni, atque adeo etiam vernaculo reddita sunt.

Respondebitis primum, non omnia reddita esse; deinde non fideliter; postremo illa ipsa, quæ fideliter reddita dicuntur, tamen in pluribus deficere & claudicare; quod nulla lingua vim & venustatem Græcæ assequi possit. Quam in rem Gel-

lii auctoritatem afferetis, qui toto capite sexto decimolib. xi. contendit quædam esse, quæ ne pluribus quidem Latinis verbis dici possunt nisi obscurissime, cum a Græcis perfectissime & planissime uno verbo dicantur.

Demonstrabitis igitur, qui carent Græcis litteris, eos catere usu pulcherrimæ artis, quæ Critice dicitur, in veteribus scriptis interpretandis ac dijudicandis posita. Nomine autem veterum scriptorum Latina quoque complector, quæ cum magnam partem a Græcis fluxerint, nequeunt sine ope illorum perfecte intelligi.

Si vacat, errores aliquot illorum hominum recensete, qui aleam hanc sine Græcæ linguæ præsidio tentare voluerunt; eorum vero in primis, qui rationes & origines vocum sunt persecuti; qui sane ridicula protulerunt.

Hæc ad interpretandum. Multa porro etiam ad componendum facere videntur, si quam copiosa, quam fusa, quam varia Græca lingua sit, cogitare velitis. Sed hoc veluti prætereuntes attingite, ne solitæ exercitationis modum prætergrediāmini.

Parænesi orationem claudetis, cui auctoritatem conciliabit Horatii monitum in epist. ad Pisones de Art. Poet.

- - - - - *Vos exemplaria Græca
Nocturna versate manu, versate diurna.*

AD GRÆCAM

INTERPRETATIONEM.

*Lingua Græcâ per Ven. GREGORIUM CARD.
BARBADICUM in Seminario
Patavino restituta.*

MUſarum Phœbique parens pulcherrima
quondam,
Græcia nunc fœdo dat ſua colla iugo.
Heu, Superi, prohibete nefas; quo crimine tanto
Amiſit priſcum patria veſtra decus?
Sic erat in fatiſ. Artes migrate Pelasgæ:
Explicat en vobis Itala terra ſinum.
Nec mora; jam lætæ ſubeunt Antenoris Urbem,
Illas Gregorius quo jubet eſſe loco.
Scilicet hic unus mirandi fœderis auctor,
Trojugenas Græcis conciliare poteſt.

GRATIARUM ACTIO.

NOn agimus Græce veſtro pro munere gra-
tes:
Scilicet hoc unum Dorica lingua nequit.
Aptior haud ulla eſt benefacta rependere verbis;
Sed nondum veteri ſuſpicionē vacat.
Artibus ingenium juvit coluiſſe Pelasgi:
At Romana tenet pectora noſtra fides.

COMMISSIO III.

Accusatur Solœcismus.

P R O O E M I U M.

Nullus est capitalior litterarum ac litteratorum hostis, quam Solœcismus, a quo vix illi cavere sibi possunt, qui florentissimam ætatem assidua ingenii exercitatione triverunt, omnemque Grammaticorum studiorum cursum per summos labores ac vigilias semel atque iterum obierunt. Itaque non est cur miremini, Auditores, si nos pestem hanc justo judicio persequi hodierna luce decrevimus, tantoque conatu debilitare atque affligere, ut ex hoc Musarum domicilio longe cultissimo statim excedat, & in suas illas, unde exiit, Solorum latebras, se se conjiciat. Itane igitur esse labem, quæ sermonem nostrum, hoc est maximum Deorum beneficium hominibus concessum turpissime fœdet, neque solum in triviis & tabernis, sed in foro, in templis, in curia, in academiis impune grassetur? Dii vestram fidem! Nimis jam mites, nimis patientes adhuc fuimus. Expedienda sunt arma omnia, explicanda signa, procedendum in aciem, debellandum aliquando est. Sed illius quidem tam multæ insidiæ sunt, tam abditæ, tam callide positæ, ut in ejus sinu sæpe lateat, tamquam in tuto, quicum depugnat, nec ante se prodatur, quam victoriam reportarit. Quocirca mihi ipsi timendum

dum magnopere est, ne dum Solœcismo gloriosus miles bellum indico, Solœcismum admiserim; ipsisque armis hostem contexerim, quæ in ipsum distringo. Id ne forte fiat, quæso vos, Auditores, intendite oculos animosque, monete pro vestra benevolentia, pro vestra auctoritate reprehendite: nam cum animadverterim sæpenumero, ideo scelus hoc impune abire, quod ab iis ipsis defenditur, qui huc descendunt ut oppugnent, ego firmissime statui conjunctis vobiscum viribus prælium inire, & in me ipsum arma convertere, siquidem in me ipso deprehendetur. Tu vero, *Præsul amplissime*, quem nobis judicem nec opinatum fortuna obtulit, noli mirari de rebus tam minutis a nobis disputari. *Ætas* videlicet, & prima hæc studiorum ratio ita postulat: nec illi ipsi, qui in litteris regnant, ad eam gloriam pervenissent, nisi ab his tenuissimis exercitationibus inceperant.

S I L V A.

Compositio versabitur in genere judiciali: postulabitis enim Solœcismum hostem vestrum velut apud Prætorem actione de vi & insidiis; quod nolentibus vobis, in possessiones vestras invadat, modo per insidias, modo per vim, stipatus barbarismis, idiotismis, impropriis, macrologis, battologis, & aliis orationis pestibus.

Dicetis, vos operam omnem & indultiam adhibuisse, rogasse, obsecrassse, contendisse modis omnibus, ut a vobis rebusque vestris abesset; sed audaciam tantam coerceri non posse nisi publica auctoritate.

Describetis labes, quas lucubratiunculis vestris sæpe intulit; dolorem inde consecutum, verecundiam, jejunia, verbera, &c.

Si monstrum hoc abigatur, ætatem vestram felicissimam fore, quæ hac una de causa infelicissima est, &c.

A D G R Æ C A M I N T E R P R E T A T I O N E M.

Pro Solæcismo.

CUm hæc audisset Solæcismus, neque patrum inveniret, ipse pro se dixit; & quidem ita graviter & facunde, ut nihil desideratum in ejus oratione sit, nisi causa melior. Innocentiæ suæ illud in primis argumento esse, quod cum ætate innocentissima, hoc est cum pueris maxime vivat; a viris autem fere absit, nisi boni viri sint. Grammaticorum nationem, quod sibi bella movèrit, Deorum immortalium judicio ad perpetuas nugas tamquam ad metalla fuisse damnatam. Neque vero magis miseram illorum conditionem fuisse, qui olim sua crimina luere in fodinis cogeantur, quam sit illorum, qui inter obsoleta atque exesa veterum linguarum rudera dies noctesque versantur. Sed adhuc unum sermonis libertatem ab illis oppugnatam defendisse; se Theologis, se Philosophis, se Medicis, se Jurisperitis suffragatum, ut præclaras animorum suorum cogitationes, quibus generis humani salus continetur, dicendo scribendoque exponere possent. Ro-
gar

COMMISSIONES. 453

gare atque orare, ne se ejicerent, ni vellent, magnam repente in omnibus bibliothecis & academis solitudinem fieri; Ipsos quoque latinitatis magistros ac pæne canonicos non raro ad Solæcisum confugisse, ne optimas sententias Grammatica superstitione debilitare cogerentur. Quid enim esse aliud Virgilii schemata, quibus obtinuit, ut Grammaticorum malleus diceretur? Nomina varia, rem unam & eandem. Scilicet ostenderent Grammaticum aliquem, qui latine & eleganter scriberet: omnes ad unum aridos esse, jejunos, ineptos, exsuccos, vix ossibus hæere. Ipsi se igitur prius accusatores in ordinem redigerent, tum de aliis cogitarent. Quamquam se quidem libenter in exilium abiturum, si possit aliquando inter homines istos ad contentiones natos convenire. Hoc vero quis ferre possit, adversarios suos oppugnationem instituisse, de cujus ratione atque ordine nondum statuere unanimi consensu potuerint? Alios enim alia præcipere; quod unus probet, alterum improbare: non esse mirum, si Solæcisimo non parcant, qui pugnant secum ipsi. Hic vero tam ingeniosus visus est, ut ipsi illi, qui accusabant, cogitare cœperint, numquid sibi rimendum esset, quod reo minime malo periculum creassent.

GRATIARUM ACTIO.

Siquando litterulæ nostræ de fortuna conquestæ sunt, quod minime videretur desiderio respondere, hodie quidem jure ac merito queruntur, quod te nobis, *Præsul Illustrissime ac Reve*

rendissime, jamdiu optatissimum non satis opportuno tempore concefferit. Nec enim aut hujus diei schola ex illis est, quæ principes habentur, aut ipsa scholæ exercitatio auribus tam eruditis ullo modo digna. Sed tamen, ut de nobis ingenue fateamur, quemcumque tandem adventus hic tuus in diem incidisset, nihil profecto erat in toto hoc Scholarum nostrarum ordine, quod in tantam hanc lucem sine verecundia exponeretur, teque judicem totius Italiæ sapientissimum non formidaret. Ergo quidquid hoc est sive laboris, sive industriæ, exiguum certe quidem, noli præ tua ista singulari atque recondita eruditione contemnere; sed reputa, tantam hanc litterariæ gloriæ famam, quantam nemo unus post natas litteras vivens obtinuit, ita demum te beatum efficere posse, si sit cum illa humanitate conjuncta, a qua litteræ ipsæ nomen adeptæ sunt.

COMMISSIO IV.

Curas hominum ridere oportet, sed sapientius, quam Democritus solebat.

PROŒMIUM.

DUos ferunt fuisse Philosophos, Democritum & Heraclitum, ita inter se natura studiisque diversos, ut alter perpetuo rideret, alter perpetuo quodam luctu conficeretur. Prodibat Democritus in forum ridenti similis, adunco naso, buc-

buccis pæne ad aures diductis; & ut mercatorem offendebat, vel artificem, vel caussidicum, ad singulos, veluti rem novam sibi que lætissimam, risum instaurabat. Narrabat quis de magistratu sibi delato? Ille ridebat. Alius querebatur de repulsa? Ille ridebat. Erat qui venderet, qui emeret, qui transigeret, testesque in rem suam appellaret? Ille vero suavissime ridebat. Denique quidquid diceres, quidquid peteres, quidquid interrogares, omnia promiscue, teque ipsum tamquam scenicum hominem risu excipiebat. Accedebat ex parte altera mœstus & sordidus senex Heraclitus, promissa impexaque barba squalidissimus, obducta fronte, lippis oculis, acutis naribus, distorto ore, temporibus collapsis, genis enectis, qualem prorsus decet esse hominem rebus omnibus illacrimantem. Hunc si quis recreare conatus esset vel ostentatione rerum, vel narratione lætissima, laterem lavabat; quod sibi ad sapientiæ famam æternum squalorem luctumque indixisset. Habetis, Auditores, stultorum par lepidissimum. Non enim video, quemadmodum inter Philosophos isthoc nescio quid hominum numerare possim. Tamen si quod stultitiæ genus ferendum est, & humanæ imbecillitati condonandum, multo malim in nostra civitate Democritos esse, quam Heraclitos. Etsi enim tam in adversis rebus ridere vitium est, quam flere in secundis; attamen hoc asperioris naturæ est, neque excusari interpretando potest, nec in hominum societate tolerari. At vero qui sibi imperavit in qualibet fortuna hilariter vivere, & omnes rerum humanarum eventus ridere, nec valde a sapiente distat, & ma-

gnum sibi præsidium ad aliorum convictum & benevolentiam comparavit. Si paullum igitur sibi temperet Democritus, si effrenem ridendi licentiam paullulum cohibeat, jam noster est, & cum sapientibus sedet. Id totum cujusmodi sit, Auditores, adsumus explicaturi; ea tamen siue lege, siue consuetudine, ut nos pro nostra imbecillitate atque infantia impune ridenda dicamus, vos vero pro vestra bonitate & patientia ne talia quidem rideatis.

S I L V A.

A Nimadvertite argumenti hujus duas esse partes, quarum prima significat, curas fere omnes quæ ab hominibus suscipiuntur, leves esse ac risu dignas; altera, non admodum prudenter se gessisse Democritum, quem ferunt humana omnia promiscue risisse.

I. pars. Homines plerumque sunt occupati vel in honoribus comparandis, vel in divitiis congerendis, vel in utroque: atqui honores ac divitiæ non possunt humanum appetitum explere, eique beatitatem impertiri: sunt igitur ridendi tot tantique conatus. Videte hanc in rem Aristotel. l. 1. Ethic. c. 5. & ibi Interpretes, præsertim vero Tarquinium Gallutium.

Civitatis ordines recenserebitis, in foro, in curia, in officinis nimio plus occupatos atque intentos, ut bona tam exigua, tam incerta, tam habentibus noxia per fas nefasque sibi parent. Videte hic Juvenalis Satyram X. Ipsos quoque litterarum ac sapientiæ studiosos, eorumque contentio-

tiones ad trutinam revocabitis; ostendentes, quam stultum sit diu noctuque impallescere chartis, summumque hujus vitæ bonum valetudinem exsuccæ gloriolæ devovere. Nihil enim fere sit intra modum.

II. pars. Democriti vultum, habitum, mores urbanæ atque eleganti ethopæja describeris; ut appareat, nulla certa ratione, sed potius levitate, aut etiam fortasse ambitione ductum, hominum studia ridere consuevisse.

Quodnam enim judicium de illo ferendum est, qui & possessiones suas deseruit, & oculis se privavit, ut nulla re a cogitando averteretur? Diceris, hanc ipsam opinionem sapientiæ, quam quærebat, fuisse ridiculam. Nihil enim probari debet, quod nimium sit.

Ostendetis, multa esse in hominum societate, quæ rideri non debent, si modo & ratione consent. Deorum immortalium religiones, artium ac disciplinarum studia, rei familiaris ac publicæ curam, &c.

Denique Democritum, ceterosque ejus mentis Philosophos ob antiquitatis reverentiam per quamdam veluti correctionem excusabitis. Nam cum vellent hominum animos nimis perturbationibus liberare, ad extrema hæc adducere conabantur; non quod id totum fieri posse crederent, quod contendebant, sed ut naturam nimis aberrantem revocarent ac reflecterent.

Verumtamen correctionem hanc ita adhibebitis, ut excusare quidem magna nomina videamini, non tamen eorum institutum probare.

AD GRÆCAM

INTERPRETATIONEM.

VEteres scriptores in Democriti Philosophi famam conjurasse videntur. Adeo multa de illo ridicula memoriæ prodiderunt. Ego uni fidem habeo Diogeni Laertio, qui & gravis Historicus est, & hoc sibi argumentum sumsit, ut Philosophorum Vitas moresque describeret. Alii mirabilia magis, quam vera consèctantur: itaque etiam contraria dicunt. Valerius Maximus lib. 8. c. 7. scribit, eum bona sua patriæ donasse, Cicero de fin. l. 5. c. 29. deseruisse: qua etiam de causa stultitiæ insimulatur a Laëtantio lib. 3. c. 23. Revera neque donavit, neque deseruit, sed in pecuniam redacta peregrinando absumsit. In quibusdam Græcis monumentis apud Gellium l. 10. c. 17. habetur, illum se oculis sua sponte privasse, ne umquam videndi illecebris a contemplando avocaretur. Id ipsum confirmat Laberius Poeta, & Tertullianus in Apologetico c. 46. sed alter causam affert, quod improborum fortunas aspicere nollit; alter, quod mulieres sine cupiditate intueri non posset. *Credat Judeus Apella.* Perpetuo ridens inducitur a Seneca de tranq. c. 15. & ab aliis antitheta quærentibus. Sic enim præclare opponitur Heraclito sine intermissione ploranti. Ex Philosopho Mimus. Vitæ genus tam varium varia item consecuta est opinio mortis. Senio defecit, cum annos vixisset plusquam centum. Sed magis ex dignitate tanti viri Athenæo

l. 2. *dem.* visum est, si persuadere posteritati posset, ipsum sibi mortem ultro conscivisse. Quidam tradit, *φθίσιας* confectum objisse; haud alio sane fundamento, quam quod a tanta paupertate, in quam inciderat, pediculi abesse non possent. Miror equidem, neminem unum ex ejus discipulis inventum fuisse, qui magistri nomen ab injuria vindicaret.

GRATIARUM ACTIO.

Siquis Democritus tantam hanc gravissimorum virorum, & nobilium adolescentum frequentiam videret, statim a meridie uno in loco, eoque pro ratione temporis valde angusto coactam; assidensque paullulum, audiret de Latinis Græcisque litterulis, de syllabis, de apicibus certamen institui, quot quantosque cachinnos tolleret, quam solutos, quam effusos! Mira enimvero est patientia vestra, quæ hujusmodi tædia ad duas pæne horas producta, qualibet hebdomada ferre potest; nosque etiam excitare cunctantes ac segnes, ut hoc vobis negotii afferamus. In quo cum reputo nihil vos spectare aliud, quam quod e re nostra sit, incredibili quadam verecundia perfundor; maximeque velim meum erga vos animum, voluntatem, studium, observantiam singulari aliquo verborum genere declarare. At in hac officii parte tam difficili si valerem, jam non vestra institutione indigerem: nisi vero qui aquilam pingere recte novit, is ad muscam doctore indiget. Illi igitur hæc rideant, qui se sibi dumtaxat natos existimant; nec nisi privatorum commodorum ratio-

tionem habent : vos nobis semper in magna admiratione eritis , qui rerum vestrarum fere obli-
ti , nihil agitis , nihilque cogitatis nisi nostra
caussa. Idque eo magis mirum est , quod benefi-
cia vestra in illos confertis , qui non solum refer-
re nullam gratiam possunt , sed ne ipsum quidem
beneficiorum pondus ex toto cognoscere.

COMMISSIO V.

Qui recte paret , dignus est ut imperet.

PRO O E M I U M.

QUOD de bello dici solet , nondum expertis
jucundum esse , id de imperio dici debet .
Etiā enim imperare pulcherrima in speciem &
suavissima res est , in his tamen veluti floribus
multiplex latet anguis , idemque ejusmodi , ut non
modo corpus , sed animum in primis sauciet , par-
tem hominis præstantissimam . Ingredere magni-
ficas illas ædes . Videsne stantes in limine armatas
copias ? Non tam ad populi , quam ad ipsius do-
mini terrorem aluntur . *Multos enim timeat , qui a
multis timeretur , necesse est .* Agedum infer pedem ,
tolle oculos . Delectantne te lacunaria illa argen-
to auroque distincta ? At inde in ejus beati cer-
vices gladii pendent , filo tenuissimo illigati , quem-
admodum Damocli ostendit Dionysius . Circum-
fer te undique . Placetne solum nobilissimis ser-
vis ad nutum & obsequium utrimque stipatum ?
At multi in eo Reges ab iis ipsis trucidati sunt ,
quorum opera utebantur ; atque adeo ab illis ,
quos

quos sibi unice ad præsidium constitutos, corporis custodes appellabant. Quid mihi mensas apparatusissimas innuis? Ita quotidie multi veneno interficiuntur, ut jam mensa crux Regum appellari possit. Quid dominatus majestatem, quid chlamydem, quid sceptrum, quid coronam ostendis? Nempe ostendis onus: tanto enim ista graviora sunt, tanto curæ molestiæque pleniora, quanto pluribus gemmis ornata. Noli mihi ærarium, noli mihi fiscum indicare. Nihil potest esse hujusmodi sine magna invidia & populi imprecationibus. Sed jam per Deos immortales exeamus; omnia hic suspicionis plena, intuta omnia; non amicitiae, non fidei, non benevolentiae locus. In aula sumus, intelligenti satis est: sed numquam tamen satis ambizioso, qui sua cupiditate tamquam nocte aliqua circumfusus, nihil tale videt, aut omnia videt vitro illo colorato, quo crudelissimus Princeps suppliciis ipsis, humano sanguine fœdatis, pulchritudinem aliquam comparabat. Nihil vero hic tam miserum est, ut ex omni parte circumspectum, non aliquam bonitatis speciem præferat, moveatque desiderium sui. Ergo parcamus homini imperandi cupido, vel quia sua est imperio felicitas, vel quia videtur esse. Id unum ab illo contendamus, ut hæc ipsa cupiditas virtutis ministra sit; hoc est ita sibi persuadeat, privatum hominem tum demum imperio dignum esse, si recte pareat. Si hac ad imperandum nitetur via, nos illi ultro imperium concedemus; reique publicæ egregie consultum per ambitionem existimabimus. Id dum fusus ostendimus, adeste humaniter; totamque hanc exercitationem ita temperate,

rate, ut nobis quotidie magis magisque placeat, talibus dominis obtemperare.

S I L V A.

PLato lib. 6. de leg. & Aristoteles lib. Polit. 3. non de suo modo sensu, sed ex communi hominum opinione proverbio firmata pronunciant, vix fieri posse, ut aliquis recte imperet, qui non antea paruerit. *ὅτι ἄνθρωπος ἐν ἀρχῇ μὴ ἀρχόμενος*. Id vos tamquam exordii loco ponetis, ut propositam a me sententiam oratiuncula explicetis. Utrumque enim conjunxit Cicero, cum dixit initio lib. 3. de leg. *Et qui bene imperat, paruerit aliquando necesse est; & qui modeste paret, videatur qui aliquando imperet, dignus esse*.

Dicetis igitur hoc maxime locum habere in liberis civitatibus, in quibus ex ipso civium ordine summi magistratus eliguntur; iidemque homines modo imperant, modo parent.

Explicabitis recte parendi difficultates; quas qui expertus est, & superavit, magnum dedit virtutis ac prudentiæ testimonium.

Dicetis, terminos esse aliquos, intra quos imperia in liberum hominem contineri debeant; quos quidem terminos nemo melius cognoscere potest, quam qui privatam fortunam belle ac modeste tulit.

A contrariis quoque argumenta ducetis, ostendentes, quam stolide, atque impotenter rempublicam administrent, qui cum essent privati, magistratibus ipsis imperare voluerunt, & cum summa rerum omnium licentia vivere.

De-

Denique quascumque obedientiæ laudes invenietis, huc trahi recte poterunt.

AD GRÆCAM

INTERPRETATIONEM.

Responsio Jugurthæ nomine ad Micipsæ orationem, quæ est apud Sallustium de Bel. Jugurt. c. 10.

NE dii siverint, Rex, ut Numidiæ immaturre adeo rapiaris. Etsi enim satis gloriæ vixisti; & tibi etiam fortasse satis, qua es moderatione rerumque humanarum satietate; nobis quidem certe nondum satis. Tamen, quod caveas in posterum rebus tuis, veritus multo ante, quæ aliquando naturæ necessitate futura sunt, facis tu quidem pro tua ista ubique commendata sapientia. Mihi sane invisum regni nomen, si tua funera consequi debet. Præterquamquod innutritus ego bellicis laboribus ac venatione, quomodo possum ad civilem rerum curam & urbanam quietem animum convertere? Adherbali & Hiempsali facile erit patris virtutes imitari, quibus licuit manentibus domi proxime intueri. Quod si me tamen jubeas uti beneficio tuo, & in partem venire summæ dignitatis, id ethicam diligentissime, ut videaris potius laboris aliquid imminuisse filiis, quam regni. Numquam excidet animo meritum tuorum recordatio; eamque prædicabo & habebo nomini tuo gratiam, quam tibi referre non potero. Dic mihi vel regnandi, vel paren-
di leges, impera quod videtur, aut veta; omnia
non

non minore fide, quam tibi, præstabo memoriæ tuæ. Quod & faciam, diis bene juvantibus; & eo libentius, quo tardius.

GRATIARUM ACTIO.

Quemadmodum ad recte parendum observantia & solertia opus est, ita ad imperandum prouentia & æquitate. Nihil porro in humana societate miserius excogitari potest, quam impotens dominus. Siquidem servus moneri, castigari, dimitti potest; dominum patinecesse est. Quorsum hæc, Auditores? Scilicet eo denique ventum est, ut grates postuletis; multumque veremur, nequid nobis supra virium nostrarum modum imponatur: non quod iniquius aliquid a vobis esse possit, sed quod pro insigni quadam bonitate naturæ de meritorum vestrorum magnitudine cogitare nolitis; quæ, ut nos quidem existimamus, nulla verborum copia æquari potest. Ergo date hoc observantiæ in vos nostræ, ut non parere aliquando liceat: ex quo potissimum intelligetis, hominibus vos de vestra dignitate sollicitis imperare. In reliquis pro vestra auctoritate iubete; nam ita nobis in animum induximus, huic in primis ætati obedientiam convenire; & per eam unam fieri posse, ut cum vos ad majora progressi eritis, non desint ex nobis, qui loca ista vestra occupare possint.

COMMISSIO VI.

Populo imponere facile est.

P R O O E M I U M.

Siquando umquam lætus & alacer ad dicendum, aut scribendum accessi, quod ipsa me rei propositæ facilitas ceteroquin timidum ac refugientem invitaret, id certe mihi hodie contigit, cum de hominum fraudibus & fallaciis commentari aliqua jussus sum, & in conspectum vestrum afferre. Neque enim putavi in eo mihi deesse orationem posse, quod ita commune omnibus esset, ita vetus, ita frequens, ita privatim publiceque usurpatum, ut quocumque me verterem, quidquid aspicerem, quidquid audirem, vel totum ex mendacio constaret, vel mendacii partem maximam complecteretur. Curia, forum, judicia, compita omnia, summi infimique cives, quantam, bone Deus, quamque perspicuam, civilium negotiorum non imperito, dicendi copiam suppeditant! Sed ne a schola discedamus, quid est in poetica facultate non fallacissimum, quæ vel ipsum nomen a fingendo ducit? Quid nostra hæc, cujus in præsentia periculum facimus? Nonne ita in fallendo est, ut præceptores ante Aristotelem omnes nullam dicendi artem, nisi ad concitandos auditorum animos tradiderint; Aristoteles vero ipse, qui primus probandi locos excogitavit atque edidit, non tamen vera, sed vero similia ab oratore requirat?

G g

Quid

Quid plura? Ipsi illi barbati Philosophi, qui se gravissimo nomine veritatis indagatores appellant, multis animi motibus abrepti, & partium studiis veluti milites auctorati fallacissime disputant; eo-que se feliciores arbitrantur, quo plures adolescentes, magistrorum fallacias in ipsam posteritatem propagaturos, inducere possunt. Neque vero si quis est ita solers & acutus, ut sibi nolit imponi, fraudum isti ac fallaciarum artifices quippiam de solita contentione remittunt. Satis illis est, si plures in errorem inducant: populo canunt, non Platoni; nec hominum de se judicia ponderant, sed numerant. Id utrum recte faciant, nolo in præsentī quærere; sed tamen quandoquidem faciunt, eorum artes explorare lubet, ut quantum quidem ætatis hujus nostræ imbecillitas patitur, populares insidias nobis caveamus. In quo primum facilitate vestra indigemus, deinde vero sapientia; ut cum patienter tuleritis nugas nostras, ipsi talia reponatis, qualia argumenti gravitas postulare videtur. Id a vobis præsertim speramus, NNNN. quod ex inopinato sedentes hoc in loco conspiciamus. Neque enim, opinor, tantam hanc incommodissimi temporis molestiam animo tam æquo ferretis, nisi magno quodam erga litteras amore, & aliqua etiam erga nos benevolentia duceremini.

SILVA;

STilum vestrum in eos expedire debetis, qui se populo venditant, idque laborant, ut sapientes habeantur, quamvis nullam operam nul-
lum-

lumque laborem impenderint in comparanda sapientia.

Initio quidem explicabitis, quid nomine populi intelligatis, quæ vox non plebem dumtaxat comprehendit, sed nobiles promiscue atque ignobiles, tum viros quoque principes, si sint indocti.

Turba hæc magis specie rerum ducitur, quam rebus ipsis. Itaque mendacia ingeniose colorata plus valent apud illam, quam simplex ac nuda veritas: Medicum probat garrulum, Philosophum contentiosum, Caussidicum impudentem, Militem jactabundum; quo quidem genere hominum quid frequentius?

Nihil facilius, quam in eos cœtus cooptari, quas litterarias Academias vocant. Cum quis tamen eo loco sedet, tamquam ita demum Musis initiatus, statim cum litteratis numeratur. Advenit sollemnis recitationis dies, tota urbe discurritur; vix unus aut alter de suo: hoc tamen populo satis.

Quid si quis libellos aliquot sibi comparet? quid si pauca quædam magnorum virorum nomina memoriæ mandet? quid si publicas acroases frequentet, in iisque caput belle moveat? Apollo est.

Sed inter omnia hujusmodi fallaciarum instrumenta nullum potentius est opibus, quibus & fama sapientiæ, & laudatores, & testes facili negotio comparantur. &c.

AD GRÆCAM

INTERPRETATIONEM.

De simulationis & fallaciæ bonis.

Fallendi ars vetustissima est; & ex quo virtus cœpit esse, virtutis simulatio fuit. Quæ de re adeo nihil querendum iudico, ut etiam miseram ejus civitatis conditionem putem, quæ istiusmodi vitio caret. Apparet enim in nullo pretio veram laudem esse, ubi nemo est, qui eam fallaciter imitando simulet. Illi tantum numi adulterari solent, quibus publica forma & auctoritas est. Miror equidem, Juvenalem tantopere doluisse Sat. 2. quod essent Romæ qui *Curios simularent, & bacchanalia viverent*. Quam enim hæc significationem habebant, nisi probitatem & honestatem in ea gentium omnium patria tantum fieri, ut illi etiam, qui ad vitia profligatissimi erant, tamen se Curiorum similes videri mallerent? Non tanta est virtutis ostendendæ cura, ubi vitia valent & dominantur. Sed ne a litterulis nostris longius abeamus, vix dici potest, quanta ego læticia exultem, cum video in aliqua civitate opifices quoque ac sellularios scientiæ opinionem aucupari. Neque enim se tamquam scientes venditarent indocti, nisi crederent in honore esse, qui vere sciunt. Quoties tibi se tamquam magnos historicos jactabunt, quos transalpina ephemerides erudierunt? Attamen patere. Quoties Gellium cum Cicerone component; quoties de
Sal-

Sallustio tamquam de Poeta loquentur; quoties tempora temporibus, nomina nominibus mutabunt, *delphinum silvis appingentes, fluctibus aprum?* Attamen patere. Sed vide, quam te velim ad patientiam comparatum. Tum quoque illos sine fastidio aspicere debes, cum viros Principes inducunt, suaque illis mendacia venditant. Grave est hoc, nec facile ferendum; verumtamen ita fiet, ut tuam tibi fortunam gratulere, regiasque opes contemnas, quæ talibus insidiis obnoxiae sunt.

GRATIARUM ACTIO.

Multi se vobis bene gratos carmine præbent;

Sed mirum, si quis vera Poeta canit.

Qui nullas vestro reddit pro munere grates,
Scilicet is pretium muneris omne videt.

COMMISSIO VII.

Jucundius est reprehendere, quam laudare;
sed tutius laudare, quam reprehendere.

PROOEMIUM.

Quidam sunt ingenio tam difficili & acerbo, ut omnes hominum actiones ægre ferentes, quicquid vident, quicquid audiunt, promiscue reprehendant: rursus alii tam bono ac facili, ut

G g ;

omnia

omnia ad laudem convertant. Utrumque meaquidem sententia malum: nam neque reprehensore vitia carere debent, neque virtus laudatore; ut æqui & iniqui discrimina appareant, habeantque homines officii studiosi atque honestatis, quid sequantur, ac fugiant. Pejus tamen illud, quod a reprehensione profiscitur: nam laudare omnia levitatis est; at reprehendere intolerandæ cujusdam malitiæ, quæ odia inter homines ferit, eorumque societatem & communionem, alterum in alterum armando, dissolvit. Ac ne silere quidem prorsus laudabile est: oportet enim hominem ratione & voce præditum non quasi mutum animal vivere, sed de rebus humanis judicare, colloqui cum altero, turpia & honesta perpendere, probare, improbare. Qui medium nosse ac tenere potest, is mihi est sapientissimus: proximum locum tenet, qui minimum peccat, vel in ea parte peccat, quæ minus periculi habet. In hanc rem totam quædam de more afferimus, sed nihil prorsus aut vestro judicio, aut loco dignum. Et multi quidem se modestiæ causa initio statim abjiciunt, ut in ipsa exercitatione tanto magis excellent: nos hoc uno fortasse laudandi erimus, quod de nostra infirmitate vere ingenueque fate-mur.

S I L V A.

DUplex erit orationis pars. Ad primam hæc pertinent. Quia qui reprehendit, videtur esse quodammodo judex ejus, qui reprehenditur.

Se-

Secundo, quia ex vitiis ejus, qui reprehenditur, magis apparet præstantia & virtus illius, qui reprehendit.

Tertio, quia qui reprehendit, sibi videtur acutus & perspicax, atque adeo etiam urbanus, siquidem possit cum aliquo sale aliena peccata notare.

Quarto, quia reprehensor sibi videtur rem gratam audientibus facere; quippe omnes libentius reprehensionem aliorum, quam laudes excipiunt.

Ad secundam hæc. Quia qui reprehendunt, inimicos; qui laudant, amicos sibi parant. Quo referri Terentianum illud poterit Andr. 1. 1. 41. *Obsequium amicos, veritas odium parit.*

Secundo, quia laudatores facile inveniunt, qui seipsos quoque laudent, reprehensores frequenter in reprehensionem incidunt.

Tertio, quia qui reprehendit, facile modum excedit; qui laudat, non item, aut si excedit, nullam injuriam facit.

Quarto, quia neminem umquam laudasse pœnituit; reprehendisse, permultos. Hic commemorare poteritis infelices eorum exitus, qui se satyris scribendis dediderunt: & ne longius abeat, infandam Ciceronis necem referetis, quam certe sibi ipse per suas Philippicas peperit. &c.

AD GRÆCAM

INTERPRETATIONEM.

Epistola C. Verris, qua Ciceronem ab instituta in se accusatione deterret.

SI eo cœpisti, M. Tulli, in foro & judiciis tanta contentione versari, ut te levium adolescentum & quadruplatorum agmini nunc demum conjungeres, vereor, ne non satis tutam vitæ rationem ad laudem & gloriam, ac ne ad opes quidem institueris. Ad hominum certe benevolentiam nihil est importunius. Quo est mirandum magis, te petitionis tuæ tempore ad accusandum descendere, & a Cornelia gente invisæ admodum rei auspicia capere. Ædilitatem petis; comitia imminet. Itane prenas? Itane Romanos cives tibi concilias? Nempe Siculi præsto erunt? Siculi pro Cicerone suffragia ferent; aderunt tibi gratia & auctoritate Siculi. O te rerum omnium ignarum, si necessitudinis vinculo nescio quo seditiosis provinciæ ingeniis obstrictus, non iis modo, quibus eadem in urbe, in foro, in curia vivendum, sed fortunis etiam tuis bellum indicis! Noli, quæso, M. Tulli, susceptum ambitionis cursum tute tibi intervertere, ut provinciarum audaciam foveas ad Prætores accusandos plus nimio effusam. Jam vero si principes civitatis ad dicendum idonei sociorum querelas temere excipiant, & in judicium deferant, profecto neque Curiis, neque Catonibus salva res erit. Sunt enim adhuc libertatis me-

memores, verbo socii, revera populi Romani hostes; cumque ipsi per se non possint, id continent, ut nos per nos ipsos intestino bello conficiant. Vide ergo etiam atque etiam, diligenterque considera, utrum alienis morem geras, an tuis; Siculis ne, an Verri. Aliunde quid speres nec scio, nec ut sciam, valde laboro. Ego certe, si evadere per te potero, id efficiam gentis opibus, amicorum gratia, & quod his temporibus caput est, pecuniarum largitione, ut in Comitibus tuis nihilo plus a Quinto Fratre desideres. Novi equidem magnanimi viri ingenium, qui malis omnibus Reip. carere honoribus, quam ulla re niti præter virtutem & honestatem. Sed tamen ut libere fateamur quod res est, prisca illa prensandi simplicitas, & frigida majorum ambitio in Campo obsoleverunt; & ipsi illi integerrimi libertatis auctores, Bruti ac Valerii, si in hæc tempora incidissent, sæculi moribus communique consuetudini inservirent. Cum enim hæc una ad Præturas & Consulatus via reliqua sit, operæ pretium est vel invitos huc pertrahi bonos cives, ut quoquo modo ab improbis Reip. administrationem vindicent. Siqua ergo in nobis præsidia esse putas ad civium Rom. studia & voluntates conciliandas, ea potes hoc tempore demereri omnia. Sive enim delationem Cæcilio concedas; sive iudices ex composito rejicias; sive demum in sequentem annum causam produci ultro citroque disputando patiaris; & amice facies, & sine ulla clientum suspicione facies. Interim vide, quam de animo tuo nihil dubitem, qui statim fiscos tibi aliquot recte obsignatos per pue-

rum mitto, quos Comitiorum nomine distribuas. Sic ea tibi adjumento futura sunt, quibus si ^{ut} nolis, oppugnabere. Itaque consule non mihi modo, sed tibi etiam multo magis, rebusque tuis. Mihi siquidem in hoc judicio nihil te amico periculi comparatur, te inimico parum. Satis enim intelligis pro tua sapientia, & rerum forensium usu, quid nobis præsidii in Hortensio, quid in Metellis, aliisque summâ auctoritate viris, quid in civitatibus Siciliæ non unis, quid denique in causa ipsa futurum sit. Sed jam familiaris epistolæ modum pæne excessi. Vale; & reputa, mihi quidem, ut omnia cedant improspere, nihil impendere gravius exilio: at vero eas esse nostræ familiæ opes, ut & amicorum beneficiis, & inimicorum injuriis paria rependere possimus.

GRATIARUM ACTIO.

Non nos pro vestro referemus munere verba. In tacito melius gratia corde sedet.

COMMISSIO VIII.

Litterati solent esse mites.

ROOE MIUM.

Qui de vitiis ac virtutibus crassius judicant, nec inter lenitatem, ac lentitudinem satis distinguunt, putant sapientem hominem omni prorsus ira vacare oportere, omnesque injurias
ut-

utrumque illatas fatue stolidęque tolerare. Hinc non defuerunt, qui Zenonem Eleatem valde reprehenderent, quod conviciis petitus non conticuisset; quasi vero philosophica præcepta non animi perturbationes, sed animum ipsum retunderent, & ad servilem patientiam abjicerent. At ille, quomodo, inquit, laudes sentiam, si convicia non sensero? Non igitur insitos naturæ ignes virtus extinguit, sed moderatur; isque demum mansuetus ac mitis est, qui ab omni tumultu liber eatenus irascitur, quatenus ratio postulat. Habetis, Auditores, quid revera sentiamus, cum literatis hominibus lenitatem tribuimus, qui si omni motu iræ carerent, & ἀναισθητοὶ essent, ne litterati quidem appellari possent; quippe illo instrumento spoliati, quo ingenium acuitur & accenditur. Res est hujusmodi, ut non facile ab adolescente tractari possit; me tamen ideo conari juvit, tantumque discrimen subire, quod cogitarim non posse vos, qui tam multa sapientia litterisque floretis, mecum agere nisi mitissime.

S I L V A.

ARgumentum hoc ejusmodi est, ut primum more & exemplis, deinde ratione explicari debeat.

Videmus igitur litteratorum ingenia lenissima esse, & ad timendum potius, quam ad audendum prona. Multa hoc in genere de Cicerone ac Demosthene narrantur, quæ eos ab armorum strepitu valde alienos fuisse significant; quamvis uterque in acie fuerit, alter vero etiam exercitum du-

duxerit, seque Imperatorem appellandum curaverit.

Ratio ea videtur esse, quod litterarum studia molliunt animos, & humanitatis memores faciunt.

Juvat ad iram moderandam, ex Philosophia didicisse, quam gravis morbus sit; quantopere ipsi noceat, in quo est; quam hominem ratione præditum dedeceat, ferisque similem reddat, &c.

Accedit vitæ genus, quod litterati ducere solent, umbratile ac remotum a turbis, quæ homines ad iram inclinant.

Hinc puellas litterarum præfides fecit antiquitas, easque in altissimo jugo collocavit procul a rerum humanarum curis & sollicitudinibus; ex quibus fere *surgit lutea bilis*. &c.

A D G R Æ C A M I N T E R P R E T A T I O N E M.

Vetus est barbarorum accusatio, Musarum studia animum frangere. Hinc narrat Procopius, Gothos procures nullo pacto permittere voluisse, ut Amalasuntha eorum Regina filium Athalaricum litteris imbueret. Quid vero Gothos appello? Licinius ipse Romanorum Imperator adeo litteris hac una de causa infestus fuit, ut eas virus ac pestem publicam appellaret. Horum non dicam hominum, sed brutorum stultitiam satis arguit Julius Cæsar. Quis illo fortior, quis item ex omni antiquitate doctior? Nemo plura bella gessit, nemo plures victorias retulit, nemo

ma-

COMMISSIONES. 477

majus imperium occupavit. Idem tamen cum hæc ageret, suos illos Commentarios scribebat, quibus nihil est in tota latinitate elegantius. Quid Cicero, alter, ut ita dicam, litterariæ Reipublicæ Consul? Nonne is quoque & Pompeji castra sequutus est, & ipse exercitum duxit, & Imperator est appellatus? Ergo litteræ cautos homines faciunt, non timidos; lenes, non ignavos.

GRATIARUM ACTIO.

Reddimus eni nullas vestro pro munere gratias.

Qui poterit nobis parcere, mitis erit.

COMMISSIO IX.

Magnum est in paupertate ad bonas artes acquirendas profitendasque impedimentum.

PROOEMIUM.

Nihil est in orbe terrarum, quod pluribus conviciis ac maledictis petatur, quam pecunia; nihil item quod magis anxie avideque pareatur. Si Senecam audis, pecunia pestis est, curarum parens & origo, vitiorum administra, satelles malorum omnium, hominibus in pœnam concessa, ut sese ipsi non habentes habentesque excruciant. Interim tamen nemo Seneca ditior: prædia rustica, & urbana supra modum privatae for-

fortunæ; equi, servi, statux, horti, vis auri & argenti tanta, quanta Imperatorem, orbis terrarum dominum, movere possit, & ad prædam allicere. In hac rerum omnium copia paupertatem laudat, quæ animi libera, quæ secura & expedita, quæ paucis contenta, quæ ad philosophandum aptissima. Dii boni! Tunc is, Seneca, esses; aut omnino Senecam esse homines scirent, nisi per commoda ista ad philosophiam pervenisses, tuamque sapientiam divitiarum splendore illustrasses? Philosophiam dico; non Cynicam illam in reprehendendo positam, cetera inertem, sordidam, dolioque & Diogene dignam; uno verbo Senecæ Philosophiam, quæ & aulæ par sit, & conviviiis intersit, & joci delectetur, & vivere homines cum hominibus sinat. Huc qui contendit, næ ille multis ab ipsa pueritia indiget, in primis vero schola & magistro, quæ maximo fere impendio constant. Fac porro te felicissimo ingenio præditum per omnia paupertatis incommoda evasisse, & ad aliquam cognitionem, diis hominibusque juvantibus, devenisse. Quid tum inde? Quot quantisque fortunæ adjumentis opus est, quibus amicis ac patronis, quanto otio, quam multis libris, ut aliorum judicio satisfacias, cumque te omnibus probes, quem esse revera sentis? Toga ipsa suas partes agit, annulus, ædes, comitatus; quibus deficientibus, jacere ingenia vel laureata necesse est, molisque ac tabernis operam dare. Nemo Medicum advocat, cui trita lacerna sit; nemo litem ad Causlidicum defert, cujus facundiam non ampla domus opibusque referta commendet. Bene ac feliciter in hoc argumento Sa-

Satyricorum princeps Juvenalis versatus est, cujus ingenium placet nobis hodierna exercitatione imitari; non quod similia fieri posse putemus præsertim ab adolescentibus, sed ut rem natura sua veram, sæculisque omnibus exploratam magis magisque confirmari ætate moribusque nostris ostendamus.

S I L V A.

Duplex difficultatis genus perpendere debetis, quod pauperi impedimento est, ne possit emergere, & in hoc quasi theatro litterarum suas partes agere.

Prima difficultas est in litteris ac disciplinis acquirendis, eaque primam oratiunculæ vestræ partem constituet; altera in profitendis, quæ partis alterius argumentum erit.

Pars I. Hic explicare debetis, quanti prima institutio constet: nam pueri, quos proficere in litteris volumus, domo ablegandi sunt; & in iis locis qualibet impensa collocandi, in quibus neque optimorum magistrorum copia desit, neque frequens exercitatio, neque æmulatio, &c.

Tum paullatim progressi ad studia, quæ majora dicuntur, ostendetis, quibus facultatibus opus sit, ut quis librorum supellectilem sibi compareret, ut in celeberrimis Academiis præstantes viros audiat, ut publicas exercitationes de more habeat, iisque titulis ornetur, quos majores nostri sapientissime instituerunt, ut doctos ab indoctis etiam vulgus distinguere posset.

Ex his & similibus recte expositis apparebit,
quan-

quantum sit ad bonas artes acquirendas in paupertate impeditenti.

Pars II. Sed fac aliquem acquisivisse; cui, quæso, bono erunt? sibi uni sapiat necesse est; suæque in umbra vivat, qui opibus caret. Nam ne ad eos quidem gradus, quos Sapientes occupant, vel occupare debent, nisi per numos ascendere potest. Hic vero cavete diligenter, nequid nimis odiosum attingatis.

Quid si emittere lucubrationes suas velit, & hominum judicia subire? Num ad typographum accedere potest sine pecunia?

At enim vel Medicinam facere, vel in causis judiciisque versari poterit, unde opes comparantur. Ita videlicet, si quis vellet aut Medico uti pannofo, aut Caussidico.

Neque vero hoc ad sæculi mores referendum; quæ communis quidem, sed vetus & vana querela est: cujus rei vobis argumento erit Satyra Juvenalis VI I. Quippe ipsa rerum natura ita ferre solet, ut cui ad vitam commodè ducendam necessaria defunt, is animo depressus atque abjectus, nihil eximium proferre possit.

Artes aluntur laude; at paupertas ridiculos homines facit. &c.

A D G R Æ C A M

INTERPRETATIONEM.

SI felicitas venalis esset, nemo nisi dives feliciter viveret. Quamquam divites fere omnes ita sunt avari, ut ne ipsam quidem felicitatem em-

COMMISSIONES. 481

emturi videantur, si emi pecunia possit. Itaque sumus omnes infelices; pauper laborat, ut aliquas opes acquirat, dives ut plures; ille nequit uti, hic uti renuit. Et hujus quidem major calamitas; neque enim mirum est pauperem appetere pecuniam, qua caret; quemadmodum non est mirum, sitire convivam, qui nondum bibit. At divitem inhiare pecuniæ, ejusque cupiditate contabescere, hoc vero quid est aliud, quam illum, qui immodice bibit, adhuc sitire, nullaque ratione expleri posse? Sitis hujusmodi morbus est, & quidem insanabilis, quia cupiditas superfluum infinita est. Paupertas si morbus est, facile sanatur; quia necessaria pauca sunt & parabilia.

GRATIARUM ACTIO.

Reddere pauperie prohibemur munera vobis.
Sic ea pauperibus, divitibusque nocet.

COMMISSIO X.

Litteratus homo non debet latere.

PROŒMIUM.

Disciplinarum & artium studium ita cum famæ studio conjunctum est, ut nemo neque nostra, neque majorum, neque ulla sæculorum memoria inventus sit, qui cum esset excellenti virtute præditus, prædicationem nobilitatemque contemneret. Ac si quis forte modestiæ simulatione lucem

H h splen-

splendoremque fugit; nobisque persuadere conatur, satis se multa scire, sed hominum judicia famamque despiciere; hanc scitote ignaviæ morem esse, ut fallam quamdam moderationis speciem comminiscatur, qua se primum tegat adversus reprehensionem, deinde etiam, si fieri possit, nova ingenia & industria in invidiam adducat. Scilicet ubi quis in animum induxit pigram & desidiam vitam agere, nihil est reliquum nisi ut vires ingenii omnes, quascumque habet, in id conferat, ut ejus vitii notam effugiat, in quo est: id autem facere commodius nequit, quam si ad proximam virtutem confugiat, ex eaque sibi personam adumbret, quæ minus acutos plebeculæ oculos eludat. Hæc fere illa modestia est, quam quidam in literis jactant, non sibi tantum, aut privato nomine improbi, sed ipsi rerum naturæ injuriosi, quæ sensum hunc laudis & gloriæ præclare agentibus indidit; ut si cetera diligentiae præmia aliquando desint, hoc tamen non assumptum aut adventitium, sed innatum atque inditum perpetuo illam comitetur. Hoc illi tam insigne bonum prava opinione corrumpunt; rati, se industriam tollere posse, si tam certum probatumque industriz incitamentum suo judicio sustulerint. Quod si quis forte non nihil valet, & tamen revera ita sentit, hic quidem non improbus est, sed tamen stultus. Sapientia, inquit, seipsa contenta est; splendet sibi lumine suo; non debet ex ore vulgi pendere. Egregie. Tu igitur in tuis latebris ac silentio sapias. At quo teste? cui bono? quam in rem? Hujusmodi nempe sunt avarorum pecuniæ, quæ tam desunt, si adsint, quam si non ad-

adsint. Quis mihi lyram laudet, quæ semper taceat? quis arcum, qui numquam tendatur? quis ratem, quæ navalibus nondum exierit? Tute tibi habe mutum hoc sive scientiæ, sive sapientiæ genus: sed interim noli mirari, quod nos non tam subtilis ingenii homines hoc, quidquid est, inertiam appellemus. Intelligitis, Auditores, quibuscum nobis præsentis exercitatione futura res sit; nec vero umquam tantopere de nostra infantia dolumus, quam hoc tempore dolemus, quo tenebriones isti ignaviæ patroni conficiendi essent. Agemus, pugnabimus, contendemus viribus omnibus; ac si nihil aliud, hoc certe efficiemus, ut cognoscatis, quam vehementi laudis studio ducamur, qui ne has quidem lucubratiunculas latere volumus.

S I L V A.

Vulgatum est argumentum, quod multis rationibus firmari potest, sed quæ sequuntur, potissimæ sunt.

I. Quia literæ debent perficere naturam hominis, non corrumpere; corrumperent autem, si solitariam facerent; quia homo natura sua societatem amat.

II. Nullus homo sibi soli natus est: ergo multo minus litteratus homo, qui quanto pluribus naturæ beneficiis ornatus est, tanto magis debet humanæ societati prodesse.

III. Hominibus natura sermonem dedit, ut inter se colloquerentur, & animi sensa ad commune bonum inter se conferrent. Ergo litteratus

H h a

ho-

homo, qui optima cogitat, & cogitata optime explicat, non debet mutarum animantium more latere.

IV. Ipsa litterarum doctrinæque natura abhorret a latebris, lucemque poscit. Quapropter Varro apud Cicer. Acad. 1. c. 1. ait, *Intemperantis esse scribere, quod occultari velis.*

At enim in alto montis vertice Musarum domicilium sapientissimi homines, litterarum parentes, collocarunt. Scilicet significarunt, hominis litterati vitam non esse valde negotiosam, non tamen solitariam. Neque enim singulas Musas in singulis montibus statuerunt, sed omnes simul cum Gratiis, & Apolline, & magna præterea illorum frequentia, qui in eam civitatem quotidie contenderent.

V. Litteratus homo non potest excellere, si careat æmulis, multo vero minus si careat amicis. Nam eum & excitari aliquando necesse est, & moneri, & provocari, &c. Ergo ejus vita non debet esse solitaria.

Ultimo loco repellite vanas ac ridiculas illorum excusationes, qui per quamdam *δυσωπρίαν* latere se dicunt, suæque ignaviæ culpam ad modestiam traducunt.

AD GRÆCAM

INTERPRETATIONEM.

GLoriæ cupiditas magnum est ad recte agendum incitamentum, nec ullus eam contemnit, quin fuerit ignavus. Hæc ipsa tamen aliquan-

quando modum excedit, ut in Zeuxi contigisse accepimus; qui cum ad ludos Olympicos se contulisset, quo tota fere Græcia conveniebat, nomen suum aureis litteris pallio inscripsit, ut ab omnibus agnosceretur. Porro tam alte de se sentiebat, ut quas pinxisset tabulas, nullo pretio æstimari posse putaret: ideoque non eas quidem vendeat, sed donabat. Quod vitium in illo fuit, multi deinde sunt imitati, virtutem paucissimi.

GRATIARUM ACTIO.

MUnera quod nequeat persolvere debita vobis,
Scilicet idcirco gratia nostra latet.

COMMISSIO XI.

De urbis commodis.

PROŒMIUM.

SI mihi verba ad ignavos adolescentes facienda essent, nihil diligentius caverem, quam ne urbem, aut urbanum aliquid laudarem. Cum enim illi tunicatam libertatem vehementer ament, rustica otia, aucupia, venationes, acerbissime indignantur, quoties audiunt fori curiæque occupationes, Magistratus, Scholas, Academias, ceterasque, ut ipsi appellant, civitatis cruces celebrari. Sed cum apud eos dicam, qui discendi studio inflammati, & ad omnem urbanam elegan-

H h ; tiam

tiam exultant, cum hominibus vivere malunt, quam cum feris, videor mihi magnam inire posse gratiam, si urbis commoda persequar, & in aliquo litterarum lumine collocem. Vestra scilicet bona vobis commendo, vestraque fortunæ gratulor, qui in hac præclarissimarum rerum communione vivitis, ubi quæ ad scientiam, quæ ad virtutem, quæ ad felicitatem pertinent, vobis non modo abundant, sed, siquid hujusmodi redundare potest, plane redundant. In Urbe vivitis origine antiqua, mœnibus ampla, publicis privatisque ædibus splendida, solo ac cælo temperatissima, multiplici flumine irrigua, monti marique proxima, & quod in primis ex usu vestro est, omnium bonarum artium ac disciplinarum libris & magistris refertissima. Siquis alio cogitet, hunc ego omnis humanitatis expertem ad infelicissimum illud vitæ genus redire jusserim, a quo sive Oratorum opera, sive Poetarum, sive etiam Philosophorum (nam multi sibi hanc laudem sumunt) vetustissimi homines abducti sunt, & in hoc veluti corpus confociati. Illud vero mihi verendum est, ne in tam lata atque ubere dicendi segete jejunos videar; cui quidem accusationi ut prævertam, non dicam me eloquentia carere, quæ ab hac ætate postulari non potest; sed quod eloquentes ipsi dicere solent, inopem me copia factum. Attamen, ut spero, industriam probabitis, quam ego unam præstare debeo: nam quod a natura est, vires ita sunt infirmæ, ut ne agello quidem laudando sufficiant.

SILVA.

Multa sunt urbis commoda : ac primum quidem ratione loci, qui solet esse saluberrimus : id enim in primis urbium conditores advertere solent. Quod si forte natura non sit hujusmodi, ignium multitudine purgatur.

Deinde ad mercimonia exercenda opportunus est : fere enim urbes ad fluminum ripas, & maritimōs portus statui solent, ut omnia importari & exportari facile possint.

Demum tutus est : quia mœnibus claudi solet, & adversus hostium incursum communiri.

Sed multo plura, multoque majora sunt commoda illa, quæ ex ipsa societate & communione civium profisciscuntur : quia nemo sibi unus satis est ad omnia vitæ officia.

Quo loco explicabitis commoda exercendæ religionis, dicetis de curia, de judiciis, de reliquis magistratibus, de artificum & mercatorum collegiis, de academiis, deque iis omnibus, quæ homines hominum causa excogitarunt, ut simul vivere possent, mutuisque officiis & auxiliis frui, &c.

AD GRÆCAM

INTERPRETATIONEM.

De urbis incommodis.

Bene hercule disputas : sed videris tertiam Juvenalis satyram nondum legisse. Fac, quæ-

so, in manus sumas; & quæ ille de urbanis incommodis narrat, cum tua ista oratiuncula compone: tum vero iudicium feremus. Quod si ad fallendum dicis, auditores quæras oportet, qui adhuc in silvis degant & glande vescantur. At nobis nimis quotidie in oculis sunt ingentes animi corporisque agitationes, vitia, pericula, morbi, quæ urbanam vitam comitantur, eamque infelicissimam faciunt. Magnus est curiæ splendor: at ambitione contaminatur. Utilis est iudiciorum administratio: scilicet si corruptelis vacare posset. Pulchra est ordinum distributio, & hominum inter se societas: ita videlicet nisi contentionibus, calumniis, invidia, malevolentia, ceterisque urbanis pestibus corrumpereetur. Mercatura commoda est: nimirum si posset carere fraudibus. Nul- lum profecto bonum nobis ostendes, quod non aliqua tabe inficiatur. Tempia & religiones non tam splendide coluntur, quam ambitiose; litterariæ Academiæ ineptis hominibus, & insulsis recitationibus affluunt; ædium magnitudo ac frequentia casibus & incendiis obnoxia est; opportunitas loci vicinorum avaritiam & cupiditatem allicit; arces & mœnia bella provocant. Hæc sunt bona illa tua. Nunc si mala referre incipiam, vereor ne ita te commoveam, ut ex hoc loco statim avoles, & in agrum concedas. Sed parcamus

l. i. c. 2. ægrotis; siquidem urbani bene multi, ut Celso videtur, aut ægroti sunt, aut ab ægrotis parum distant.

GRATIARUM ACTIO.

Gratia cum Musis habitare Heliconia fertur,

Urbanisque locis præposuisse juga.

Quod si forte subit, veteres oblita recessus,

Mœnia, num fallax occupat illa forum?

Sedibus his gaudet, quas non sprevere Camœnæ;

Scilicet antiqui fœderis usque memor.

COMMISSIO XII.

Ignava adolescentia nihil est turpius.

PRO OE MIUM.

Sophocles, Isocrates, Plato, multique præterea Græci Latinique homines, quos in literis consensuisse accepimus, ita sibi scribendi operam ad bene beateque vivendum necessariam existimarunt, ut ne in summa quidem senectute, coram ipsa, ut ita dicam, incumbente ac minitante Libitina, calamo pepercerint. Nimia illa fortasse agitatio fuit, & si quidem recte judico, extra locum; quod postrema vitæ pars longo jam cursu defatigata, contentionem ferre nequeat: sed tamen cum multi viribus & ætate florentes laborem recusent, ad annos minus idoneos migrare debuit. Quod si parum intenta & operosa senectus non admodum probatur, quid de adolescentia dicendum erit otiosa & ignava? Monstrum

H h f

hoc

hoc simile est ac si tellus per nivem & brumam diligenter subigatur, anni tempore incalescente quiescat. Ac nos quidem ibi vivimus, ubi ipsa natura loci nullam ætatem esse patitur nisi occupatissimam. Nihil hic deterius habetur otio; nulla est tam fœda lues, nulla labes, nulla pestis, quæ possit cum ignavia comparari. Parietes isti citius ruent, quam desides tegant: quia instituta studiorum ratio perpetuo labore constat; eoque intermisso, non jam debilitatur, sed omnino dissolvitur. Facile igitur mihi erit in hac exercitatione, quemadmodum jubeor, ignavos reprehendere, invisum nomen, & omni patrocinio destitutum: sed tamen timide facio, veritus nimirum, ne cum aliquid ingenii infirmitate peccavero, minus benevole judicantibus ipse quoque ignavus videar.

S I L V A.

QUæcumque de otio dicta, aut scripta invenietis, huc omnia, judicio & ratione adhibita, adduci possunt. Sed ita efferenda sunt, ut vim maximam capiant ex comparatione adolescentiæ cum reliquis ætatibus.

In eo præsertim operam & industriam vestram collocabitis, ut adolescentem aliquem urbane describatis, qui inter nostras hæcæ numquam intermissas contentiones otiari velit, & per causas malitiose quæsitæ magistrorum curam eludere.

Orationem parænesi concludetis, ea omnia commemorando, quæ pudorem ignavo adolescenti afferre possint; eumque in sui ipsius suarumque virium cogitationem adducere,

AD

AD GRÆCAM

INTERPRETATIONEM.

Pro Ignavia.

IGnavus tibi videor: numquid iccirco minus sapiens? Scilicet ardelionibus insipientia est modestè agere domi suæ; honesto otio frui; non foro, non curiæ, non suis, non alienis molestiam exhibere. At hoc nostro vitæ genere qui delectantur, vacant invidia & inimicitijs, non capite dolent, non distillationibus laborant, felices fortunatique ævum longissimum ducunt. Et esse igitur, & dici ignavum facile patior, si Superi terrarum cælorumque domini ignavos fortunant. Apage te cum tua ista diligentia laboris ac periculorum plena, valetudini infesta, anxia, sollicita, æmulis, invidis, inimicis obnoxia. Num pauca tibi videntur humani generis incommoda ab ipsa rerum natura profluentia, nisi sibi quisque carnifex sit, & ad interitum ruat voluntarium? Audio gloriæ nomen jactari: quam vanum, quam inane, quam ridiculum, Dii boni! Hoc vero vel in primis hominum levitatem ostendit, quorum multi vitam cum gloria commutant, quæ siquid est, a mortuo quidem percipi nequit. Atqui hoc, quidquid est, immortalitatem appellant, ut etiam in summo malo sibi blandiantur. Ego ex mortalibus natus, mortalis æquo animo sum: idque unum peto, quod, nisi fallor, æquissimum est, ut mihi inter illos vivere

liceat, qui & plerumque tarde moriuntur, & numquam certe se ipsi conficiunt.

GRATIARUM ACTIO.

SI bene pugnatum est, Musæ Charitesque, favete;

Ut sua pro meritis præmia quisque ferat.

Si male pugnatum est, Musæ Charitesque, favete;

Ut melior faciat nobile finis opus.

COMMISSIO XIII.

Litteris deditus adolescens debet esse vigilans & operosus.

PRO O E M I U M.

SCipionem ferunt dicere solitum, se numquam minus esse otiosum, quam cum esset otiosus. Ego vero multos animadverti numquam minus esse operosos, quam cum sunt operosi. Ille enim longa consuetudine obtinuerat, ut ne otium quidem otiose consumeret; isti autem languoris ac desidii pleni vel gravissima negotia socorditer agunt. Fac rursus, ne in sæculi offensionem incidas, Romanam curiam esse: quid gravius, Dii immortales? Hic tamen sedere videas nescio quid hominum, quibus nihil est senatorium præter togam. Accedunt vel pœnæ, vel infamiæ metu, & quidem eo tardius, quo ægrius. Ex ipso ore
mo-

motuque corporis statim apparet, quanto otio ac
 socordia diffuant. Prima illis cura de subsellio,
 tum quora sit hora, & multa subinde de itine-
 re, de scalis, de publico seruo querela. Sequitur
 aliquid de valetudine; sed inter hæc hesterna cra-
 pula fessis somnus obrepit: obdormiscunt, ructant,
 eruditates inhalant vicinis omnibus. Tandem Se-
 natus dimittitur, surgunt semisopiti, incuriosi ab-
 eunt. Tu vero cave homines offendas. O te
 beatum, inquit, qui nostris laboribus vitam se-
 curam ducis. Noli enim de privata conditione
 dolere: magna cruce cares; nulla est Senatori
 quies. Papæ, nimis exhaustum laboris est; vaca-
 tionem petant, ætatemque publicis jactationibus
 ingravescentem domestico otio reficiant. Hæc ali-
 quis fortasse ridebit: ego vero indignationem te-
 nere non possum. Nullum enim turpius est
 otium, & homine indignius, quam quod negotii
 simulatione tegitur. Neque vero putetis. Audito-
 res, litterarios ludos hoc vitio carere. Videtis;
 ut ignavi quidam de suis laboribus querantur;
 lectos deferi ante lucem; æternas scholas haberi;
 publicas exercitationes privatis succedere; modo
 Latine scribi, modo Græce; ne ipsam quidem
 mensam lectione vacare; quin etiam ludos ipsos
 animi causa institutos latina locutione contami-
 nari? Operosum sane vitæ genus, si ita est; ri-
 diculum, si adsit laboris fallendi ratio. Surgimus
 scilicet ut inviti solent, iterum ac sæpius urgente
 monitore; libros in manus sumimus, sed tam lente
 atque oscitantur, ut statim decidant; non pluteus
 recte habet; non calamus, non atramentum: moni-
 tor interim abit; rursus obdormitur, donec proce-
 den-

dente die, præclara illa ientandi hora omnes omnino excitat. Hic vero totus est homo, itur, reditur, clamatur, nihil fingi potest negotiosus. Sed jam schola, magister adest, animi cadunt; alius capite, alius ventre laborat; hic libros invenire non potuit, illi pensum ablatum est; per excusationes & fallacias tempus ducitur. Itane vero operosi sumus? Hæcine adolescentis ingenui occupatio? Honestius, opinor, Nattæ vivunt ac Nomentani, qui otium & ignaviam sine fuce profitentur. Hac de re lubet aliquanto copiosius dicere, præsertim cum illos iudices habeam, qui non modo sententia sua, sed exemplo etiam, quæ dixerò, confirmabunt.

S I L V A.

EXercitatio hæc admodum ab ea differt, quæ vobis superioribus diebus proposita est; sed illud etiam curare debetis ad dicendi copiam comparandam, ut aliquando rem eandem stilo varietis.

In vigilantia præcipue versandum vobis erit, quæ quantum ad studia conferat, Cleantis lucerna tantopere celebrata satis declarat.

Adolescens porro desidii somnique plenum belle irridet Persius Sat. 3. quam videbitis.

Nullum est ingenium hominis tantum, quod efficere aliquid possit, nisi viridem ætatem assiduis vigiliis exercuerit. Quis enim magis ad eloquentiam factus, quam Demosthenes; quis magis, quam Aristoteles ad philosophiam? Ille tamen, ut scribit Cicero Tuscul. 4. c. 19. dolere se agebat, si qua-

quando opificum antelucana victus esset industria; hic vero ita, teste Laertio, cubare solebat, ut machina ad id comparata citissime excitatus, naturam ipsam superaret, studiumque repeteret.

Ajunt Auroram amicam esse Musarum: nempe ut significant, quæ pars diei ad studia opportunissima sit. &c.

A D G R Æ C A M I N T E R P R E T A T I O N E M.

Fabellæ.

Hodie mane adolescentem conveni juris studiosum, & quidem pro ætate strenuum, sed somno & culcitæ ut qui maxime deditum. In lectulo de more jacebat; vixque impetrare potui, ut sub ipsum prandium Zotheam aperiret, nosque salutantes admitteret. Reprehensionem paraveram; cum ille me ex vultu ipso intelligens, noli, inquit, subirascei, quasi vero otiosus decumbam. O vitam jurisconsultorum infelicem! Litem adhuc audiavi magno labore animi, necdum video, quomodo satis commode dirimere possim. Ego vero, quid hoc, inquam, litis est adeo gravis, ut ne dormienti quidem parcat? Tum ille: nihil potes cogitare gravius. Adsunt mihi quotidie bene mane feminae duæ acerbissime litigantes: feminam dixi, satis intelligis rixosum animal & implacabile. Altera Pigritia dicitur, altera Diligentia: hæc me somno excitat, jubetque ante lucem surgere; illa adversariam arcet, graviterque increpat; & quamdiu inter se digladiantur de somno

vitiis ac virtutibus, de lecti commodis & incommodis, ego inter utramque iudex animi pendeo, nec alterutram condemnare audeo. Prandium interim advenit; Amplius pronuncio. Vide igitur quantæ me curæ vel eo tempore conficiant, cum tibi cessare videor. Ad hæc primum risi; deinde vero indignatus, non modo verbis, sed etiam verberibus, cum se defendere non posset, desidiam tam ingeniosam castigavi.

GRATIARUM ACTIO.

Gratia conatur si vobis æqua referre,
Nempe supra vires est operosa suas.

COMMISSIO XIV.

Tardus adolescens nullus homo est.

PRO OE MI U M.

TAm multas identidem personas hoc loco sumimus, ut mirum sit, adolescentis ingenium ætate ipsa tenue atque exile tantæ varietati sufficere. Modo nos matutinæ scholæ de rebus subtilissimis disputare jubent, modo ad exotericas exercitationes vocant pomeridianæ; nunc Græca urgent, nunc Latina; interdum stantes, interdum sedentes dicimus; alias interrogamus, alias respondemus; nemo denique nostrum unus homo est, sed veluti Proteus Virgilianus, *omnia transformas se se in miracula rerum*. Ecce nos hodie
Rhe-

Rhetoras, qui hesterno die partim Theologi, partim Philolophi videbamus. Satin' salvæ, Quintiliane? Nosti discipulos olim tuos, qui te ineptiis conficiebant? Nimium placuisti tute tibi, cum vappas hujusmodi exclusisses. Adsumus in veteri ludo. Verum sic habe; nos tamquam tempestate delatos huic scopulo adhæsisse, quem nec libenter tenemus, nec certe tenebimus diu. Tu vero, Naso, curæ quondam nostræ, cui partes hodie secundas tribuimus, quo animo in scenam redis? Age porro Getas cogita; nihil tibi a nobis æque continget calamitosum. Tua quidem carmina interpretari pro dignitate non possumus, at certe non deformabimus. Quid vero si ne tua quidem dicere potes, quæ publici juris esse voluisti? Misereor prolis quondam tuæ; sed jam a te ipso emancipata per omnes puerorum scholas dudum oberrat, & vapulat. Atqui ego Manibus loquor neque curantibus talia, neque scientibus; perinde quasi ab iis, qui audiunt & judices sedent, nihil omnino timendum sit. Equidem video, quam multa verba fieri oporteat, si omnem ingeniorum nostrorum infirmitatem aperire de more velimus, causasque illas singillatim recensere, quibus ab hac luce deterrebamur; sed nunc ita se res habet, ut cum verecundiæ fines transgressi, negotium tam grave susceperimus, jam audere naviter, totumque perficere debeamus. Ac ne initio quidem fortasse peccavimus; neque omnino verecundia dicenda est, quæ adolescentes a pulvere arcet. Tarditas & ignavia hoc nomine tegitur, cum qua nos perpetuum bellum suscepimus; in quam sæpe ex hoc loco declamavimus;

quam hac ipsa exercitatione profligare dicendo statuimus. Si quando labes hæc teterrima (quod in primis Superi avertant) nos quoque inficiet, animadvertite jure vestro; in ceteris rebus ætatis hujus nostræ, atque imbecillitatis rationem habete.

SILVA.

DEScribite exordii loco præclaram indolem ejus adolescentis, qui experrectus & ad omnia promptus est. Ex quo sequitur, quam misera sit ejus conditio, qui in ætate suapte ingenio tam fervida victus est ac frigidus. Alteram hanc partem explicate oratorie; & ostendite, hunc nullum hominem tota vita futurum.

I. Quia in hac prima ætate prodit se natura, & significat, cujus ingenii sit, quantum possit, quid valeat; quæ si sopita est, quando, aut quomodo excitabitur? Quod ostendi potest a simili; nam fere ex aurora primoque diluculo totius diei ratio & natura dignoscitur.

II. Quia cum in adolescentia spiritus celerissime agantur, is aut paucos, aut hebetes spiritus habet, qui tarde movetur.

III. Quia hæc ætas nulla re alia commendatur, quam vivido naturæ impetu, qui est ingenii index, unde omen in reliquas ætates capere solemus.

IV. Quia qui friget in adolescentia, deficientibus ætatis flexu spiritibus, reliquum est, ut stipes in senectute fiat.

V. Denique quia tarditas in aliis ætatibus excusa-

COMMISSIONES. 499

cusari potest *specie virtutis & umbra*: In adolescente nullam habet excusationem. &c.

A D G R Æ C A M I N T E R P R E T A T I O N E M.

Pro tarditate.

DUm vitas tarditatis notam, vide ne subeas levitatis. Proverbium est apud Varronem, Romanos sedendo vincere; inde ortum opinor, quod Fabius Maximus Hannibalis vires juveniliter exultantis, & pugnandi locum impatientissime quærentis cunctando fregerit. Nullum quadrupes est humano generi utilius quam bos, nullum item tardius. Qui nimium properat, serius absolvit. Itaque citius equi caudam depilat, qui singulos pilos digitis excerptos paullatim evellit, quam qui omnes simul, utraque manu comprehensos, uno impetu conatur educere. Ajunt canem festinantem cæcos parere catulos: quod quemadmodum se habeat, videant naturæ exploratores. Quid igitur agendum? In omni vitæ ratione difficile est terminos illos invenire, quos *ultra citraque nequit consistere rectum*. Cura ne nimium juvenis, neve nimium senex videaris; &c, quod Græci dicunt, *Festina lente*.

G R A T I A R U M A C T I O.

GRatia, quid cessas vetulæ male mobilis instar?

I i 2

Et

Et tamen æterno flore puella viges.

Gratia non grata est, quæ dat sua munera tarde:

Unum si dederis, da cito, bina dabis.

COMMISSIO XV.

Multa multis condonare oportet.

PRO OE M I U M.

SÆpe mecum ipse cogitavi, quo tandem fato loci hujus exercitationes regerentur, in quibus nihil unquam auditur, nisi jurgia & accusationes, perinde quasi quidquid huc affertur, ipsa soli luc statim corrumpatur, nullamque sui partem retineat, quæ possit jure laudari. Ubi quis in hunc pulverem descendit, ubi se sistit, illico turba omnis in illum; alii solœcismum obijciunt, alii rerum ordinem castigant, alii sensa non probant; quosdam vocula offendit, nonnullos etiam litterula; huic dictio non bene sonat; ille nervos desiderat; denique modo turmatim, modo singuli miserum adolescentem aggrediuntur, verberant, conficiunt. Si legis, non recte pronuncias; si recitas, male canis; si taces, es ignavus; si dicis, nimis audax; omnia demum ad reprehensionem referuntur. Equidem non diffiteor multa præsertim a pueris in re litteraria peccari, quod nisi esset, magistris non indigerent; at nimis acerbè judicat, qui nihil putat ab illis promi, nisi errores. *Objicio, reprehendo, errasti, faciendum erat, hæ sunt perpetuæ harum exerci-*
tatio-

COMMISSIONES. 501

tationum formulæ. Est ne versiculus, quem ferre possis? Agedum lauda, si diis placet, mihi-que animos adde. Lapsus alicubi videor non tam ignavia, quam infirmitate? Ne me statim jugules; remitte aliquid proficere volenti. Ita videlicet in omni humana vita fieri solet, in qua nisi veniæ daretur locus, nulla homini cum homine posset esse societas & conjunctio. Ex quo enim primi parentis labe rerum natura vitata est, siquis perfectum aliquid, suisque numeris absolutum ex omni parte requirit, is mihi ne compos quidem videtur animi. Sed hoc ipsum latius explicabo; ut cum vobis persuasum erit in universum, multa multis condonari oportere, nihilo plus a me postuletis, quam ab ingenio infirmissimo debeat.

S I L V A.

Dicetis, nihil esse in hac rerum universitate ex omni parte perfectum, sed ea bona appellari, quæ minus mala sunt.

Quod igitur usuvenit in rebus ceteris, idem de homine dicendum: *Vitiis nemo sine nascitur*; Hor. l. 1. *optimus ille est, qui minimis urgetur*. Ergo qui ser. 3. humanæ vitæ societate fruitur, condonare multa debet.

Quia qui nihil condonare vult, nullos amicos habet: stare autem sine amicitiiis humana vita non potest.

Quia qui est difficilis, nihilque in aliis ferre potest, infinitam sibi invidiam conflat; cumque

ipse vitii non careat, vitam moresque suos multorum inimicorum iudicio subicit.

Quia neque magistratus summo jure agunt, sed ex æquitate multa remittunt.

Quia Deus, cujus summa est auctoritas, & infinita potentia, tamen erga homines mitissimus est. Cur non homines erga homines ipsos? &c.

AD GRÆCAM

INTERPRETATIONEM.

Pro Severitate.

Tanta est aliquorum in peccando temeritas & pervicacia, ut vel a mitissimis pœnas extorqueat. Nam clementia quoque ipsa suos terminos habere debet, ut virtutis nomen & rationem tueatur. Neminem puto ex omni antiquitatis memoria ad parcendum fuisse proniorem, quam Alexandrum Romanorum Imperatorem: quem unum iccirco ex omnibus nomino, quod non faintate aut inertia, sed ratione & consilio talis fuerit: siquidem suapte natura ad severitatem ferebatur, unde illi *Severo* nomen. Cum cognovisset, Camillum quemdam Senatorem res novas moliri, ut tyrannidem occuparet, primum quidem ad se vocato gratias egit, quod reipublicæ curam sponte susceperet; deinde in Senatu imperii participem appellavit: tum ne quid joco facere videretur, in ædes Palatinas recepit, Imperiali veste ornavit, & mensæ adhibuit: donec ipse in expeditionem profectus, renuentem sequi, & im-

pe-

COMMISSIONES. 503

perium abdicantem ad rustica otia dimisit. Hunc tamen ipsum longo post tempore Impetatoris iussu occisum historici narrant. Quid rursus peccaverit, non constat; sed certe Alexandri patientiam fatigavit. Quod cum reputo, sic statuum existimo, quemadmodum in corporibus, ita etiam in animis morbos esse quosdam, qui sine ferro atque igne curari nequeant.

GRATIARUM ACTIO.

Multa igitur multis debent peccata remitti: Lex pulchra est, nobis non tamen æqua satis.

Omnia si pueris jubeat peccata remitti,
Quæ nobis placeat, non erit ulla magis.

COMMISSIO XVI.

Improborum felicitas non potest
esse diuturna.

PROŒMIUM.

S, quam Græci dicunt *ἡθελοθρησκείαν*, hominibus concederetur, varios sibi quisque Deos fingeret, & pro diversis cupiditatibus plane ridiculos. Mirabile dictu est, quam nihil sibi inter se convenient ne duo quidem homines de re tanta; atque adeo ne unus quidem sibi ipse in tota vita. Adolescens enim lata numina facit & ad indulgendum prona; vir gravia & honorum cupida;

pida ; senex callida & rebus servandis intenta ; denique ut cujusque negotia pro temporum varietate ferunt, modo facilia, modo severa, nulla-que in re sibi constantia. Quid quæritis ? Illi ipsi, qui probi sunt, & pro conditione rerum humanarum etiam prudentes, nonnumquam tamen de Superis queruntur, quod latrones, proditores, adulteri diutius florent, quam ipsi pati possint ; & sua consilia quodammodo cælestibus opponunt. Etsi divina humanis rationibus penlitanda non sunt, nobis tamen in mentem venit, hac ipsa de re hodierna exercitatione differere ; & improborum felicitatem, quæcumque sit, in medium vocare. Magna vero res, & adolescentis ingenio longe major : nisi quod auspicio jussuque præstantissimorum virorum conantibus nihil omnino difficile videri debet. Favete igitur, Auditores, cum ea, qua semper consuevistis humanitate, tum singulari aliqua, & in præsens discrimen accommodata, nequid indignum divina providentia pro nostra imbecillitate dicamus.

S I L V A.

Dicetis in exordio non esse temere judicandum de Divina providentia, cum videmus improbis hominibus recte esse : nam fere in altum tolluntur, ut graviore casu ruant. Tum causas & rationes persequemini, quibus felicitas corrumpi solet, nisi sit cum virtute conjuncta.

I. Igitur nihil potest esse diu, quod a fortuna pendeat, non a ratione : improborum autem felicitas fortunæ munus est.

II.

II. Quia, ut refert Cicero ex Nævio Philipp. 2. c. 27. male parta male dilabuntur: nihil enim est constans nisi virtus, & quod virtute nititur.

III. Quia improbi neque per se ipsi retinere fortunam possunt, ejusque bona tueri, quia carent prudentia; neque per alios, quia carent amicis.

IV. Quia interest publicæ felicitatis improbos perire, aut jacere; itaque oppugnatores multos inveniunt.

V. Ponite vobis ante oculos Romanos Imperatores, orbis terrarum Dominos. Improbissimus quisque pessime periit.

VI. Sed esto. Tota improbi vita felix sit (si quidem felix dici potest, quem malefactorum conscientia diu noctuque vexant) attamen felix sit more suo, seu potius communi hoc nostro, qui felicem appellamus, cui plurima sint fortunæ bona, quid? An hæc diuturna dici felicitas potest? Quid est, oro, in hoc tam exiguo vitæ spatio diuturnum? Manent illum sempiterni cruciatus, &c.

Hic vero ex Fidei Christianæ regulis ostendite, quomodo brevissimam vitæ hujus felicitatem æterna supplicia tandem aliquando consequantur.

Sic porro illa refelli possunt, quæ adversus Deorum providentiam in libro Ciceronis tertio de Nat. Deor. Cotta disputat, ubi tantopere miratur, Dionysium tyrannum, post natos homines scelestissimum, in suo lectulo mori potuisse; eamque potestatem, quam ipse per scelus nactus erat, quasi justam & legitimam, hæreditatis loco filio tradere.

AD GRÆCAM

INTERPRETATIONEM.

D^E*eorum crimen* (inquit Seneca de consol. ad Marc. c. 12.) *Sylla Felix*. Nempe Ethnici de Diis suis facile judicabant, quos & fato duci, & pugnare secum ipsos, & multis perturbationibus agitari arbitrabantur. Nos qui de divinitate ita sentimus, quemadmodum homines decet superiore quodam lumine illustratos, neque infelicitate proborum hominum, neque improborum felicitate movemur, ut de arcana illa providentia dubitemus, quæ cælos terrasque moderatur. Quamquam fere homines in eo falluntur, quod veram felicitatis, atque infelicitatis rationem & naturam non recte metiantur. Hanc enim totam fortunæ bonis & corporis robore definiunt; cum in quadam potius mentis tranquillitate, in fortitudine animi, in omnium dictorum atque factorum constantia & veritate ponenda sit. Ex veteribus Philosophis nulli minus peccarunt hac in parte, quam Stoici: itaque etiam maxime omnium cum Christianis institutis eorum instituta consentiunt. At enim Seneca, qui Deos criminatur, totus a Zenone est. Est videlicet a Zenone; sed ipse quidem, si recte perpendimus, Deos non criminatur. Nam eo in loco ubi invidiam commemorat Diis conflata ob Syllæ felicitatem, vulgus notat. Imo, si Senecam audis, non est Sylla inter improbos numerandus, qui arma bene sumsit, & bene posuit. Quid, inquit,

si

COMMISSIONES. 507

si Diogenes quoque dicere solebat, Harpalum 1. 3. de
prædonem nimis felicem contra Deos testimo- natur.
nium dicere? Nempe ex illa, quam profitebatur, Deor.
Cynica disciplina, quæ neque Diis, neque homi- c. 34.
nibus parceret. Nemini umquam Diogenis crimi-
nationes periculum crearunt.

GRATIARUM ACTIO.

MUnera vestra libens cepi; nec verba re-
quiro,
Debita queis solvam. Debeo nempe libens.



sCHO.

SCHOLASTICÆ DISPUTATIONES,

Quæ bis in hebdomada in Seminario Patavino publice haberi solent.



DISPUTATIO I.

Ad quamlibet Disciplinam.

PROOEMIUM.



Umquam sane intelligere potui, quemadmodum fiat, ut cum veterani milites quotidie hostem aciemque cupiant, gregarii vero insolentia rerum examinati ad quemlibet armorum strepitum de fuga cogitent; in nostra tamen hac umbratili militia tirones plus animo valeant, quam qui viribus usuque probati triariorum locum tenent. Ego equidem primis adolescentiæ annis in hanc arenam descendere iussus, non solum nihil cunctabar, sed tamquam ad victoriam vocatus, horas ipsas impatientissime numerabam, quæ cuilibet ex more atque instituto ad se comparan-

parandum concedi solent. Nunc seu cognitione periculi, seu majore famæ cura ita locum hunc reformido, ut nihil beatius putem, quam latere, aliorumque contentiones procul a sollicitudine spectare, & ex illis proficere. Quam multa tentarim, quam multa moverim, qua arte, quibus precibus usum sim, ne huc prodirem, meque alæ tam periculosæ committerem, in præsentî non vacat exponere; illud tamen tacere non debeo, me quidquid egerim, non ignavia egisse, sed formidine quadam pugnæ, quæ cum ipsa per se difficilis, multarum rerum apparatus & ingenia exercitatissima postulat, tum vero mihi & valde infirmo, & parum animoso, & ex tam longa vacatione modo redeunti plane intolerabilis videbatur. Parere tamen necesse fuit; in quo deinde ne alacritas quidem defuit, ubi præsertim cogitare cœpi, cum illis rem fore, qui judicia sua ad æquitatem referre solent; omnemque hujusmodi exercitationem ex cujusque ingenio, ex loco, ex tempore humani facilesque metiri.

GRATIARUM ACTIO.

Primus ego, Charites, posco mihi munera vestra,

Queis ornem faciles in mea vota viros.

Siqua negare placet, postrema negabitis olim.

Officiosæ animæ non bene prima negat.

DIS-

DISPUTATIO II.

Ad Theologiam.

P R O O E M I U M.

EQuidem fore non putabam, ut qui alios ridere soleo, quotiescumque de suæ disciplinæ difficultate tam multa prædicant, ipse quoque ad hunc scopulum appellere deberem, aliisque ludo esse. Videlicet id mihi proponitur ad disputandum, *utrum futurum fuerit, ut Deus humanam naturam sibi adjungeret, si Adam non peccasset*: estne, ut nobis tamquam in facili negotio blandiamur? Si in iis cognoscendis, quæ facta sunt, tantopere alii sudare se atque algere dicunt, quid reliquum est, ut ego dicam, qui in ipsa divinæ voluntatis arcana penetrare jubeor; atque adeo voluntatem ipsam quodammodo prægredi, quidque factura fuerit, si non fecisset quod fecit, divinare? At enim illi, qui se unos Theologos putant, & locum tam gravem numero ipso defendunt, in hac se disputatione privatim ac publice frequentissime jactant. Ego vero Theologicam hanc multitudinem laceßere nolo: sed tamen multitudo est. Utinam tam bene cum litteris ageretur, ut Theologi multi esse possent. Quotidie disputant, non quidem ut veritas tamquam ex æris lapidisque confictu expressa refulgeat, sed ut exire volens, suoque ingenio refulgere, barbararum formularum tenebris plusquam Cim-
riis

DISPUTATIONES. 511

riis obruatur. Qui in hoc sibi persuadent positam esse differendi laudem, nihil debent reformidare. Ergo qui alio specto, ad hæc tam recondita ægerrime accedo; veritus scilicet, ne per ambages ingenii mei non solum nihil promam hac luce dignum, sed ea ipsa, quæ plana ac lucida sunt, aliqua umbra deformem. Cavete vobis diligenter, Auditores; cavete nobis: neque quidpiam abire sinatis, quod temere excidisse videatur.

GRATIARUM ACTIO.

GRates, Musa, refer, dixi: tum reddidit illa:
Non est feminei Numinis istud opus.

DISPUTATIO III.

Ad Theologiam.

PROŒMIUM.

Qui gravissimas controversias audire quotidie soles (N N) & pro tuo jure disceptare, miraberis fortasse, quid nos tanto rerum ac verborum apparatu ludicrum certamen instituamus, quo demum confecto, nihil victores supra victos referant; totumque negotium vanis gratulationibus definiatur. Verumtamen si reputabis, per factas has pugnas eo denique perveniri, ubi tu tantopere emines, hoc est ad veras & solidas recte
ju-

judicandas; sollicitudini huic nostræ non solum veniam dabis, sed auspicia quoque tamquam rei gravissimæ præbebis. Quamquam nihil in Theologico pulvere leve est, ipsæque illæ exercitationes, quas reliquæ facultates umbra tegunt, & domesticis parietibus concludunt, si a Theologis suscipiantur, ex re ipsa dignitatem capiunt, & magnorum virorum præsentia dignæ sunt. Itaque ipse me tibi potius excusabo, qui neque ingenio ita valeo, neque viribus, neque usu, ut rei non exiguæ gravitatem coram Principe sustinere possim. Video enim, quam dedecet ineptire, ubi qui præest, dignitate & sapientia conspicuus, sua quadam luce subsellia ornat, magnamque verecundiam dicentibus & audientibus offundit. Sed profecto si tum denique appellare te debeo, cum paria tibi eniti potero, tardius id æquo, aut numquam fiet. Interim quæ possunt à me proficisci, quæcumque sint, humaniter excipe: nam ita quidem fiet, ut ad majora confirmatus ætatem audendo prægreddiar; eaque tibi offeram, quæ tuo nomine patrociniò quadantenus digna, his vero longe meliora judicentur.

GRATIARUM ACTIO.

AUdisti facilis; virtus hæc Principe digna,
Muneribus nullis allicienda venit.

DISPUTATIO IV.

Ad Historiam Ecclesiasticam.

P R O O E M I U M.

Nondum satis molestia illa deposita, quam ex Theologica exercitatione cepistis, ecce vos iterum Ecclesiastica historia in hanc arenam adducit, de se suisque alumniis judicatu- ros. Nempe plurimum sibi scholæ nostræ de vestra sapientia & humanitate pollicentur, quæ se vobis singulæ publice commendant, nulla- que tantorum calor- um ratione habita, aures vestras obtundunt. Ea quidem est studiorum nostrorum ratio, ut his diebus absoluta, aliquam sibi quærant ex publica luce commendationem: nisi tamen cum primum patientiæ vestræ periculum fecimus, tam nobiscum benevole egissetis, nemo profecto nostrum ausus esset rursus descendere, vestrumque animum, renovato certamine, pertentare. Tametsi nova hæc exercitationis species, insolitus rerum historicarum apparatus, minime usitata de antiquissimis tem- poribus quæstiones nonnullam habere videntur ju- cunditatem, quam illæ fortasse non habent egre- giæ quidem ac divinæ, sed tamen valde protritæ Thomistarum & Scotistarum disputationes. Ve- rumtamen de re ipsa utcumque sit, de me qui- dem certe nihil polliceri possum, nisi tenue atque exiguum; tum quod nemo est, qui in tanto dif- ficillimarum rerum discrimine audere debeat; tum

K k

quod

quod ego minime omnium ad audendum factus, non modo solem ac pulverem, sed etiam umbram timere soleo. Quid igitur? Scilicet tantum mihi esse in te præsidium intelligo, Princeps Eminentissime, ut præsentia tua confirmatus animos summam, magnoque me sive ardore, sive impetu in certamen conjiciam. Tu nobis si faveas, nihil est aliud, quod laboremus; nec vero favere non potes, ubi tuos videas in magno periculo positos ope indigere.

GRATIARUM ACTIO.

Munera non possunt æqua tibi lance rependi:
Munera non debent lancè minore dari.

DISPUTATIO V.

Ad S. Biblia Polyglotta.

PRO O E M I U M.

Quo primum tempore ad hæc sacrarum literarum studia vocatus sum, fortunam inculcare cœpi; quæ me in altum repente compulisset, ubi magnam vitæ partem modico fructu jactarer, nihilque mihi per diu appareret, nisi *pons & ather*. Exiguus quidem codex ad discendum offerebatur; at eum ajebant multis abditisque linguis descriptum esse, quas simul omnes terribili nescio quo nomine *Polyglotta* vocabant, æternis-

DISPUTATIONES. 515

nisque voluminibus exaratas ostendebant. His addebant & Biblia magna, & Criticos Sacros, & Cornelium à Lapide, & Tostatum, & Ugonem, & Sylveiram, & Lorinum, & alia multa Scriptorum nomina, qui non libros, sed bibliothecas ad nostras animulas fatigandas ediderunt. Dii boni, quæ tum me cepit desperatio! Parui gravate quidem, ut sit, sed tamen parui, quoniam ita necesse erat. Quid tum postea? Cum paullo longius processissem, facile cognovi omnia initio ad fallendum composita fuisse; nihilque studiis nostris planius esse, si recte instituantur. Linguarum multæ sunt, sed valde sibi similes: interpretes prope infiniti, sed eadem fere recoquentes; volumina immensa, sed succus mediocris, & ex uno in aliud minima varietate decurrens: uno verbo, si methodus non desit, omnia in medio posita & expedita. Neque vero hæc dico, quod putem posse me in hac exercitatione facili negotio præstare: jam enim fateor ante tubas, non esse mihi propositum, ut contentionibus emineam, a quibus me & voluntas, & exilitas laterum, & verecundia quædam pæne rustica cogit esse alienum. Sed hæc ipsa, ut spero, imbecillitatis pudorisque confessio ab ea me culpa liberabit, qua se multi nimio plus fidentes hoc in loco contaminant.

GRATIARUM ACTIO.

MUnera non refero: nimirum fenore nullo Illelli nobis munera vestra datis.

DISPUTATIO VI.

Ad S. Scripturam Vulgatam.

P R O O E M I U M.

ECce nos Vulgatæ Scripturæ Interpretes, ut nobis quidem videmur, satis industrii, ut aliis nescio quibus, desides & ignavi. Sunt enim quidam nimii obsoletarum linguarum admiratores, qui nullam diligentiam probant in sacris litteris adhibitam, nisi Græcos & Hebraicos codices complectatur: quorum opinio si quidquam habere momenti debet, videtis quodnam judicium non dicam de Scholasticis scriptoribus, sed de ipsis Sanctis Patribus ferendum sit; qui omnes, præter Hieronymum, Hebraicis litteris caruerunt, multi vero etiam Græcis. Equidem non intelligo, qui fieri potuerit, ut Deus Optimus Maximus in medio Latio religionis sedem constitueret, nec tamen vellet ad ejus mysteria explicanda Latinas litteras esse satis. Latinus igitur erit supremus religionis Antistes atque Interpres, Latinæ ejus constitutiones, Latinæ sacrificiorum formulæ, Latinæ preces; liber vero ille, unde hæc omnia fluxerunt, per quem maxime constant, ad quem unum tamquam ad lapidem Lydium exigenda sunt, intelligi ex toto non poterit, nisi ad Græcos & Hebræos confugerimus? Siqui tantum ingenii habent atque otii, ut multarum linguarum cognitionem comparare possint, afferant per me
licet

licet ad Vulgatæ Scripturæ studium non Græca solum & Hebraica, sed etiam Arabica & Ægyptia; sed a nobis tamen nihilo plus requirant, quam quantum potest Latinus homo ad sacrorum Bibliorum interpretationem divina providentia vocatus. Nam quod de fontibus ajunt, inde puriores latices fluere, quam ex rivis, id a D. Hieronymo petatum est, cujus ætate minus aliquanto depravati erant Hebraici Græcique codices, Latinus vero nullus designari poterat in magna Interpretum varietate, qui pro certo haberetur. Nunc universæ Ecclesiæ decreto quidquid erat in antiquis illis fontibus auctoritatis, in Vulgatam interpretationem derivatum est; ut jam nec pervicacibus Hebræis, nec levibus Græcis ad nostram institutionem indigeamus. Hæc habui, quæ hodiernæ exercitationi breviter præferer, ut a veteri accusatione me meosque aliquando liberarem. Quod superest, in judicio vestro conquiescimus, cui sane tantum tribuimus, ut, si jubeatis, a proposito susceptoque consilio statim discedere parati simus.

GRATIARUM ACTIO.

UTor jure meo, dum carmina bina rependo:

Hoc alias pretio munera vestra tuli.

DISPUTATIO VII.

Ad Dialecticam.

PROOEMIUM.

Vix egressi Rhetorico ludo, necdum satis, quid sit syllogismus, tenentes, in hanc arenam prodire jubemur, & Dialectici personam sustinere. Scimus totum hoc discrimen valde leve videri illis, qui crassiore Minerva rerum nomina capientes, Dialecticos parum abesse a Grammaticis putant; quod utrique de verbo ac nomine, eorumque recta inter se conjunctione plurimum disputent. Neque vero nos tam abiectos homines Grammaticos judicamus, ut eorum societatem reformidemus, præsertim si illi ad nos accedant, quemadmodum Scioppius fecit, cum suam illam Grammaticam Philosophicam scripsit. Ne illud quidem inficiabimur, utramque hanc facultatem in re levi occupari, modo ipsi nobis ostendant, leve aliquid esse, animi sensa recte formare & efferre. Sed bona illorum venia dicam; siqui sunt, qui ita sentiant, vereor ne ingenium habeant ad Dialecticam non satis idoneum: nam vel minus apte cogitant, vel sua cogitata infelicitè exprimunt. Nos ex quo cœpimus hoc in pulvere exerceri, tantum videmus, ut nunc demum homines nos esse cognoscamus, ratione & judicio præditos, ad cogitandum natos, & ad ea, quæ cogitamus, mutuis sermonibus in-

cer

DISPUTATIONES. 519

ter nos conferenda. Quam misera est eorum condicio, qui nondum eo pervenerunt, ut disciplinæ hujus tam divinæ usum & utilitatem intelligant! *Ille se* (inquit Fabius libro Instit. 10. c. 1.) *profecisse sciat, cui Cicero valde placebit.* Quod ille in arte dicendi valere putabat, ego ad nostram hanc cogitandi artem exigua mutatione transferre soleo, ratus hunc esse primum adolescentis progressum ad philosophica contendentis, si Dialecticos libenter audiat. Neque enim diffiteor, ab Oratoriis & Poeticis studiis ad hæc nostra venientibus omnia videri strigosa, exsucca, frigida, molestiarum plenissima. Itaque qui porro pergit, & perspicit intra corticem, ille nimirum Philosophus est, vel Philosopho proximus: qui nihilo plus capit, quam Grammaticus, vocemque omnem, cujuscumque sit scholæ, aut magistri, ex sono & strepitu judicat, is redeat ad Priscianum. Sed de aliis nimis multa: ad me ipsum venio, de quo in primis hodierna exercitatione judicium ferri debet. Equidem nihil habeo, quod pollicear, ne illam quidem, quam omnes ceteroquin hoc in loco jactare solent, voluntatem & indultiam. Ipse enim mihi vehementer diffido; & quanvis intendam vires omnes, attamen cum reputo, quam longe absum ab eo fastigio, in quo laus philosophandi sita est, non solum nihil in præsentia audeo, sed vix animum majoris ætatis expectatione sustento. Si ullo umquam tempore fiet, ut aliquid possim, hujus certe diei recordabor, quo die mearum virium periculum facere incipio, & ex vestra erga nos benevolentia omen capio.

GRATIARUM ACTIO.

Sæpe fatigantem repulit me Gratia : numquid
Non satis est, inquit, munera velle dare?

DISPUTATIO VIII.

Ad Physicam.

PROŒMIUM.

Artem illam jam adepti, quæ definitionis, divisionis, & argumentationis regulis continetur, reliquum est, ut ad eas disciplinas aggre- diamur, quarum gratia tria hæc sciendi instru- menta non tam a Dialecticis, quam ab ipsa na- tura sunt comparata. In his primum locum te- net Physica scientia, quæ terram hanc in qua vi- vimus, aerem quem ducimus, cœlum quo regi- mur, uno verbo hominem homini manifestat. Nam via & ratio discendi postulat, ut antequam ad altissimas contemplationes erigatur animus, quibus sapientia constare dicitur, quæ sunt ante pedes, atque adeo in nobis ipsis teneamus; & per hos quasi gradus ad reliqua contendamus. At- que eo jam loco sumus, ut otiosorum reprehensio- nes, quæ nos in Logicis subtilitatibus occupatos fatigabant, non amplius timeamus: nisi forte ab illis quoque cavendum nobis est, qui operosa om- nia, quantæcunque tandem dignitatis sint, im- probare solent. Nihil sane præclarum est, quod
faci-

facile comparetur. Ac si quis sibi persuadet, per otium & voluptates ad aliquam laudem perveniri posse, non dicam Philosophiæ, quæ primas in scholis tenet, sed artium minimarum, is quidem non nostra, sed Medici opera indiget. Ex quo fit, ut eorum voces contemnamus, qui Aristotelis studiorum nostrorum duci & auctori obscuritatem objiciunt: quasi vero ille, qui tam clare ac dilucide Moralia & Politica tractavit, eundem nitorem ad naturalia asferre nequiverit, nisi ipsa rerum conditio repugnasset. Quamquam Aristotelica omnia obscura esse necesse est hominibus istis nescio quibus, certe ineruditis, qui cum Græcarum litterarum cognitione careant, coguntur interpretibus uti. Mihi vero Aristoteles non modo obscurus, sed etiam ineptus ac prope ridiculus videtur, quotiescumque per interpretes loquentem excipio, præsertim vero illos, qui Scholastici dicuntur, genus hominum ad rixas natum, qui neque Græce, neque Latine cum sciant, Græcos tamen Philosophos interpretari audent, & Latino sermoni tradere. Dii te perdant, miser litterator, qui cum me a teneris unguiculis in disciplinam accepisses, tam multa pollicitus, non tamen iis litteris imbuendum curasti, per quas maxime ad hæc Musarum sacraria accedere possem. At hoc tibi tamen debeo, tuæque institutioni, quod de re nulla judicare ausim, in qua ipse uti nequeam iudicio meo; quod virium mearum imbecillitatem non dissimulem; quod non turpe ducam post alios consistere, & quod non didici, plane nescire fateri. Itaque ego Aristotelis doctrinam admiratus eximiam ac prope divinam, nihil de

stili obscuritate dicam, quæ, siqua est, cum oritur ex rebus ipsis suapte natura latentibus & controversiarum varietate implicatis, tum multo maxime ex ingeniorum nostrorum infirmitate; qua fit, ut quemadmodum vetula illa, cum oculorum aciem ætate amisisset, de ædium luminibus querebatur, ita nos inscitæ nostræ culpam in scholam ipsam & magistrum conferamus. Hæc juvit præmonere, antequam de Physicis principiis ex ea, quam profitemur, Peripatetica doctrina disputare incipiam, ut quocum homine vobis futura res sit, statim habeatis, & judicia de me vestra in ipsa disputatione regere possitis.

GRATIARUM ACTIO.

GRates nunc agerem, sed me monet ipsa magistri
Regula: nemo potest, quo caret ipse, dare.

DISPUTATIO IX.

Ad Metaphysicam.

PROOEMIUM.

JAm ibi sumus, ubi mures ferrum rodunt; cumque superioribus diebus videretur nobis præter modum difficile privati ludi labores sustinere ob eas rerum ambages, in quas more atque ordine hic annus incurrit, nunc in publicum discrimen vocamur, de eo responsuri, quod nondum
fatis,

fatis, si libere omnia fateri licet, intelligimus. Videte igitur, Auditores, quantum nobis de vestra bonitate polliceamur; quæ certe nisi tanta esset, non nos solum ab hac luce abstineremus, sed illi etiam, qui modestiam hanc nostram contemnere solent, suæque ingenia Musis opponere. Grave enim est loci hujus judicium, tum natura sua, quia publica judicia omnia periculi plena sunt; tum vel maxime, quod æmulatione regitur, iique de nobis in præsens judicant, de quibus nos postmodum judicabimus. Quod tamen non cadit in omnes, satis tamen multos complectitur; estque ejusmodi, ut infinitam cogitationem accedentibus injiciat, metuque sollicitos faciat. Verum hæc in universum. At mihi præsertim multa timenda sunt, qui, si me cum ceteris conféro, vix hiscere audeam, nedum in eodem stare ordine, eadem subire certamina, & provocantibus ex æquo respondere. Attamen sua voluntati quoque debet esse laus; quæ quidem in me quanta sit, vel ex eo cognosci potest, quod in hanc dimicationem venio, a qua me ceteroquin ingenii viriumque infirmitas valde deterret.

GRATIARUM ACTIO.

NIl est, cur Vobis obrudat Gratia munus,
Quæ conata alias, non dedit æqua satis.

DISPUTATIO X.

Ad Catechismum.

P R O O E M I U M.

ADsumus homines in hujus spem Ecclesiæ crescentes, ut aliqua de Sacramentis disputemus, vestroque judicio longe gravissimo subiciamus. Quid nobis statim, Aristotelis alumni, molesti estis? Quid negotium exhibetis, quod res materia conflatas præter fidem & modum extolamus, & ad animos purgandos per miracula nimium nobis familiaria perducamus? Comprimite vocem stultitiæ indicem: vos profanum vulgus extra sacrarium estis; satis curarum habetis, si tandem aliquando statuere possitis, utrum culices ex putri, an ex ovo nascantur. Sua se quisque provincia, suis finibus contineat: & quoniam nos pro nostra æquitate nihil a vobis de vestris papilionibus quærimus, vos quoque nobis hanc veniam concedite, nisi fallimur, admodum debitam, ut divina oracula sine invidia proferre possimus. Quod si minus acuto ingenio præditi videmur, non ideo tamen contemnendi sumus, tamquam ad cælestes inflatus minus idonei; quippe satis constat, supera mysteria fere semper simplicibus & ineruditis patefieri; ne scilicet humanum ingenium nimio plus sibi tribuat, & cum Diis ipsis Gigantum more pugnare velit. Accipite igitur, Auditores humanissimi, quæ nobis de Sacramentis

DISPUTATIONES. 525

tis dici posse videntur, & facite pro vestra auctoritate, ut multi nobis scholæ hujus fortunam invideant.

GRATIARUM ACTIO.

GRatum carmen erit, siquod nunc Gratia
pangat:
Gratius at vobis, si fileatur, erit.

DISPUTATIO XI.

Ad Mathematicam.

P R O O E M I U M.

Divinandi ars a Chaldæis, a Græcis, ab Etruscis, a Romanis ipsis magnopere culta, & inter religiones habita, jam ad Circulatores in forum abiit, nec nisi fatuæ plebeculæ credulitate sustinetur. Ut autem locum illum miserum, quomodo modo potest, tueatur, maximam sui partem abdicare coacta est, auspicia, ostenta, oracula, somnia; & in paucarum rerum maximeque siderum observatione industriam suam continere. Hinc magnum sibi nomen adscivit Astrologiæ; quo quidem non tam seipsam nobilitavit, quam nobis Mathematicis, qui astrorum scientiam, omnemque rationem, qua oriuntur & occidunt, studio complectimur, injuriam intulit. Nimirum in eo se putant commune aliquid habere scholæ nostræ ridiculi Agyræ, quod nos quoque imbres,
ven-

ventos, tempestatesque prædicimus ex vario stellarum motu, præsertim vero ex Solis Lunæque accessu ac recessu: sed nos quidem necessarias cæli conversiones commutationesque considerantes, certa ratione ducimur, ut quædam fieri oportere dicamus, quæ nisi fiant, naturalis rerum cognatio dissolvatur necesse sit. At quid habent sidera cum thesauri inventione conjunctum, cum amicitiiis, cum civili, aut bellica gloria, quæ tibi credulo viro cerdones isti pollicentur? Non sum nescius, prædictiones quoque nostras a quibusdam rejici, atque adeo studium omnerum cælestium condemnari: etenim, ajunt, quæ supra nos, nihil ad nos. Verum hoc nihil est aliud, quam mala malis curare. Ingenia hominum suapte natura divina, & altissimis rebus contemplandis idonea, quo nequeunt corporei sensus pertingere, non sunt ita opprimenda, ut vel ipsos infra oculos, quibus cælum spectare concessum est, deprimantur. Sibi ipsi injurius est, qui de parte sui præstantissima tam humiliter cogitat. Nos hac in re quid sentiamus, & quatenus, paucis habere; vos pro vestra sapientia totam hanc dissertationem temperate.

GRATIARUM ACTIO.

GRatia, præterito faciebas disticha cursu,
 Ut solita meritis munera lege dares.
 Nunc duplica generosa modos, tetrasticha pange;
 Ipsa etenim novitas muneris instar erit.

DIS.

DISPUTATIO XII.

Ad Moralia.

P R O O E M I U M.

QUli hunc exercitationum ordinem instituerunt, numquam profecto Moralem disciplinam cum Theologica conjunxissent, si reputassent, in hæc demum tempora incidendum, quibus nihil esset utrique commune. Nam in illa quidem ingenium vel exiguum loco ipso nobilitatum satis elucet; in hac promptissimi quoque homines jacere coguntur, & tamquam in abdolum detrusi delitescere. Neque enim rerum judicia ex rebus ipsis hac tempestate fieri solent; ex præjudicatis quibusdam opinionibus, ex fama, sed ex rumusculis, ex eorum denique malitia, qui se callide venditare, populumque ducere noverunt. Titius moralia tractat: ergo bonus vir, nescit litteras. Quid si ingenio magno sit? quid si Canonicos ac Theologicos libros quotidie volvat? quid si gravia quæque studia Moralibus adjungat? Moralia tractat; satis est ut despiciatur. Equidem, Auditores, cum hæc aliquando cogitarem, quovis mihi potius, quam in hanc scholam eundum putabam; ubi si vel maxime laborarem, nullus tamen perpetuo viderer. Verum cum vos audissem, vestramque hanc rerum distributionem diligenter animadvertissem, aliam vobis inesse mentem cognovi, quam quæ teme-

re

re circumfertur; meque ad eam facultatem libentissime contuli, quam vos infra unam Theologiam collocandam judicatis. Utinam vero quod de nostra facultate dico, de ingeniis quoque dicere possem; tantumque nos intelligentia valeremus, quantum Moralis scientia dignitate valet. Sed & modestia quadam jubemur de nobis pauca polliceri, & revera infirmissimi sumus. Nihil est opus multis; siquidem & a prima pueritia unusquisque nostrum ex hoc loco suarum virium specimen dedit, & patientiam vestram suis nugis sæpissime exercuit. Id unum tibi dicemus, Præses Illustrissime, nos, etsi mira proferamus, nullo modo posse molestissimi temporis tædia levare: verumtamen ea cogitatio levabit, quæ tibi in mentem revocet, cujus nomen ac personam hoc loco sustineas.

GRATIARUM ACTIO.

NOs quoque bis gemino solvemus carmine
 grates,
 Moralis Pindo non bene nota cohors.
 Quid vos conatum, Vates, ridetis inanem?
 Nempe pares vobis nos facit officium,

DISPUTATIO XIII.

Ad Justiniani Institutiones.

P R O O E M I U M.

SI rei cujusque facilitas allicere in primis juventutem solet ad eam summo studio amplectendam, nullum est artium, aut disciplinarum genus, quod plures sui studiosos habere debeat, quam Juris Institutiones. Ita enim illæ immortali viro Jacobo Cujacio planæ & expeditæ visæ sunt, ut omnem eorum operam ac laborem valde contemserit, qui se ad eas illustrandas contulerunt. Et vero quid potest esse facilius, quam ea pertractare, quæ quotidiana consuetudine usuveniunt, quæ in dictis factisque totius vitæ versantur, de quorum singulis suæ certæque leges editæ sunt? Quod cum reputo, valde mitior, quid tandem Arnaldo Vinnio in mentem venerit nondum in scirpo quærere, hoc est difficultates in re facillima comminisci. Sed hinc profecto intelligere licet, quam varia sit ingeniorum ratio, quamque diversa diversi sentiant. Equidem non diffiteor, me quoque identidem hæerere, commentaria consulere, magistri opem implorare: sed nimirum ætatis infirmitate fit, ut nos ne planissima quidem via inoffenso pede ambulemus. Itaque rogo vos atque obtestor, ut quidquid in præsentī certamine peccatum fuerit, nobis tribuatis, rem vero ipsam, de qua certamus, ab omni invidiæ suspitione liberetis.

L 1

GRA-

GRATIARUM ACTIO.

Quatuor usuvenit reddi nunc carmina vobis;

Sed numeri ratio non satis apta venit.

Nam si tres tantum Charitas fecere Poetæ,

Jam sine postremum Numine carmen erit.

DISPUTATIO XIV.

Ad Justiniani Institutiones.

PRO O E M I U M.

Non ignoro esse multos, qui valde mirentur, ecquid nobis rebus sacris ac religioni addictis de Jure Civili disputare conveniat. Hos ego primum moneo, ne de alienis negotiis tantopere laborent; deinde respondeo, non nos Jus Flavianum, aut Ælianum tractare, non notis ac formulis actionum impallescere, unde nullus nisi litium propagandarum usus; sed æqui & iniqui discrimina quærere, easque leges explicare, quibus omnia justitiæ ac virtutis officia continentur. Numquid ita videmur ab instituta ratione vitæ discedere? At etiam de Mancipiis, quæ nulla hoc tempore sunt; de patria potestate, quæ jam exolevit; de parietibus, de luminibus, de stillicidiis, quæ vix infirmi subsellii rabulæ curant, diutinas controversias excitamus, arguimus, respondemus. Si nihil habent gravius quod objiciant, sal-

DISPUTATIONES. 531

salva res est. Hæc scilicet percurrimus, non tractamus; nec vero percurreremus, nisi rebus gravioribus conjuncta essent, vetustaque & exquisita eruditione redundarent. Sed nimis multa dicenda essent, si omnibus satisfacere oporteret. Nunc id videndum, quomodo hæc, quæcumque sint, pro munere scholæ nostræ didicerimus: in quo magis vereor, Auditores, ne nos potius nostramque industriam, quam quæ profitemur, condemnatis.

GRATIARUM ACTIO.

Verba ligata modis vestro pro munere reddit

Gratia, quæ morum temperat officia.

Ut Vires perhibent, cælestia carmina si sunt,

Gratia nil melius, quod dare possit, habet.

DISPUTATIO XV.

Ad Catechismum.

PROOEMIUM.

Qui cælibatus commoda non recte perpendit, magnum quiddam & beatitati simile conjugium putat. Hominis enim natura ita comparata est, seu potius ita vitiata, ut præsentem explere cupiditatem velit, nihil præterea sollicita de rebus ceteris. Itaque, non secus atque effrenes viribus & ætate equi, adolescentum plerique ad

uxores advolant, onusque pœnitendum temerè
 suscipiunt. Inde impensæ majores, inde gravissima
 censui puerorum cohors, inde jurgia, inde divor-
 tia, inde infinita prope mala, quibus leges re-
 media parare conatæ sunt, sed pararunt omnino
 numquam. Illud inter cetera cautum est, ut ma-
 trimonia recte fierent: nam malum principium
 similes fere exitus consequuntur. Hinc illa ex-
 plosa, quæ clandestina vocantur, quibus faciles
 plerumque puellæ olim deceptæ jura legesque fru-
 stra appellabant. Aut igitur uxore abstinendum
 est, aut ita quærenda uxor, ut sine fraude do-
 loque fiat. Id dum ostendo, favete humaniter,
 Auditores: non quod ego humanitatem vestram
 ullo modo mereri possim, sed quod omnibus pa-
 ratam esse pro vestra facilitate velit.

GRATIARUM ACTIO.

Olim conatus Grates deducere Pindo,
 Numine non fausto disticha multa dedi,
 Postea tentavi, numquid tetrasticha possent;
 Sed numeros sprexit Gratia trina meos.
 Carmina jam crescant: poterunt hexasticha for-
 sin
 Frangere majori ferrea corda sono.

DISPUTATIO XVI.

Ad Moralia.

P R O O E M I U M.

SI quis rerum nostrarum ignarus tantum hunc apparatus aspiceret; ingentia volumina, sublimem exhedram, exactores rigidos, magnam ornatumque arenam, frequentiam, silentium, expectationem, & quod caput est, judicem Eminentissimum, is certe gravem sibi animo certaminis speciem objiceret, agique de Musarum aris ac focus existimaret. Ubi vero nos in medium vocatos audiret nescio quid nugarum blaterare, putaret se tamquam in Oceani litore Caligulae Suet. in Calig. c. 46. mimum spectare, cum parata expeditione, machinis balistisque dispositis, indicta denique pugna, adversus conchas exercitum duxit, in easque unas tantarum irarum immerentes impetum fecit. Ita fit, Auditores, ut nos infirmitate nostra gravissimæ exercitationis dignitatem minuamus; magnamque vel ex eo commoveamus invidiam, quod non infra scholas ceteras detrusum, tum demum prodeamus (quandoquidem prodire juvat) cum alii omnino defierint. Ac de nobis quidem, nostraque gloria, quæ revera nulla est, non admodum laboramus: verumtamen Moralem disciplinam, quam nos, quales demum cumque simus, in hanc lucem afferimus, quis pati possit tam acerbè accipi, & velut inter ipsas litterarum quibus

quiliâs amandari? Siccine morum ac vivendi magistra turpiter jacebit, aut etiam iis locum cedit disputationibus, quæ inani cogitatione verbisque futilibus circumscribuntur? Quid ita est de genere hominum male merita, ut cultores quære-
re precario debeat, neminemque unum inveniat, cujus ingenio & auctoritate sustentetur? Tibi se hodierna luce commendat, Princeps Eminentissi-
me, cujus tanti interest Moralia studia in Epi-
scopali ditioe florere, ut ipsa ditio sine illis nul-
la futura sit. Interim vero habe, quid nos pos-
simus: ac si nihil aliud, hoc tamen proba, quod
iter optimum ingressi sumus.

GRATIARUM ACTIO.

SOcrates, ut scribit Plato, in disputationibus
ita versari solebat, ut cuperet inferior po-
tius, quam superior discedere; quod ratione vi-
ctus, falsis opinionibus, si quas animo comprehen-
disset, liberaretur. Tanto hoc proposito exemplo,
nihil mehercule doleo, quod me toties in hoc
certamine ad absurda declinantem sapientia ve-
stra revocaveritis; nec turpe existimo ab iis vin-
ti, qui pro eorum commodis pugnant, qui vin-
tuntur. Et me igitur victum a vobis fateor, &
id ipsum ingenti beneficio obstrictum: quæ
simplex atque ingenua debitionis confessio non so-
lum ad referendam gratiam, sed etiam ad ineun-
dam aliquo modo valere debet. Nisi forte ii vo-
bis grati videntur, qui confecta demum pugna,
Musas excitant, quæ sibi epinicia canant, & ab-
cunctes tamquam ad coronam comitentur. Nos si
quas

quas agere aut habere grates possumus, primum agimus & habemus, quod non infra dignitatem vestram putaveritis nobiscum manus conferere; deinde quod victos profligatosque in fidem tutelamque vestram acceperitis, seu potius jam acceptos retinueritis.

DISPUTATIO XVII.

Ad S. Scripturam.

PROOEMIUM.

Publicæ disputationes ad veritatem detegendam primum inventæ, nescio qua Dialecticæ artis depravatione superioribus annis degenerarunt, & a rerum dignitate ad verborum pugnas & contentiones adductæ sunt. Cum enim olim qui tamquam studiorum exactores advocabantur, plures subinde difficultates proponerent, nullaque verecundia impedirentur, quin una soluta, ad aliam transirent, gravissimum fiebat ingeniorum experimentum; totique coronæ, absoluto certamine, apparebat, non quanta subtilitate ac volubilitate verborum esset, qui responderet, sed quanta ejus scientiæ intelligentia, de qua sibi respondendum proposuisset. Verum posteritatis levitate factum est, ut non videatur ex dignitate ejus qui interrogat, a prima difficultate discedere; & inanibus verbis ac sophismatis rem ducere præstet, quam alio confugere, & novo argumento adversarium tentare. Sed concedamus hoc scholasticis exerci-

tationibus, in quibus nihil fere nisi acuminis gloriola quæritur: dominantur ibi vulgaria formularum monstra, perterrefaciendis adolescentibus inventa: esto in eo campo victor ac triumphator, qui quod semel proposuit, ad finem usque velitando sustinuit; & multiplici verborum conformatione idem dicere sexagies potuit. Aliud quidam nobis in S. Scripturæ studio institutum est; totaque hujusmodi exercitatio in eo consistit, ut ejus sensa quam optime & quam planissime explicentur, multisque similibus allatis confirmentur. Ceterum nihil laboramus, utrum argumenta dialectico artificio contorta sint; utrum loco uno nostra cum sententia conciliato, alius omnino novus & a primo diversus afferatur; utrum difficultates difficultatibus colligatæ sint, & alteram altera tamquam filia parentem excipiat. Unum illud fatemur deesse nobis, quod ab ingenio proficiscitur; quod quidem si rei propositæ responderet, nimium beati nobis videremur, nec tot laboribus ac vigiliis florentissimam ætatem frangeremus. Quod si in hac virium infirmitate plus justo audere videmur, reputate, non nos quidem de nobis judicare, sed ejus parere judicio, qui rerum nostrarum arbiter divino consilio constitutus, non studia modo universa, sed singulorum contentiones pro sua prudentia & auctoritate moderatur.

GRATIARUM ACTIO.

TRia sunt, quæ beneficium ornant & amplificanc, is qui dat, id quod datur, &

DISPUTATIONES. 537

is qui accipit; quæ singula magnam mihi injiciunt agendarum gratiarum difficultatem. Nam, ut ab ultimo incipiam, is ego sum, in quo nulla erat promerendi causa; id vero accipi, quo uno ad famam & exultationem nihil est majus, hoc est præstantissimorum virorum præsentiam, &, nisi me amor fallit, favorem quoque. Verumtamen qui beneficium concutere, non valde me sollicitum habent; quippe etsi plurimum mereantur, nihil tamen solent pro sua benignitate postulare. Juvat ergo a vobis beneficium accipere, Viri ornatissimi, qui præter debitionis professionem nihil insuper requiritis. Hoc vobis gloriosum est, tantoque gloriosius, quanto pauciores sunt, qui gratis hoc tempore benefaciant. De te vero tibi que quid dicam, Præful Illustrissime, cujus præsentia & judicio tantopere lætantur Musæ nostræ? Unum illud verissime dicam, quod multarum laudum instar erit, effecisse te sapientia & humanitate, ut ille ipse rebus nostris adesse videretur Princeps Eminentissimus, qui unice optari potest ac debet.

DISPUTATIO XVIII.

Ad Philosophiam.

P R O O E M I U M.

Qui de valetudine scribunt, ii fere studiorum ac litterarum osores, nos tamquam male sanos accusant, quod diebus ferventissimis non so-

L I S.

lum

lum non celsamus, sed etiam operam laboremque intendamus. Videlicet non intelligunt, nostras has exercitationes adeo nihil incommodi habere, nihilque molestiæ, ut & a Latinis ludi, & a Græcis σχολαί, hoc est otia, sint appellatæ. Quod enim incommodum esse potest in tecto conclusoque loco, & ad solem arcendum præclare comparato cum lectissimis viris sedere, de rebus pulcherrimis conferre sermones; ingeniosas disputationes audire, modo Poetæ optimi, modo Oratoris, modo Philosophi cogitata percipere, sine ulla denique aut certe sine magna corporis contentione insitum a natura discendi desiderium suavissime explere? Numquid, ni ita esset, tam multa ingenia, tamque præclara minimam quamque invitationem acciperent, tanto silentio ac favore adessent, ne ipsum quidem interrogandi, monendique officium recusarent? Vobis enimvero injuriam faciunt, nobilissimi Auditores, qui nostrum hoc consilium damnant talibus suffragiis probatum: nisi quod qui ita loquuntur, sibi ipsis potius injurii sunt, quod ostendant, non modo se litteratos non esse, sed omnino quæ sit litterarum ratio ac natura, qui locus ac tempus, ignorare. Quamquam mihi quidem nihil aliud quærendum est, quam quid jubeat Princeps Eminentissimus, cujus auspicio studia nostra reguntur: neque enim aut ille jubere potest, nisi opportuna, aut nos incommodum reputare debemus, quod ipse nobiscum patientia tam insigni suscipiat. Illud unum hodierna exercitatione molestum fore video, quod ab hac ingenioli mei infirmitate manabit: sed tamen siquam vim ac signi-

DISPUTATIONES. 539

gnificationem habet, quod vulgo fertur, nihil ita esse in provincia philosophica monstrosum, ut omni prorsus auctore careat, videor mihi in campo tam lato posse aliquid, si minus probandum, at certe ferendum.

GRATIARUM ACTIO.

SI ego nunc vestris ornatus beneficiis gratias agere velim, hæc ipsa beneficia non satis cognoscere videar; aut mihi plus assumere, quam vel ætas, vel ingenium, vel exiguus hic dicendi usus pati possit. Silere autem me neque loci consuetudo finit, neque mehercule si sineret, ipse mihi tantæ debitionis conscius quiescere possem, & sine ulla mei in vos studii atque observantiæ significatione discedere. Ergo quam benevolentiam in ipso certamine adhibuistis, sola voluntate nisuque contenti, eam nunc quoque suscipientes, satis habete, me omnem prorsus gratiæ referendæ rationem persequi, quamvis pro mearum virtutum infirmitate nullam assequar. Id ego te in primis oro atque obsecro, Princeps Eminentissime, cujus beneficia cum plurimi faciam, doleo vel maxime nullam mihi esse facultatem, qua tibi voluntatem hanc meam aut privatim probare possim, aut in hac publica luce patefacere. Frue virtute tua, quæ ipsa per se magno viro debet esse satis: ego enim, quod unum valeo, tam excellentis ornamenta animi perpetua cogitatione complectar, officio colam, prædicatione amplificabo.

DIS-

DISPUTATIO XIX.

Ad quamlibet disciplinam.

P R O O E M I U M.

Siquando nova potuit publicæ exercitationis species in palæstram litterariam afferri, nunc certe necesse est: tum quia veteres nimio vulgaræ usu, & interdum etiam dolo scædatæ pristinam dignitatem aliquo modo amiserunt, tum quia tanta est eorum hominum copia, qui sui periculum in hac luce facere cupiunt, ut nisi plures uno die producantur, quotidie civitatem commovere oporteat, & a ceteris occupationibus abducere. Ergo dimicationem illam, in qua unus versari solebat, duce aliquo ejus ingenium vocemque regente, nunc tres subimus, sed partem singuli suam, lateribus plane nudis, sine Magistri præsidio, ac sine illa confidentia opis, quæ alios munire consuevit, & adversus tela omnia, undecumque mitterentur, confirmare. Neque vero tantum audemus, ut credamus posse nos viris præstantissimis cum laude resistere; verumtamen hac ratione declarandum publice fuit, nihil minus propositum fuisse nobis, quam ut nova hac disputandi forma difficultatem & periculum defugeremus. Nunc vero quis ita in nos iniquo animo erit, ut cum videat in hac acie adolescentem nulla renixum, nisi suo qualicumque ingenio, non faveat humaniter, modicisque contentus bona cum gratia

DISPUTATIONES. 541

tia dimittat? Id quidem ab omnibus, sed a te in primis speramus, Princeps Eminentissime, qui ut nos viresque nostras perquam exiguas optime nosti, ita aliud nihil postulas, nisi ut satis animorum sit ad res difficillimas suscipiendas,

GRATIARUM ACTIO.

SI, quod Aristoteles ait in secundo Rhetoricorum libro, verecundum est sæpius beneficium ab eodem accipere, quanta nos obrui verecundia debebimus, qui vos tam sæpe legis nostris obtundimus, & rerum minimarum iudices constituimus? Enimvero si perturbatio hæc, quam etiam virtutem nonnulli putarunt, laudabilis in juvene est, habemus abunde, de quo nobis ipsi gratulemur: sin autem ne ipsa quidem, quod ex vitio oriatur, culpa caret, videtis quo loco simus. Sed nimis hæc philosophice: valeat Aristoteles; potiusque nos officiorum magistro Ciceroni tradamus, qui animi esse ingenui putat, *cui multum debeas, ei plurimum velle debere*. Quo plura in nos confertis, ad Famil. i. 2. ep. 6. eo plura expectamus: nimirum quod ipsi vos beneficia vestra ornare debeatis, nec aliter ornari possint, quam si novis beneficiis cumulentur. Hoc vero tu ne monendus quidem es, Princeps Eminentissime, nisi quod, ut Ovidianis versiculis utar,

Qui monet ut facias, quod jam facis, ille monendo Trist. 5. el. 14.

Laudat, & hortatu comprobat acta suo.

DIS.

DISPUTATIO XX.

Ad quamlibet Disciplinam.

P R O O E M I U M.

OMnes fere, qui in arenam descendunt adolescentes, suarum virium periculum publice facturi carmen illud obsoletissimum præfari solent, magno se timore percelli, nec ultro accedere, nec satis pro negotii gravitate paratos. Quæ omnia quamvis ex usu dicant, non quod ita sentiant, attamen reipsa sæpe probant, vera esse, quæ dixerint; & in magnam invidiam magistros adducunt, quod Icaris istis alas adjecerint; eosque, nondum satis firme repentes, volare coegerint, ut, multis impune ridentibus, deciderent. Itaque ego non diffiteor, periculum hoc, quantumcumque est, quod sentio quam sit grave, hoc, inquam, periculum totum me suscepisse sponte mea, alacriter, promte, animose suscepisse: quod non credo tamen ab ullo reprehendi posse, nisi ab eo, qui putet, ætatem hanc laudis stimulo carere oportere, tamdiuque in umbra delitescere, donec annis extrusa, quemadmodum Porcio Latroni contigisse ferunt, solis novitate hallucinetur. Aio etiam, me tantum mihi præcipisse temporis, quantum ad rem difficillimam comparandam satis esse duxi; nihilque omisisse diligentia, nihil laboris, aut studii, quod publica experimenti ratio postulare videretur. Quod non ita a vobis accipi debet,

Quintil.
l. 10.
c. 5.

bet, ut mihi egregium aliquid præstandum sit, cum de industria polliceri possim, de ingenio non possim. Fere autem contingit, ut in hujusmodi certaminibus plus multo natura valeat, quam diligentia; quia plerique non tam sæpe animadvertunt, quid dicatur, quam quo spiritu ac voce dicatur. Verum quemcumque tandem exitum habitura res sit, ea me primum cogitatione consolabor, quod mihi ipse non defuerim; deinde quod eorum me iudicio commiserim, qui res æstimare prudentissime solent. Noli, Princeps Eminentissime, tantam hanc adolescentis fiduciam condemnare: nam cum mihi potissimum ob ea, quæ dixi, necessaria est, tum omnibus nostris turpe existimo, quippiam timere, te patrono. Hac ego fretus publicum disputandi periculum subeo, non valde reputans, quibus viribus, quoque ingenio, sed tantum quibus auspiciis subeam.

GRATIARUM ACTIO.

SI quam magno cœpi animo, tam etiam magno persequi cœpta potuissem, jam non ego vobis gratias agerem, sed vos mihi potius pro vestro in bonas artes ac litteras studio aliquam gratiam haberetis. Non enim dubito, quin libenter audiat quidquid in hac urbe vestra ad juventutis eruditionem institutum est, quoties iudicetis, non fucum vobis fieri, non scruta venditari, non picas produci. At cum in ipsa acie multo mihi majus periculum fuerit, quam procul aspicienti ante tubas appareret, sentio me vobis ingenti beneficio obstrictum, quod leviter
bla-

blaterantem in re gravissima æquo animo tuleritis, nec silentium modo, sed favorem quoque ore nutuque vestro præbueritis. Scilicet hæc summa nostri hujus cæli ac soli felicitas est, ubi homines ad humanitatem facti, litterarias omnes exercitationes boni consulunt, nihil ab ullo requirentes, præter conatum & voluntatem; ut non solum in primis subsellis, sed etiam in secundis, ac tertiis, qui ordo est rerum omnium, aliqui sedeant. Tibi vero, Princeps Eminentissime, si me excussem, profecto videar imponere voluisse, quasi vero non tuos noris; minimeque scias, quantum quisque nostrum in iis disciplinis, ad quas tuo se judicio contulit, præstare possit.

DISPUTATIO XXI.

Ad quamlibet Discipulinam.

PROŒMIUM.

Si quod est ab ingenua timoris professione præsidium, id certe nobis debet esse paratum, qui hac in re omnino fingere nequivimus, callidoque verborum artificio animi securitatem obtegere. Nihil de schola dico, quæ, utcumque malevoli criminantur, certe postrema non est: at nos qui sumus, bone Deus, ut cum lucem hanc aspiciamus, non valde timeamus? Putatisne fieri posse, ut tam notæ infirmitatis adolescens in hoc ingenii sui judicio cristas tollat, fidentiam ostendet, sibi blandiatur? Attamen personam hanc ipsi
no.

DISPUTATIONES. 545

nobis imponunt principum scholarum proceres, qui præteritis diebus ex hoc loco disputantes, cum se in omnem timoris humilitatem abjecerint, aut abjectos significaverint, illud est reliquum, ut nos tenuissimi homines audere incipiamus, & in locum ab illis desertum commigremus. Adsumus igitur animorum fiduciaque pleni: abeant veteres illæ querelæ de nimia gravitate loci, de rerum difficultate, de judicum supercilio; nihil de temporis angustia doleamus, nihil de virium tenuitate; nulla sit ne minima quidem timoris significatio; sileatur indecorum illud ac frigidum verbum, metuo. Viri sumus. Vos facite, Auditores, pro vestra humanitate, ut alii, qui deinceps accedent, exemplo nostro spiritus sumant, majorique alacritate mandata vestra capeffant.

GRATIARUM ACTIO.

Ultimus hic labor est; quin munera, Gratia, fundis?

Ut laudetur opus, si pote, claude bene.

Tum Dea trina mihi: Quid numina nostra fatigas?

O bone, verborum desine, munus erit.

F I N I S.

INDEX

RERUM ET VERBORUM.

A

A Bgari litteræ.	pag. 160
<i>Abrior</i> minus recte adhiberi solet.	435
<i>Abrior</i> quid significet.	435. Vox dubia. <i>ibid.</i>
<i>Academici</i> toti in disputando.	246
Actio Oratoria.	398. & seqq.
<i>Admodum</i> perperam adhibetur pro <i>valde</i> .	432
Adolescentes nobiles non tam multum, quam multa discere debent.	86
Adriani Imperatoris dictum.	298
Adventus Christi. De ejus anno opiniones.	158
Ægyptii sorores sibi matrimonio copulabant.	133
Ælopi Apologi.	172
Ætates linguæ Latinæ.	27. & seqq.
Alexandri Severi Imp. patientia.	502
Alvarus.	7. 9. 10. 17
<i>Anno</i> ad multos ordines verborum pertinere potest.	9
Anna Angliæ Regina.	222
Annales Pontificum.	152
Antalcidæ dictum.	440
Antonius Orator num aliquid scriptum reliquerit.	433
Arcades ante lunam orti.	9
Archelaus jus a natura abdicat.	133
Ἀντινείμην quid significet.	410. & seqq.
Ἀντίσοφον quid.	411
Aristoteles non omnia præstare debet, quæ scribunt Aristotelici. 308. & seq. Ab eo recentium Philoso- phorum doctrina manat. 304. & seqq. De ejus ob- scuritate. 521. Stagiritæ a quibusdam dicitur ad contemptum. 277. convicia in eum jaciuntur. 288.	Argu-

INDEX RERUM ET VERBORUM. 547

argumentandi locos primus invenit.	447.	eius principia	philosophica. 81.	Ejus dictum.	541
Ars cogitandi num Logica sit.	244.	& seqq.			
Artoptæ quid sibi velit.	421.	& seqq.			
Afinii Pollionis de Livio iudicium.	436				
Astrologia & Astronomia quomodo differant.	194				
Astrologiæ nomen perperam circulatorum ad suas technas trahunt.	525				
Attilæ edicta contra Latinitatem.	273				
Aurelianensis Dux.	331				
D. Augustinus.	382				

B

Barbadicus Gregorius Card.	206. 210. 228. 443. 449				
D. Basilii de Poetis iudicium.	180				
Bellum non impedit studia litterarum.	274				
Bembus Petrus.	408.	& seqq.			
Benedictus XIII.	338. 340				
Beneficia unde dignitatem accipiant.	536	& seqq.			
Bibliopolæ alia ac viri docti debet esse scientia.	56				
Bosluetus.	351				
Brevitatis laus.	184.	& seqq.			

C

Caccia Jo. Maria Episc.	355. 356				
Caligulæ pugna adversus conchas.	533				
Callimachi dictum.	46				
Cæsar cur interfectus.	297				
Canalis Hieronymus.	326				
Capellus Leopoldus Abbas S. Georgii.	361				
Caragianus Nicolaus.	360				
Carneades Roma eiectus. 67. quomodo bilis impetum temperaverit.	156.	eius dictum.	12		
Carolus VI. Rom. Imperator.	223. 335				
Casibus nomina unde indita.	10				
Catechismus.	524				
Censor graviter delinquit etiam in minimis.	164				
Chronologia historiæ scopulus.	158				
Chymica mysteria e S. libris petita.	139				
	M m 2				
	Cice-				

548 INDEX RERUM

Cicero solœcismis non caret. <u>7.</u> Procemiorum volumen habuit. <u>329.</u> Ejus locus nunc primum explicatus. <u>433.</u> Cur Jurisprudentiæ studia contemnat. <u>1:7</u> Ejus dictum de beneficiis. <u>541</u>
Cilices furta probarunt. <u>133</u>
Clemens XI. <u>290</u>
<i>Clonarius</i> , vox Scioppij. <u>11</u>
Clericus idem ac litteratus. <u>273</u>
Condonare multa oportet. <u>500. & seqq.</u>
Consuetudo verborum domina. <u>8</u>
Cornelii Cardinalis funebris laudatio. <u>240.</u> Vita. <u>215</u>
Cornelius Joannes Dux Venet. <u>207. 217</u>
Corneliorum gens Poetis favit. <u>183</u>
Corrarius Patriarcha Venet. <u>218</u>
Craigij Joannis Theologiæ principia Mathematica. <u>197</u>
Criticorum regulæ. <u>159.</u> Prima minus certa. <u>160. & seqq.</u>
Criticum studium periculofum. <u>155.</u> Quam multa requirat. <i>ibid.</i> <u>156. & seqq.</u> Laudandum. <u>277. & seqq.</u>
Criticus non debet esse injuriosus. <u>280</u>
Curæ hominum ridendæ. <u>436</u>
Curio. Judicium de ejus eloquentia. <u>63</u>

D

Democriti atomi. <u>68.</u> variz de ejus vita, & morte opiniones. <u>458</u>
Demosthenes octies Thucydidis historias descripsit. <u>14.</u> ejus ad studia litterarum vigilantia. <u>481</u>
Deponentia verba non probantur omnibus. <u>63. 64</u>
<i>Διάγνωσις</i> Medicorum. <u>314. & seqq.</u>
Dialectica in quo conveniat cum Rhetorica. <u>232. & seqq.</u> In quo differat. <u>63. 255. & seqq.</u> Hoc proprium est artis nomen, & quid significet. <u>245.</u> Alia docens, alia utens. <u>254. & seqq.</u>
Dialectica studia adolescentibus molesta. <u>82. 83.</u> Conveniunt cum studiis Grammaticis. <u>518</u>
Dialecticus quis. <u>64</u>
Dicæarchi liber. <u>152</u>

Dice-

Dicere recte facilius, quam facere.	88
Diogenes Cynicus. 170. Deos accusat.	507
Disputationum publicarum vitia.	535. & seq.
Divinandi ars a quibus culta.	518
Divitias qui contemnit, major, quam qui habet.	227
Domitilla Flavii Clementis uxor.	416
Duodecim tabulæ toti præstant Philosophiæ.	137

E

Elocutio Rhetoricæ propria.	72. & seq.
Eloquentia tribus disciplinis constat. 205. Ejus partes quot. 61. Quænam potissima. 62. Quænam difficillima. ibid. Oratores facit. 64. 65. Convenit cum Dialectica.	212. & seqq.
Epicurus cur Poetis infensus. 179. Ejus Philosophia.	180
Episcopi quidam scribendi artem ignorarunt.	273
Equestris sermo.	406
Eruditionis debet esse modus.	49
Eruditio quid.	98. 99
Ethnicorum Dii pro cuiusque libidine confecti.	503
Exemplum argumentatio quo tendat.	261
Exercitatio dicendi alia, alia contemplandi.	91

F

Fabellæ de adolescente somno dedito.	495
Fabularum usus.	172. & seq.
Fabulæ suavius capiunt, quam nuda præcepta. 173. & seqq. Docent sine periculo. 176. Fallaciæ excusationes & effugia.	468
Felicitas vera in quo posita sit. 506. Improborum neque vera, neque diuturna.	505
Fernelii laus.	199
Ferrarii Octavii <i>κοινισμός</i> ex pultorum librorum lectione. 51. 52. Ejus opinio castigata.	422
Ficus cujus generis & declinationis.	10
Figuræ & schemata verborum unde sint. 8. 453.	
Fluida in corpore humano quam difficile judicentur.	

Forma Peripatetica num sit substantia. [307.](#) & seq.

G

- G**Eometricæ figuræ ad speciem adhibitæ. [208](#)
 Gerundia quibus probentur, & improbentur. [10](#)
 Gestus Oratoris qualis esse debeat. [401](#)
 Gorgias Leontinus, & alii Sophistæ quo spectarent dicendo. [67](#)
 Gothi & Langobardi etiam extra patriam suas leges tenere voluerunt. [144](#)
 Gothi litterarum studia damnarunt. [273](#)
 Grammaticus sermo qualis sit. [7. 13. 453](#)
 Græcæ linguæ dignitas, & utilitas. [444.](#) & seqq.
 Gravina Vincentius. [300](#)
 Guarini Veronensis rudimenta. [54](#)
 Gymnasium Patavinum. [224](#)

H

- H**Ebraicæ linguæ præstantia. [125.](#) & seqq. Ejus ad-
 discendæ facilitas. [ibid.](#) & seq. Ejus usus & neces-
 sitas. [120.](#) & seqq.
 Heraclitus. [454.](#) & seq.
 D. Hieronymus. [114](#)
 Historicum studium ad omnes pertinet. [149.](#) & seqq.
 Non tamen Criticum. [ibid.](#)
 Historicorum veterum vitia quædam. [157](#)
 Historia apud omnes nationes culta. [152.](#) Ejus ad di-
 sciplinas comparandas utilitas. [153.](#) & seq.
 Historiæ sacræ studium quam difficile. [158](#)
 Homerus in quo laudatus. [178.](#) Cur ab aliquibus re-
 prehensus. [84.](#) Præsertim a Seneca. [178.](#) Cur a Pla-
 tonis rep. expulsus. [179](#)
 Horatii locus explicatus. [409](#)
 Humanitatis nomen ad Rhetorica elementa transla-
 tum. [44. 58](#)

I

- I**Gnava adolescentia nihil turpius. [489.](#) & seqq.
 Ignaviæ commoda. [491](#)
 Igna-

ET VERBORUM. 551

Ignavus adolescens describitur.	493. & seqq.
Imitari quid sit.	56
Imperandi incommoda.	460. & seq.
Imperatoribus Romanis non est collata regia auctoritas.	296. & seq.
	100. & seq.
Impersonalia verba.	10
Innocentius XIII.	209
Inductio argumentatio Dialectica.	260. & seq.
Inscriptio antiqua L. Scipionis.	22. Tullii.
	23
Jocandi ratio arte non comparatur.	28
Joannellus Cajetanus Episc.	351
Joannellus Benedictus S. Palatii Magister.	354
Isocrates.	45. 66
Judicia secundum leges patrias ferenda.	142. & seqq.
Jugurthæ responsio ad Salustianam Micipsæ Orationem.	463
Jurisprudentia unde orta.	134. Romanorum propria.
ibid. Ejus studium Clericis convenit.	530
Jus utrum in natura, an in opinione hominum positum sit.	133
Juvenalis locus explicatus.	421
Juvenes non sunt apti ad res philosophicas.	68. & seq.
Ne ad morales quidem.	176

L

Lacedæmoniorum mos in colligendis Senatorum sententiis.	109
Latina lingua toto orbe diffusa non comparatur ex Grammaticorum libris.	1. Ejus præstantia.
	13. Ejus necessitas.
	442. Ejus ortus, interitus, & instauratio.
	19. & seqq.
Latini Scriptores in suas ætates distributi.	27. & seqq.
Latinitas non ex singulis particulis, sed ex toto genere judicanda.	414. Quid senserit hac de re Muretus.
	419
Latinae jurandi formulæ in Græcis fabulis recte adhibita.	405

552 INDEX RERUM

Latinus sermo certis legibus comprehendi non potest.	
7. & seq. Ejus laus.	442
Lectio præceptis parum iuvat.	55. 56
Leges variae pro vario hominum ingenio.	135
Leges Græcorum pugnant inter se.	26
Leges XII. Tabularum.	21. 137
Leges Romanæ ad omnem civilis administrationis formam documenta suppeditant.	138. Iisdem operanda, sed suis vivendum.
	133. & seqq.
Lex Regia.	294. & seqq.
Lex Romuli.	20
Lex prima Tribunicia.	21
Lexica non omnia continent, quæ ad linguarum studium requiruntur.	120. 121
Libri quomodo legendi.	96
Librorum tituli.	283
Librorum multitudo.	46. & seqq.
Liber magnus magno malo similis.	46
Licinius Imperator litteris infestus.	476
Linguarum veterum studium necessarium.	120. 123
Lingua vernacula explicandæ disciplinæ sunt.	117
Lingua Italica labore comparanda.	290
Lipsii iudicium de Bembo.	54
Litterati non debent latere.	481. Eorum mores.
& seqq.	475.
Litteræ artesque nunc valde auctæ.	289. & seqq.
Livio obiecta Paravinitas, & quid ea sit.	436. & seqq.
Locare quid revera significet.	426
Logicæ nomen.	235. & 245. Probationes ab ea petendæ.
236. Ejus cum Rhetorica conjunctio.	237. & seqq.
Discrimen.	254. & seqq.
Sola cogitandi arte non continetur.	245. Quomodo a Cicerone definita.
ibid. Tota est ab Aristotele.	306
Lucina Latinis eadem atque Ilithyia Græcis.	405. & seqq.
Ludovicus XIV. Galliarum Rex.	221
Lux num sit corpus.	309
Lycurgi duo.	150

M

- M**agna de parvis, parva de magnis facere, cujus facultatis sit. 66
- Massagetæ promiscuas uxores habuere. 133
- Mathematica studia Clericis non interdenda. 189. & seqq. Philosopho necessaria. 190. & seqq. Eorum certa cognitio. 193. & seqq. Sacrarum rerum studiosis opportuna. 195. & seqq. Interdum nimia. 195. & seqq.
- Manilii locus explicatus. 262
- Martialis locus explicatus. 406
- Maria Virgo. 383
- Manus quam partem habeant in actione Oratoria. 402
- Materia Peripatetica quomodo principium Physicum sit. 307
- Medica judicia. 313. & seqq.
- Medici perperam se Physicos dicunt. 317
- Medicus non debet esse Mathematicus. 199. & seqq.
- Medicorum calliditas. 314. 318
- Mehercule*, particula quomodo adhibenda. 404. & seqq.
- Memoria thesaurus a Tullio dicta. 47
- Menenii Agrippæ fabula ad plebem conciliandam. 172
- Metaphysica tota Aristotelis est. 310. & seqq.
- Minerva Sanctiana. 10
- Moralis institutio magis a Poetis, quam Philosophis petenda. 166. & seqq.
- Moralis Theologia. 527
- Mors improvisa non semper est infortunium. 229
- Mosaici libri non sunt fontes rerum omnium. 139. Antiquissimi omnium. 153
- Multitudo etiam rerum optimarum nocet. 49
- Muretus quantum licere putet latine scribenti. 419
- Musellus Franciscus Archipresbyter. 363

N

- N**avis emuncta homo, num recte dicatur. 409
- Navigaciones insignes. 291
- M m 5
- Nepos

554 INDEX RERUM

- Nepos* quam cognationem designet. [413.](#) & seqq. cur de prodigiis dicatur. [419](#)
 Neutra verba qui non admittant. [11](#)
Nota pro adnotatione vox latina non est. [427](#)
 Numerus Orationis ad aurium sensum judicandus. [15.](#) & [16.](#)

O

- O**bedientia imperio digna. [440.](#) & seqq.
 Oculi quam partem habeant in actione Oratoria. [402.](#)
 Orator quomodo differat a Dialectico. [63.](#) [64](#)
 Oratores Attici, Asiatici, Laconici. [65](#)
 Oratori necessaria Geometriæ cognitio. [201](#)
 Otium adolescentibus fugiendum. [474.](#) & seqq.
 Otthobonus Petrus Card. [341](#)
 Ovidii locus illustratus. [414](#)

P

- P**aradoxa Philosophorum. [178](#)
 Patavinis objecta severitas. [437.](#) De eorum studio erga Pompejum. [ibid.](#)
 Patavium litteræ artesque confluxere. [289](#)
 D. Paulus Poetarum dictis utitur. [180](#)
 Paupertas ad litteras impedimentum. [477.](#) & seqq.
 Pedes quam partem habeant in actione Oratoria. [403](#)
 Peripatetici ubique Aristotelem obtrudunt. [86](#)
 Persæ filias in matrimonium ducebant. [133](#)
 Petrus [11.](#) Lusit. Rex. [116](#)
 Petrarcha. [26.](#) [58](#)
 Perspicuitas prima Oratoris virtus. [47](#)
 Philippus V. Hispaniarum Rex. [332](#)
 Πρώτης Medicorum. [317.](#) & seqq.
 Philosophia trifariam divisa. [304.](#) & seqq.
 Phædri Fabulæ. [173](#)
 Philo-

Philosophia quo tempore fuerit a Rhetorica distincta.

78. Cur aliquando contempta, 93. in tres partes divisa. 302. & seqq.

Philosophia historica adolescentibus tradenda, 80. & seqq. Juvat ad Poetarum interpretationem. 84.

Quibus præsertim addiscenda. 85. 86. 92. 93

Philosophorum principia. 82

Philosophorum veterum habitus, & deliramenta. 169 & seq.

Philosophorum recentium dogmata a Græcis derivantur. 305. & seqq.

Philostrati locus dubius quomodo legendus. 416. & seq.

Pisanus Aloysius Venet. Dux. 218. & seqq. 343. 345. 347.

Pisanus Hermolaus. 227. 344. 348

Pisanus Carolus. 225

Pisanus Andreas. 348

Pistores quandiu Roma absuerint. 423

Plancus Janus. 386

Plato cur Poetis infestus. 162. Ejus idem. 89. Ejus iudicium de Mathematica. 191

Plauti *supposita* latini hominis sunt. 415. Eorum ultima scena Plauto ipsi adjudicanda. 16. Plauti locus explicatus. 405

Plinii locus explicatus. 423

Plinii de copia librorum iudicium. 57

Poesis initia. 68. Scientiarum parens. ibid. Quomodo a Philosophia sejuncta. 169. Ejus suavia monita. 171. In fallendo posita. 465

Poetarum lectio adolescentibus commendata. 180

Polyanthea. 50

Polyglotta. 514

Polycleti canon. 12

Populo imponere facile est. 465

Populi nomen quos comprehendat. 467

Populus Rom. libertatis præter modum cupidus. 295

Præjudicia multa in Philosophia unde. 88. 89

Præterita verbis in Or non omnes tribuunt. 11

Prin-

556 INDEX RERUM

Principum virorum vita misera.	440
Priscianus castigatus a Valla.	10
Prudentes Romæ quinam dicti.	36
Pueri quamprimum ad classicum Scriptorem ducendi.	
5. Nimia præceptorum copia obruuntur.	6. Plus
memoria, quam ingenio valent.	47. Pejora, & ma-
gis colorata probant. ibid. Fabulas sequuntur.	168
Pythagoræ monas.	90. Ejus dictum.
182. Quos au-	
ditores admitteret. 191. Sophista dictus.	240

Q

Q	Uæstiones inanes.	81. 192. 248. Obsolete.	123.
	Recentium Summistarum.		247
Q	uintiliani locus explicatus & illustratus.	415. Ejus	
	ætas, doctrina, fortunæ. ibid. Ejus querela de ni-		
	mia sermonis latini religione,		419
Q	uirinus Cardinalis.		361

R

R	eprehendere jucundum est, sed minus tutum.	459.
	& seq.	
R	henus quid significet apud Persium.	424
R	hetoris cura præcipua.	60. & seqq.
R	hetoricæ termini.	63. Ejus differentia a Dialectica.
	64. 255. & seqq.	
R	hetorica propago Civilis scientiæ.	256
R	oma omnes reipub. formas experta est.	138
R	omani minus, quam Græci, contentiosi.	279. Regi-
	um nomen in primis odere.	296. & seq.
R	uzzinus Carolus Venet, Dux,	225

S

S	andius.	10
	Scaliger.	12. 13
	Scho-	

ET VERBORUM. 557

Scholastica Philosophandi ratio .	192
Schwartius Conradus .	433
Scioppius impersonalia non admittit . 10. Varia de eo judicia . 11. Alios reprehendit .	13
Scripturæ Sacræ sensus e veterum linguarum studio eruendus . 113. & seq. Magna ejusdem cum Theo- logia affinitas .	113
Scripturæ Vulgatæ laus .	516
Seminarium Patavinum .	213. 443. 449
Seneca non sibi sapuit . 177. & seq. Homero dicam im- pingit . 178. Superos accusat . 506. Mathematicis studiis infensus . 197. Item Logicis . 247. Ditissimus cum esset, paupertatem laudabat .	477. & seq.
Septuaginta Interpretum Biblia .	118. 119
<i>Septuplum</i> in Vulgata explicari nequit sine Arabo in- terprete .	121
Severitas defenditur .	502.
Simulatio quid boni habeat .	468
Socratici quomodo viverent .	100
Socratis dictum de publicis disputationibus .	534
Solida in corpore humano quam difficile judicentur .	316
Solæcismus accusatus . 450. Defensus .	452
Solon Sophista dictus .	240
Solonis νόμοι .	135
Sophistæ veteres in honore habiti . 240. Ex quo invi- dia laborarint .	ibid.
Stilus cuique proprius .	330
Stilus cujusmodi esse debeat . 51. Diversus pro cuiusq. natura .	65
Stoici arcana festinantur . 247. Captiones amant . ibid.	
Inopes in dicendo . 64. Eorum instituta cum Chri- stianis institutis consentiunt .	506
<i>Summulistæ</i>	246
Supina non probantur omnibus .	10
Sylla felix .	506
Syllogismus argumentatio Dialectica est .	260

T

T acitus quomodo historiae suae fidem quaerat.	417
ejus locus celebris.	161
Tarditas impugnata. 496. & seq. Propugnata.	499
Tassi Torquati de Casae Epigrammate judicium.	65
Thales Philosophiae inventor.	87
Theologia non potest carere historia. 154. Theologia Scholastica.	ibid. & 155
Theologus esse nequit uni sectae addictus. 108. Debet esse probus. 97. & seqq. Ejus peccata multis nocent.	96. 99
104. Incredulus censetur.	96. 99
Theophrasti affectatio reprehensa a muliercula.	438
Tiberii Imperatoris dictum.	298
Topica pertinent ad Dialecticos. 255. & seq. Cur ea Rhetores tractent.	257. & seq.
Tribonianus.	295. & 296
Transitionum formulae in Oratione.	427

V

V alla reprehensus a Petro Ramo. 10. Item a Ramirezio.	11
Varro analogiae exactor. 8. Porcus litterarum dictus a Palamone. 11. Antiquitatem affectavit.	13
Venetarum Legum laus.	144. 145
Verba barbara, vel minus latina.	69. & seq.
Verborum modi quot.	10
Verris Epistola, qua Ciceronem ab accusando deterret.	472
Vigilantia studiosis adolescentibus necessaria. 492. & seqq.	492. & seqq.
Vinnius Arnaldus difficultatem quaerit in jure.	529
Vita Philippi a Turre Episc.	391. & seqq.
Vox Oratoris qualis esse debeat.	400
Urbanitas quid.	98
Urbis commoda. 487. & seq. Ejusdem incommoda.	485. & seqq.
Vul-	

ET VERBORUM: 559

Vulgata S. Bibliorum Editio cur antelata latinis omni-
bus. 119. Per hanc aliarum linguarum Editionibus
detrahitur non est. 120. 121. 124. Ejus laus. 516

Z

Z Azzeri P. Magister.	358
Zeno Citticus omnia crimina paria facit.	142.
Quid ab eo Seneca sumserit.	247. 506
Zendrinus Bernardinus.	384
Zeno Eleates bilinguis dicitur. 239. Dialecticam quo- modo separet a Rhetorica.	244
Zeuxis qua arte pulcherrimam mulierem pinxerit.	87.
Ejus superbia.	485

FINIS.





